





1

COMMERCI EPISTOLARIS
VFFENBACHIANI
S E L E C T A

VARIIS OBSERVATIONIBVS

ILLVSTRAVIT

VITAM QVE



B. ZACH. CONR. AB VFFENBACH

CONTINVTAM PRAEMISIT

IO. GE. SCHELHORNIVS



PARS SECVNDA

VLMAE ET MEMMINGAE
APVD IOAN. FRIDER. GAVM
MDCCLIII.

32.6.C.1p.



VIRO MAGNIFICO
ATQVE
REVERENDISSIMO DOMINO
DOMINO
CHRISTOPH. MATTHAEO
PFAFFIO

SAC. CAES. PAL. COMITI, SERENISS.
WIRTEMBERG. DVCIS CONSILIARIO,
S. THEOL. DOCTORI ET PROFESSORI
PRIMARIO, VNIVERSITATIS TVBING.
CANCELLARIO, ECCLESIAE PRAEPOSITO,
ET ABBATI LAVREACENSI,

VIRO
NON MERITORVM MINVS IN REM
LITERARVM PVBLICAM GLORIA,
QVAM
GRAVISSIMORVM DIGNITATE MVNERVM
LONGE SPLENDIDISSIMO

THEOLOGORVM
SVEVIAE NOSTRAE PRINCIPI
QVEM B. VFFENBACHIVS
QVONDAM MAIOREM IN MODVM AMAVIT
ET COLVIT,

PATRONO SVO
MAXIMOPERE SVSPICIENDO,
VT SVMMVM, QVO IPSVM A LONGO
IAM TEMPORE PROSEQVITVR,
CVLTVM IN ORBIS ERVDITI CONSPECTV
TESTARETVR,

HVNC LIBELLVM,
IMO SE IPSVM CVM ARDENTISSIMO
OMNIS VERAE AC PERENNANTIS FELICITATIS
VOTO DICATVM CVPIT

CELEBRATISSIMI EIVS NOMINIS

VENERATOR PERPETVVS
IO. GEORG. SCHELHORNIVS
Pastor et Superintendens Memmingensis.



INDEX.

A.

Aestas an hiems studiis aptior.	395
Alberti Magni cellula et machina artificiosa Argentorati.	xxii
Alcoranus quanto pretio in Turcia vendatur.	380
Anatomici studii vtilitas.	xxiv
Andreae (Io. Valentinus) laudatur.	271
Anthologia graeca MS.	145. 149
Anti-Iesuitica quaedam scripta.	333
Architrenium, titulus poëmatis.	205
Arnoldi (Godofr.) <i>Kirchen- und Ketzer-Historie.</i>	xxxvii
Arpe (Petri Frid.) et Vffenbachii Epistolae.	437. sqq.

I N D E X.

B.

Bardili (Car.) ad Schickardum epistola.	418
Barthii (Caspar.) corona animae conuersae.	425
Barthii (Io. Henr.) et Vffenbachii Epistolae.	421
de Bary (Iac.) gazophylacium nummarium.	160. sqq.
Beuerlandi (Hadr.) otia philologica.	453
Biblia polyglotta occidentalia.	401. 404
Biblia vulgari lingua Iudaica.	152
Bibliotheca Regia Hungarica Matthiae Coruini.	8. LXXXIII
- - - Fuldenfis.	78
- - - Marckiana.	96
<i>Biuan</i> ge, <i>Beuanck</i> .	77
Bodini Dialogus.	62. sqq.
Bodleiana Bibliotheca.	181
van der Borch (Henr.)	28
de Bruyn (Corn.) Itinerarium.	164
Buddeus (D. Io. Franc.) laudatur.	xxxI. sqq.
Burcklinus (G. Chr.)	225

C.

Caniz (Lib. Baro de) laudatur.	Lv. sq.
<i>Carfreytag</i> , quare sic vocetur.	117
Catalogus Bibliothecae Bunauianae.	49
Catalogus Codicum Graecorum MSS. in Bibliotheca Boica.	100. sqq.
Cata-	

I N D E X.

Catalogus specialissimus librorum, variis collectionibus insertorum.	41. fqq.
Catalogi MSSorum Angliae, quam negliger confecti. 183. Animaduersiones in eos. 187. Additiones.	199
Claudiani Codex MS.	55
Codex vetustus Graecus fragmenta Epistolae ad Hebraeos continens.	40
Codex Epistolarum Paulinarum.	61. 64
Codices Hebraici Vffenbachiani.	57
Codices tres. 1. Bonifacii, qui Fuldae afferuntur.	85. fqq.
Codices vett. rhythmici.	130
Commercium litterarium.	111
Constantini M. nummus. 60. 64. Signum a Constantino in aere visum.	65
Constantini Porphyrogenneti Codex graecus cerimonialis. 2. de eius fati singularis obseruatio.	6. fqq.
Crab.	182
Crypta subterranea Fuldenfis.	91
Currus veliuolus.	LXXVI

D.

Dadichi (Carolus) Antiochenus. de ipso obseruatio.	421. 430. 432. fqq.
Danielis prophetae Liber visionum.	116. 126
ad Danzium (Io. Andr.) Epistolae.	54. 293
Dilichii (Wilh.) opus de re militari.	74
Diplomata Fuldensia.	80

I N D E X

E.

Ehingeri Catalogus Bibliothecae Augustanae,	44
Emblemata singulis Bibliothecae suae voluminibus ab Vffenbachio interius agglutinata. —	275. fqq.
Enemannus (Mich.)	379. 383. 386. 392
Erfurtenſe Chronicon.	82

F.

Fabricii (I. Alb.) Bibliographia antiquaria.	157. 165. 170
- - - - - et Vffenbachii epistolae.	1. fqq.
Fabricii quidam.	54
Faleſii (Franc.) a Burgundia opus MS.	53
Flacianus Cultellus.	282. fqq.
Flacius a furti librarii crimine vindicatus.	284 fqq.
Forſtneri Ephemerides hiſtorico-politicae MSS.	57
Fuldensia memorabilia ab Vffenbachio animaduерſa.	78. fqq.
Fuldensium quondam Monachorum feruor in literarum ſtudiis. 87.	Fuldensis quondam Bibliotheca.
Fures librarii.	LXXXIII. 78 279

G.

Gemma Gemmarum.	129
	Gen.

I N D E X.

Gentilot. ab Engelsbronn, Bibliothecarius	
Caesar.	242. 244. 253. 255
a Glauburg (Io. Ern.) et Vffenbachii Episto-	
lae.	321. sqq.
Glossaria linguae Germanicae.	115. 124
Goldmanni Opus de Architectura.	73
Golii Lexicon Arabicum, ipsa eius manu	
emendatum et auctum.	142. 296
Grauina (Vinc.) sub Philodemi et Bionis no-	
mine a Q. Sextano perstringuntur.	83
Grotii (Hug.) de veritate Resurr. Christ. Li-	
bri exemplar memorabile.	292

H.

Hachenbergii Historia Friderici Victoriosi	
Pal	303
Harlemensia primigeniae typographiae mo-	
numenta.	LXXIV
Hearne.	182
Heckelius ex quodam numo Constantii M.	
fidem Christianam demonstrare voluit.	67
Heineccius (D. Io. Mich.) laudatur.	LXXXVIII
Heraldica ars in Britannia maxime floret.	322
Heraldicus libellus Ioan. Wolfg. Trieri.	
	321. 324
Herodoti memorabile exemplar.	388
Hirsch Franc'kel Rabbinus.	213
Hoffmannus (Melch.)	427
Hudson.	181
Hutten (Christoph. Franc.) Episcopus Her-	
bipol. literarum Maecenas.	90

I N D E X.

I.

De tribus Impostoribus liber famosus.	440.
445. nuperus de hoc argumento ingenii foetus, quo patre natus sit.	445. 450
Ioannis (Ge. Christ.) et Vffenbachii Epistolae.	300
Ittigius (D. Th.) laudatus.	LXXXIV
Iunckeri Historia Hennebergica.	69

K.

Kusterus (Ludolphus).	34
-----------------------	----

L.

Lambecius (Petr.)	68
ad Langium (Io. Christian.) Epistolae.	275. 291
Lehmanni (D. Io. Chr.) Museum.	LXXXVI
Leichius (I. Henr.)	22
Leonis Papae ad Flavianum Episcopum Con- stantinop. Epistola MS.	85
Leti (Gregorius) polygraphus.	267
Liuii (Titi) an extet versio Arabica.	435

M.

Magicorum librorum MSS. Catalogus.	184.
	213
Maii (I. H.) Fil. circa Codicem Constantini cerimonialem molimina.	11. sqq.
- - - - - ej. et Vffenbachii Epistolae mutuae.	137. sqq. 328. sqq.
Maratus (Car.) Chalcographus.	82
	Mare-

I N D E X.

Marescoti nomen quis adsciuerit.	450
Marianus Scotus.	91
Martiniani fratris ex Ordine Praed. Chroni- con.	82
Mascouii (Io. Iac.) laus.	20
Matthias Kemnatenfis.	318
Miegii (Lud. Christ.) et Vffenbachii Episto- lae.	59. sqq.
Monstrum humanum bicorporeum.	LXXXVI
Mulleri (Io. Ioach.) Historia August. Conf.	62
- - - Historia Comitiorum.	219
Muratorii (Lud. Aub.) iudicium de censo- rum eccles. rigore.	264

N.

Negri (Salomon) Damascenus.	437
-----------------------------	-----

O.

Ouuonis Presbyteri Rauenn. Historia.	129
--------------------------------------	-----

P.

ex Palatina historia quaedam <i>δυσνόητα</i> .	315
Papyriperda.	272
Passionei (Dominic.) Cardin.	14
Peirescius quanti Wilh. Schickardum fecerit.	413
Pezii (P. Bern.) et Vffenbachii Epistolae.	238. sqq.
- - - eius Thesaurus Anecdotorum.	240
Philotheca Vffenb.	280

Phy-

I N D E X.

Physici studii vtilitas.	xxxvii
Plarre (Ern. Mart.) et Vffenbachii Epistolæ mutuæ.	257. fqq.
Platinae Historia Mantuana.	246. 248
Portneri Commentarius MS. in Tacitum.	50
Postelli (Guil.) Librorum MStorum duplex elenchus.	455. fqq.
Puerperium eruditum.	266. fqq.

R.

Rabanus Maurus.	86. 89.
Raphaël Vrbinas.	83
Reiskius (Io. Iac.) laudatus.	22
Reuberi Scriptores rerum Germanicarum.	98
Rhenferdus.	159

S.

R. Sabbathai Striemer Labia dormientium.	237
Salmonius (Franc.)	48
Sangallensis bibliothecæ fata.	CXXV
Sappuhnus, (Ge. Henr.)	155
Schacheri Museum.	LXXXV
Schannatus, (Io. Fr.)	91. CXXII. fqq.
Scheidt (Io. Val.)	XXIV
Scherzii (Io. Ge.) et Vffenb. Epistol.	109. fqq.
Schickardus (Lucas)	420
ad Schickardum (Wilh.) Epistolæ MSS.	409
Schickardum quanti fecerit Peirescius.	413
in Schickardum Epicedia.	417
Schlezerus.	291
Schilterus (Io.)	XXIV
Schockii (Mart.) Commentarius MS. in Ta- citum.	51 de

I N D E X.

de Scribendi pruritu coërcendo.	166. 170. 257. sqq.
Secreta Secretorum Soc. Iesu.	340
Sectani (Qu.) Satyrae.	83
ad Sieglerum (Ge. Conr.) Vffenb. Epistola.	75
Speculum Suevicum.	133. sq. 136
Spenerus (Phil. Iac.) laudatur.	LVI. 321. 325
a Stade (Dieter.)	123
Sporii Technophysiotameum.	XXI. sq.
ad Struuium (Burckh. Gotth.) Epistola.	297
ad Sturmium (Leonh. Chr.) Vffenbachii Epi- stola.	72
Steuinus (Sim.)	LXXVII
Stoschii Concordia rationis et fidei.	LVIII
de Syghes (Nic.)	82
Sylvii (Aeneae) Epistola ad patrem memora- bilis.	365

T.

Tabulae pictae antiquae.	70
de Thomasio (D. Chr.) iudicium.	XLI. sqq.
Tiraquellus (Andr.)	268
Tollneri mors.	69.
Historia Hassiaca.	ibid.
Trieri (Io. Wolfg.) Libellus heraldicus.	321 324
Trithemii de rebus gestis Friderici Victoriosi liber rarus.	306

V.

Vanini (Iul. Caes.) Apologia.	447. 451.
ab Vffenbach (Io. Frid.) laudatus.	LXXXI
ab VFFENBACH (Zach. Conr.) Vita. I. sqq. continuata. XLIX. sqq. periculum embryo- nis.	

I N D E X.

nis. iv. parentes. v. educatio. vi. studia puerilia. vii. studia in Gymnasio Rudolphopolitano. viii sqq. praeceptor. x. diligentia. xi. studium literarium. xiii. commilitones. xiv. studiorum specimen. xv. valetudo afflicta. xvi. studia in Academia Argentor. xviii. sqq. parentum mors. xxviii. studia in Academ. Halensi. xxx. sqq. honores academici. xlviii. Itinera. xlix. sqq. lxix. sqq. lxxx. sqq. xcii. sqq. studium bibliothecarium. lvii. et passim. cxvii. sqq. coniugium. xcvi. cxxxviii. commercium epistolare. ci. sqq. sigillotheca. cix. studium diplomaticum. cx. sqq. Album. cxxviii. propensissima in aliorum studia iuuanda voluntas. cxxix. Catalogus MSSorum. cxxx. venditio bibliothecae. cxxxvi. munera. cxxxix. corporis et animi icon, cxl. obitus. cxli. pietas. cxlii. modestia. cxlii. epitaphium. cxliii.

W.

Wachterus (Io. Ge.) laudatur.	117
ad Weberum (Imman.) Vffenbachii epistola.	95
Widmanstadii (Io. Alb.) Bibliotheca ubi hodiernum asseruetur.	105
Wolfius (Io. Christoph.)	31







Series Contentorum Partis II.

<i>Vita b. VFFENBACHII continuata.</i>	p. XLIX.
<i>Epistolae amoebaeae Vffenbachii et Ernest. Mart. Plarre.</i>	p. 257
<i>Epistolae Vffenbachii ad Io. Christian. Langium.</i>	275
<i>Epistola Vffenbachii ad D. Io. Andr. Danzium.</i>	293
<i>Epistola Vffenbachii ad D. Burckh. Gotth. Struuium.</i>	297
<i>Epistolae mutuae Ge. Christ. Ioannis et Vffenbachii.</i>	300
- - - - <i>Vffenbachii et Ioan. Ern. a Glauburg.</i>	321
- - - - <i>Vffenbachii et Io. Henr. Maii Fil.</i>	328
- - - - <i>D. Io. Henr. Barthii et Vffenbachii.</i>	421
- - - - <i>Vffenbachii et Petri Frid. Arpe.</i>	437

Singulares Obseruationes suis locis insertae.

I. <i>De Puerperio erudito.</i>	p. 266
II. <i>Problema literarium de Cultello Flaciano.</i>	285
III. <i>De Epistolis Virorum cel. autographis ad Wilb. Schickhardum.</i>	409
IV. <i>De Carolo Dadichi Antiocheno.</i>	432
V. <i>Duplex Elenchus librorum Msptorum Guil. Postelli.</i>	455

VITA

JO. GEORGII SCHELHORNII
DE
V I T A

B. ZACH. CONRADI
AB VFFENBACH

SCABINI ET SENATORIS
MOENO-FRANCOF.
C O M M E N T A T I O.



Series Contentorum Partis II.

<i>Vita b. VFFENBACHII continuata.</i>	p. XLIX.
<i>Epistolae amoebaeae Vffenbachii et Ernest. Mart. Plarre.</i>	p. 257
<i>Epistolae Vffenbachii ad Io. Christian. Langium.</i>	275
<i>Epistola Vffenbachii ad D. Io. Andr. Danzium.</i>	293
<i>Epistola Vffenbachii ad D. Burckh. Gotth. Struuium.</i>	297
<i>Epistolae mutuae Ge. Christ. Ioannis et Vffenbachii.</i>	300
- - - - <i>Vffenbachii et Ioan. Ern. a Glauburg.</i>	321
- - - - <i>Vffenbachii et Io. Henr. Maii Fil.</i>	328
- - - - <i>D. Io. Henr. Bartbii et Vffenbachii.</i>	421
- - - - <i>Vffenbachii et Petri Frid. Arpe.</i>	437

Singulares Obseruationes suis locis insertae.

I. <i>De Puerperio erudito.</i>	p. 266
II. <i>Problema literarium de Cultello Flaciano.</i>	285
III. <i>De Epistolis Virorum cel. autographis ad Wilb. Schickhardum.</i>	409
IV. <i>De Carolo Dadichi Antiocheno.</i>	432
V. <i>Duplex Elenchus librorum Msptorum Guil. Postelli.</i>	455

VITA

JO. GEORGII SCHELHORNII
DE
V I T A

B. ZACH. CONRADI
AB VFFENBACH

SCABINI ET SENATORIS
MOENO-FRANCOF.
C O M M E N T A T I O.



VITA

B. ZACHAR. CONRADI
AB VFFENBACH,



Acharias Conradus ab VFFENBACH, Vir in ævi nostri decus adque literas juvandas natus, ortu suo illustravit Francofurtum ad Mœnum, florentissimum Germaniæ Emporium, ubi lucem aspexit primam A. R. S. MDCLXXXIII. d. XXII. mensis Februarii. De illius nativitate juvat ipsa ejus verba ex schedis, in quibus de vita sua eleganter commentari cœpit, huc transferre, cum lectu sint nec injucunda nec indigna. En ergo tibi illa: *Vitam propriam scripturo, ab ovo, ut veteri ac trito dicitur proverbio, ordiendum omnino, ac patria ante omnia indicanda foret. Hæc vero cum duplex seu diversa, si tum conceptionem, tum ipsum*

psum partum spectes , a Physicis ac JEcis recte statuatur , eandem exacte definire , quod non uno eodemque in loco conceptio atque partus mihi contigerit , haud valeo. Accidit enim , ut anno MDCLXXXII. mense Junio parentes tum negotiorum , tum animi causa , quod civibus meis etiamnum ob eam , quam Aëneus ac Rhenus prabet , commoditatem , haud infrequens est , iter per utrumque Belgium , Galliam , Lotharingiam , Alsatiā , atque Palatinatum instituērunt , ac mense demum Octobri domum reversi fuerint. Durante igitur hoc itinere , incerto plane in loco mater mea me concepit. Hoc vero non ideo monendum duxi , quod vanam aliquam inde gloriam captem , ac ullos de patria mea , quemadmodum de Homero ac aliis , quorum incerta patria est , perhibetur , littere oriri posse existimem. Etsi etiam illi , qui physicis studiis delectantur , feliciora pro diversitate climatis ingenia hominibus tribuunt , ac mutationem locorum , aeris , ac victus , perpetuamque tum corporis , tum vero mentis , qua peregrinantes gaudere solent , recreationem , ad meliorem corporis animique habitum ingeniiue felicitatem nonnihil conferre mihi quoque , potuisse , forsā opinari queant ; absit tamen , ut hinc mihi quidquam arrogem , sed , si inde aliquid emolumenti in me redundarit , gratus equidem cognosco , iis ceterum , quibus me divina bonitas donavit , animi ac corporis dotibus , qualescunque illa ipsa sint , contentus omnino. Non possum vero non , quin Deo T. O. M. debitas referam gratias , quod parentes salvos atque incolumes in patriam reduxerit ,
eosque

eosque ab omnibus, quæ iter facientibus haud raro obvenire solent, periculis, una mecum in utero jam peregrinante, ac multis sane malis obnoxio, immunes præstiterit, licet e Belgio Fæderato in Regium tendentibus, ac lacum illum ob plurimos, qui in eo contigerunt per naufragia, casus fatales satis famosum, qui Belgis Moer dyck dicitur, trajicientibus, gravissimam tempestatem fuerimus experti, quæ tanta fuit, ut ipsum naufragium imminuerit. Ast majus adhuc a me, in utero adhuc latente, avertit divina misericordia periculum: duobus enim ante nativitatem mensibus, videlicet Decembri, gravida mater, scaldas descendens atque vacillans, tam graviter lapsa est, inque ipsum impegit uterum, ut non modo pater ac cognati, sed ipse etiam medicus infelix puerperium metuerent, ac de fœtus salute ferme desperarent. Divina tamen, cui laus & gloria sit sempiterna! Providentia factum est, ut justo tempore, subsequente scil. anno MDCLXXXIII. vigesimo secundo mensis Februarii styl. vet. hora noctis duodecima saluum atque incolumem eniteretur mater optima, nisi quod in dextro ventris latere e regione umbilici, a vehementi in lapsu matris contusione orta, macula rubicunda, a congelato procul dubio sanguine originem trahens, quæ adulta postea ætate subsusum colorem attraxit, ad palmæ utique magnitudinem conspecta fuerit. Hanc sane maculam non, ut alios nervos solemus, parvi feci, sed velut divina erga me providentia singularis monimentum suspexi semper, atque, quoad vixero, suspiciam.

Originem traxit ex prosapia senatoria, atque in illustrem, quæ Francofurti per aliquot sæcula floret, ac *Frauensteinia* dicitur, societatem jam olim recepta, & ab ipso Imperatore circa sæculi superioris initium insigni nobilitatis diplomate donata, cujus plura decora longo ordine enumerare possem, nisi brevitati litandum foret. Patrem coluit Jo. Balthasarem ab VFFENBACH, Senatorem de Rep. patria præclare meritum, ac ob singularem pietatem, candorem & liberalitatem in pauperes laudatissimum; Matrem vero Annam Sibyllam, ortu MAYERIAM, Matronam insigni prudentia, moribus honestis suavisque, æconomica insuper diligentia, ac aliis, quæ foeminas decent, virtutibus conspicuam.

Optimi hi parentes omnem curam atque sollicitudinem non modo ipsimet adhibebant, ut, quod Vellejus de Tiberio, licet gentili, dixit, innutritetur filius coelestium præceptorum disciplinis, sed, cum vix e crepundiis profiluisset, privatis etiam ac publicis formandæ juventutis magistris eandem serio simul committebant. Pater enim illorum opinionem, qui publicas scholas plane contemnunt, minime probabat, eas cum privata institutione potius conjungendas ratus. Etenim, ut cætera silentio præteream, vel ob rationem hanc

hanc solam, si alia non existeret, commendandæ sunt illæ bonarum artium officinæ, quod animi pueriles in istis honesta æmulatione excitentur, vel ad maiorem diligentiam exstimulentur. Privata autem informatio eo minus negligenda, quod solers præceptor domesticus ingenio, captui atque profectibus discipuli melius sese accommodare valeat, id quod in publicis scholis in tanta discentium copia atque diversitate fieri nequit.

Non sine omine autem, ac quodam futuræ Bibliophilæ prælagio, quam primum legere paulo expeditius didicit, tenera admodum ætate, ingenti librorum, imprimis historicorum, amore incaluit. Fovit eundem Parens optimus, ac magis magisque incendit, non Historias modo biblicas æri incisas, adjecta brevi enarratione elucidatas, quales Norimbergenses sub titulo *Bilder-Bibel* satis elegantes dederunt, sed nitidum etiam GOTTFRIEDI de quatuor, ut inscripsit, Monarchiis opus, pulcerrimis a Meriano iconibus illustratum, ipsi comparans. Dici non potest, quantopere tales libri oculos ac animos puerorum alliciant atque delectent, quod experientia edoctus in schedis suis asserit Noster, brevi tempore bene multas tam in sacra, quam profana historia narrationes tabularum istarum adminiculo

se memoriæ ita impressisse testatus, ut non sine audientium admiratione recitare easdem promte valuerit.

In istis quoque pueritiæ annis Musica haud parum delectabatur, fidibus canere discens. Capiebatur præterea Mechanicis artibus, ita, ut non libris tantum consuendis ac leviter compingendis operam dederit, sed in officinis etiam, quavis data occasione, manuarias opificum operas singulari cum attentione ac summa voluntate aspexerit, acuere hoc ipsum non modo ingenium juvenile, verum suo quoque tempore utilitatem in œconomicis haud levem præstare expertus.

Cum annum nondum duodecimum complevisset excitatæ indolis adolescentulus, accidit, ut unus ex patruelibus e Lyceo patrio in Gymnasium Rudolphopolitanum transferretur. Enixissimis igitur precibus Patrem quotidie fatigavit, ut idem consilium sequeretur, arduum sane, si comoda pariter atque incommoda pensites, quæ, ut suorum educationem aliis committant, vel suadere vel dissuadere parentibus queant. Inter illa hæc potissimum sunt, quod cum blanda patrum ac matrum imprimis indulgentia segnes plerumque faciat liberos, si aliis commendetur educatio, hoc ipsum haud facile metuendum sit.

fit. Hi enim vitia infantum, quæ cæcus parentum amor vel plane non animadvertit, vel connivendo fovet, non facilius tantum cognoscunt, sed severius etiam corrigunt, ac felicius emendant. Ut taceam, pueros peregre missos multis carere deliciis, quibus alii in ædibus paternis ac in matrum sinu plerumque mollescent, cum illi vitæ magis masculæ citius assuefiant. Altera vero ex parte metuendum parentibus, qui liberos suos aliorum educationi permittunt, ne vel nimia eorum severitate deprimantur, vel supina incuria negligantur. Haud raro etiam accidit, ut teneri puerorum animi peregrinarum corruptelarum illecebris irretiantur ac corrumpantur. Neque reticendum, liberos illos, qui extra familiam educantur, omni plane rerum œconomicarum notitia privari, cum ad illas difficulter admittantur ab hospitibus, ipsi vero de iis, velut ad se haud pertinentibus, vix ac ne vix quidem cogitent.

Hæc aliaque licet molestam redderent consilii capiendi deliberationem, multaque in mentem venirent in utramque partem, ac amor præcipue maternus obniteretur, vicerunt tamen enixæ fervidi juvenis preces. Missus est igitur cum patruele in Atheneum Rudolstadtense, in quod A. MDCXCIV. ipsis Kal. Oct. divina aspiran-

te gratia , pervenit salvus atque incolumis. Eo majores propitio Numini persolvendæ fuerunt grates , quod illum a maximo periculo in hoc itinere liberaverit. Cum enim Isenaco Gotham tenderent , e rheda , quod ab aliis comitibus aliquoties factum viderat , inter vehendum desilire volens , pede a pallio circumjacente impedito , saltuque fallenti , tam prope ad orbitam cadebat , ut , nisi pedes illico retraxisset , rota procurrens utrosque diffregisset.

Domicilium nanciscebatur apud Gymnasii Correctorem, Clar. M. Jo. Ernestum MULLERUM, Kelbra-Thuringum, virum in linguis præcipuis orientalibus , quas etiam Lipsiæ velut Magister , ut ajunt , legens non sine laude antea docuerat, versatissimum. Alebat is domi suæ plures juvenes , qui a vicinis Nobilibus, aliisque honestioribus ipsius educationi ac institutioni credebantur. Plerique ex convictoribus provectiore ætate , ac nonnulli etiam majorennnes erant. Fieri aliter non potuit, quam ut in tali petulantium ac lascivientium adolescentum cœtu non nugæ modo infinitæ fuerint actæ , sed flagitia etiam interdum perpetrata , quibus tenera ac ad vitia flexilis mens corrumpi potuisset , nisi gratia divina & animi probitas strenue obstitisset.

Ab-

Abducebat vero a pravo isthoc confor-
 tio potissimum, etiam innata illa discendi
 cupiditas, & ad studia naturalis propen-
 sio. Exserebat se illa in tenera jam ætate,
 eoque magis incendebatur, quod, licet
 exigui fuerint profectus, quibus ad hoc
 Gymnasium instructus pervenerat, Con-
 rectori tamen eam in Classsem, in qua ipse
 docebat, illum recipere visum fuerit.
 Sperabat nimirum Præceptor optimus, se
 fideliter manducente, eo feliciores illum
 progressus facturum, quod ingenium prom-
 tum & discendi cupidissimum in eo ani-
 madverteret. Nec bona illum spes fefel-
 lit. Cum enim condiscipulos videret No-
 ster, non ætate duntaxat, sed profectibus
 quoque in studiis longe superiores, tan-
 tum hoc ipsum discendi ardorem in eo
 excitavit, ut non modo incredibiles brevi
 tempore profectus fecerit, verum nimius
 etiam ille fervor retundendus atque re-
 primendus fuerit. Haud sufficebat, ordi-
 nariis laboribus scholasticis, ut probum di-
 scipulum decet, rite ac summa cum cura
 defungi, exercitia, quæ nuncupant, do-
 mestica componere, ac, quæ ediscenda e-
 rant, memoriæ mandare: sed tempus il-
 lud, quod alii recreationi ac lusu dabant,
 bonorum auctorum lectioni tribuere, ac
 dimidiam quoque noctem eidem dicare so-
 lebat. Vix auctor priscus Latinus est,
 quem non tractarit, si modo ejus ipsi a
 Præ-

Præceptore copia fuerit facta. Præ aliis tamen Justinum, Livium, Julium Cæsarem, Curtium, Terentium, Plautum, ac inter Poetas Virgilium, Horatium atque Ovidium cupidius atque ita legebat, ut omnes ex iisdem sententias non in locos tantum, ut ajunt, communes redigeret, sed plures etiam in certos titulos diligentissime exciperet. His spissa admodum quatuor volumina replevit, quæ semper asservavit, non velut maximum, quod tunc temporis reputabat, eruditionis thesaurum, sed in aliquod puerilis industriæ monumentum. E recentioribus Erasmi Colloquia deperibat.

Probabat, atque commilitonibus ejus in exemplum proponebat singularem hanc diligentiam sedulitatemque Præceptor. Quum vero eam non sine ratione sanitati noxiam existimaret, ac lucubrationes nimias teneræ inprimis ætati detrimentum allaturas crederet; iisdem non solum interdicebat, sed ipsi etiam haud parenti candelarum copiam denegabat. Hac assiduitate, brevi ac vix annuo spatio, tantum profecit Noster, ut reliquis discipulis non modo æquipolluerit, verum plurimis eorum palmam præripuerit.

Dolebat vero postea, tunc temporis in hoc Lyceo præter linguam Latinam, Græcam

etiam & Hebraicam nonnisi Logicam ac Metaphysicam scholasticam fuisse tractatam, spretis utilioribus & ætati juvenili magis convenientibus disciplinis, Historia scilicet, Chronologia, Genealogia atque Geographia. Hæ enim eo diligentius, juvenuti scholasticæ inculcandæ videntur, quo magis memoria, ad illas addiscendas imprimis necessaria, in ea ætate viget.

Deinde cum hæ scientiæ insignem tam in aliis studiis altioribus, quam in omni vita usum præbeant, ineptiæ illæ syllogisticæ ac scholasticæ philosophiæ nugæ exiguam plane utilitatem habent. Defectum hunc privato studio diligentique lectione Bunonianæ Idææ historicæ, Compendii Geographiæ Cluverianæ, ac SLEIDANI de quatuor summis Imperiis libelli elegantissimi resarcire conabatur. Præ aliis autem in deliciis ipsi erat MORHOFII Polyhistor literarius, quem toties legit atque relegit, ut non auctores duntaxat ab ipso laudatos atque recensitos in numero haberet, sed integra etiam ex isthoc capita memoriter recitare valeret.

Emicuit jam eo tempore ac in tenera ista ætate singularis illa in bonos libros propensio, quæ in tantum crescentibus annis excrevit amorem, ut satiari nunquam potuerit. Laudatum MORHOFII opus eo cha-

charius ipsi semper extitit , quod primos in re literaria ac libraria in eodem progressus fecerit , ac tantam ex ejus lectione ceperit voluptatem , ut aliæ isti ætati convenientes atque solitæ oblectationes præ illa tardio essent.

Hac vero non solus fruebatur , sed cum amicis eam intimioribus communicabat , utpote cum quibus de iis , quæ legerat , literaria ac , pro puerili isthac ætate , erudita colloquia miscebat. Erant isti Jo. Henricus ACKERUS , & Andr. Nicolaus SULZNERUS , quorum ille postea in hoc Rudolphopolitano ac deinde Altenburgensi Gymnasio Rector , hic autem Principum Schwarzburgicorum Consiliarius (a) fuit. Inter hos egregios juvenes erat honesta in studiis æmulatio , ac varia inprimis quoad stylum exercitatio. Non epistolare modo inter eos commercium intercedebat , sed , dum alii commilitones tempus ludendo ac lasciviendo perderent , istud illi inter deambulationes vel in Sulzneri vineas , vel lucum prope arcem , vel in pratâ juxta Salam fluvium variis iisque literariis colloquiis pro captu suo jucundissime transigebant. Circa finem A. MDCXCVI. suadente Conrectore ,

(a) vid. Ccl. Jac. BURCKHARDI de sua ipsius vita Commentar. pag. 160.

re animum induxit , panegyricam orationem in patriæ laudem contexere , illaque de instante novo anno Patriæ Patribus conscriptis , aliisque Patronis gratulari. Optime rem hanc successisse, exinde apparerebat , quod Præceptor vix tria verba non tam correxerit, quam cum aliis, quæ ipsi aptiora videbantur, commutaverit, ac juvenilem hunc foetum dignum judicaverit , qui in lucem ederetur. Orationem illam satis longam ex memoria in perillustri panegyri sine ulla hæsitatione , animo vultuque intrepido , cum auditorum applausu feliciter recitavit.

Serenissimus Princeps ANTONIUS unacum filio FRIDERICO ANTONIO , ejus postmodum successore , non sua tantum præsentia actum istum illustraverat, sed Ministris etiam stipatus advenerat , interque hos Cancellario , Viro tam eruditione quam pietate illustri , Ahasvero ERITSCHIO. Tanta erga Nostrum, quamvis adolescentulum , summi hujusce Viri fuit humanitas , ut , quotiescunque (siebat autem persæpe) a Correctore ad optimum hunc Senem , ut aliquid ejus nomine vel denunciaret , vel deferret , mittebatur , paterno illum quasi affectu exceperit , exploratisque in studiis profectibus ad ulteriorem diligentiam incenderit, ac fingito etiam actu illo oratorio in transi-
tu

tu de rite expleto oratoris munere verbis ei Latinis fuerit gratulatus.

Inter hosce auspicios studiosorum successus valetudo ejus ex infelici lapsu graviter afflictâ fuit. Anno enim MDCXCVII. mense Februario, dum mane in scholam properaret, deque monte, in quo non Arx tantum Principis, sed in radice etiam illius Conrectoris ædes erant sitæ, descenderet, via autem ob nivem per pluviam haud satis liquefactam, ac noctu denuo congelatam, admodum esset lubrica, pede fallente tam graviter lapsus est, ut omenti ruptura in sinistro inguinis latere fuerit facta. Qua molestia licet opus Chirurgi iterum fuerit liberatus, malum tamen anno vertente recrudit; sed divino beneficio denuo depulsum fuit.

Interim amantissimi Parentes, de adversa ejus valetudine edocti atque solliciti, satius ducebant, eum domum revocare. Redit ergo, superato gravi, Deo juvante, ad Fuldam amnem, qui copiosissimis imbribus intumuerat, periculo, ad Lares patrios anno MDCXCVIII. ultimo mensis Maji die, a Parentibus optimis ac reliqua familia post quadriennem absentiam maximo cum gaudio receptus. Velut novum in orbem delatus sibi videbatur, mirabaturque omnium fere rerum statum interea muta-

mutatum. Augustiora ipsi apparebant cuncta, quod in loco obscuriori, ac re familiari tenui, vel parum lauta, hactenus vixerit. Accessit, quod Parens interim ad lenatoriam dignitatem fuerit evectus, atque hac etiam ratione familiæ statum nonnihil mutatum animadverterit. Prima vero dulcissimorum Parentum cura de ejus sanitate obfirmanda erat.

Ne autem, durante hac curatione, otiosus esset, consultum duxit optimus Pater, ut lectiones historicas & geographicas Rectoris Gymnasii, Viri Clar. Jo. Gerhardi ARNOLDI una cum nonnullis vitæ academicæ Candidatis frequentaret. Eo lubentius hoc faciebat, quod isthæc studia in Lyceo Rudolphopolitano male neglecta agnosceret. Initio mensis Julii cum Parente Swalbacum proficiscebatur, quod acidularum ibi scaturientium usus utrique a Medico fuerit præscriptus.

Accidit tunc, ut in eadem domo cum Viro Illustri, Jobo LUDOLFO, qui Patri erat amicissimus, commorarentur. Rogabatur is a Parente, ut eum tentaret, ac in studiorum profectus penitus inquireret. Bonus itaque hic Senex, quandoque illum offendeat, vel a longinquo conspicabatur, haud Latina duntaxat lingua ipsum adoriebatur, ac non nisi Latinos

nos sermones ferebat , sed variis etiam quæstionibus philologicis ac historicis eum exercebat.

Domum valetudine corroborata reversum meditabatur Parens in Gymnasium, quod tum satis florebat , Idsteinianum ablegare. Is vero , ut juvenes solent , vitam academicam anhelans , enixis illud precibus deprecabatur , quibus tandem, ac LUDOLFI aliorumque, ejus profectus colaudantium , suasionibus cedens Pater annuebat , ut ad vitam academicam se præpararet. Placuit Argentoratensis Academia, vel eo nomine, quod linguæ Gallicæ facilius addiscendæ commoda ibi occasio esset. Cumque annum decimum quintum vix exegisset, piaculum ducebant providi Parentes , eum sine morum ac studiorum moderatore ad Academiam dimittere. Dabatur ergo illi Ephorus , Jo. Philippus Pistor , Juris Candidatus, quo comitatus proficiscebatur per viam montanam & Palatinum , terras quidem amœnissimas ac fertilitate sua felices , eo autem tempore horrendis plane Gallorum incendiis ac furoribus ita depopulatas atque devastatas , ut ubivis, Heidelbergæ inprimis ac Spiræ, quæ Germaniæ civitates fuerant florentissimæ , ruinas vix sine lacrymis aspicere potuerit : ac Deo duce A. MDCXCVIII. d.

XIV. mensis Augusti Argentoratum perveniebat sospes atque vegetus.

Ordinato ac probe disposito museo, prima cura erat, ut in Civium academicorum numerum rite reciperetur: quod factum est a Rectore tum temporis Magnifico, Jo. BOECLERO, artis salutaris Professore, magni illius Historici, Politici ac Philologi, Jo. Henrici BOECLERI filio. Erant eo tempore in Theologorum Ordine Isaacus FAUSTIUS, Jo. Joachim. ZENTGRAVIUS, plurimis, nec contemnendis scriptis, tam philosophicis quam theologicis clarus, & Bern. WAGNERUS. Inter Jctos excelebant Jo. SCHILTERUS, vir in Jurisprudentia veterum inprimis Germanorum asserenda, & Antiquitatibus Germanicis illustrandis princeps, MARBACHIUS & FELZIUS. Ex Ordine Medicorum florebant BOECLERUS, SCHELDIUS ac SALZMANNUS. Mathesin docebat, ac egregiis etiam scriptis illustrabat Julius REICHEL, Eloquentiam Jo. Christophorus ARTOPOEUS, Historiam Jo. Cunr. KUHNIIUS, Orator facundissimus. Frequentia studiosorum non adeo magna, quod majores hic, quam alibi, sumtus requirantur. Maximum Civium academicorum numerum constituebant Nobiles ac alii in Galliam tendentes. Hi enim aliquamdiu subsistere hic solent, ut Galli-

cam linguam addiscant , ac moribus etiam Gallicis assuefiant. Nec defuit iis , qui in disciplina equestri , arte palæstrica , saltationibus , aliisque corporis ac ingenii exercitiis , mathematicis etiam ac cæteris Nobiles decentibus artibus institui cupiunt , egregia occasio. Erat enim Vir quidam honestus , nomine Macko , qui Academiam , ut vocant , equestrem Gallico more aperuerat. Animus Nostro erat , eandem ingredi : ast Ephorus prudenter renuebat , quod tenuem atque imbecillem corporis constitutionem talia exercitia haud admittere probe animadvertibat , nec proficua illi fore putabat. Id quod postea ipse bene agnovit , cum experientia doceret , plerosque , qui scholas palæstricas frequentant , ad rixas fieri proniores , ac malo aliorum consortio corrumpi. Equestrem equidem disciplinam usum habere majorem existimavit , ac salutarem studiosis motionem præbere : id vero simul incommodi secum ferre , quod non modo horæ matutinæ , studiis commodissimæ , eam exercentibus pereant , sed quod tales equites in Collegiis , quæ vocant , ita viderit defatigatos , ut a somno vix abstinere potuerint.

Inter primarias causas , cur ad hanc Academiam cum ablegaret Pater amantissimus , erat , ut linguam Gallicam eo melius

lius addisceret. Statim igitur post adventum Ephorus de idoneo hujus linguæ Magistro ipsi prospexit, ac præterea tale hospitium elegit, in quo nonnisi cum Gal-
lis commercium illi esset. Idem vero si-
mul de ipso ad studia etiam solidiora manu-
ducendo sollicitus, non cum duntaxat in
geographicis ac historicis per aliquot ho-
ras singulis diebus ipse instituit, sed & ei
de Collegio quodam, ut nuncupant, pri-
vato, seu lectionibus ad styli literarii ex-
ercitium spectantibus providit. Egit igi-
tur cum Professoris Artopœi filio, ut
Plinii Epistolas ei hunc in finem explica-
ret. Plus autem ipse profecit bonorum
auctorum lectione usuque, ac variis styli
exercitationibus, suoapte Marte institutis.

Nec studium historiæ literariæ, ac rei
librariæ, quod semper ei in deliciis fuit,
neglexit, sed scripta huc facientia summa
cum industria ac voluptate perlustravit, ac
Bibliothecas tam publicas, quam privatas,
officinas item librarías sedulo frequentavit.
Inter has Sporianam reliquis prætulit, ob
singularem optimi Senis Sporii humanita-
tem, quam non solum in novis pariter ac
rarioribus libris, verum in curiosis etiam
tum naturalibus, tum artificialibus, quæ
in Museo satis instructo, magnoque stu-
dio, nec exiguis sumtibus adornato, asser-
vabat, demonstrandis comprobavit.



Taberna Sporii libraria erat in Cœnobio, quod olim Dominicanæ Sodalitatis Monachorum fuit. Commoratus in hoc aliquandiu, dum viveret, quondam Albertus Magnus. Monstravit ei humanissimus Senex cellulam, quam ille inhabitasse, inque ea machinam illam artificiosam, quam se movere ac loqui etiam potuisse ferunt, composuisse dicitur. Ostendit etiam locum, ubi hanc eum ipsam posuisse credebat, indicavitque foramina nonnulla, per quæ Albertus Magnus fila ferrea, quibus machinam in inferiori ædificii contiguatione motam, ac tubum, per quem vocem fuisse editam credebat, demisisse sagax Senex suspicabatur. Hanc enim machinam ab Alberto ita constructam fuisse, ut proprio motu se movere ac loqui potuerit, nemo sibi persuaderi sinit, nisi qui insipidis illis de magicis ejus artibus, quarum pro istorum temporum more inepte insimulabatur, narratiunculis fidem haberi velit. Quibus forsân etiam accensenda venit lepida, ut videtur, fabella, quod Thomas Aquinas illam ipsam machinam, pro spectro habitam, præ terrore baculo confregerit. Nisi enim ex argilla, vel alia fragili materia confecta fuisset, frangere eandem baculo Thomas haud potuisset. Hoc ipsum autem ideo verisimile non est, quod movere se potuisse perhibeatur; atque ita vel ex ligno, vel laminis fabrefactam fuisse credendum est.

Præter Bibliothecas ac Officinas librarías jucunde etiam Disputationes, aliosque actus solennes frequentare consuevit, maximopere oblectari solitus, si in illis acriter & masculè dimicaretur. Interdum quoque Jesuitarum disputationibus interfuit; ast offendebar non modo tumultuaria eorum in disputando methodo, accavillationibus scholasticis, sed quod argumenta, de quibus inter eos disceptatur, plerumque e Metaphysica, vel Theologia & Philosophia scholastica sint desumpta.

Circa finem anni KUHNIUS, Historiarum Professor, lectiones in Tabulas chronologicas SCHRADERI studiosis proposuit, quas ut Noster frequentaret, Ephoro consultum videbatur. Haud parum ex iis profecit, id unicum dolens, quod majorem diligentiam non adhiberet Professor, Orator quidem eximius, quod plurimi in Regis Galliarum honorem habiti, typisque exscripti Panegyrici satis evincunt, ac Vir eruditissimus, ast majorem fere cuticulæ, quam studiorum, curam gerens, moribusque minus politis præditus.

Incedebat tunc etiam animum cupiditas audiendi lectiones juridicas, quam velut intempestivam restinxit Ephorus. Interim prælectionibus, quas ipse apud Viros consultissimos SCHILTERUM ac FELZIUM

frequentabat, hospitii instar, uti ajunt, nonnunquam interfuit Noster. Quum prima vice SCHILTERI, Viri summi, Museum intraret, obstupefactum se sensit. Vix enim Doctorem vel Professore ob languidam debilemque vocem audire, nec etiam cernere poterat: ita lectis erat undiquaque in sella acclinatoria, qua non tam sedebat, quam recumbebat, constipatus ac fere sepultus. Interdum etiam in ipso lecto docebat, cum esset perpetuo valetudinarius, ac morbo articulari fractus. Nihilo tamen minus in docendo tam erat assiduus, ut Collegas propemodum omnes diligentia vicerit.

Durante hyeme, A. MDCXCIX. pluribus Anatomiis, quas Vir Clar. D. Jo. Valentinus SCHEIDT, Medicinæ ac Anatomiae Professor, peregit, interfuit. Habentur illæ in Sacello quodam prope Nosocomium, ex quo tot prudenti Amplissimi Senatus decreto cadavera in illo morientium suppeditantur, quot ad exercitia anatomica per integram hyemem requiruntur. Optandum, ut alii Magistratus in Civitatibus nobilioribus, licet Academiis destitutis, laudabile hoc exemplum sequantur. Hac enim ratione crassa chirurgorum & obstetricum ignorantia propulsari, ac salus ægrotantium & parturientium haud parum promoveri posset. Tantopere autem

tem hoc sese institutum tum Nostro probavit, ut A. MDCCXVIII. ejus consilio Celsissimus Comes de SCHOENBORN, Cæsareus ad componendas inter Amplissimum Magistratum ac Cives Francofurtanos lites, civitatisque administrationem ac œconomiam ordinandam Legatus, fuerit permotus; ut Theatrum anatomicum exstrui, ac hyemali tempore sectiones fieri, & cadavera necessaria ex Nosocomio sine difficultate subministrari jusserit. Illo jam tempore eximiæ indolis juvenis probe censuit, quod corporis structuram nosse, licet medicis studiis haud addicto, apprime conducatur, non ad sanitatem modo melius tuendam ac conservandam, sed ad Medicum etiam in adversa valetudine de morborum, qui nobis obveniunt, genere ac statu certiores reddendum. Quapropter maxima cum diligentia, nec sine voluptate his exercitiis anatomicis interfuit. Mirabatur non tantum venerandi Senis D. SCHEIDII in præparandis ac demonstrandis singulis corporis humani partibus dexteritatem, sed & facundiam; singulari cum delectatione sæpe recordatus exordii illius, quo Cordis humani demonstrationem ultimam aggrediebatur. Cum enim eam ob subitam aeris regelascentis mutationem die dominica post sacra peracta suscipere cogeretur, hac demonstratione sua nullam Sabbati profanationem se commissurum

evincebat, quod eam urgente necessitate institueret, ac insuper omnium præstantissimum e corporis humani membris sit demonstraturus, ex quo summi Creatoris, qui ipse Cordium Scrutator dici velit, admiranda sapientia præ aliis pateat. Hac igitur demonstratione rite peracta, tam sanctas cogitationes, mentisque agitationes apud auditores spectatoresque se excitaturum confidere, quæ diem, licet sacrum, optime deceant, ac omnium animos sancta Creatoris Opt. Max. veneratione sint repleturæ.

Ejusdem anni æstate inter alia duo ad animi recreationem exercitia instituere cœpit, ut fistula nimirum canere, ac graphicam, seu delineandi artem addisceret. In Musica Jo. Braunium, in arte pictoria autem Seupelium, magistros elegerat, utrumque in arte sua Roscium. Vix autem per tres menses graphices studio se oblectaverat, cum ob oculorum morbum illud deferere cogeretur. Pari cum ægritudine nobile hoc exercitium abjecisse se meminit, ac de PEIRESCIO in vita ejus a GASSENDO elegantissime descripta p. 564. editionis minoris Hagiensis legerat: qui frequenter testatus est, pœnitere se maxime, quod a teneris usque annis pingendi artem non didicisset, optareque, si fieri posset, digitis duobus sinistræ manus redemptam
peri-

peritiam , qua dextra careret. Speraverat enim Noster , honestam hanc exercitationem sibi & summam delectationem , & maximam in omni vita utilitatem , in itineribus præsertim suo tempore suscipiendis , omnino allaturam. Supplevit vero hunc defectum Generosissimus Frater, qui sua in his dexteritate insignem ipsi in itineribus operam præstitit.

Die 13. mensis Sept. horrenda illa æ plane memorabilis Eclipsis Solis , cujus exactam Jo. Phil. WURZELBAUERI , Astronomi Norib. celeberrimi , descriptionem Actis Eruditorum ejusdem anni p. 544. seqq. inseruerunt doctissimi Collectores , accidebat. Hanc maxima cum admiratione , nec sine voluptate, & quidem accuratissime observare licuit. Variis enim illam modis D. SEBIZIUS juvenibus studiosis , quos inter & Noster erat , demonstravit , tum in horto domui adjacente, tum in Camera , quam adaptaverat , ac variis instrumentis instruxerat. Contemplabantur itaque initium , progressum ac finem ejus , tam per vitra, fuligine in una parte oblita , quam per varios tubos, potissimum vero omni cum industria in Camera obscura , ubi ad Horologii oscillatorii Anglicani momenta initium, incrementum ac decrementum hujus Eclipses , in chartæ plagula , quæ umbram per Tubum opticum

exceptam circino dimetiebatur, observabant.

His aliisque egregiis exercitationibus jucunde occupatus, triste e patria nuncium accepit de gravi Matris dilectissimæ ægitudine, quæ, cum hæcticis affectibus jam aliquoties laborasset, adeo ingravescebat, ut viribus exhausta decumbere cogeretur. Evanescente igitur restitutionis spe, summo filium ante obitum videndi desiderio tandem ducebatur, cui, licet invitatus vale Musis Argentoratensibus diceret, parendum fuit. Rediit itaque in patriam sub initium mensis Martii A. MDCC. & dulcissimam Matrem in lecto emortuali per febrem hæcticam adeo invenit emaciatam, ut eam vix amplius agnosceret. Augebat dolorem, quod omnem recuperandæ pristinae sanitatis spem plane collapsam videret, ac indies mors ejus metuenda esset. Ipsa vero pientissima Matrona eandem non modo placide expectabat, sed forti devotaque mente creberrime exoptabat. Ast cheu! antequam pii voti sui compos redderetur, paucos intra dies, & triduo ante beatam suam dialysin marito amantissimo semet privatam, liberos autem non tantum Patre charissimo orbatos, sed brevi etiam per imminentem mortem suam plane orphanos prævidere cogeбatur.

Acci-

Accidit enim inopinato prorsus, ut Pater Optimus, qui firma alias ac prospera, si transeuntēs calculi dolores, quibus sæpenumero laborabat, excipias, utebatur sanitate, in febrem ardentem malignam incideret, ex mœrore procul dubio, quem ex diuturna Conjugis suavissimæ contabescens ægritudine contraxit. Tanta vero morbi vis erat, ut tertio statim die, scilicet Jovis, qui Viridium vulgo dicitur, inopinatam ac tristem mortem anno ætatis LIX. inferret. Pia autem Mater triduo vix exacto desideratissimum maritum secuta, in ipso Paschatis die circa meridiem animam Deo placidissime reddidit, cum annum ætatis XLIV. nondum explevisset. Pietatem utriusque beatissimi parentis inter cætera testabantur Legata, ærario pauperum, orphanotrophio ac Nosodochio, nec non oraculorum divinatorum Interpretibus facta, quæ ad aliquot florenorum millia ascenderunt. Patrem, cum ex singulari, qua omnibus innotuit, modestia vivus nunquam pingi voluerit, mortuum, ac loculo, seu cista ferali jam conditum depingi curavit Filius. Quæ imago, scita ac felici pictoris manu consimilis admodum efficta, omni tempore gratam illi meritissimi Parentis præbuit memoriam.

Quum ab acerbissimo hoc luctu paulatim sese

sefe collegisset, studia sua strenue profecturus, mense Augusto ejusdem anni MDCC. in Academiam Halensem ob magnam STRYCKII, THOMASII, LVDOVICIORUM, BUDDEI, aliorumque ibi summo cum applausu docentium, famam se contulit. Dignitate Prorektoris tum fulgebat Vir celeb. Georgius Ernestus STAHLIUS, Medicus excellentissimus, a quo nomen ejus in Academicorum Civium Album inscriptum est. Cum illius ædes ingrederetur, ancilla Herum, in Chymico laboratorio operantem, se advocaturam ajebat. Hoc nisi dixisset, advenientem mox Prorektorem Magnificum minime agnovisset. Carbonario enim videbatur simillimus, indutus quippe toga linea nigra, nec manibus tantum, sed ipsa etiam facie a pulvere carbonario tam squalidus, ut risum cohibere vix potuerit.

Commodum accidit, ut explicare tum Jo. Samuel STRYCKIUS, Filius, Institutiones juris Justinianeas studiosis quibusdam inciperet; has itaque ejus prælectiones quidem audire, potissimam vero philosophicis studiis navare operam constituit, usus in his præceptore præclari nominis Viro, Jo. Francisco BUDDEO, Moraliùm Professore, qui circulum lectionum suarum philosophicarum denuo ordiebatur. Ipsa
b.

b. VFFENBACHII de hisce prælectionibus, ac BUDDEI, Viri summi, in se meritis verba huc transferre visum est. Ita vero ille (b):

BUDDEUM per omnes philosophia partes, non modo summa cum diligentia & attentione, sed maxima etiam cum voluptate audiui, adeo, ut per tres annos, quibus ejus auditorem egi, ne unicam quidem horam, quibus docebat, neglexerim. Tanto autem Viro me Præceptore usum esse, non modo gaudeo, sed illum ipsum ea, qua par est, veneratione etiam post cineres prosequor. Huic enim Viro optimo ac Præceptori fidelissimo me plus debere, quam cuiquam mortalium, ingenue profiteor. Is enim manu ductione sua fidissima prima non modo vera sapientia ac Philosophia, sed omnis etiam solidioris eruditionis semina instillavit, animumque ad liberalia quævis studia mirum in modum incendit. Probabat enim se mihi eclectica, eaque vera philosophandi ratio, ac plana atque perspicua in docendo methodus.

Neque enim tetricorum ac morosorum illorum Doctorum rationem sequebatur, qui disciplinarum ac scientiarum principia crude ac sine omni elegantioris eruditionis condimento proponunt, neque vanam ac ridiculam aliorum ostentationem probabat, qui

(b) Literis hæc consignavit b. VFFENBACHIIUS, annum ætatis jam agens quinquagesimum, A. MDCCXXXIII.

qui multis ineptisque digressionibus auditores fatigant, neque etiam eorum, gravitatem Doctoris minus decentem, morem imitabatur, qui facetiis ac nugis etiam, quod Thomasio, Gundlingio aliisque a multis vitio versum fuit, auditores allicere atque demulcere student. Evitabat hos scopulos Buddeus, sua tamen, spinosiora etiam dogmata, ita proponebat, ut summa cum voluptate ab omnibus audiretur. Præprimis autem me, literariorum harum deliciarum, cupidissimum, capiebat, quod historie literarie ac libraria quavis data occasione rationem haberet, ac bonorum auctorum librorumque notitiam praberet, & solidum de scriptis, quæ de re qualibet extant, optimis iudicium ferret. Cum haud infima eruditionis pars in bonorum auctorum ac librorum notitia consistat, multum sane interest, ut adolescentes ad eam in tempore acquirendam manu ducantur. Insignis plane superioribus sæculis hic neglectus fuit, ubi ipsa historia literaria parum excolta, ac Professores seu Doctores etiam pro callido plane artificio habebant, ut ea scripta, quibus usi, & unde sua haurirent, discipulos celarent, hoc ad augendam eruditionis suæ existimationem auctoritatemque apprime facere existimantes. Inepta vero talis invidia nullo modo excusari potest. Quemadmodum enim opifex maxime foret culpandus, qui tyroni necessaria ad artem addiscendam instrumenta occultaret, cum quavis etiam, ad eandem exercendam commoda, bona fide demonstrare, horumque usum edocere in conscientia obligetur: ita etiam Doctores ac Præceptores graviter peccant, nisi discipulis auditoribusque son-

tes, e quibus ipsi hauserunt; feliciter indicent, ac optimorum quorumvis auctorum notitiam praebeant, e quorum scriptis ea, quae didicerunt, plenius ediscere, majoremque de re qualibet notitiam solidioremque eruditionem adipisci valeant. Quamvis enim multorum auctorum usus adolescentibus haud conducatur, ac vaga plurimorumque librorum lectio noxia magis, quam utilis esse soleat, necessaria tamen est, ac in tempore acquirenda bonorum Scriptorum notitia. Quemadmodum enim, ut in simili de mechanicis ac artificibus supra dicto pergam, tyro ad prima in arte sua rudimenta addiscenda paucis admodum instrumentis opus habet, si vero ad operas majores magisque arduas temporis progressu adhibetur, plurium etiam instrumentorum usus requiritur: ita etiam eruditi ad studia prosequenda, augendamque eruditionem majori librorum copia indigent. Cum vero in tanto horum, quo Orbis eruditus laborat, numero delectu utique opus sit, ac exactam eorundem notitiam acquirere tam facile non sit, laudanda utique illorum Doctorum ac Praceptorum est diligentia atque dexteritas, qui discipulos auditoresque suos ad tam necessariam utilemque cognitionem manuducunt. Grata sane mente etiamnum agnosco egregium Praeceptoris optimi **BUDDEI** hac in re studium.

Præ aliis autem disciplinis philosophicis sese illi probabat ea, quae de moribus agit, ac moralis vulgo dicitur. Privata diligentia legit Christiani **THOMASII** Ethicam,

cam, quæ tantopere placebat, ut ejus lectionem pluries, quam tritum proverbium de libris præstantioribus suadet, repetierit, quamvis non deessent, quæ in illo displicerent.

Circa anni MDCCI. exordium, die nimirum XVIII. Jan. Festum Coronationis FRIDERICI I. Borussiae Regis solenniter Halæ celebrabatur. Lætus ille ac auspiciatus dies fuit VFFENBACHIO valde infestus. Cum enim noctu omnium fere ædium fenestræ ardentibus luminibus, ac variis in Regis honorem emblematis & inscriptionibus essent exornatæ, illeque cum innumeris aliis spectatoribus per plateas circumeundo eas perlustraret, nec sine jucunditate varias inhabitantium tam ingeniosas, quam ineptas & ridiculas plane inventiones animadverteret, per plateam quandam angustiolem, glacie ac nive oppletam, oculis in altum ad lustranda emblemata elatis, transiens, tam graviter in terram supinus concidit, ut non modo ensis, quo cingebatur, ejusque capulus in plurima frustra frangeretur, nummique, ac quæcunque in marsupiis erant, excuterentur, sed omnes etiam horologii portatilis rotæ cum elatere hoc ipso casu gravissimo rumperentur. Ipse vero aliquandiu quasi exanimis, rigidus ac ita quassatus jacebat, ut amici comites vix reficere,

ac erigere, domumque deducere eum potuerint.

Licet etiam varia adhibuerit medicamina, ac lecto se continuerit, per aliquot tamen dies omnibus artubus contremiscebatur, doloresque haud leves per cuncta membra sentiebat. Cum insuper altero statim die vertiginem ac singularem mentis stuporem pateretur, nonnullam in capite lationem metuebat. Mox vero cessantibus divina gratia gravioribus hisce symptomatibus, reliqua etiam incommoda pedetentim evanescebant. Casus hic gravissimus eum admonuit, ut Æsopici illius Astrologi, cœlum ac astra contemplantis, inque foveam cadentis, imprudentiam in posterum vitaret.

Mense Aprili ad nundinas Lipsienses visitandas profectus, mirabatur præsertim peregrinorum bibliopolarum confluxum; tantumque esse illum deprehendit, ut quoad librorum negotium Lipsienses nundinas Francofurtensibus hodie præripere palmam animadverterit. Eo majori voluptate tabernas ibi librarías perlustravit, quod non nisi tres tunc Halæ essent, iis haud comparandæ, Rengeriana, Zeitleriana, & quæ noviter adornabatur in Orphanotrophio Glauchensi. In his vero in dies pro ea, qua jam tum, imo a teneris unguibus

culis flagravit , Bibliophilia tot libros coemit , ut Bibliotheca , non qualis studiosum decet , sed quæ Professori sufficere potuisset , ab ipso colligeretur . Nee libris propriis contentus , publicas ac privatas insigniores Bibliothecas diligenter frequentavit . Inter illas Halæ eminebat Senatoria , quam singulari schediasmate descripsit Neumannus . Bibliotheca Academica , utpote novissime adornari cœpta , inter locupletes referenda tum nondum erat . Bibliothecæ vero exquisitæ Virorum illustrum Samuelis STRYKII & Christiani THOMASII ipsi patebant . In primis Christophorus KRAUSIUS , Medicinæ Doctor , inter literatos infelices numerandus , Bibliothecæ suæ copiosissimæ , ac libris præcipue historicis egregie instructæ , summa cum facilitate usum ei concessit . Ex hoc thesauro innumera fere Itineraria mutuo accepit , e quibus quævis per Europam universam visu atque notatu digna horis subsecivis excerptis , ac in sex satis spissa volumina ita digessit , ut , quæ singulis in locis in futuris peregrinationibus observanda atque exploranda videbantur , facile reperire valeret . Maximam hæc illi collectio in itineribus suo tempore utilitatem præstitit .

Per idem tempus privata diligentia diebus dominicis Historiam ecclesiasticam , peractis

actis sacris, haud sine fructu excoluit. Ægre enim ferebat, quod nemo ex Professoribus esset, qui vel hanc, vel Historiam literariam tunc temporis doceret, cum probe agnosceret, quantum utriusque studium commodi afferat. Legebat primum illud egregium Compendium, quod Illustris Viti Ludovici SECKENDORFII auspiciis editum est, ac *Gothanum* inscribitur, magno cum emolumento. Deinde famosum Godofredi ARNOLDI opus, quod sub titulo: *Kirchen-und Kezer-Historie* prodit, curate pervolvit. Quod equidem institutum, etsi Cel. Thomasi consilio susceptum, ego, si meum hic mihi interponere liceat iudicium, juveni studioso imitandum haud suaserim, cum Arnoldina Historia, caute profecto & summa cum circumspectione lustranda, lectorem atque iudicem efflagitet non tyronem, sed virum, subacto iudicio pollentem, eximia plurimarum rerum notitia imbutum, necessariis subsidiis instructum, ac in hoc studiorum genere jam exercitatissimum.

Historiam literariam aliis horis vacivis strenue excoluit, multaque ad eam facientia, quæ ineunte hoc sæculo majori, quam ante, studio in dias luminis auras emittentur, scripta sibi comparavit. Ex Ephemeridibus eruditis præ aliis avidissime legit *Acta Eruditorum*, Lipsiæ evulgari solita, Bælii Novellas, quas vocavit, *Reipublicæ literariæ*,

riæ, ac Diarium Eruditorum Parisiense, quæ palmam reliquis hujusce generis scriptis dubiam reddunt.

Circa medium mensis Julii Collegium, uti nuncupant; physico-experimentale instituit immortalis memoriæ Vir, D. Fridericus HOFMANNUS, cui & VFFENBACHIIUS auditor jucundissimo, nec sine profectu, interfuit. Studium enim physicum tam rerum varietate, quam curiosarum, ac in omni vita utilium quæstionum exploratione cuiusvis facile se commendat. In primis vero illud hoc se nomine Nostro probavit, quod piis etiam de Creatoris sapientia meditationibus, quibus mirifice semper fuit delectatus, ansam præbeat. Hinc quoque Scripta illa, quæ Dei existentiam ac sapientiam ex creaturis demonstrare satagunt, velut Parkeri, Hallii, Bentleji, Raji, Nieuwenteitii, aliorumque maximo cum oblectamento & fructu studiose perlegit; imo RAJI de sapientia Dei opus ita placuit, ut ejus versionem aliquot ante obitum annos conficere cœperit, quam tamen, cum deinceps in Gallicum & Germanicum sermonem jam translatum, ac copioso CALVOERII commentario illustratum videret, ad umbilicum non perduxit.

Mense Septembri de lingua Græca addiscenda consilium, quod diu jam agitarat, persequi statuit. Cum enim hanc linguam nobilissimam ex communi errore, eam Juris

ris cultoribus minus esse necessariam, in Scholis neglexisset, nunc vero probe agnosceret, neminem sine ejus cognitione ad solidam pervenire eruditionem posse, probro sibi minime duxit, literas Græcas etiamnum addiscere. Obtulit ipsi se in hoc studio ducem quidam Artium liberalium Magister, Friebenius, homo probus ac doctus, qui tanta eum dexteritate instituit, ut elapsis duobus mensibus Novum Testamentum Græcum intelligere atque exponere satis bene valeret. Strenue deinde in hoc laudabili instituto perrexit, ac, divina gratia secundante, simul in pietatis praxi egregie profecit, ad quam quavis occasione, quam ipsi loci vel vocis cujusdam explicatio facile suggererat, graviter illum excitare pius Præceptor allaboravit.

Hoc tempore non modo dolores illos oculorum, quibus Argentorati jam vexatus fuit, sed alia etiam incommoda sensit, quæ lucubrationibus, quibus nimium indulgebat, adscribenda videbantur. Decrevit igitur auroram, communi tum Medicorum, tum aliorum opinione, Musis amicam experiri, ac matutinis studiis assuescere. Verum invita quasi Minerva isthoc consilii cepit. Licet enim per integrum mensis spatium id tentaret, irritum tamen hoc fiebat successu, adeo, ut inter legendum ac scribendum somno nondum exacto opprimeretur. Quantumvis etiam, ut eo alacrius

surgeret, corpus quieti citius dederit, sopore tamen ante suetum circa mediam noctem tempus non obrepente, inanis omnis non eo duntaxat tempore, sed quotiescunque id tentaret, fuit ejus conatus.

Mense Octobri duas Celeberrimus BUD-DEUS aperuit scholas, quibus doctrinam politicam & Historiam recentiorem explicandam auditoribus offerebat, quas sedulo frequentare magis e re videbatur, quam in historia antiqua tantum temporis consumere. Haud equidem Themidos cultori negligenda est historia prisca: ast opus non videtur, ut omnes Assyriorum, Medorum, Persarum, Ægyptiorum, Græcorum, aliarumque vetustarum gentium Reges in numerato habeat, incertas veterum epochas omni studio rimetur, ac fabulosas sæpe de gestis eorum narrationes excutiat. Sed potissimum omnino studium in mediæ ævi ac recentiori a Caroli M. temporibus historia collocandum videtur. Hujus enim penitior cognitio non ad alia solum Juris publici & feudalis præsertim studia rite tractanda pernecessaria, sed in omni etiam vita civili insignem plane usum præstat.

Ipsis Kalendis Novembris Vir illustris Christianus THOMASIUS novum lectionum vel doctrinarum suarum circulum ad ductum systematis sui, sub titulo: *Grund-Lehren* &c. divulgati, ordiebatur. Insignis hujusce Doctoris fama, ac variorum Scripto-

ptorum ejus, quam haud injucunde, nec inutiliter haëtenus instituerat, lectio Nostrum alliciebat, ut ejus quoque se auditorem præberet: cujus jam de viro hoc celebratissimo judicium ipsis ejus verbis exponere non piget,

Mox intellexi, ut verum fatear, Thomastum multo meliorem ac solidiorem Scriptorem esse, quam Doctorem. Agnoscebam enim, genium hujus viri minus aptum esse ad docenda ordine inculcandaque tyranibus principia, cum omne fere tempus in dubiis movendis ac digressionibus vagistereret. Ut vero attentos atque faventes auditores redderet, joci atque facetiis, ast immodicis fere, ac haud raro Doctorem gravem minus decentibus, scepticis etiam de Collegis aliisque viris doctis judiciis ac narrationibus pralectiones suas condire solebat. Observabam igitur, virum hunc magis idoneum esse ad eorum animos acuendos, qui apud alios debita jam fundamenta jecissent, quam ad docenda principia, ac formanda rudium ingenia. Hoc adeo verum deprehendi, ut plures noverim, qui præjudicio auctoritatis, quod ille sedulo cavendum alios in scriptis suis monuerat, capti, eo solo Praeceptore usi, ad solidam eruditionem minime pervenerunt, sed paradoxarum opinionum sectatores ac defensores satis inepti evaserunt, in Republica minus commodi, vel utiles in Collegiis atque officiis, quibus postea admoti, obstinati, morosi ac turbulenti, ac denique ad res tractandas gerendasque parum apti. Quod variis exemplis, si hujus loci esset, probare possem. Imo, si ingenue dicendum, quod res est, omnes

omnes fere auditores Thomasiани hoc vitio laborant, ut novarum, singularium ac paradoxarum opinionum studiosiores sint, adeoque aliis, Theologici inprimis ordinis hominibus, molesti, suspecti atque odiosi esse solent. Propria sane experientia hoc me docuit ipsum, & haud leves molestiae inde mihi enatae, quod pro Sectatore Thomasiани fuerim habitus, licet in hujus Magistri verba nunquam juraverim, plures ejus opiniones minime adoptarim vel probarim, ac contradicendi studium, quantum ratio ac equitas permisit, omni modo evitare studuerim. Hoc vero meum, ut libere, quod sentiam, dicam, de THOMASIO semper fuit judicium: Eum in Philosophia, inprimis Morali, excelluisse; in reliquis scientiis Criticum, ac novandi potius studium, quam profundam solidamque eruditionem commonstrasse; in humanioribus literis minus peritum, in historia vero literaria fere hospitem extitisse. Absit verò, ut fama tanti viri, quem semper maximi feci, ac cujus etiam manes ea, quae par est, Reverentia veneror, hoc meo judicio detrabere velim; hoc enim ingrati discipuli esset, cum grato potius animo multum me huic quoque Praeceptori meo debere agnoscam. Mentem itaque meam melius explicabo hoc modo: Philosophus fuit THOMASIUS eximius, ac judicii acuti climatique vi ac praestantia maxima praeclitus, iis vero, quae hodie a Viro docto in seculo hoc nostro, ut ita dicam, polyhistorico requiruntur, varia eruditionis subsidia non satis instructus. Propriis, ut ignea istiusmodi ingenia solent, meditationibus inherere valuit, quam multa lectione variam eruditionem
aliun-

aliunde acquirere. Hinc varias, aliosque latentes, veritates felicissime detexit, erroresque prostravit, quod eo felicius præstare potuit, quod Scepticus ac Scepticus fuerit insignis. Probo utique Clarissimi HEUMANNI de THOMASIO sententiam, quam in eleganti Conspectu suo *Reipublica literaria* tertium edito, duobus in locis tulit. Primo enim p. 176. ubi Scriptores in primanos, secundanos & tertianos haud inepte dividit, THOMASII in exemplum Primani jure posuit. Vocat autem HEUMANNUS primanos, qui ingenio judicioque florentissimi ex sua ipsorum penu proferunt & novas magni momenti veritates, & inveteratorum errorum detectiones. Altero in loco p. 362. summum ac verissimum hoc eidem tribuit elogium, quod primus fuerit THOMASIIUS, qui Philosophiam electricam, prostratis pristinis erroribus innumeris, in Germanicas Academias introduxerit. Ast THOMASIIUS non modo in Philosophicis, sed in omnibus fere aliis disciplinis atque scientiis auream sentiendi libertatem stabilivit, ejusque exemplum non modo Collegæ, sed & alii in Academiis Doctores strenue secuti, eandem libertatem in docendo atque scribendo omnibus hodie propugnant viribus.

Initio anni MDCCII. a quarto videlicet ad decimum usque quartum mensis Januarii diem D. Fridericus HOFMANNUS sectionem anatomicam sceminx ejusdam, capite plexæ, instituit, cui lubens, ut ea, quæ Argentorati in anatomicis didicerat, repeteret, interfuit VFFENBACHIIUS. Bene quidem pro sua in his dexteritate Illustris

stris HOFMANNUS hanc anatomen peregit; at, cum non nisi unicum suppeteret cadaver, præparationes ac demonstrationes deproperandæ erant, nec ea cura atque industria institui poterant, qua Argentorati (ubi in dies nova e Nosocomio haberi potuerunt corpora) fiebant. Singularem vero quandam observationem haud sine ingenti Sæctoris gaudio hujus cadaveris anatome subministravit. Scilicetprehendebat HOFMANNUS foramen, quod nuncupant, ovale, per quod fœtus in utero sanguis a dextro ad sinistrum ventriculum meare dicitur, adhuc apertum, quod alias consolidari solet. Narrabat Vir summus, quod in nonnullis salis coctorum Halensium cadaveribus idem animadverterit, causamque credebat tenellorum infantum in aquas immersionem, a patribus, ferocioris genti homuncionibus, fieri solitam ratus, ideo illos homines tam diu respiratione carere, ac sub aquis subsistere posse, cum hujusce foraminis ovalis beneficio fœtus in utero tam diu sine respiratione vivere queant.

Ipsis Kalendis Aprilis VFFENBACHIUS, præludium veluti majorum itinerum factururus, cum quibusdam bonæ frugis amicis Leucopetram sive Weissenfelsium iter animi causa suscepit, ac deinde paulo post reditum Dresdam, Saxonix Metropolin, & quan-

quantum fieri poterat, non modo quævis memorabilia in urbibus, templis, arcibus, cimeliarchiis, bibliothecis, armamentariis, hortis ac theriotrophiis probe perlustravit, sed studiose etiam in pugillares retulit. Freibergæ contemplatus est in æde Cathedrali augustissimum Electorum ac Ducum Saxoniae Mausoleum, & argentifodinas. Descendit quoque in unam ex præcipuis, vestibus, metalli fossoribus solitis, indutus, ac lampade instructus: & observavit omnes, qui in fodinis, tum in mineris per varia instrumenta eruendis, ac per cuniculos pulveris pyrii vi disiciendis, tum etiam in comportandis ac in altum evehendis exantlandi sunt, labores horrendos & periculosissimos.

Visis fodinis, omnes insuper officinas perlustravit, ubi metalla tunduntur, funduntur, liquantur, separantur ac purificantur, & infinitas, quæ ad ea tractanda adhibentur, operas haud sine voluptate perspexit. Ad Musarum suarum sedem redux, non solum hoc & sequenti anno prælectionibus THOMASII in Olearianam historiam, quæ sub titulo: *Einleitung zur Ræmisch-Teutschen Historie*, non sine applausu excepta fuit, Ethicam item suam, & Ill. COCCEJI Jurisprudentiam publicam, nec non D. Jac. Frid. LUDOVICI practico, ut vocant, Collegio sedulo

dulo interfuit, verum etiam in numerum auditorum excellentissimi Jcti, Samuelis STRYCKII, qui novum Juris, ut in Academiis loquuntur, cursum tum exorsus est, eo lubentius concessit, quod solida ac perspicua summi Viri jura docendi ratio, cum ejus prælectionibus nonnunquam interfuisset, ei maxime placuerit.

Tanta etiam erat venerandi senis in docendo sedulitas, ut vix unam alteramve horam per integrum Semestre neglexerit, quamvis ob ingravescentem senium perpetuo esset valetudinarius, asthmate inprimis ac pedum tumore ita laborans, ut in auditorium, quod in altissima ædium contignatione, sub ipso scilicet tecto, erat, primum per duos homines in sella quadam gestatoria e corio Russico facta, ferri deberet; deinde autem, cum non sine ratione gerulorum cespitationem lapsumque metueret, quod ipse ob proceram staturam obesitatemque admodum gravis ac ponderosus, cochlidium vero lapideum, per quod ascendendum & descendendum erat, satis esset angustum, per Mathematicum quendam machinam satis commodam fieri curaret. Sella erat cruribus carens, quæ ope duorum funium, duarumque in parte superiore scalæ decurrentium rotarum, ab unico homine per

per fuculam in tabulato ædum agitatarum,
 sursum ac deorsum ferebatur.

Mensa, dum in Academia Halensi versaretur, utebatur publica in diversorio primario, quod insigne Borussici Regni Heredis habet. Licet enim majores ipsi sumtus essent impendendi, varia tamen inde emolumenta percepit. Commensales ibi non modo ordinarios offendebat præter alios viros spectatissimos Jo. Erdmannum WITTE (c) Consiliarium regium, ac Nicolaum Hieronymum GUNDLINGIUM, tunc temporis Ephorum duorum Patriciorum Noribergensium; sed plurimi insuper honestæ ac illustris etiam conditionis advenæ, qui Berolinum transibant, vel illinc redibant, hospites & convictores erant. Ex talium itaque conversatione ac usu haud parum profecit, ac, quæ in publicis tunc agebantur, magno cum emolumento didicit. De rebus etiam eruditis crebri miscebantur sermones, quos GUNDLINGIUS pro ea, qua jam tum instructus erat, doctrina exquisita non tantum alebat, verum pro ingenio etiam, quo

(c) vid. Jac. BURCKARDI de sua ipsius vita Commentar. p. 38. sqq. ejusdemque Analecta ad hunc Commentar. p. 24. sqq. ac Cel. G. G. KUSTERI, mihi amicissimi, Marchiæ literatæ Specimen X.

quo gaudebat, festivo atque jucundo, multo sale condiebat. Longe sane honestiori ac liberiori vivendi ratione hic ei licuit uti, quam in ordinario studiosorum convivio, ubi pravorum quorundam confortium ac inevitabilis fere imitationis necessitas multos corrumpere solet.

Tandem vero, ut omnium rerum est satietas, vitæ eum academicæ tædium subito invasit. Maestus autem est ante abitum, post emensum feliciter liberalium artium ac Jurisprudentiæ ambitum, & exploratam contestatamque solitis examimbus eruditionem, iis honoribus, quos indefessa ejus industria, ac decoræ sociata virtuti scientia merebatur, brabeuta Virò Illustri Christiano THOMASIO, Docturæ in Civili & Canonico Jure charactere ac privilegiis insignitus, sub cujus etiam præsidio die VIII. Sept. A. MDCCIII. plaudente auditorum caterva, Dissertationem suam inauguralem de Quasi - Emancipatione Germanorum, occasione Reformationis Francofurtanæ Part. II. Tit. I. §. IX. masculæ defendit.

EXPLICIT PARS I. VITÆ VFFENB.





V I T A
B. ZACH. CONRADI
AB VFFENBACH
CONTINUATA.



Mnibus rite peractis, et bibliotheca sua, quam jam satis locupletem habebat, in Patriam transmissa, ad itinera suscipienda se composuit.

Qui enim jam in utero materno veluti peregrinatus olim fuerat, ingenti flagrabat desiderio, varias pervadendi regiones, et quævis memorabiliora in iis contemplandi. Paraverat quoque Schema vastissimum itinerum per universam Europam, nulla provincia, etiam remotissima, excepta, perticiendorum. Vix sine risu dein maturiori ætate (sche-
Pars II. d ma

ma hoc perlustrare potuit. Notarat singula loca , ac quo ordine et tempore quodlibet eorum adeundum , et quamdiu in præcipuis locis ac civitatibus subsistendum. Calculo probe subducto , minimum novem annorum spatium ad omnia peragenda requisitum fuisset , ut de infinitis , ad tam longum iter necessariis , sumtibus fileamus.

Eo autumnio illa per Saxoniam loca tantum , quæ nondum attigerat , perlustrare , ac Berolini per hyemem instantem subsistere , proximo autem vere per Holsatiam in Daniam ac Sueciam progredi animus erat. Sed hoc, quicquid erat consilii , sufflaminatum deinde , cum Berolini degeret , fuit ab illius Curatoribus , cum in patriam revocantibus.

Singulari beatissimi Viri beneficio sunt in manibus meis , ac eximii instar thesauri a me asservantur Diaria tam hujus brevioris , quam reliquorum ab eo deinde peractorum itinerum , in quæ memorabilia sibi ubivis animadversa studiose retulit.

Amplissimus igitur mihi hic pateret campus , e quo multa notatu dignissima depromere , et huic commentationi inferre facile possem , nisi angustiores obstarant

rent limites, quibus hancce opellam voluit circumscriptam honestissimus Bibliopola, qui manus ipsi obstetricantes præbuit. Eo autem lubentius morem illi gero, quod ejusdem jam sumtibus eximia descriptio rerum notabiliorum, in itinere præcipuo, A. MDCCIX. et sequentibus per Germaniam inferiorem in Belgium et Angliam feliciter peracto, a Nostro observatarum nitidis excudatur typis, æneisque elegantissimis tabulis condecoretur. Nec spes plane deest, fore, ut et breviora, quæ illud antecesserunt, itinera pari aliquando fortuna gaudeant.

Abunde autem, quod in antecessum hic monendum est, e laudatis Ephemeridibus elucet, quam provide et utiliter sua instituerit itinera, quam parcus fuerit temporis, quam sagax et assiduus rerum memorabiliorum ruspator, quam studiosus mercium literariorum, quas præ omnibus aliis maximo semper in pretio habuit, conquisitor, quam alieno ab otiosis discursationibus, turpium voluptatum illecebris, computationibus, quas magna juvenum peregrinantium pars alias confectari solet, extiterit animo, quam cupide ubivis ingressus sit veneranda Musarum domicilia, quam suaviter in illis bonarum mentium pabulo, quovis sesamo et papavere dulciori, refectus optimus VFFEN-

BACHIUS, in illo viridi vernantis ævi flore cum Viris jam et senibus mascula eruditione ac prudentia certans.

Ita igitur animatus die XI. Sept. discessit Lipsiam, omnis elegantiae magistrum, ibique præter cætera lustravit Collegium Paulinum ac Petrinum, Museum Linkianum, Martini NABOTHI Præparata anatomica, Bibliothecas Thomanam et Paulinam, quum ad Senatoriam aditum frustra quælivisset, ac Hortos elegantissimos, interque eos præsertim Bosiorum, Apfeldii, Guldeni et Schambergeri, Viros etiam inclytæ hujus Academiæ celebriores convenit, ac in diversorio, ubi morabatur, convictorem habuit clarissimi nominis Virum, Wilhelmum Ernestum TENZELIUM, ex cujus vero usu ac consuetudine admodum difficili atque injucunda parum proficere licuit, cum auditus difficultate adeo laborarit, ut pene pro surdo fuerit habendus.

Hinc Cizam per Pegavium profectus, Principis Arcem selectumque librorum apparatus, cujus magnam partem Thomæ REINESII Bibliotheca conficit, Theriotrophium ac MITTERNACHTII Museum spectavit. Inde abiit Zwiccaviam, ac viso, duce VINHOLDO Rectore, celebri per duo jam sæcula Gymnasio et Bibliotheca

theca satis instructa , divertit ad fodinas carbonarias , horæ spatio ab urbe distantes , et lapidicinas. Illinc perrexit Altenburgum , Templum S. Bartholomæi , alterumque , quod olim Fratrum discalceatorum fuit , Bibliothecam et Ducalem , et Gymnasii , Arcem , Hortum et Theriotrophium Principis , Museaque KUNITSCHII ac CLAUDERI lustrans. Unde Torgam progressus , Arcem , ejusque ac Civitatis Tempia , Gymnasium et Bibliothecam perspexit , prope Torgam vero Anatum sylvestrium capturam , in lacu satis spatioso , ad horæ dimidium ab Urbe sito , Equariam electoralem in vico Delen , Liechtenburgum , ubi Electrix Palatina vidua commorabatur , ac denique Annæburgum , vel potius Theriotrophium prope illud. Postea Wittebergam pervenit , visisque ibi auditoriis academicis , templis tum aulico , tum primario , S. Mariæ quondam dicato , Cœnobio Augustiniano , Museo NICOLAI , Bibliotheca et publica , et privata Conr. Sam. SCHURZFLEISCHII , salutatisque et hoc et aliis Viris celebrioribus , tandem die XXIV. ejusdem mensis Berolinum abiit. In hac Urbe vere regia oculos animumque pavit lustratione Arcis , quæ tum ingenti sumtu ac augusto splendore exædificabatur , Templorum præcipuorum , Theriotrophii ac Viridarii regii amœnissimi , Equilis , cui

dextrorsus juncta est palæstra, docendis ac exercendis equis destinata, Bibliothecæ potissimum, cujus claustra ac scrinia ipsi aliquoties humanissime fuere reclusa, Cimieliarchii, in quo veluti in compendio res totius orbis rariores ac præcipua artis naturæque miracula cum stupore vidit, Antiquitatum thesauri, optime digesti, inque tribus amplis conclavibus reconditi, incomparabilis Nummorum Gazæ, quatuor abacis, diluti juniperi lacryma artificio Daglii inductis, inclusæ, quibus quintus mox accedere debebat, priscis aliisque memorabilioribus nummis uncialibus asservandis inserviturus, ac tandem Academiæ Scientiarum regiæ, illius Apollinis & Minervæ delubri. Nec omisit, prout erat rerum scitu dignarum scrutator solertissimus, varias invisere officinas, interque has monetariam, singula, quæ in cudendis minoris pariter ac majoris moduli nummis usu veniunt, perspicacibus oculis observans, ac fusoriam, omnem varia ex ære et orichalco fundendi rationem curate investigans. Adiiit etiam plus simplici vice regium peristromatum textorem, ortu Gallum, qua ratione aulæa, magnificis operibus picta, ac auro argentove variegata, et nec ipsis Bruxellensibus palmam cedentia, concinnentur, sedula inquisitione perscrutatus. Observavit insuper apud Batavum quendam modum vasa fictilia

lia Sinica more Delphico conficiendi, ex terra partim hic effodi, partim e Belgio et Anglia arcessi solita.

In templis solenne ipsi erat, sedulo præfertim investigare Epitaphia, viris præclare meritis posita, eaque, si digna videbantur, describere. Cum vero in quadam ædis, B. Mariæ olim sacratæ, crypta cerneret sarcophagum, in quo, quicquid mortale habuit, deposuit Frid. Rud. Ludovicus, Lib. Baro de CANIZ, quem divini ingenii fama, et inusitata carmina nostro sermone pangendi facultas pridem reddidit immortalem, illudque Viri quidem illustris nomine ac nota anni dieique natalis pariter ac emortualis insignitum, sed nullum plane Epitaphium adjectum animadverteret, huic sæculi nostri in tantum Heroem iniquitati indignatus, recessit. Sed haud dubie illi, qui feralia ipsi officia persolverunt, rati, solum ejus nomen instar omnium elogiorum esse, hoc unum sandapilæ inscripserunt, cum virtutibus ipse suis et carminibus elegantissimis sibi crexerit monumentum, quovis ære ac marmore perennius, regalique situ Pyramidum altius, quod non imber edax, non aquilo impotens possit diruere, aut innumerabilis annorum series, et fuga temporum. Ego igitur paucis mutatis in vatem consummatissimum transfero egregium epigram-

pigramma, in tumulum Jac. CUJACII Avarici Biturigum, cum adhuc A. 1639. epitaphio careret, a Vincentio Fabricio (a) confectum:

*CANIZI cineres capulo veneratus in isto,
Ne fama dubites, hospes, habere fidem.
Nam tumulus titulo caret; est sine marmore bustum:*

*Indice eget, quamvis sit sacer ille locus,
Sed caperet dignum tanto qui nomine carmen,
Scilicet in toto non fuit orbe lapis.
Adde, quod, aternos dum versat patria libros,
Credidit, auctorem non potuisse mori.*

Inter plures eruditos celebritate nominis conspicuos salutavit Venerandum Theologum, D. Phil. Jac. SPENERUM, Ecclesiæ tum Nicolaitanæ Præpositum, in quo, præter singularem animi vitæque sanctimoniam, eruditionem summam cum pari certantem humanitate lætabundus suspexit. Nondum is deposuerat Francofurtanæ, cui olim laudabiliter præfuit, ecclesiæ memoriam, atque adeo vel hoc nomine Nostrum obviis veluti ulnis perquam

(a) vid. ejus Orationes, Dissertationes, epistolas et poemata, junctim divulgata, p. 715. conf. HUETII Commentar. de rebus ad eum pertinentibus, p. 382.

quam comiter excepit. Probe adhuc recordabatur integræ nobilissimæ gentis Vffenbachianæ, quæ illum quondam in oculis atque deliciis habuit, ac de aliis quoque Familiis Francofurtanis tot singularia referebat, omnes quarundam lineas et genealogias iusto ordine enarrans, ut Nostro esset miraculo, Virum tam provectæ ætate, tam diu jam Francofurto absentem, totque gravissimis obrutum negotiis, adeo felici adhuc rerum Francofurtensium gaudere memoria. Monstrabat igitur ipsi topographicam Civitatis Francofurtanæ tabulam, a Meriano æri incisam, parietique ante Museum appensam, illam se subinde per otium oculis permeare, atque hoc pacto pristinarum rerum memoriam confirmare dictitans.

Convenit etiam ejus filium, Christianum Maximilianum SPENERUM, Medicinæ Doctorem, et Archiatrum regium, cui a magno parente veluti per traducem ingeneratus erat amor studii genealogici atque heraldici, in quo ille viris, in harum rerum scientia exercitatissimis, palmam præripuit, studiose ejus Physiotameum contemplatus.

Adiit præterea solertissimos quosdam artifices, Reznagelium scilicet, in vitris argenti modo cælandis principem, Daglium,

um, in rebus sandaracino diluto imbuen-
dis dexterrimum, Lævinum gente Judæ-
um, sigillorum scalptorem scientissimum,
Weyhenmajerum, patria Ulmensem, et
Andream Rothium, sculptores et statuari-
os vel Praxiteli comparandos, quorum
ille præsertim incomparabilis etiam in effi-
giebus ex cera fingendis artifex erat: ri-
matus pariter ac miratus exquisitissima ar-
tis, in qua eorum quisque excellebat,
specimina. Et quis, quaeso, dubitet, quin
VFFENBACHIUS noster, cui dulces an-
te omnia Musæ erant, officinas etiam li-
brarias diligenter visitaverit, inter quas tum
Rudigeriana reliquis præstitit? In hac cum
aliquando in famosum illum Stoschii li-
bellum, quem *Concordiam rationis et fidei*
inscripsit, inquireret, Rudigerus, vir ali-
as satis humanus, nullum plane respon-
sum dabat, instantem vero haud sine gra-
vi indignatione quærebat, num ipsum
tentare, vel grandi periculo exponere
cuperet. An ignoret, quod opusculum
illud auctoritate regia suppressum, ac tan-
tis sub pœnis prohibitum sit, ut, qui ali-
quod ejus exemplum possideat atque reti-
neat, ingenti mulcta, qui autem vendat,
fustigationis pœna afficiendus sit? Cum
vero intelligeret, Nostrum esse peregri-
num, ac nescire, quod tam gravi pœna li-
bellus iste sit prohibitus, mox placabatur,
Nihilo tamen minus plura illius exempla-
ria

ria apud curiosos latitare, cognovit deinde VFFENBACHIUS, cui unum etiam a Medico quodam sub summa silentii fide ad unius dieculæ usum fuit concessum, quod sua manu, noctis quoque tempore adhibito, descripsit.

Interim vero etiam subinde divertit in loca Berolino vicina, ac arces regias, quæ magno satis numero circumjacent, Potsdanium puta, Caput, Bornem, Glüncke, Spandaviam, Neuendorffium, Pessernavium, Oranieburgum, &c. Excurrit quoque Malchavium, unico ab Urbella-pide distans prædium amplum ac splendidum Pauli a FUCHS, ex intimis Regis Consiliariis primarii, quod ipse Rex atque Regina animi causa frequentare solebant. Bibliothecam ac Museum Illustrissimi Viri conspiciatus, aptiorem Musis ac studiis locum inveniri vix posse ob summam non modo tranquillitatem, sed amoenissimum etiam undique per hortum prospectum, censuit. Spectatis porro urbis ad portam Spandavianam propugnaculis, per Bernaviam, Neostadium et Angermundam se Suetum contulit, ac, arce aliisque ibi visis, veloci cursu Custrinum festinavit, in qua urbe munienda artem natura vicisse videbatur. Hinc conscendens naviculam, secundo Viadro, ac posthac Wartha le-ni aquarum tractu in Viadrum sese insinu-

nuante, Sonneburgum concessit, quod oppidum cum Arce equestris Johannitarum Ordo possidet, conspecturus ibi ornatum, et insignia, adhiberi consueta, quando equites veteri ritu stricti gladii percussu creantur: sed desiderio frustratus suo ob absentiam ejus, qui Ordini a secretis ac sacri custos scrinii erat, vidit tantum reliqua Arcis et Templi memorabilia, Custrinumque navigio rediit, peracta sic felici sydere omnium prima, quas in itineribus suis instituit, navigatione.

Inde Musas Viadrinas exosculaturus, in Academiam Francfurtanam properavit. Munus tum docendi in ea præclare obibant inter cæteros Viri doctrina et laudibus insignes, Henricus et Samuel COCEJI, Jo. Christophorus BECMANNUS, Samuël STRIMESIUS, Barth. HOLZFUS, Arnoldus WESENFELDIUS, et Leonh. Christoph. STURMIUS. Præter Templum Iustravit Academiæ Bibliothecam, cujus Catalogum BECMANNUS edidit. Observavit in illa duo armaria, quorum unum non nisi Disputationum, ab hujusce Universitatis Professoribus publice ventilatarum, voluminibus, Gallicano more ligatis, iisque maximam partem primæ magnitudinis, instructum erat: alterum Voluminibus, eodem modo compactis, quæ Programmata, Orationes, et Carmina,

na, hic in lucem emissa, complectebantur, quibus semper adjici studiose solebant scripta hujusce generis singula, sensim in dias luminis auras prodeuntia, ac in posterum quoque proditura adjicientur: quod laudabile institutum se Nostro mirifice probavit.

Avidis etiam oculis apud laudatum BECMANNUM, multis nominibus de illa Academia præclare meritum, contuitus est tam varia naturæ curiosa, quam scrinium, diversi generis urnis, lampadibus, ac utensilibus prisca ævi, in circumjacente regione potissimum erutis, copiose repositum. Divertit hinc in vicinam regionem, ut quædam naturæ prodigia indagaret, quorum notitiam ex BECMANNI scriptis et aliunde hauserat. Et primo quidem visitavit Poetarum, quem nominant, fontem, prope Carthusiam in vinea quadam situm, in cujus aquas conjecta virgulta, folia, ligna et alia, quæ foramina habent, in lapides converti, priore forma manente, olim jam Georgius AGRICOLA, Lib. II. de Natura eorum, quæ effluunt exterâ, f. 543, ac post alii naturæ scrutatores tradiderunt. Sed animadvertit Noster ex *autoresia*, ea, quæ in fontem hunc injiciuntur, non plane in saxa permutari, verum lapides duntaxat cortice obduci. Tacito autem quodam gaudii sensu fuit miri-

rifice circa hos latices affectus, quod hic olim frequenter versatos esse nobilissimos Poetas, Conradum CELTEM, Ulricum HUTTENUM, Eobanum HESSUM, Mich. HASLEBIUM, Jo. et Christianum SCHOSSEROS, aliosque mente recoluerit, atque adeo vestigia veluti eorum impressa conspiceret, ac venerari ipsi licuerit. Accidit igitur illi idem fere, quod Ciceroni quondam, Athenis diversanti, qui Lib. V. Cap. I. de Finibus ita de se: *Mihi Platonis in mentem venit, quem accepimus, primum hic disputare solitum, cujus etiam illi hortuli propinqui non memoriam solum mihi afferunt, sed ipsum videntur in conspectu meo ponere. Hic Speusippus, hic Xenocrates, hic ejus auditor Polemo, cujus ipsa illa sessio fuit, quam videmus.* Tantorum igitur Virorum, quos *Τεχνησὺ αἰώνος λείψανον* jure vocaveris, ad hunc fontem meminisse, juveni nostro philomuso dulce erat.

Exin Wrizigium, pagum uno lapide Francofurto distantem, petiit, spectatum in regione adjacente novam fossam, qua mediante Viadrus et Sprea, indeque mare Germanicum et Balthicum summa commerciorum utilitate junguntur, opus stupendum, frustra olim tentatum, sed tandem sub auspiciis FRIDERICI GUILIELMI, Electoris gloriosissimi, successu felici perfectum, et octo cataractis lapideis, quas

quas amotis ligneis FRIDERICUS I. Potentissimus Borussiae Rex, substituit, instructum. In altera pagi regione in exiguo monte visit scaturiginem, in qua lapides, rubris conspersi maculis, instar sanguinis guttarum, sunt obvii. Hinc Lichtenbergam perrexit, ac in vicina ejus pagi regione antiquum illud monumentum lapideum, tumulo prisca cujusdam Herois, uti videtur, appositum, et ab accolis *Napfchens-Stein* appellitari solitum, cujus BECMANNUS in Accessionibus histor. ad Wolfg. JUSTI Descriptionem Francofurti ad Viadrum, f. 23. sq. meminit, exquisivit, eo-que modo comparatum vidit, quo a viro laudato describitur.

Haud parum vero ingenuas hasce delicias, quibus tam suaviter truebatur, disturbarent literae Curatorum, Berolinum reduci redditae, quibus, nihil tale opinans, in patriam revocabatur. Sarcinis itaque convasatis, ac plurima Berolino salute dicta, sub ipsum anni MDCCIII. finem reditum ad suos instituit. Eadem vero via, qua Berolinum venerat, Lipsiam celeri cursu reversus, jucunde spectavit Bibliothecam Senatoriam, in quam eum insigni comitate deduxit illius Praefectus, Godofr. GRÆVIUS, Criticorum facile principis Jo. Ge. GRÆVII frater. Invenit eam opulento librorum impressorum

apparatu instructissimam, et codicibus quoque MSS. haud paucis superbientem, ac Orientalium præsertim exquisita copia, quorum plurimi e Bibliotheca Wagenfeldiana paulo ante huc migraverant, affluentem. Intento etiam vultu consideravit Mumiam Ægyptiacam, de qua singularis extat Kettneri dissertatio. Doluit Gravius, Lipsiensem cœli temperiem esse illi aliquantum incommodam, unde caput quoque ejus abruptum sit: cæteroquin autem erat integerrima, omnibus integumentis ac signis hieroglyphicis prædita, et omnium, quod quidem constet, maxima atque pulcherrima(b). Luculenta quoque veterum numismatum copia præsto erat, quorum contemplatione insigniter fuit oblectatus.

Tandem Noster ad patrios focos d. x. Jan. A. MDCCIV. divino favente Numine, valens sospesque rediit, ac per integrum, et quod excedit, lustrum, si excursions quasdam excipiam, hic substitit, privatæ vitæ tranquillitatem atque dulcedinem sectatus, ita tamen, ut totum illud otium, in literarum studiis consumeret,

(b) vid. b. Gottfr. Christiani GOEZII, Prætoris et Bibliothecæ Senatoriæ Lipsiensis, dum viveret, Præfecti, elegans Programma, quo publicum Bibliothecæ hujus usum A. 1711. prid. Non. Aug. indicavit, p. 36. sq.

ret, et auspicata vastissimæ illius Bibliothecæ, e qua tot in orbem eruditum redundarunt utilitates, fundamenta incredibili solertia poneret; quod tempus felicissimam vitæ suæ periodum appellitare consuevit.

Musas sibi tam caras, ac in Academiis et itineribus flagranti industria cultas, secum ad Penates suos reduxit VFFENBACHIUS. Mente igitur diligenter primo omnium recolenda sibi sumit ea studia, quibus Argentorati atque Halæ sedulam navarat operam, probe gnarus, repetitionem esse illorum quasi animam, per quam ea demum veram vivacitatem et masculum vigorem accipiant. Quodam vero præsertim naturæ ductu ferebatur in amorem historiæ literariæ, quam ad solidiora facere aditum, omnisque doctrinæ ac sapientiæ fontes recludere censebat. Satis ergo illi erat, quod ageret, tempusque, quo nihil ipsi fuit pretiosius, jucunde pariter ac fructuose transmitteret, veræ eruditionis dulcedinem cuilibet oblationis generi longissime præferens.

Tam dulces autem ipsi erant Musæ, tam suaves bonæ literæ, ut eo quidem tempore noluerit, certo se vitæ generi addicere, ne scilicet hoc pacto ab earum cultu avelleretur; præsertim si iis impli-

caretur negotiis , ad quæ animi indoles haud erat proclivis. Lætitandi, meditando , scriptitandi voluptatem cum Galliæ quondam lumine, Guil. BUDÆO (c) nec ære, nec auro permutandam esse censuit, ne sceptris quidem ipsis, nedum fascibus ad vulgus splendorem suum venditantibus. Jo. Harius ob copiosissimam Bibliothecam, maximis sumtibus ac inexplebili industria collectam, vocatus olim est *Joannes cum libris* (d). Noster nunquam fere et nusquam sine libris erat, sive deambulare per campos, læto gramine decoratos, sive curru veheretur, sive patulæ sub tegmine fagi jucundisque sylvarum viretis recubaret, sive ripis Mœni, raucò murmure suaviter strepitantis, assideret. Jucundiori anni tempore, urbanis se turbis subducturus, secedere solebat in prædia Generosissimi Affinis LINDHEIMERI amœnissima, sed libris semper comitatus et Musis, quas secum quoque rusticatum ire jussit.

Quum vero in eo inexhausta esset legendi et variam ex libris doctrinam haurien-

(c) in Epistolis p. 36. edit. Basil. A. 1521.

(d) vid. Jo. LOMEJER. de Bibliothecis Cap. X. p. 209. edit. Schmid. coll. Clar. Virorum Epistolis, a GABBEMA Harlingæ A. 1654. evulgatis, p. 604.

riendi cupiditas, hanc ejus φιλαμαθία
βιβλιοφιλία ceu fidelis pedissequa inse-
quebatur. Apud animum igitur statuit,
insignem condere Bibliothecam, non sibi
duntaxat, sed aliis etiam, literis strenue
operantibus, uti bono publico natus erat,
profuturam, nullis sumtibus, nulli ope-
ræ hac in re feliciter peragenda parci-
tus, cui studio cum per omnem vitam
fuerit deditus, magnumque inde nomen
nactus, potissima, quæ ad Bibliothecæ
illius spectant historiam, sedulo annotare
nostrarum esset partium, id quod rei eti-
am librariæ curiosis neque inutile, neque
injucundum fore sperari posset. Quoniam
vero limites nobis præscripti id haud per-
mittunt, tertio hujus Sylloges tomulo
præfigam singularem de studio b. VFFEN-
BACHII bibliothecario commentationem.
Nunc autem omnem hanc rem in pauca
contraham.

Magno animo vastissimæ Bibliothecæ
adornationem aggressus est, ad quam cun-
ctis, illa in rei literariæ incrementum usu-
ris, liberrimum deinde concessit aditum.
Conspirasse autem inter se videtur fatum
et consilium, propitiamque satis exper-
tus est fortunam in hoc laudabili institu-
to, ac MSStis præcipue Codicibus ingea-
ti numero congerendis. Principio quidem
non certos sibi limites fixerat, intra quos

se potissimum contineret animus librorum habendorum avidissimus, sed juvenili quodam fervore abreptus, in omne se eorum genus laxis habenis diffundere coepit. Agnovit autem postea, patentissimum hunc campum ingressus, Croesi etiam gazas sic tandem exhauriri posse. Prudens igitur ac damno suo eruditus, mutavit, tempore procedente, mentem, ac præ cæteris libros historico-politicos, illos item, qui ad rei literariæ notitiam spectant, quique sunt paulo post prima artis typographicæ incunabula typis exscripti, præterea rarius obvios, ac eos præsertim, quos prohibitos vulgo vocitant, et denique manu exaratos, præcipue vero eruditorum Epistolas, libros item manu doctorum virorum notatos atque illustratos, ac tandem documenta atque Francofurtensia, quanta posset, industria colligere, haud tamen plane neglectis aliorum generum libris, decrevit.

Læta vero in dies incrementa capiente Bibliotheca, crevit et ejus in illa digerenda, apteque collocanda labor ac industria. Cumprimis multum operæ studiique consumsit in adornandis librorum suorum Catalogis. Vix credibile est, quantum molestiæ hoc in negotio devoraverit, ut aliorum potissimum, opibus literariis, tanto a se sumtu congestis, uti cupientium com-
moda

moda promoveret Vir laboris patientissimus. Ne quid de aliis bibliothecæ suæ Catalogis ab eo concinnatis dicam, quantæ, fœdes, molis erat, illum specialissimum omnium librorum et opusculorum in variis collectionibus comprehensorum, vel aliis insertorum annexorumve Indicem conficere, quem A. MDCCVI. exorsus est, cum numerus illiusmodi scriptorum A. MDCCXXV. ad sexagies jam mille excreverit (e)?

Animadvertens autem, Francofurtum haud satis librorum ad Bibliothecam suam strenue locupletandam sibi subministrare, peregrinationes quoque ejus causa suscipiendas duxit, quarum præcipuum fructum in doctrinæ suæ copia feliciter ex conversatione cum eruditis augenda, ac in libris Codicibusque in patria frustra quæsitis adipiscendis consistere censuit. Non ignotum ipsi erat, quam pretiosa spolia ex itineribus in Orientem peraëtis Guil. POSTELLUS, Augerius Gislenius BUSBEQUIUS, Achilles HARLÆUS Dominus de Sancy, Thomas ERPENIUS, Theodorus PETRÆUS, Jac. GOLIIUS, Joannes GRAVIUS, Christianus RAVIUS, Eduardus

e 3

dus

(e) vid. si placet, quæ de illo in singulari observatione, Syllogæ nostræ epistolicae inserta, p. 41. sqq. diximus.

dus POCOKIUS, Georgius GENTIUS, Robertus HUNTINGTONUS, alique domum reportaverint; quot optimæ notæ libros et Codices in peregrinationibus suis POGGIUS, Pomponius LÆTUS, Conradus CELTES, Didacus MENDOZA, Jo. SAMBUCUS, Jac. Aug. THUANUS, Nicol. Claudius Fabricius de PEIRESCIO, Jac. GRONOVIVS, Marqu. GUDIUS, C. S. SCHURZFLEISCHIVS, et innumeri alii sibi vindicaverint. Statuit igitur etiam VFFENBACHIVS, quam primum fieri posset, professionem in Belgium et Angliam librariæ suæ potissimum suppellectilis ac doctrinæ cumulandæ gratia facere, ibique Bibliothecis lustrandis, eruditissimis salutandis, libris codicibusque emendis animum suum φιλομαθείας oblectare pariter, ac multarum rerum utilium peritia instructiorem reddere. Cum vero nemo tunc esset ex consanguineis, qui facultatum ejus curam suscipere vellet, illius consilii expeditio in futurum rejicienda erat tempus. Interim tamen varias excursions, cœu majoris itineris præludia, instituit.

Scilicet animi gratia A. MDCCV. d. XI. Maji Hanovium, quod Francofurto vicinum amœnissimumque est oppidum, excurrit, ibique amicitiam cum Viris doctissimis, Jo. Dan. CRAMERO et Theodoro

ro HASÆO, inclyti Gymnasii tum Professoribus, contraxit, multis in rebus postea ipsi frugiferam, cum Crameri potissimum opera non paucis bonæ notæ libris Bibliotheca ejus fuerit adaucta, quos inter præcipuo loco commemorandus est incomparabilis ille Codex cerimonialis MS. Imp. Constantini Porphyrogenneti, de quo ejusque fatis ac Vffenbachii studio in editionem ejus curandam impenso in Sylloge epistolari p. 6. sqq. ex instituto differui.

Eodem etiam mense excursionem Belgicam cum ornatissima Sorore ac aliis familiaribus suscepit, die nimirum XXVII. Maji Francofurto abiens, ac d. XVI. Aug. domum reversus. Paucula tantum ex hujus itineris Diario speciminis gratia decerpemus, partim ad curiosâ naturæ et artis, partim ad rem literariam spectantia.

Amstelodami admirabundus contemplatus est VINCENTII, mercatoris cujusdam, Technophysiotameum plane incomparabile, cui rite perlustrando vix annus suffecisset, curate autem describendo plura majoris formæ volumina complenda fuissent (f). Prodigiosa inprimis rerum

e 4

na-

(f) conf. Clar. Jac. Burckhardi de sua ipsius vita Commentar. p. 55. sq.

naturalium omnis generis copia illud abundabat, interque eas variis rarioribus animalibus, embryonibus, monstris, spiritu vini conservatis, vitrisque inclusis: conchyliorum et insectorum, ex omnibus Orbis partibus conquisitorum, incredibilem ostentabat multitudinem; cunctaque tam eleganter ac scite disposita erant, ut dubius fuerit Noster, num ordo magis, an res ipsæ admirationi contuentibus esse deberent. Ipsa possessoris ingeniosa uxor insecta solerter præparare, summa industria et arte agglutinare, atque sexcentis modis mirifice disponere solebat. Integra veluti topiaria aliasque figuras jucundissimas ex artificiosa insectorum dispositione tam affabre confecerat, ut, nisi quis propius accessisset, primo intuitu omnia vel Phrygiana esse opera, vel penicillo aut acupicta, existimasset: tam concinne et scite colores insectorum et reliqua fuere disposita et conglutinata. Singula conchylia speculorum instar erant expolita, quod Amstelodami quidam mira arte facere solebat, victum hoc labore quærens. Uxor omnia secundum sua genera tam belle disposuerat, ut in singulis loculamentis pro eorum diversitate diversa vel topiaria, vel sydera, vel alia ex iis Dædaleo ingenio amussitata, inque concinnam seriem digesta conspicerentur. Cuncta autem tam munde ac nitide erant conservata, ut ne pul-

pulvisculum quidem in ullo deprehendere licuerit. Sollicite hinc cavebat Possessor ac artificiosa ejus conjux, ne quis coma mutuaticia, pulvere odorato conspersa, ornatus propius ad insecta potissimum accederet, eaque pulvisculo perfunderet. Centum sibi hic Argi exoptasset oculos, ac integri anni tempus, quo singula penitius contemplari, sapientiamque Dei in minimis decenter admirari potuisset. Ipse possessor, singulari humanitate pollens, binis hebdomadis diebus suum thesaurum cunctis lustrandum permittebat, quem ejus jam parens adornare cœperat, ipse vero strenue adhuc in dies locupletabat, ex omnibus orbis partibus insecta aliaque stupendis sumtibus amicorum opera conquirens. Summo autem jure huic naturæ artisque Theatro inscribi potuissent illa, quæ olim quidam cecinit de Bernhardi PALUDANI, Medici Enchusani, Thaumatheca, in qua non ægre tulisset PEIRESCIUS, teste GASSENDO (g), tanquam ad Cyaneos scopulos consenescere :

e 5

Quic-

(g) in Vita Peirescii Lib. II. p. 127. De hoc Paludani-Cimeliarchio vid. Georg. Hegenitii Itinerarium Frisio-Hollandicum. p. 85. sq.

*Quicquid terra sinu venisque recondidit imis ,
 Thesauros Orbis hac brevis arca tenet.
 Laus magna est , tacitas natura inquirere vires ,
 Major , in hoc ipsum munere nosse Deum.*

Harlemi cupidus erat videndi illa primigeniæ typographiæ monumenta , in Curia custodita , quæ Laurentio Costero suo adscribere solent Belgæ ; cumque MISSIONIUS (h) Speculum humanæ salvationis , quod eorum præcipuum est , tanta ibi aservari sollicitudine referat, serico involutum , et argentæ capsulæ inclusum , ut ejus curam aliquot e Senatorum ordine gerant, quorum singuli peculiarem ad capsulam illam referendam clavem teneant, ne unus absque alterius ope cimelium hoc contrectare, aliisque ostendere queat, Vfsenbachius rem longe aliter se habere, ac Missionius nugatur , non tunc modo , sed deinde etiam A. MDCCXI. et MDCCXVIII. *avtoris* tertium repetita, didicit. Summa enim facilitate, ternis istis vicibus cimeliorum illorum inspectio ipsi concessa. Nam cum primum in Curia Harlemensi in libros istos inquireret , illico quidam Scribarum, Vir perquam humanus, aderat, qui eum absque Senatorum convocatione, vel clavium flagitatione, in hypocaustum,

Ta-

(h) in Itinerario per Italiam , Germanice edito Lips. A. 1713. Tom. I. p. 34.

Tabulario Civitatis proximum, deducebat, in quo sine mora ex hoc deportabat capsulam quandam, non argenteam, qualem fabricat Missonius, sed ligneam, formam libri cujusdam, vel voluminis spissioris, referentem, in qua cimelia illa erant recondita. Capsula hæc non seris, quibus idem illam instruit, sed uncinis orichalceis, ut libri solent, clausa erat, in quorum uno cælatum: SPECULUM HUMANÆ SALVATIONIS LAURENTII COSTERI: in altero vero idem Belgice: SPIEGEL MENSCHLICHER BEHOUDENISSE. Remoto operculo, expromebat Renzius (hoc Scribæ nomen fuit) non unicum Speculum, sed quinque volumina, numeris pro ætatis, ut asserebat, ratione signata. Nullum vero eorum, ut denuo fingit Missonius, serico erat involutum, sed corio rubro, ut videbatur, Moscovitico erant compacta, quæ omnia et singula solus ille ostendebat, et citra piaculum contrectanda, proque lubitu inspicienda porrigebat humanissime. Describendis vero jam libris istis supersedere, chartæque parcere possum, cum otium hic mihi fecerit ipsemet optimus VFFENBACHIUS, qui in binis literis, olim ad me humanissime datis, ac Amœnitat. Literar. Tom. IX. p. 970. sqq. insertis, eos curate recensuit. Mirari autem satis nequeo, Jo. Gottliebium KRAUSIUM, Virum alias præstan-

tissimum, in Tabulis rerum, quæ in Orbe erudito geruntur, novarum fidem inclyti Mæcenatis ipsa nixam experientia, hac in re in dubium vocasse. Opponimus ergo illi alios testes duos *αὐτόπτες*, eosque fide dignissimos, VFFENBACHIO nostro adstipulantes, Viros nempe integerrimos, Albertum Henricum de SALLENGRE (i), et J. C. NEMEIZIUM (k).

Haga Comitum digressus est Schevelingam, ut ibi experimentum caperet ejus rei, quam GASSENDUS PEIRESCIUM quondam explorasse his verbis refert (l): Divertit Schevelingam, ut exploraret vestitionem et velocitatem Currus ea solertia a paucis annis excogitati, ut passis velis in littore navigii instar evolveret. Inaudierat nempe, Comitem Mauritium post Neoportuensem victoriam experiundi gratia illum conscendisse, una cum capto in pralio Francisco Mendoza, ac intra duas horas attigisse oppidum Puttenum, quod inter atque Schevelingam horaria milliaria quatuordecim intercipiuntur. Quare ipse quoque experiri

vo-

(i) vid. ejus *Memoires, de Litterature*, Tom. I. Part. II. p. 392.

(k) conf. ejus *Vernünfftige Gedancken über allerhand Historische, Critische und Moralsche Materien*. Part. I. p. 34. sqq.

(l) in vita Peirescii Lib. II. p. 128.

voluit, commemorareque solebat stuporem, quo correptus fuerat, cum vento translatus citatissimo, non persentisceret tamen (nempe tam citus erat, quam ventus) cumque animadverteret scrobeis occurrenteis pratervolari; restagnantes passim aquas superficie tenus duntaxat attingi; qui antecedeabant cursores, visos quasi retrorsum niti; quæ distantissima apparebant, momento pene prætervehi; et quadam id genus similia. Inventor idemque fabricator currus hujusce velivoli, quem ne velocissimi quidem equi longo spatio æquare potuerunt, fuit Simon STEVINUS, Brugenſis, vir supra captum vulgarem, Adriani Romani judicio, in mathesi rerumque naturalium cognitione versatus (m). Fuit etiam Hugo GROTIUS in stupenda illa vectione una cum aliis Mauricii Nassovii socius, cujus in Casp. DORNAVII Amphitheatro sapientiæ Socraticæ joco-seriæ (n) in hunc currum veliferum exstat elegantissima elegia cum viginti duobus epigrammatibus.

Mi-

(m) De quo vide sis Valerii Andreae Desfœlii Biblioth. Belg. p. 813. ejusdemque editionem a Jo. Franc. Foppens adornatam Tom. II. p. 1102. et P. Bælii Diction. Crit. Tom. III. f. 2655. edit. III. Roterod.

(n) Tom. I. f. 669. 199.

bliothecarum, præconis voci subjici solitarum, jucunde interfuisset, ac supellectilem suam librariam hoc pacto feliciter locupletasset, ex istiusmodi auctioribus, a quibus antehac abhorrebat animus, postea plurimos egregios libros, tam calamo exaratos, quam typis excusos in suam Bibliothecam intulit.

Ejusdem anni Mense Octobri Darmstadii, Wormatiæ, Francothalii, Manheimii, et Heidelbergæ, quicquid exploratu videbatur dignum, investigavit.

Anno autem MDCCVI. mense Septembris vergente, excurrit Moguntiam, ac inde præter quosdam Codices MSS. ultra centum nummos antiquos domum retulit. Etenim Nummophylacium quoque instruxerat, quod tum, quantum pote, locupletare ipsi curæ cordique erat, de quo ita ad ACKERUM suum IV. Id. Oct. illius anni: *Paucos ante dies Moguntia fui, ibique inveni tres Codices membranaceos, de quibus proxime plura. Accepi quoque nummorum antiquorum ultra centum, maximam partem æneorum, inter quos quidam rarissimi. Curta quidem mihi adhuc eorum supellex est; quicquid tamen in manus incidit, magna cura colligo. Igitur cum sciam, quod in Misnia atque Saxoniâ multi reperiantur nummi bracteati (de quibus Schlegelius, Olearius, Tenzelius) enixe te rogo*
atque

atque obsecro , si quid occurrat , ut a quo pretio mihi comparare velis. Nihil omittas , precor , quo Museum meum locupletare poteris. Cum enim nil mihi gratius atque acceptius sit , augebis meum erga te amorem , jam jam maximum. Sumtus quoque omnes quam lubentissime resarciam.

Anno tandem MDCCIX. rebus suis ita dispositis , ut peregre sibi abire liceret , accinxit se ad iter Belgicum et Anglicum , dum jam animo conceptum ac exoptatum , eruditionis suæ et Bibliothecæ divitias potissimum cumulaturus , sique in Anglia sibi res ad voluntatem fluerent , perpetuam in Collegio quodam Oxoniensi sedem fixurus. Quis vero de itinere hoc non optima quævis animo præcipiat ? Quis dubitet , eum inde uberrimum laboris atque impensarum retulisse fructum ? Cum mens ejus jam optimorum librorum lectione subacta , judicium maturum , indolesque animi virtutum præceptis ac exemplis optime firmata fuerit. Animo jam , antequam pedes in illas regiones inferret , iter emensus feliciter erat , a puero fere e præstantissimis itinerum scriptoribus aliisque libris memorabilia apud externos conspicua diligenter enotaverat , Bibliothecas lustratu digniores ac præcipua earum cimelia , Nummophylacia item atque Technophysiotamea in numerato habebat , et quicquid quo-

uovis in loco præ cæteris illustre sit observandum, oculisque cupidioribus conuendum, ad unguem noverat.

Prudenti autem consilio secum constituit, itineris comitem sibi adsciscere Generosissimum Fratrem, Jo. Fridericum ab VFFENBACH, Halæ tum Magdeburgicæ liberalibus studiis operantem, hodie vero perillustri in loco positum, Reip. nempe Mœno-Francofurtanæ Consulem Magnificum, belli pacisque artibus inclytum, jucunda hujusce fidi sibi tenerrime deamati Achatis societate molestias itineris levaturus, ac scita ejus artisque Apellæ gnarissima manu ad delineanda naturæ & artis miracula, canæque antiquitatis monumenta usus. Abiit igitur prius d. XIX. Aprilis citato cursu in Saxoniam, dilectissimi Fratris mentem ad peregrinationis consortium flexurus: XXIII. autem Jun. ad Lares suos rediit. Emicat etiam ex hujus itineris descriptione stupenda optimi Mæcenatis industria, ac mirandum est, in tantillo ac bimestri duntaxat temporis spatio tot Viros præclaros ab eo saluari, tantam librorum ac rerum notabilium copiam non vagis modo oculis & veluti per transfennam, sed exquisita diligentia & exacta cura lustrari, singulisque diebus tot memorabilia in chartam ex pugillaribus referri potuisse. Sagaciter in

Pars II. f hoc

hoc excursu speculatus est Lipsiæ Bibliothecas ITTIGII ac Paulinam denuo, Musea SEYLERI Mechanici, SCHACHERI, LEHMANNI, LEUPOLDI : Halæ Museum J. M. HEINECCII : Seeburgi duos lacus vicinos, disparis plane indolis, quorum unius aqua dulcis, alterius falsa est (p) : Martisburgi præter Rudolphi Imp. inscriptionem sepulcralem, amputatamque ejus manum, Bibliothecam Canoniorum: prope Naumburgum Gymnasium Portense ejusque supellectilem librariam : Jenæ Bibliothecas Academicam, G. W. WEDELLII, & J. A. DANZII : Vinariæ Bibliothecam ac Cimeliarchium Principis, & prope eam civitatem Pufhardum, arcem subterraneam (q) : Erfurti Bibliothecas veteris Monasterii Augustiniani, Academiæ & Collegii Amploniani, hancque multis quidem Codicibus MSS. instructam, sed plane neglectam, ac pulvere situque squalidam : Arnstadii principalem numismatum Thesaurum exquisitissimum, qui hodie Gothano junctus est, Musea item Schlegelii ac Olearii : Gothæ Serenissimi Ducis Gazam librariam ac Cimeliarchium,

Vo-

(p) vid. Miscellan. Acad. Naturæ Curios. Decad. II, An. VI, p. 212. sqq.

(q) vid. Ge. AGRICOLÆ Libr. de animalibus subterraneis f. 482.

Vockerodtii Bibliothecam, Technophysio-
tameum Wermuthi, a quo triplicem cru-
stæ margaritariæ conchas adaptandi modum
didicit: Reinhardtsbronnæ veterum Thu-
ringiæ Landgraviorum monumenta, Hort-
lederii studio huc translata: Isenaci li-
brariam Gymnasii supellectilem, satis qui-
dem curtam, rariorum tamen scriptorum
haud plane expertem, arcemque Wart-
burg, Lutheri quondam Pathmum: ac
tandem Fuldæ memorabilia, in prima hu-
jus sylloges particula p. 78. sqq. a nobis
descripta (r). Pauca jam ex iis, quæ in
f 2 hoc

(r) Iis, quæ de veteri Fulda ejusque in-
structissima Bibliotheca ibi dixi, addere
hic juvat verba Henr. Leonardi SCHURZ-
FLEISCHII ex ejus Notitia Bibliothecæ
principalis Vinariensis p. 7. sq. *Fulda be-
nignitate Pipini ac Carolomanni, consilioque
Bonifacii, Moguntini Præsulis, A. C. 744.
initium sumfit, atque Abbatis sede ornata,
præstantissimisque deinde Doctöribus, e Cænobio
Picardiæ Corbejensi antiquo potissimum accersitis,
adaucta & locupletata, florere undiquaque cæ-
pit. Ibi Abbas Rabanus Maurus, Alcuini
disciplina quondam alumnus, postea Antistes
Moguntinus, Vir, cui neque Italia tum tem-
poris similem, neque Germania parem habuit,
primam cum Hildeberto in Germania Bibliote-
cam*

hoc itinere Musageta noster observavit ,
ne nuda tantum eorum recensione lecto-
rem fatigemus, afferre juvat.

Primo omnium Lipsiæ adiit D. Thomam
ITTIGIUM, celeberrimi nominis Theolo-
gum , & antiquitatum ecclesiasticarum
promum condum, cujus nomen, si nihil
aliud præclari unquam fecisset, vel soli
ejus discipuli, e scholis illius progressi,
immortalitati consecrarent, e quibus ex-
empli & honoris causa solum nomino vi-
ros beatos, quorum merita in rem sa-
cram

*cam amplissimam, veterumque scriptorum Co-
dicum multitudine instructissimam, ac brevi post
totius Germania celeberrimam, condidit, ipsam-
que adeo scholam eruditione sua non vulgari il-
lustravit, ut eo, tanquam ad communem bo-
narum artium officinam, non tam ab extremis
finibus Germanos, quam Gallos, Scotos etiam
& Britannos, & Italos magno numero conflu-
xisse, edoceamur.* Caspar BARTHIUS
DAUMIO narravit, sex libros Cicero-
nis de Republica longe desideratissimos
extitisse ante bellum tricennale in Bi-
bliotheca Fuldensi in aliquot volumini-
bus membranaceis, sed a militum pe-
tulantia discerptos, & equis substratos
fuisse. vid. D. J. Alb. FABRICII Bi-
blioth. Lat. Vol. II. p. 145.

cram & literariam sunt testatissima, Joannem FRICKIUM, Gottfridum OLEARIUM & Jo. Alb. FABRICIUM, vastissimam suam doctrinam potissimum dexterimæ ITTIGII institutioni acceptam grata mente referentes. Is licet calculi doloribus laboraret, humanissime Nostrum excepit, & partim ipse, partim, cum nephritici cruciatus prohiberent, famuli eruditi opera eximiam Bibliothecam suam ei perlustrandam dedit. Haud facile uspiam tam pretiosum & vastum Patrum ac historiæ ecclesiasticæ apparatus uno in loco asservari, ac fere nullam, sive veterem, sive recentiorem Patrum antiquorum editionem hec desiderari censuit VFFENBACHIUS.

Ibidem in D. SCHACHERI, eximiæ humanitatis Viri, Museo inter reliqua visu ipsi erat perjucunda integra veluti series embryonum, a trium hebdomadum ætate in nonum usque mensem suo secundum ætatem ordine, instar canalium organi pneumatici, collocatorum, quorum minimi, articuli longitudinem haud æquantes, maxime ei videbantur admirandi, cum in illis omnes jam corporis partes, quanquam non adeo distincte & luculenter ac in majoribus, deprehendantur.

Inprimis ipsum in admirationem rapuit exquisita plurimorum artis naturæque speciminum copia, quam ei contemplandam mira comitate permisit D. Jo. Christianus LEHMANNUS, Vir multiplici scientia recentibusque inventis insignis. In tanta autem rerum memorabilium supellectile summæ illi fuit voluptati ingens nidorum, a varii generis avibus, tam exoticis, quam indigenis, textorum vis, nec satis poterat mirari artificium diversitatemque structuræ & materiarum, e quibus conditi fuere: plerisque vero, quod spectatu jucundum erat, injacebant ova. Animus tum erat eximio illi naturæ indagatori, ipsas etiam, quotquot e vicina regione nancisci posset, colligere aves, easque exenteratas nido quamque suo imponere, id quod ad Ornithologiam Saxoniae concinnandam egregie inservitutum fuisset. Negotium istas conquirendi præmiolo constituto juvenibus rusticis dederat, qui simul cujusque alitis nomen, locum & tempus nidificii, aliaque hujusmodi ipsi referrent.

Post salutatos plures alios viros celebriores spectatum quoque illi est monstrum humanum bicorneporeum, quod in nundinas a muliere Belgica ad corrogandas pecunias delatum erat. Biennio jam abhinc oculis curiosorum ibidem fuerat expositum,

tum, ac deinde singulari dissertatione, cui figura hujus monstri ænea præmissa est, a maximi nominis Medico D. Mich. Ern. ETTMULLERO illustratum, e qua & No-
stri Ephemeridibus hoc hominum porten-
tum penitus hic cognoscere, lectoribus
volupe fore arbitror. Natum erat A.
1701. in Hungaria Szœnii prope Como-
ram a rustica. Qui primum exitum ex
uteri ergastulo molitus est, & ad umbili-
cum usque prodiit, foetus, Helenæ no-
men nactus, cujus pedes tribus post ho-
ris cum altero foetu, priori adnato, & Ju-
ditha vocato, sunt exclusi. Duo hoc
monstrum habebat capita, quatuor bra-
chia, totidem pedes, duos truncos: circa
finem vertebrarum lumborum utraque si-
bi corpora cohærebant: inter sinistrum
Helenæ & dextrum Judithæ pedem unus
conspiciebatur inter nates duas anus. In-
guina nulla monstrabant genitalia, sed
carne erant occlusa. In spatio autem in-
ter quatuor pedes intermedio circulus ex-
tabat patulus, in quem ex utroque cor-
pore ductus desinebant, per alterum ta-
men duntaxat, Helenæ nempe, urina ab
utroque reddebatur. Quoad reliqua le-
gitimam partes hæ externæ sortitæ erant
proportionem. Diversi vero observaban-
tur esse temperamenti binæ sorores, altera
latabunda, tristiori altera existente; mu-
tuo interim se amplectebantur amore, quem

sæpe osculis demonstrabant. Nec utrique unus erat urinam mittendi alvumque exonerandi stimulus, sed egerebantur hæc modo ab uno, modo ab altero corpore. Loquebantur Belgice, Hungarice, Gallice, & aliquantulum Germanice. Utrique non eadem semper voluntas, vel idem appetitus ambulandi, vel ad unum locum se conferendi, nec quatuor pedes ita erant collocati, ut uno tempore simul ad unum eundemque locum properare potuissent, sed uno corpore progrediente, alterum regredi cogebatur: cum vero hæc sorores mutuo se complecterentur amore, una libenter sequi solebat, quo ab altera ducebatur. Sedere haud poterant, sed a latere nonnihil ad sedilia se acclinabant. Non eadem semper utrique erat sensibilitas tam quoad res naturales, quam morales: nec uno semper eodemque tempore fame vel siti stimulabantur, vel ad soporem sollicitabantur, vel ægrotabant. Duobus quin monstrum hoc præditum fuerit animabus, in dubitationem cadere haud videtur.

Halæ convenit D. Jo. Mich. HEINECCIUM, Virum in antiquitatum ecclesiasticarum & rei præsertim diplomaticæ notitiâ versatissimum, quem singulari morum suavitate præditum expertus est. Magnam in ejus Museo percepit voluptatem ex ingenti

genti pulcherrimorum sigillorum apparatu, quorum typos cum aliunde, tum præcipue ex Tabulario Corbejensi curate effinxerat Vir, quem excellenti harum rerum cognitione fuisse imbutum testatur insigne opus de veteribus Germanorum aliarumque nationum sigillis, eorumque usu & præstantia. Ab eo quoque didicit modum, ætyma veterum sigillorum faciendi.

Solebat nempe Noster, qua erat prudentia præditus, si quos in itineribus viros doctos inviseret, ad cujusque se genium accommodare, sermonisque materiam de illis potissimum rebus subministrare, in quarum notitia eos excellere noverat; quasque iis adeo cæteris jucundiores fore facile hariolari poterat. Duplex inde in eum redundavit commodum. Primo enim hoc illis nomine acceptior erat, sique isthoc pacto affabilliores reddebantur; cum, quam quisque novit artem, de ea præsertim animo lubentissimo largiorique verborum flumine sermocinari soleat, & magnam præterea vim, recte judicante Tullio, ad conjungendas amicitias studiorum ac naturæ similitudo habeat. Deinde peropportuna hinc ipsi enascebatur occasio, lætissima in variis & aliis abstrusioribus ingenuarum artium ac disciplinarum generibus incrementa capiendi, & viva voce ocularique demon-

f s

stra-

stratione virorum hujus illiusve doctrinæ scientissimorum addiscendi , quæ ex libris haud ita luculenter cognosci poterant. Animo igitur jam ante , quam in peregrinatione sua viros doctos & artifices adiret , infixerat quæstiones , dubia vel argumenta , quæ uberius discussa ac dilucidius a singulis explanata cupiebat. Quocirca maximopere sane expedit liberalium artium cultori , cum fructu peregrinaturus , notitia eximiorum artificum , & virorum variæ doctrinæ laudibus in singulis , quas lustrare constituit , civitatibus apprime florentium , ne imparatus accedens præcipuo itineris sui lucro frustretur , & opportunam occasionem egregia multa videndi cognoscendique , posthac non ita facile redituram , sibi e manibus elabi patiatur. Commendandum hoc nomine , præter Cel. BRUCKERI mei Pinacothecam Virorum hodie literis illustrium elegantissimam , majorem in modum est , quantum quidem ad Virorum nostro ævo literarum gloria insignium notitiam spectat , institutum , quod Summe Venerabilis Gabr. Wilh. GOETTENIUS scite exorsus est , elegantis autem ingenii ac doctrinæ Viri Ernestus Ludov. RATHLEF & J. C. STRODTMANNUS laudabili dexteritate continuarunt , in describenda literata hujus ævi Europa. VFFENBACHIUS itaque cum nosset , quanta HEINECCIUS rei
diplo-

diplomaticæ , ac imprimis , ut cum Vo-
pisco loquar , sigillatice peritia polleret ,
quantumque ad fidem diplomatum explo-
randam & confirmandam sigilla valerent,
multa ex illo de sigillorum materia , in-
scriptionibus , figuris , annectendorum
modo , effigiebus , sincerorum ac spuri-
orum criteriis , aliisque huc pertinentibus
sciscitatus , magnum ex illo congressu fru-
ctum retulit.

Laudatus HEINECCIUS tum Halæ præ-
lectiones in rem diplomaticam instituere
solebat , quod salutare consilium ita No-
stro placuit , ut hæc tempora prædicave-
rit felicia , quibus istiusmodi res in Aca-
demiis docentur , cum antea nihil facile ,
nisi quod ad panem lucrandum inserviret ,
in cathedris personaret. Occupatus insu-
per erat in Ecclesiæ Græcæ delineatione
adornanda , ac Historia Marchionum Bran-
denburgensium per sigilla eum in modum
illustranda , quo VREDIUS Comitum
Flandriæ historiam elucidavit , ad quod
institutum multa jam subsidia tam e Mag-
deburgensi tabulario , quam Berolino , ius-
su Regis Borussiae acceperat.

Domum d. XXIII. Jun. reversus , more
Francofurtano mense Julio ad Schwalba-
censes fontes acidulos abiit , iis , quan-
quam necessitate tum haud flagitante ,
usu-

ufurus. Vegetus enim ac valens ex itinere redierat, illa soli cœlique mutatione, vestatione, corporisque motu ac animi deliciis ad salubritatem ipsi maxime proficuis. Experientia post edoctus censuit, annum sine urgentibus causis acidularum usum esse potius abusum, ac sæpe sanitati plus officere, quam prodesse, cum præsertim raro, qui ad ipsos fontes accedunt, temperatam vitæ rationem diligenter custodiant.

Octavo autem mensis Nov. die una cum Generosissimo Fratre iter, Deo favente, per Saxoniam inferiorem & Frisiam in Belgium & Angliam ingressus est, quæstum doctrinæ majorem capturus, ac thesauri sui librarii incrementa promoturus; cujus itineris luculenta optimæque frugis plena descriptio cum jam sub prælo fudet, præcipua tantum loca, in quibus aliquamdiu incomparabile hoc optimorum Fratrum par, ut Bibliothecas & alia observatu digna enixa diligentia investigarent, Virosque doctos & industrios artifices adirent, diversatum fuit, ac ex Viris, quos salutarunt, celebribus potiores hic nominare visum est. Illa sunt Cassellæ, Goslaria, Clausthalium, Blanckenburgum, Quedlinburgum, Halberstadium, Magdeburgum, Helmstadium, Brunsviga, Guelpherbytum, Salzdahlum, Hildesum, Han-

no-

novera, Herrenhusa, Cella, Luneburgum, Razeburgum, Lubeca, Hamburgum, Stada, Brema, Emda, Grœninga, Lœwarda, Franequera, Harlinga, Bolswertum, Zwolla, Daventria, Harderovicum, Amersfortum, Ultrajectum, Amsterodamum, Lugdunum, Roterodamum, Delphi, Haga Comitum, Harlemum, Londinum, Greenvicum, Cantabrigia, Oxonium, Hamptoni Curia, Kensingtonium, Woodstockium, Richemontium, Dusseldorpium, Colonia Agrippina.

Ex Viris celebribus, quos hæc nobilissima Fratrum biga convenit, nominare sat est Jo. Andream Schmidium, Hermannum von der Hardt, Just. Christophorum Bœhmerum, Phil. Jul. Rethmejerum, Jo. Henr. Burckhardum, Godofr. Guil. Leibnitium, Gerh. Molanum, Polycarpum Lyserum, Henr. Ludolphum Benthemium, Jo. Alb. Fabricium, Jo. Frid. Wincklerum, Jo. Dieckmannum, Dietericum von Stade, Michaelem Richey, Gerh. de Mastricht, Theodorum Hasæum, Jo. Henr. Eggelingium, Alexandr. Arnold. Pagenstecherum, Mensonem Altingium, Adamum Mensonem Isingk, Mich. Rossal, Ant. Schultingium, Campegium Vitringam, Zach. Huberum, Jac. Rhenferdium, Nicol. Gütlerum, Gisb. Cuperum, Theod. Janson, ab Almeloveen, Jo. Majerum, Petrum Bur-

Burmannum, Jac. Perizonium, Cornelium van Alkemade, Ant. van Leuwenhoek, Prosperum Marchand, Bernardum Piccard, Petrum Valkenier, Wolfh. Senguerdum, Salomonem van Till, Jacobum Gronovium, Phil. Reinh. & Jo. Jac. Vitriarios, Herm. Bœrhaven, Jo. Musschenbrœck, Thomam Crenium, J. Aymon, Jac. Basnage, Jac. Bernard, Pet. Vlaming, Jo. Guil. van Meel, Tiberium Hemsterhuysen, Gosw. Uilenbrœck, Jac. Rau, J. de Wilde, Frid. Ruysch, Jo. Theod. Schalbrug, Jac. Bary, Corn. de Bruyn, Hadr. Relandum, Nic. Hartsoecker, Rich. Bentlejum, J. Flamsteed, Georg. Holmes, Wilh. Wiston, Jo. Hudson, Th. Hearne, Hans Sloane, Jo. Covel, Georg. Hickesum, Jo. Ern. Grabium, Thom. Tenissonium, D. Ferrarium (s), Jo. Woodward.

Ex tot tantorumque Virorum sermonibus exoptatam Nostro in variis doctrinæ generibus plurimum proficiendi facultatem esse suppeditatam, quis non agnoscit? In-
lu-

(s) Italum in Anglia commoratum, cujus honorificam mentionem facit Cel. Petrus Franc. COURAYERIUS in præfatione Historiæ Concilii Tridentini Sarpianæ, in Gallicum sermonem translata, præmissa, p. XIV. XVI. sq.

lustrandis instructissimis, quæ Londini, Oxonii & Cantabrigiæ asservantur, Bibliothecis, ac excutiendis earum Codicibus MSS. id sibi potissimum negotii imposuit, ut eos conferret cum Catalogis, ab Edwardo Bernardo collectis, studioque Humphredi Wanleyi A. 1697. e Theatro Sheldoniano splendide evulgatis. Errorum in iis, non ea, qua decebat, accuratatione concinnatis, commissorum notationibus tantum chartæ, in meis manibus versantis, complevit, ut singulare illæ volumen conficerent (t).

Ipsa autem Nostri Bibliotheca maximum ex hoc itinere incrementum cepit, cum supra quatuor voluminum millia inde reportaverit, id quod ex epistola ad Cel. DANZIUM data, & huic nostræ Sylloges particulæ inserta, liquet.

Primo quidem animo secum constituerat, in Collegio quodam Oxoniensi fixam sibi Musisque suis stabilire sedem; sed tam victus ratio, quam cœli temperies, ipsi minus commoda, præsertim vero turbidus rerum Anglicarum eo tempore status, ut consilium hoc abjiceret, effecere. Martis
in-

(t) conf. primam hujus Sylloges particulam, p. 183. & 187. sqq.

insuper ferocia , in nobilioribus Europæ regnis tum sæviens , literarium in Galliam atque Italiam iter , quod mente agitabat , plane sufflaminavit. Imo divina potius providentia , commodis cum inclytæ Patriæ & rei in Germania nostra literariæ promovendis destinans, ipsum ad natale solum veluti retraxit. Mortalium enim cœtui interea exempto amicorum ejus principe , Viro Amplissimo , Jo. Nicolao SNEIDERO, dicto Smidt, cujus in ædibus habitaverat , librariumque suum thesaurum deposuerat, ac Deo , cujus in manu fors nostra est , sic dirigente , factum est , ut domum A. MDCCXI. sub initium mensis Aprilis redux, Vidua ejus, Matrona omnibus sui sexus ornamentis decoratissima , quamque studium suum bibliothecarium haud remoraturam noverat, mense Julio in matrimonium ducta, in illius thalamum feliciter succederet.

Anno MDCCXVIII. mense Junio animi gratia denuo iter in utrumque Belgium instituit, dulcissima conjuge & generosissimis Fratribus ac Affinibus cum privigno eum comitantibus. En tibi, quæ ipse amicissimo MAIO suo in literis ad eum decima Septembris die exaratis de hoc itinere exposuit : „Pollicitus nuper sum, me itineris „peracti fata descripturum, quod, antequam „ad ultimas tuas respondeam, præstandum „vide-

„videtur. Ast paucis me expediam. Ne-
 „que enim navigationis Coloniam usque
 „amœnitatem, neque subortam posthæc,
 „quam bis experti sumus, Neptuni in nos
 „iracundiam, neque enatas inde fœminei
 „sexus querelas explicabo minime jucun-
 „das. Nec jocos, facetias atque delicias,
 „quibus tempus fallere, ac itineris mole-
 „stias superare læta nostra societas studuit,
 „referam; parum enim salis nunc haberet
 „talis relatio. Non etiam situs utriusque
 „Belgii amœnitatem, Urbium magnitudi-
 „nem, ædificiorum magnificentiam, ho-
 „minum mores, partim satis agrestes atque
 „ridiculos, rerum omnium his in oris af-
 „fluentiam, memorabiliumque, quæ vidi-
 „mus, multitudinem prolixè describam.
 „Hæc enim omnia tibi cognita scio, ac
 „parum te juvare posse autumo. Litera-
 „ria nova, quæ scilicet in Bibliothecis ac
 „officinis librariis viderim, quæque ex o-
 „re atque colloquiis Eruditorum didicerim,
 „magis tibi arriderent, majori etiam cum
 „voluptate a me describerentur. Ast, ut
 „jam nuper dixi, neque ipsa itineris, rela-
 „xandi atque recreandi animi causa potis-
 „simum instituti, ratio, neque societatis,
 „quam inieram, seria abhorrentis nexus,
 „nec denique festinatio ubivis locorum
 „nimia permisit, ut meo in rem literariam
 „ardori ac doctos viros invisendi desiderio
 „satisfacere potuerim, nec tuæ nunc,

Pars II.

g

„quam

„quam bene novi , cupiditati latisdare
 „queam. Me quidem solabatur, quod pri-
 „mis duabus vicibus , dum in fœderato
 „Belgio versabar , omnes fere Bibliothecas
 „ac Musæa perreptaverim , ac , quicquid
 „est doctorum Virorum , convenerim.
 „Hinc , cum regium attingebamus Belgi-
 „um , quod nondum peragraveram , quan-
 „tum potui , e societate me subduxi , Mu-
 „sasque , ringentibus licet ac opprobranti-
 „bus Gratiis meis , sectatus sum. Biblio-
 „thecæ præstantiores , quas offendi , ad
 „Lojolicam Societatem spectant , quarum
 „ea , quæ Lovanii est , splendore atque
 „numero , Antwerpiensis vero librorum
 „historicorum ac MSSorum inprimis præ-
 „stantia antecellit. Copiam Codicum e-
 „orum , qui Acta Sanctorum collegerunt ,
 „studium atque industria huic invexisse pu-
 „to. Rariores alias esse solent apud Jesui-
 „tas libri veteres , manu inprimis exarati.
 „Magnam sane horum apud Antwerpien-
 „ses farraginem vidi , eorum potissimum ,
 „qui ad martyrologicum studium facere
 „possunt. Cum eximium , quem mea
 „Bibliotheca servat, Codicem martyrolo-
 „gicum (u) iis , qui continuandis Actis
 in-

(u) De hoc immensæ magnitudinis Codi-
 ce membranaceo, sæculo XIII. vel cer-
 te XIV. exarato vid. Bibliothecæ Vffen-
 ba-

„insudant , obtulerim , spes mihi est , me
„quorundam ex iis , quos possident , co-
„piam nacturum. R. P. du SOLLIER ,
„cui præcipua operis cura demandata est ,
„excepit me benignissime , ac summa cum
„humanitate Bibliothecam monstravit , qua
„divina clementia in horrendo Templi in-
„cendio , utpote Ecclesiæ contigua , serva-
„ta , Fratres impense gaudent. Plura de
„hac Bibliotheca ac rarioribus , quæ in il-
„la observavi , narrarem , si angusti epi-
„stolæ limites sinerent. Officinas librarias
„in utroque Belgio instructissimas esse , quis
„ignorat ? Miratus tamen sum , me in re-
„gio tantam librorum historicorum copi-
„am invenisse. Cessit vero admiratio , po-
„steaquam mecum reputavi , studia histo-
„rica , præprimis genealogico-heraldica ,
„his in terris semper floruisse , adeo , ut
„Reges Armorum ac alia officia heraldica ,
„ut in Anglia , semper habuerint. Tu
„vero facile intelligis , quanta me coemen-
„di cupiditas inceserit. Miraberis autem
„tu quoque , quod eam ita reprefferim , ut
„nonnisi duos typis exscriptos emerim.
„Deterrebant tum locorum distantia , tum
„vero graves , qui in itinere , cum non
„solū pro memetipso , sed etiam pro
„Uxore ac Filio solvendum ubivis fuerat ,

„faciendi erant sumtus. Manu vero exara-
 „tos Codices quod attinet, temperare mi-
 „hi non potui, quin plurimos comparave-
 „rim. Putabis, veteres quoque tum Græ-
 „cos, tum Latinos inter istos fore. Ast
 „ne unicum quidem, ita me Dii ament,
 „offendere potui, licet omnem, quod in
 „proverbio est, lapidem moverim, ut ali-
 „quos nanciscerer. In Monasteriis sepul-
 „tos latere credebam, sed bellis tum in-
 „ternis, tum externis ingentes horum
 „thesauros periisse, asserebant cordatiorum
 „plurimi. Lætus igitur atque contentus
 „sum spoliis, quæ reportavi, historico-
 „genealogicis, quæ oculis tuis, Amice
 „charissime, quam lubentissime expone-
 „rem, si, quod vellem, spreto rure ac
 „Nymphis campestribus, nostras Musas
 „ac nundinas invisere velles. Eximii
 illi Codices, quos ex hoc itinere repor-
 tavit Musageta noster, recensentur in Bi-
 bliotheca miscellanea, Halæ quondam e-
 dita (x).

Ita nimirum sua instituere itinera sole-
 bat, sicuti magnus ille THUANUS, in-
 ter principes historicos merito suo refe-
 ren-

(x) in dem XII. Stücke der vermischten Bibli-
 othec, p. 1078. sqq.

rendus , de quo Josephus Quesnel (y) :
*Cum paulatim jam illud nobile congerenda Bi-
 bliotheca propositum in animo haberet , eo omnes
 suas cogitationes conferebat , etiam in sua non o-
 tiosa peregrinatione , quam propterea suscepisse
 videtur , ut ex Bibliothecis , quas videbat , sibi
 sua futura exempla peteret , ita , ut , dum quis-
 que , ad quam urbem pervenisset , lustrandum
 discurreret , Thuanus librorum apothecas ve-
 stigaret. Inde magnam librorum , qui apud nos
 rariores , copiam sibi comparavit apud Italos, Ger-
 manos & Batavos.*

Præterea amicum cum Viris doctis ac
 celebrioribus literarum commercium insti-
 tuit, atque hoc etiam medio & Bibliothecam
 & doctrinam suam luculenter in dies am-
 plicavit , lætatus isthac ævi nostri felici-
 tate , qua epistolæ ac fasciculi commode
 & celeriter ad loca , etiam longo inter-
 vallo a nobis sejuncta , per cursores &
 veredarios publice constitutos perferri pos-
 sunt , cum sæculo decimo quinto , ac deci-
 mi sexti initio res longe aliter compara-
 ta fuisset , testantibus id Virorum cloro-
 rum querelis , passim in eorum epistolis
 obviis. Diligentissimus vero fuit in hoc
 g 3 lite-

(y) in præfatione Catalogi Bibliothecæ
 Thuanæ , Lutetiæ Paris. A. 1679. in 8.
 typis excusi , p. 7.

literarum commercio, siue quis lingua Latina, siue Gallica, siue Germanica ad eum scripserit, singulis eodem sermone, idque elegantissime & cum multo sæpe variæ eruditionis apparatu respondens: nec piguit eum majoris *ἀριβείας* gratia primam epistolarum ab se scriptarum formulam plerumque penes se studiose servare, & cum amicorum literis, temporis ratione habita, in certa volumina cogere, qualia mihi ex legato optimi Mæcenatis præsto sunt unum in folio, & novendecim in quarti ordinis forma, eaque satis spissa, & exquisita eruditione scatentia.

Complēctuntur autem, si nostri etiam Musagetæ responsa ad calculos una voces, supra quinque epistolarum millia. Locuples certe variæ doctrinæ promptuarium, imo incomparabilis omnis rei & historiæ literariæ, nostri potissimum sæculi, thesaurus, quo me ex Viri Optimi liberalitate potitum, in maxima felicitatis parte gratus pono. O quam mihi sæpe, animum aliis laboribus nonnihil defessum refocillaturo, dulce est, me veluti præsentem immiscere literatis hisce Virorum doctissimorum cum VFFENBACHIO meo colloquiis, & uberrimos inde variæ eruditionis fructus percipere! Quem enim non delectent, ut verba elegantissimi Vincen-

centii FABRICII (z) paulum immutata mea faciam , familiares isti , & quasi a presentibus habiti virorum maximorum sermones : quorum imago est epistola ? quantum ibi jocorum ? quantum etiam querelarum ? quantum optimi salis ? quantum quoque dulcissimi mellis ? Quanta rerum erudite excussarum , quanta consiliorum , quanta arcanorum literariorum copia ? An non te felicem crederes , si liceret annos aliquot conversari cum Passioneis , Senkenbergiis , Pfaffiis , Moshemiis , Heumannis , Kœleris , Gesneris , aliisque nostri sæculi luminibus : vel saltem literatissimis eorum colloquiis interesse ? Jam vero talium epistolæ cum iis nos conjungunt dulci quodam contubernio : nos instruunt , nos mirifice exhilarant. Avebis haud dubie , lector candide , nosse , quibusnam potissimum tam suave cum Nostro Mæcenate intercesserit literarum commercium. En ergo tibi plerorumque nomina , alphabetica serie disposita. Sunt autem Jo. Henr. Ackerus , Simon Joan. Arnoldus , Petr. Frid. Arpe , Christ. Frid. Ayrmannus , Jo. Jac. Bajerus , Jo. Henr. Balthasar , Jo. Henr. Barthius , Henr. Jac.

(z) conf. ejus opera junctim a Friderico Fabricio filio Francof. & Lips. A. 1685. in 8. edita p. 246.

von Bashuysen , Jo. Alb. Bengelius , Jo.
Herm. Bennerus , Jo. Ad. Bernhardus , Jo.
Frid. Bertramus , Frid. Jac. Beyschlagius ,
Jo. Jac. Bodmerus , Just. Christoph. Boeh-
merus , Ludov. Bourguetus , Boyet , Ser.
Principis Eugenii de Sabaudia Bibliotheca-
rius , Jo. Jac. Breitingerus , Jac. Brucke-
rus , Franc. Ern. Brückmannus , Jo. Lu-
dolph. Bünemannus , Jo. Henr. & Jac.
Burckhardi fratres , Jo. Steph. Burgermei-
ster , Wolfg. Paul. Burgermeister von Dey-
zifau , Jo. Christianus Clodius , Jo. Chri-
stoph. Colerus , Gottl. Cortius , Jo. Dan.
Cramerus , Matur. Veissier la Croze , Ma-
gnus Crusius , Ern. Sal. Cypriani , Jo. An-
dreas Danzius , Raymundus Duellius , Gabri-
el Dumontius , Jo. Georg. Eckardus , Jo.
Georg. Estor , Jo. Alb. Fabricius , Rud.
Ant. Fabricius , Jo. Leonh. Frøereisen ,
Jo. Herm. Fürstenau , Jo. Benedictus Gen-
tilott ab Engelsbrun , Ephraimus Gerhar-
dus , Jo. Matthias Gesnerus , Jo. Ern. a
Glauburg , Jo. Zach. Gleichmann , Jo.
Wilh. de Gœbel , Jo. Dan. Gruberus ,
Valent. Ferd. de Gudenus , Jo. Tob. Ha-
gelgans , Mich. Gottl. Hanschius , Jo.
Christoph. Harenbergius , Christ. Frid.
Harpprecht , Jo. Adolph. Hartmannus ,
Theodorus Hafæus , Eberh. Dav. Haube-
rus , Jo. Mich. Heineccius , Laur. Heiste-
rus , Jo. Jac. Helfferich , Christoph. Aug.
Heumannus , Christian. Henr. Hillerus ,
Jo.

Jo. Conr. Hofmannus, Jo. Frid. Homberg,
 Philibertus Hueberus, Casp. Jac. Huth,
 Petrus Jænichius, Georg. Christianus Jo-
 annis, Car. Steph. Jordanus, Jac. Chri-
 stoph. & Jo. Rud. Iselii, Jo. Frid. Kayse-
 rus, Jo. Dav. Kœlerus, Jo. Petr. Kohli-
 us, Raymundus Krafft de Dellmensingen,
 Jo. Philipp. Kuchenbeckerus, Christoph.
 Aug. Læmmermannus, Jo. Christian. Lan-
 gius, Georg. Christian. Lehms, Jo. Leh-
 nemannus, Jac. Lenfant, Frid. Christian.
 Lesserus, Chr. Siegm. Liebe, Jo. Georg.
 Liebknecht, Mich. Lilienthal, Val. Ern.
 Lœscherus, Paul. Dan. Longolius, Jo.
 Georg. Lotterus, Georg. Melch. de Lu-
 dolf, Jo. Christian. Lunigius, Polycarpus
 Lyserus fil. Jo. Henr. Majus Pater & Fili-
 us, Jo. Casp. Malschius, Henr. Wilh.
 Marschalch, Jo. Jac. Mascovius, Jo. Go-
 dofr. de Mejern, Jo. Burch. & Frid. Otto
 Menckenii Pater & Filius, Gerh. Meusche-
 nius, Lud. Christian. Miede, Jo. Henr.
 Mollenbeccius, Jo. Laur. Moshemius, Jo.
 Jac. Moserus, Jo. Ern. Müllerus, Chri-
 stian. Münden, Georg. Lud. Oederus, Jo.
 Dan. Olenßchlagerus, Jo. Bapt. Ottius, Jo.
 Georg. Palm, Dom. Passionei, antehac Archi-
 ep. Ephesin. & Pontificis Rom. apud Au-
 gustiss. Rom. Imp. cum Facultate Legati de
 Latere Nuncius, hodie Rom. Eccl. Cardi-
 nalis, Jo. Wilh. Petersenius, Bern. Pezi-
 us, Car. Frid. Pezoldus, Christoph. Matth.

Pfaffius, Ern. Mart. Plarre, Car. Otto Rechenbergius, Jac. Frid. Reimmannus, Euchar. Gottl. Rinckius, Jo. Frid. Lib. Baro de Roth, Consil. Imp. Aulicus, Henricus II. Comes Ruthenus, J. C. Santoroc, Jo. Frid. Schannatus, Gottfr. Balth. Scharffius, Jo. Georg. Scherzcius, Christian. Schlegelius, Jo. Jac. Schmaussius, Jo. Andr. Schmidius, Jo. Herm. Schminckius, Dan. Schneiderus, Jo. Diet. de Schoenberg, Jo. Henr. Schrammius, Jo. Conr. & Christian. Gottl. Schwarzii, Jo. Henr. a Seelen, Henr. Christian. nunc Lib. Baro de Senckenberg, Consil. Imp. Aulicus, Georg. Serpilius, Georg. Conr. Siglerus, Jo. Bapt. du Sollier, Car. Otto Comes Solmensis, Jo. Wilh. Steinheil, Jo. Phil. Storrius, Burc. Gotth. Struvius, Jo. Jac. Syrbius, Frid. Thom, Gottl. Sam. Treuerus, Mich. Bernh. Valentini, Jo. Mich. Verdries, Godofr. Vockerodt, Jo. Jac. Waldschmid, Jo. Georg. Walchius, Georg. Wallinus, Imman. Weberus, G. W. Comes de Werthern, Ægid. Weissius, Jo. Jac. Wiegerus, Christianus & Jo. Christoph. Wolfii, Andr. Christoph. Zellerus, Jac. Zimmermannus, Jo. Ehrenfried Zschackwiz,

Rerum quoque naturalium ac artificia-
 lium congeriem adornare | sibi aliquando
 proposuit, ad exemplum Olai WORMII,
 ali-

aliorumque naturæ myſtarum , artisque miratorum varii generis foſſilia , vegetabilia , animalia , & artificioſa e terris , ſuccino , lapidibus , auro , argento , ære , ferro , vitro , plantis , lignis , fructibus , & animalibus elaborata in Muſeum ſuum conquiſiturus , ut jucunda hac rerum pulcherrimarum ac rariffimarum varietate non tam oculos , quam mentem , naturæ artisque ſcrutandæ cupidiffimam , paſceret , & , quantum pote , in ſecretiora utriusque adyta penetraret , ſed hoc etiam pacto aliorum curioſorum aviditati ſolèciter ſuccurreret. Verum cum jam egregia huiusce Technophyſiotamei fundamenta jeciſſet , animadvertens , ſi hoc inſtitutum eo , quo omnia agere ſolebat , fervore proſecuturus eſſet , ſumtibus in id erogandis haud parum ſuſtaminatum iri incrementa ſupelleſtilis literariæ , cujus ſolèrter adaugendæ curam omnibus alijs rebus anteponebat , ſuſceptum hoc conſilium , quantumvis invitus , iterum depoſuit , ratus , ultra privati hominis fortem eſſe , bibliothecæ plurimis libris & cõdicibus MSS. inſtruendæ , ac promtuariorio hujusmodi rerum locupletando ſimul operam ſumtusque impendere. Nam in mediocribus ſubſiſtere non poterat ingens ejus animus. Regiis ergo divitiis fuiſſet opus , ſi utrumque more ſuo perſequi viſum eſſet. Hinc alterum illud conſilium abjice-

re maluit , ac propterea Jo. Martini Waldschmidii, actorum publicorum consignatoris & Bibliothecarii Francofurtani, apparatus rerum naturalium (a) haud contemnendum, in quo conchyliæ præsertim eminebant, & quædam insuper antiquitatis monumenta asservabantur, licet æquo sibi pretio A. MDCCVI. oblatum, emere renuit.

Eadem de causa A. MDCCXXV. Numophylacium quoque suum, quod hæcenus strenue locupletaverat, nummisque ex omni metallo & genere instruxerat, Theologo Tigurino, Jo. Baptistæ OTTIO, pro plus quam centum Codicibus MSS. maximam partem ad historiam Helvetiæ civilem & ecclesiasticam spectantibus, permutationis jure concessit, a quo illud deinde in Angliam ad filium Jo. Henricum OTTIUM, Bibliothecæ tunc Lambetanæ
Præ-

(a) Museum ejus omni amœnitatum elegantiarumque genere exornatissimum vocat, eumque ipsum conchyliorum suorum accuratam descriptionem literis consignasse testatur Rud. Mart. Meelführer in Accessionibus ad Almeloveenii Bibliothecam promissam & latentem p. 152.

Præfectum, pervenit. Egregiam vero supellectilem antiquariam (b), in itineribus sollicite conquisitam, in Bibliothecæ suæ ornamentum asservavit.

Rei autem diplomaticæ cum studiosissimus esset, A. MDCCXI. ad exemplum supra laudati HEINECCII & Ge. Conradi SIEGLERI (c), antea Principi Abbati Fuldensi, post Episcopo Herbipolitano a Secretis & Tabulario, Sigillothecam adornavit, acceptis primo non paucis tam e Fuldensi Tabulario, quam beneficio Viri Illustris, sibi que amicissimi, Jo. Ernesti a GLAUBURG, harum rerum callentissimi, veterum sigillorum ectypis. Expertus vero sæpe cum indignatione est eorum, qui tabulariis custodes dati sunt, invidiam, quorum multi hæcæ prisci ævi reliquias pulveri potius, blattisve & internecioni, quam bonorum usibus permittere malunt.

Præterea cum jam eximia instructus esset variorum diplomatum copia, eorumque
magnam

(b) Index ejus exhibetur in Appendice I. Tomi II. Bibliothecæ Universalis Vffenbachianæ.

(c) vid. *Second Voyage littéraire de deux Religieux Benedictins de la Congregation de S. Maur*, p. 176.

magnam in omni historia utilitatem agnosceret, rei se diplomaticæ studio totum dedit. Aggressus illud forti animo est, munitus jam iis subsidiis, quæ MABILONIUS aliique docta manu suppeditant. Sed quo magis fausto & inoffenso pede in illo progredi posset, scripturamque veterem sibi familiariorem redderet, in priscis tabulis codicibusque manuscriptis legendis se strenue exercitavit, ac tam diplomata calamo exarata cum exemplaribus jam publicatis, quam varios Codices antiquos cum editionibus præstantissimis operose contulit, e quibus jam exempli causa nomino Hieronymi Epistolas, Augustini opus de Civitate Dei, Gregorii M. Moralia in Iobum, ejusdemque Dialogos & commentarium in Canticum canticorum (d). Ex isthoc autem labore, gravi quidem ac tædioso, eum cum primis percepit fructum, ut inde scripturæ veteris compendia, in diplomatibus ac codicibus creberrime obvia, eorumque lectionem difficilem satis ac impeditam facientia, erueret, ac cognita sibi reddere didicerit. Neminem enim facile paulo humaniorem fugit, quam fœcunda errorum mater sit compendiariorum veterum codicum atque diplomatum scriptura, utramque in iis paginam
fa-

(d) conf. hujusce Sylloges Part. I, p. 180.

faciens : recteque annotavit (e) Joannes CLERICUS, librarios sive ex festinatione, sive ex prava consuetudine, pro integris vocibus aut earum initium duntaxat puncto addito scripsisse, aut syllabas in media voce omissas, imposita lineola, supplevisse, aut etiam nullum compendiarie scriptiois indicium addidisse : hincque factum sæpe esse, ut librarii, aut etiam Critici, qui ea compendia non assequerentur, male, quod deerat, supplerint, aut integrum putarint, quod mutilum erat. Id vero non in manuscriptis solum codicibus, sed diplomatibus etiam usu venit. Et multi sane errores, iique crassissimi, fuissent evitati, neque tantæ difficultati veterum monumentorum lectio foret obnoxia, si librarii ac scribæ omnis ævi in diplomatibus & codicibus exarandis id sollicitè observassent, quod Justinianus Imp. in describendis Institutionibus, Digestis & Codice fieri graviter his verbis (f) mandavit : *Ne autem per scripturam in posterum fiat aliqua dubitatio, jubemus non per siglorum captiones & compendiosa anigmata,*
que

(e) Artis Criticæ P. III. S. I. C. XII. p. m. 164.

(f) in præf. Digest. Tit. I. de Digg. conceptione ad Tribonianum §. 13.

quæ multas per se & per suum vitium antinomias induxerunt, ejusdem Codicis textum conscribi, etiamsi numerus librorum significatur, aut aliud quidquam; nec enim per specialia sigla numerorum manifestari, sed per litterarum consequentiam explanari concedimus. Sed contrarium ubivis in medio præsertim ac infimo ævo inolevisse nemo ignorat, nisi qui plane nullum manuscriptorum usum unquam habuit. Observat peritissimus alias harum rerum arbiter, Bernhardus MONTFAUCONIUS (g), decimo quinto demum sæculo, cum literarum studia reviviscent, Latinæque linguæ usus, jam diu vitiata externisque vocibus fœdata pristina illa sinceraque elegantia, ab hominibus prisca saporis in primigenium statum sensim reduceretur, literarum sortem sequutam esse scribendi et libros exarandi rationem, quæ in perplexam, infinitisque abbreviationibus implicatam characterum figuram deflexerat, ante exortum typographiæ in pulcriorem exarandi libros ritum deductam, & ad normam codicum octavi & noni sæculi, modico intercedente discrimine restitutam, innumerosque ejus formæ codices, curantibus maxime Laurentio & Cosma Medicis, aliisque per Italiam Principibus (addo, et Matthia Corvi-

(g) Diar. Itineris Ital. Cap. XXI. p. 313.

Corvino, Pannoniæ Rege, Musis faventissimo) conscriptos fuisse. Adicit MONT-FAUCONIUS, sub hæc exortam typorum artem ex hujusmodi codicibus exemplum cudendi mutuata esse. Sed hæc non ita generatim accipienda sunt, ac si illa scribendi ratio, tot vocum compendiis implicata, plane tum in exilium pulsa et antiquata fuerit. Contrarium enim manifeste docent tot diplomata, ac plurimæ ejus ævi librorum editiones, in ipsa etiam Italia curatæ, quæ vocum abbreviationibus scatent, lectionemque injucundam et minus facilem reddunt. Optima autem, si quid judico, et convenientissima fuit methodus, qua Vffenbachius usus est ad compendiarium illam diplomatum scripturam enucleandam, conferens nempe diligenter diplomata et codices manuscriptos cum limatissimis editionibus, atque hac ratione, quæ implicatiora erant, vocum compendia haud difficulter eruens, quæ deinde in peculiarem librum retulit, ac paulatim multa eorum millia congeffit, inque diplomatum lectione, sicubi quædam hujusmodi intricatiora sibi occurrerent, ad hanc suam abbreviationum enucleatarum syllogem refugit.

Nondum enim prodierat Lexicon diplomaticum, abbreviationes syllabarum et vocum in Diplomatis et Codicibus, a

Pars II.

h

fæ-

ſæculo VIII. ad XVI. uſque occurrentes exponens, Viri in hoc ſtudiorum genere exercitatiffimi, Jo. Ludolphi WALTHERI, opus ſplendidum, ætatemque laturum, et Germaniæ noſtræ perhonorificum.

Cum diplomatum, in forma auguſta et patenti ſcriptorum, lectio hoc nomine etiam ſit difficilior ac moleſtior, quod propter ſuam latitudinem lineis conſtent longiſſimis, adeoque proclivis ſit error, ut una vel altera linea inter legendum aut deſcribendum prætermittatur; ſolenne fuit Noſtro, ad hoc præcavendum, lecti-
onemque minus impeditam reddendam, tribus viridis coloris panniculis uti, quorum unum lineæ illius, quam præ oculis habebat, initio, alterum ejus extremitati appoſuit, tertium vero lineæ medio impoſuit, et, hac legendo deſcribendove abſoluta, tres illos panniculos ulterius ad ſequentem lineam eadem ratione dimovit, ſicque ſibi facile ab errore et hiatu cav-
vit.

In hac utiliſſima exercitatione cum ſtrenue verſaretur, facile quivis, qui Vffenbachium bene novit, arbitrari poteſt, longe blandiſſima animum ejus titillari ſolitu-
tum voluptate, cum quædam diplomata authentica, in hiſtoria uſum habitura ſu-
um, nondumque publici juris facta, indi-
pisci

pisci licebat. Læta enim hinc non ipse tantum in historiarum cognitione ac rei diplomaticæ studio, sibi tam grato, capiebat incrementa, verum iis etiam egregia aliorum promte juvare poterat instituta, literato orbi profutura, Vir, qui literis promovendis totum se consecraverat. Sed nec archetypa eorum exempla renuebat, quæ ab aliis jam in lucem emissa fuerant, si præsertim magni momenti essent: experientia edoctus, industriam illorum collationem cum exemplaribus editis multum adjumenti ad faciliorem veterum diplomatum et Codicum lectionem, ad tortuosos literarum vocumque ductus explanandos, ad intricata verborum compendia enodanda, adque diversos pro sæculorum diversitate scriptionis modos cognoscendos præstare, ac præterea ad edita, si forte vitiose descripta, et male lecta fuerint, emendanda, aut, si castrata vel interpolata sint, integritati suæ restituenda sæpe maxime conducibilem esse.

Laborem vero, rei diplomaticæ impensum, satis superque compensabat insignis utilitas et felix profectus in studio historiarum, genealogiarum, geographiarum mediæ ævi, doctrinarum heraldicarum, antiquitatum, juris publici, feudalis et ecclesiastici, ac artis criticæ. Reddebantur ipsi sensim frequenti diplomatum tractatione familiaria Impe-

ratorum Regumque monogrammata , sigilla , variæ temporum notæ , Archicancellariorum et Cancellariorum nomina , palatia mediæ ævi publica , regię curtes , villæ , pagi , aliaque.

Sedulo autem hoc studium , insigni ejus utilitate captus , continuavit , cumque felici auspicio ingentem diplomatum vim coegisset , animus ipsi erat , aliquando BIBLIOTHECAM DIPLOMATICAM VF-FENBACHIANAM publici juris facere , in qua omnia diplomata , quorum ei copia erat , tam manu exarata , quam in variis libris suæ bibliothecæ impressis passim dispersa , serie pariter chronologica ac secundum sua argumenta disposita recenserentur. Sed dolendum est , huic et aliis eximiis Viri optimi consiliis et conatibus præter negotiorum publicorum molem , ipsius humeris deinceps impositam , tam bibliopolarum morositatem , quam præmaturum ejus ac Reipublicæ literariæ funestum obitum intercessisse.

Jaçturam vero hanc feliciter refarsit clarissimi nominis Vir , Petrus GEORGISCH , cujus laudabili diligentia accepta ferimus Regesta Chronologico - Diplomatica , in quibus recensentur omnis generis monumenta et documenta publica , quæ singula in summas ille suas contraxit ,
juxta

juxta annorum dierumque , quos præferunt, seriem digessit, temporisque subnotationes medii ævi more expressas cum nostro computandi modo composuit.

Has aliasque opes literarias tanto Noster congeffit ardore atque successu , nullis parcens sumtibus , ut ejus Bibliotheca illo tempore paucissimas inter privatas habuerit pares , Codicum vero manu exaratorum ac librorum prohibitorum copia haud plerasque tantum nostri & superioris ævi , quod mihi quidem constet , privatas, sed et multas publicas superaverit. Numerus enim Manuscriptorum ad duo fere voluminum millia ascendit. Ne quid dicam de insigni apparatu librorum, manu Clarorum Virorum vel collatorum , vel emendatorum , vel annotationibus illustratorum , quos Morhofius, dexterrimus, si quis alius , harum rerum æstimator, Manuscriptis accensendos judicavit (h) , quorumque propemodum quadringentos in Bibliothecam suam mira felicitate intulit. Epistolarum vero ineditarum supra duas myriadas, divitem profecto reconditarum rerum thesaurum , auspiciatissima industria conquisivit, quas præstantissimus Hamburgensium Theologus , Jo. Christopho-

h 3

(h) in Polyhist. liter. Lib. I. Cap. VII. p. 64.

phorus WOLFIVS docte recensuit (i), qui hanc inæstimabilem gazam æquo sibi pretio post placidam Nostri mortem vindicaverat.

Magnus ille Josephus SCALIGER ad Bibliothecam, quam consummatam dicere fas sit, sex spatiosa requiri conclavia censuit (k). *Pour une parfaite Bibliothèque il faudroit avoir six grandes Ghambres.* Noster, licet Bibliothecam suam omnibus numeris haud absolutam esse libens fassus sit, ac multa adhuc desideraverit, octo conclavia, interque hæc quatuor satis ampla, libris Codicibusque calamo exaratis repleta habuit, quorum conspectum, scita Generosissimi Fratris manu delineatum, ærique incisum, nostræ de studio beati Viri bibliothecario commentationi adjungemus.

Non

(i) in Conspectu Supellectilis epistolicae et literariae manu exaratae, quæ apud eum, dum viveret, exstitit, post beatum vero ejus obitum cum omni illius opulentissimo apparatu librario in Perill. Reip. Hamburgensis Bibliothecam transmigravit.

(k) vid. Scaligerana, cum Thuanis, Peronianis, Pithœanis et Colomesianis a Des Maizeaux junctim Amsterodami A. 1740. edita, Tom. II. p. 237.

Non autem in horum duntaxat conclavium ornamentum , vanamque pompam tantum librorum apparatus sollicitè Musagetæ noster collegit , sed in suum potius aliorumque φιλομέσων usum. Insitus ille literarum a primis crepundiis amor , et inexhausta legendi aviditas tantum in ejus pectore incenderat ardorem , ut sua jure potuerit facere Juliani Imp. verba (1) :

Ἄλλοι μὲν ἵππων , ἄλλοι δὲ ὀρνέων ,
 Ἄλλοι θηρίων ἐρεῶσι , μοι δὲ βιβλίων
 κτήσεως ἐκ παιδαρίῳ δυνὸς ἐκτέτῃκε
 πόθος.

Alii quidem equos amant , alii aves , alii feras ; mihi vero a puerulo mirum-acquirendi et possidendi libros desiderium insedit. Eadem ipsi mens fuit , quæ Francisco quondam Petrarchæ , strenuo illi bonarum literarum in media barbarie statori atque vindici , ita de se ad fratrem Gerardum scribenti (m) : Una inextinguibilis cupiditas me tenet , quam frenare hæcænus nec potui , nec certe volui. Mihi enim

h 4

in-

(1) vid. Socratis Histor. eccles. Lib. III. Cap. I.

(m) vid. ejus Epistolas familiar. L. III. p. 107. sq. edit. Lugd. A. 1601. in 8.

interblandior, honestarum rerum non inhonestam esse cupidinem. Expectas audire morbi genus? Libris satiari nequeo, et habeo plures sorte, quam oportet. Sed sicut in ceteris rebus; sic in libris accidit; querendi successus avaritiæ calcare est, quinimo singulare quiddam in libris est. Aurum, argentum, gemmæ, purpurea vestis, marmorea domus, cultus ager, picta tabula, phaleratus sonipes, ceteraque id genus, mutam habent et superficiariam voluptatem: libri medullitus delectant, colloquuntur, consulunt, et viva quadam nobis atque arguta familiaritate junguntur. Neque solum sese lectoribus quisque suis insinuat, sed et aliorum nomen ingerit, et alter alterius desiderium facit. -- Nemo ergo mirabitur, vehementer his animos inflammari atque configi, quorum singula suas scintillas, suosque aculeos palam habent, aliosque clanculum in sena gestant, quos sibi invicem subministrant.

Nulla igitur in loco jucundius versabatur, quam in Bibliotheca sua, optimis in omni doctrinæ genere circumfusus libris. In illis amœnissimis recessibus, ubi Musæ Charitesque sessitabant, hilares traducere horas, quibusvis aliis deliciis longe præferebat. Hoc sapientiæ sacrarium alacri pede intrans, poterat Dan. HEIN-
SII, illius Gratiarum corçuli, verbis uti: Quoties Bibliothecam ingredior, toties triumphare soleo, non imperatorio habitu cum armillis aut lauro, nec sequente militum manu, sed astante tot il-

lustrum ingeniorum exercitu , quorum nomina immortalitati consecrata sunt , astante omnis ævi, omnium seculorum populo, qui aut Græce, aut Latine , aut quocunque literarum genere aliquam sapientia partem coluerunt.

Non autem sibi soli servabat cimelia sua , tanto studio tantisque sumtibus undique conquisita , verum, uti erat ad literas ornandas natus, omnibus bonis communia esse voluit. Toto enim cœlo discrepabat optima ejus indoles ab illaudabili Euclionum tenacitate , qui opes suas avidissime corrasas nemini prodesse cupiunt. Sed communi bono dicata erat omnis ejus literata gaza : cuivis strenuo Musarum cultori patebant ejus thesauri , sive indigenæ, sive advenæ : nulli honesto aditus eorum intercludebatur. Tanta vero erat et Bibliothecæ illius et humanissimi Possessoris ubique celebritas , ut ex doctis peregrinis Francofurtum non vidisse existimaretur , qui VFFENBACHIUM ejusque instructissimam Bibliothecam haud viderat. Utriusque laudes cecinere, qui in itineribus suis magna facilitate in illustre hoc Musarum domicilium fuere admissi , Viri nominatissimi , Carolus Stephanus JORDANUS(n), et Jo. Georgius KEYS-

h s

LE.

(n) vid. Ejus *Histoire d' un Voyage littéraire* ,
fait

LERUS (o). Secundæ itineris sui literaril parti p. 175. sq. Edmundus MARTENE ac Vrsinus DURANDUS, Viri doctissimi, fragmenta duarum epistolarum ad Ill. Baronem de CRASSIER scriptarum inseruerunt, quorum in primo maxime honorifica Nostri ejusque Bibliothecæ facta est mentio, si unam illam fabulosam de Sangallensibus spoliis in ejus gazam illatis narratiunculam excepero. En ipsa Tibi referentis verba : *Des trois curieux que j' ai vû passant à Francfort, Monsieur de VFFENBACH très-riche particulier, demeurant dans la rue d' Eschenheimer, est celui qui l' emporte : je ne crois pas même qu' il se trouve son pareil dans toute l' Allemagne. Car outre un très-beau Cabinet de medailles, il a des bustes, statues, bas-reliefs, des bijoux en grand nombre, et par-dessus cela une bibliotheque des plus riches et des mieux ordonnées. Pour vous en donner une idée, je vous dirai, qu' il travaille actuellement à en donner le catalogue au public, en deux gros volumes in folio, dont l' un ne contiendra que ses manuscrits, tous également rares. Cet ouvrage sera dans le goût de Lambecius, mais plus succinct,*

fait en MDCCXXXIII. en France, en Angleterre et en Hollande, p. 23. sq.

(o) vid. Ejus Epistolas itinerarias, Germanicè editas, Tom. II. Epist. XCVIII, p. 1315. sq.

eint. Parmi ses manuscrits il y en a qui lui viennent du pillage de l'abbaye de S. Gal, qu' il a acheté au poids seulement, ayant fait exprès un voyage à Ausbourg, où il avoit appris, mais trop tard, qu' on y en avoit amené des chariots pleins, qui furent d' abord vendus chez des bâteurs d' or et des relieurs de livres, et periront ainsi misérablement. Du reste je ne sçaurois assez vous vanter le sçavoir et les manieres nobles et gracieuses de ce Monsieur de VFFENBACH, qui ne souhaite rien tant que la connoissance des sçavans, à qui il se fait un plaisir de communiquer tout sans reserve &c.

Hujusce epistolæ eorumque, quæ in illa de Sangallensium membranarum fato traduntur, cum in literis ad τὸν μακαρίτην datis aliud agens olim meminissẽm, hæc ad ea A. MDCCXXVII. mense Martio Mæcenas desideratissimus reposuit, quæ hoc loco, cum antehac occasio mihi defuerit, omnibus ut faciam cognita, pietas et ipsa illius voluntas, pro imperio mihi habenda, postulat. Ita autem vir integerimus in epistola ad me tum exarata inter cætera: „In nuperrimis Tuis scripseras, Te „commentationem quandam de eruditis „Itinerariis Amœnitatibus Tuis inserturum, „in antecedentibus vero mentionem feceras Diarii illius literarii a duobus Benedictinis editi, in cujus Tomo II. de mea „quoque Bibliotheca quædam narrarentur. Mira-

„Mirabar a Benedictinis illis, quos ne ocu-
 „lis quidem vidisse memineram, aliquam
 „mei mentionem fieri potuisse. Cum igi-
 „tur nuper in bibliotheca aliud agenti Iti-
 „nerarii illius Tomus II. in manus incide-
 „ret, locum abs Te indicatum evolvi. Ad
 „hujus vero lectionem erubui, obstupui,
 „ac, nisi epistolam p. 175. sq. insertam ab
 „amico, quem mox nominabo, profectam
 „esse illico olfecissem, vehementer com-
 „motus fuisset. Ut enim de nimis, qui-
 „bus illam, vel me potius onerat, enco-
 „miis nil dicam, varia a veritate plane
 „absona atque aliena continet. Primo e-
 „nim bina illa Catalogi volumina nonnisi
 „Codices MSSos complecti debebant, quod
 „ex edito eorundem primo, eique præfixa
 „ad MAJUM meum epistola, patet. De
 „typis enim exaratorum librorum catalo-
 „go edendo ne quidem somniaram. Deinde
 „quæ de MSSis San- Gallensibus Augustæ
 „Vind. a me coemtis narrat, falsissima sunt.
 „Nam tantum abest, ut e Bibliotheca San-
 „Gallensi plena codicibus plaustra Augu-
 „stam fuerint delata, ut optime potius no-
 „verim, ne folium quidem istuc pervenis-
 „se, sed spolia illa literaria inter Tiguri-
 „nos et Bernenses fuisse divisa, transmi-
 „sisque amicorum aliquis catalogum eorum
 „codicum, qui Tigurinis cesserunt, quem
 „etiamnum servo. Tantum enim abest, ut
 „ad coemendos codices istos iter Augustam
 „in-

„instituerim, ut nunquam istas oras atti-
„gerim, licet splendissimam hanc urbem
„adire semper in votis fuerit, atque eti-
„amnum sit. Dicam autem nunc, quæ nar-
„rationi erronæ ansam procul dubio de-
„derunt. Autor hujus epistolæ SCHAN-
„NATUS ille est, qui variis hætenus edi-
„tis scriptis ac monumentis egregiis anti-
„quitates ac historiam Abbatiae Fuldenfis
„illustrantibus inclaruit, Vir tum magnæ
„sane eruditionis, tum etiam optimæ fidei.
„Ast cum natione sit Luxenburgensis, ac
„Germanicam linguam, tunc potissimum
„temporis, minus calleret, me in bi-
„bliotheca mox Gallica, mox Germanica,
„ob Helvetios nonnullos, qui una cum il-
„lo præsentés erant, eamque perlustrabant,
„linguâ differentem minus intellexisse vi-
„detur. Sermo autem nobis erat primo
„de direpta in motibus nuperis Helveti-
„cis bibliotheca San-Gallensi, ablatisque
„inde codicibus. Deinde cum codices me-
„os veteres membranaceos commonstra-
„rem, atque unus ex peregrinis illis, qui
„aderant, percontaretur, unde hunc ap-
„paratum meum comparassem, responde-
„bam: me in itineribus plurimos conqui-
„sivisse codices, tum etiam fratrem e Gal-
„lia atque Italia plurimos transmisisse, haud
„pauca vero volumina in nundinis nostris
„olim coemisse. Narrabam porro magnam
„codicum ac membranarum copiam Colo-
„nia

„nia et ex variis in vicinia monasteriis
„huc perlata olim fuisse , quæ a merca-
„toribus Noribergensibus ac Augustanis in
„profanos bracteatorum , bibliopegorum
„ac aliorum opificum usus avide fuerint
„coemta. Addebam, me in excutiendis istis
„membranis quam maxime sedulum fuisse ,
„ac varios Codices, licet non sine tædio
„ac maximo labore, hoc modo ab interitu
„servasse. Cum autem id exiguo a me fa-
„ctum esse pretio existimarent, responde-
„bam, pro ponderis ratione me hæc qui-
„dem volumina coemisse ; cum vero gra-
„viores sint membranæ , ac pro formæ
„magnitudine pretium quoque auctum fu-
„erit , majora , quæ commonstrabam, vo-
„lumina haud levi pretio constituisse, adeo,
„ut earum membranarum , quæ maximæ
„formæ fuerint, libra duobus florenis re-
„dimenda fuerit , atque sic volumen quod-
„dam majus centum et quod excurrit flo-
„renorum summam sæpius confecerit. For-
„tunatum tamen me asserebam , quod
„tot tamque bonæ notæ codices profanis
„operariorum manibus præripere ac conser-
„vare licuerit , deplorabamque nullas fere
„membranas amplius advehi. Hos alios-
„ve sermones meos SCHANNATUS vel
„minus intelligens vel confundens, errone-
„am illam , innocenter tamen nec malo ,
„ut prorsus confido, animo ad Baronem de
„CRASSIER, Patronum suum, perscripsit
„nar-

„narrationem. Cum autem non modo mei,
 „sed publici etiam interfit, ut illius falsi-
 „tas indicetur, rem mihi facies gratissi-
 „mam, si in observatione, quam medita-
 „ris, ubi de isthoc itinerario alias præstan-
 „tissimo ages, de hac SCHANNATI (sup-
 „presso tamen viri optimi alias mihi que
 „amicissimi nomine) hallucinatione vel ip-
 „se moneas, vel si lectu digna iudices,
 „hæc ipsa monita mea inseras,,

SCHANNATO jam mortalium coetui
 exempto, reque hac nullam plane famæ vi-
 ri meritissimi maculam inurente, causam
 non video, quare nomen ejus mihi sup-
 primendum sit. Cæterum nisi secundum
 sancitas in compositione pacis cum San-Gal-
 lenſi Abbate initæ leges bibliotheca illa
 cum omnibus Codicibus MSSis pristino
 suo domino restituenda fuisset, jure belli
 Illustrissimi Rerump. Tigurinæ et Bernen-
 sis Proceres justissimi illius extitissent pos-
 sessores. Si enim fors belli aliter cecidisset,
 ipsorum bibliothecas eandem fuisse fortu-
 nam experturas, quis dubitet? Ecquis au-
 tem, quæso, sibi persuadeat, intelligentis-
 simos illos hujusmodi cimeliorum æstima-
 tores plena codicibus membranaceis plau-
 stra tum Augustam in profanos opificum
 usus fuisse missuros? Quodsi vero ab aliis
 id, insciis superioribus, furtim factum esset,
 certum mihi est et extra omnem dubitatio-
 nis

nis aleam positum, VFFENBACHIUM meum, qua erat animi morumque integritate, ne unicum quidem inde folium, licet omnia vilissimo comparari potuissent pretio, in bibliothecam suam fuisse illaturum.

Sed ex hoc diverticulo in orbitam regrediendum est. Asservatur nunc in Bibliotheca Reip. Hamburgensis Album, tribus voluminibus formæ quadruplicis oblongæ comprehensum, cui nomina sua inscripserunt docti advenæ, qui ab A. MDCCXI. ad A. MDCCXXXIII. insignem beati Viri apparatus librarium perlustrarunt. Singula folia figuram elegantem ære expressam, inque medio ejus spatio vacuo inscribentium nomina exhibent (p). Ipse noster Mæcenas in epistola ad Virum Clar. Jo. Christia-
num LANGIUM, huic Sylloges nostræ parti

(p) vid. b. Jo. Christoph. WOLFII Conspectum supellectilis suæ epistolice et literariæ manu exarata. p. 298. Istiusmodi etiam Album Jacobus de WILDE illis, qui suum Gazophylacium, nummis, gemmis, variisque antiquitatibus aliis referatissimum, coram admirati erant, tradere consuevit, ut nomina sua memoriæ causa ei inscriberent. vid. b. Jac. BURCKHARDI de sua ipsius vita Commentar. p. 56.

ti inserta, emblemata in tabulis illis æneis delineata descripsit.

Præterea, qua erat propensissima ad rei literariæ pomœria amplificanda voluntate animatus, nihil facile illi fuit jucundius, quam præclara eruditorum instituta opibus suis quibuscunque promovere, et egregia, reſeratis omnibus ſuis ſcriniis, ſubſidia illis ſubminiſtrare. Nemo unquam boni publici ſtudioſus fruſtra ejus ſuppeditias quæſivit: imo nullis precibus compellatus, interdum nihil tale cogitantibus, quæ illorum opera in publicam utilitatem converti poſſe cenſuit, liberali manu obtulit (q). Dicitur non poſſe, quanta delibutum ſe voluptate ſenſerit, quotieſcunque eximiiſ aliorum ſtudiis obſecundandi daretur ipſi occaſio. Cum cimelia ſua, tanto labore ac pretio parta, Viris doctis in publicos uſus ſuppeditare illi liceret, ingens beneficium accepiffe, non dediffe ſibi videbatur Virorum optimus, benefaciendo triumphare ſolitus: ut adeo in ipſum belliffime conveniant, quæ olim Claudius SALMASIUS ad Jacobum GOLIIUM de PEIRESCIO, æterno Galliæ ſuæ orna-

Pars II.

i

men-

(q) Exemplum hujus rei habes in prima hujus Collectionis parte, p. 72. ſqq.

mento , perscripsit (r) : *De humanitate et beneficentia PEIRESCII nostri qua dicis, profecto verissima sunt, nihilque dici de hujus candore, liberalitate, ac magnificencia potest, quin omnia omnium verba factis exsuperet. Quod ruborem inde tibi suffusum narras, eum deleri ex tuo illo ingenio velim. Injuriam quippe optimo Viro puto fieri, quum timide beneficia, qua tam cupide offert, et cupidius confert, accipiuntur. Obligatur, quum obligat. Nihil unquam tale vidi.*

Hac fini Halæ Hermundurorum A. MDCCXX. in integri folii forma publicavit primum Catalogi et Recensionis suorum MSS. Codicum tomum (s), ut Viris de re literaria bene mereri volentibus omnem suam calamo exaratam suppellectilem liberaliter ad usus publicos offerret, additurus mox secundum, nisi bibliopolæ infelicitas repagulum objecisset. Præfixa illi epistola ad Jo. Henricum MAJUM, Fil. amicorum principem, satis luculenter animum ejus rei literariæ promovendæ lon-

(r) vid. ejus Epistolas ab Antonio Clementio Lugd. Bat. A. MDCLVI. in 4. editas, p. 186. sq.

(s) vid. Catalogi Bibliothecæ Reimmanianæ systematico - critici Tom. II. p. 7. sq.

longe cupidissimum testatur. In isthoc Catalogo laudatus MAJUS Codices Hebraicos et Græcos more Lambeciano recensuit (t), Orientales reliquos, Carolus

i 2

DA-

(t) Juvat hic locum quendam , huc spectantem, exhibere ex magni hodie nominis Theologi Gieffensis, Ven. D. Jo. Hermannii BENNERI facundissimo pariter atque rarissime obvio Panegyrico, immortalibus meritis et famæ b. Jo. Henrici MAJI, Fil. quem inter et VFFENBACHIUM nostrum intima quædam et vel ipsis naturæ vinculis firmior necessitudo intercessit, consecrato, p. 30. sqq. *Maximus Nostro fautor et amicus obtigerat, VFFENBACHIUS* , in quo si PEIRESCIUM revixisse dicemus, neque nimium quiddam, neque per Europam obscurum adfirmabitur. Is, cum clarissima literarum monumenta suis in thesauris recondere, quæ nunquam prela nec lucem publicam viderent, admirabilis incessit cupido MAJUM, aperiendi scrinia, quorum opes literata gens introspiceret, et non minus inde, ipsius consilio, quam amici fortuna, neque huic magis, quam sibi ipsi gratularetur. Adgressus est negotium immensi laboris, quod nescio an quisquam præter ipsum pari vel solertia, vel constantia, vel doctrina, vel ipsa denique felicitate, perficeret.

DADICHI Antiochenus , linguæ Arabicæ
ac

ficeret. Ipse tanquam ludus hic esset , et non omnia literarum præsidia flagitaret , Gracas ita tabulas , ut aliquis vernaculum epigramma, descripserit , plerumque sic notarum ductibus implexas , ac mirifice distortas , ut alium adspectus ipse terruisset. His non contenta sedulitas , Ebraas quoque membranas excussit , quæ non Oedipum conjectorem , sed Apollinis indicium desiderabant : ita varia scriptiones , ita innexi apices , ita distorti sensus ; ea argumentorum obscuritas , ea ubique rationum perturbatio , lectori vel cupidissimo fastidium obfunde-
bant. MAJUS nihil hic implicitum , nihil dubium reliquit ; nec precario tamen ab aliena manu , sed suo ab ingenio , promptissimaque rerum notitia filum in hoc Labyrintho suspendit , quod errore nullo , per anfractus omnes , et incerta vestigia , pedem intrepidum tuto fideliterque deduxit. Plurima ex his Latino etiam sermone feliciter expressit , obscuriora suis annotationis illustravit , scriptorum ætates , nomina , discrimina , partim signis et pictura , partim scribendi genere , quasi genio quodam adflatus , agnovit , et e suis quemque latebris in lucem evocavit. Abeant hac in posteritatis memoriam , et monumentum exigant auctori suo , quod neque situs conficiat , neque livor ullus convellat , neque vetustas ipsa , quæ moles et marmora consumit , annorum diuturnitate labefactet.

ac Turcicæ callentissimus , et ipse VF-
FENBACHIUS Latinos aliosque.

Ex ubere igitur hoc fonte , ac rivo
omnibus boni publici studiosis patulo non
pauci Viri docti sua feliciter irrigavere
prata. Documento esse possunt, ut pauca
attingam exempla , Georgii Christiani
BURCKLINI Biblia Hebraica , directore
Jo. Henrico MAJO P. edita, D. Jo. Alb.
BENGELII Novum Testamentum Græcum
cum apparatu critico , Jo. Christophori
WOLFII Bibliotheca Hebræa , D. Chr.
Aug. HEUMANNI Acta Philosophorum et
Pœcile , Jo. Christiani LUNIGII Colle-
ctiones diplomaticæ, Hermannii CONRIN-
GII Opera a Jo. Wilhelmo de GOEBEL
junctim edita , Ge. Christiani JOANNIS
Scriptores rerum Moguntinarum aliaque ,
D. Jo. Georgii SCHERZII Jus provinciale
Alemannicum , sub nomine Speculi Suevi-
ci comprehensum , P. Bern. PEZII The-
saurus Anecdotorum novissimus , Jo. BU-
GENHAGII Pomerania , a Ven. Theolo-
go Gryphiswaldensi , D. Jac. Henrico
BALTHASARE publicæ luci exposita, Jo.
Phil. KUCHENBECKERI Analecta Hassia-
ca et Vita Herm. Vulteji, Jo. Balth. RIT-
TERI Historia Reformationis Francofurta-
næ , Jo. Christophori COLERI Antholo-
gia , Jo. Henrici MAJI Fil. Observationes
sacræ , Jo. Frid. BERTRAMI Historia Criti-

ca Joannis a Lasco , Jo. Mich. KOCHII
Memoria D. Lutheri , Jo. Jac. SCHUDTII
Memorabilia Judaica , &c.

SCHUDTII, Reſtoris quondam Gym-
naſii Francofurtani præclare meriti, men-
tionem faciens, ſilentio prætermittere ne-
queo, quæ ipſemet in dedicatione quarti
laudati operis tomi de noſtro Mæcenate
gratus commemoravit: nempe liberrimum
ſibi aditum ad copioſiſſimam Bibli-
othecam ab eo, clave etiam tradita, be-
nevole fuiſſe conſeſſum: ut adeo integros
ipſi dies, nundinarum præſertim tempore,
in illo Muſarum ſanctuario commorari, ac
quibuſcunque libris et Codicibus tanquam
ſuis uti licuerit. Inſuper cum SCHUD-
TIUS Anglicæ linguæ eſſet imperitus, va-
ria ex ejus gentis Scriptoribus memorabi-
lia Judaica illius in gratiam Noſter colle-
git., atque in vernaculum ſermonem
tranſtulit (u). Mæ etiam Amœnitates
literariæ vitam veluti ac ſpiritum b. D.
Raymundi KRAFFT de Dellmenſingen,
Conſulis olim Ulmenſis, de Rep. patriæ et
literaria immortaliter meriti, et Optimi
VFFENBACHII benevolentia acceptum
reſe-

(u) Exempla vide in SCHUDTII *Jüdiſchen
Merckwürdigkeiten*, Tom. I. p. 42. ſqq.
Tom. IV. p. 137. ſqq. &c.

referunt , quorum uterque primo sua sponte , ac non rogatus ad institutum illud promovendum sua mihi cimelia, auro cariora , liberaliter obtulit.

Factum hinc est, ut certatim suos Viri eruditi libros in publicum summi , quo innumera ejus in literatum orbem merita prosequerentur , cultus testimonium sacros devotosque ipsi esse juberent. Sic Excellentissimus Consiliarius Imp. Aulicus, D. Christianus Henricus Lib. Baro de SENCKENBERG ei nuncupavit primum Selectorum Juris et Historiarum tomum, D. Jo. Albertus FABRICIUS Bibliothecæ Græcæ tomum VI. Jo. Matthias GESNERUS Dissertationem de Philopatride, Luciano Dialogo , Jo. Petrus KOHLIUS vitam Petri Bælii , in Germanicum sermonem conversam, L. Jo. Henricus a SEELLEN Josephi Abudacni Historiam Jacobitarum seu Coptorum in Ægypto , Lybia &c. habitantium , D. Franciscus Ern. BRUCKMANNUS Theses physicas ex historia naturali curiosa Lapidis Ὠὴ Ἀσβεστῆς (x) , D. Jo. Hermannus FURSTENAU

i 4

Dis-

(x) Notatu dignum est , has theses quatuor foliis chartæ, ex ipso Asbesto lapide confectæ, impressas fuisse. vid. b. Jac.

Differtationem epistolarem de morbis Jure Consultorum, Jo. Henricus MAJUS Fil. Librum III. et IV. Observationum sacrarum, D. Theodorus HASÆUS et Frid. Adolphus LAMPE fasciculum I. Classis IV. Bibliothecæ historico-philologico-theologicæ, Jo. Jac. SCHUDTIUS quartum Memorabilium Judaicorum tomum, Christoph. Frid. GROSSIUS Petri Dan. Hue-tii librum de intellectus humani infirmitate Germanice redditum, et, si quid etiam de me adiciere liceat, ego tot nominibus Patrono incomparabili æternum devinctus nonam Amœnitatum literariarum partem: beate vero jam defuncti memoriæ primum Amœnitatum historiæ ecclesiasticæ et literariæ tomum lubens meritoque consecra-
vi.

Licet autem tam chara ipsi fuerit Bibliotheca, stupendo multorum annorum studio feliciter conquistata, tamen ne libros pluris quam liberös fecisse, majoremque bibliothecæ augendæ, quam familiæ curandæ rationem habuisse videretur, accedente præter debilem sanitatis constitutio-nem negotiorum publicorum mole, tandem
in

Jac. BURCKHARDI nova ad Commen-tarium de sua ipsius vita *Analecta*, p. 58. sq.

in tempore de Bibliotheca, qua pro desiderio uti frui amplius haud licebat, sine gravi jactura distrahenda cogitavit, exempla secutus Virorum amplissimorum Jo. Pauli Abbatis BIGNONII, van der MARKII, Sam. HULSII, Goswini UILENBROUCKII, aliorumque, qui vivi adhuc atque spirantes bibliothecas suas instructissimas nostra ætate divendiderunt.

Anno itaque MDCCXXIX. et binis sequentibus evulgavit sub titulo BIBLIOTHECÆ UNIVERSALIS VFFENBACHIANÆ Catalogum librorum, tam typis, quam manu exaratorum; quatuor spissis octies dispartitæ formæ voluminibus comprehensum, ac magna industria concinnatum, eosque adjectis pretiis venales exposuit. Gravissimas in proloquio indicavit rationes, quæ eum nolentem volentem induxerunt, ut librariæ suæ suppellectilis tam charæ atque raræ jacturam faceret. Non autem in hoc copiosissimo Catalogo continentur tam ea scripta, quæ ad res Francofurtenses spectant, quam illa, quæ ad historiam literariam ac rem librariam faciunt. Hæc enim ad leniendum ex reliquorum jactura dolorem sibi reservanda, atque omni studio augenda duxit. Ingenti ipsi solatio fuit, quod locuples apparatus Hebraicus, Codicibus CCXXXV. manuscriptis constans, in dignissimas summi Philologi

Hamburgensis, Jo. Christophori WOLFII, manus pervenerit (y). Insignem congeriem actorum et scriptorum, ad res Francofurtanas spectantium, Reipublicæ patriæ legavit. Libri autem ex venditione magno numero residui, et qui ad historiam literariam ac rem librariam faciunt, post beatam ejus analysin Anno MDCCXXXV. mense Martio et sequentibus sub hasta plus licitantibus fuere divenditi, novusque hunc in finem eorum Catalogus, quatuor itidem tomis comprehensus, typis excusus est. Hæc de BIBLIOTHECA VFFENBACHIANA famigeratissima, e qua tantum boni in orbem eruditum redundavit, in præsentia sufficiant. Restat, ut de vita Nostri conjugali ac Reipublicæ patriæ devota aliisque nonnihil adhuc commemoremus.

Provido Numine sic dispensante, vitæ thorique sociam A. MDCCXI. mense Julio elegit Viri sibi amicissimi, Jo. Nicolai Sneideri, dicti Smidt, artis salutaris Doctoris, Viduam, et generis honestate, et aliis, quæ fœminas decorant, ornamentis maxime insignem, Margaretam Elisabetham, D. Wilhelmi PERSBECHERI, Jcti, Scabini et Senatoris Francof. spectatissimi, ac
Eli-

(y) conf. Sylloges hujus Partem I. p. 57.
sq.

Elisabethæ Margaretæ de Glock filiam:quam Musis amicam fuisse in schedis suis sæpe Noster lætus testatur, et cum qua ad vitæ usque finem amantissime ac sine querela vixit. Suscepit ex ea duas filias, unam Sibyllam Carolinam A. MDCCXII. d. XIX. Jun. alteram Annam Sibyllam A. MDCCXIII. d. II. Jul. Filius vero ipsi natus est A. MDCCXVI. d. VI. Jul. ac nomine Friderici Caroli insignitus, qui

Si vixisset, erat decus et spes magna parentis.
Sed flos ille in ipso quasi exortu iterum concidit. Utraque autem filia intra unius anni decursum, una infelici raptu, altera subitanea morte se A. MDCCXXXII. et sequenti privatum infaustus pater acerbe doluit,

Licet Noster Mæcenæ, totus literarum amore flagrans, sibi tantum Musisque vivere suis, ac nullis aliis implicari negotiis præoptasset, patriæ tamen commodis pro virili promovendis se quoque natum cogitans, ac boni civis officium rite expleturus, A. MDCCXXI. a Patribus Reip. Francofurtanæ conscriptis in amplissimum Ordinem senatorium curarumque ac consiliorum partem se cooptari facile passus est. In hac dignitate positus, supremam sibi legem salutem patriæ statuit, talemque se præstitit, ut in eum convenerit, quod de Catone pronunciasse Ciceronem novi-

novimus : *O te felicem, M. Porci, a quo rem improbam petere nemo audet.* Consulatum bis ita gessit, ut in omnibus ejus factis atque consiliis enituerit spectata illius probitas ac integritas, prudentiæ et comitati amico juncta connubio. Tandem circa anni MDCCXXX. finem ad Scabinatum ascendit, eum nempe honoris gradum, quo ad supremum in Rep. Francofurtensi fastigium proxime acceditur. Tantum vero inde pro bono publico curarum, tantum laborum in ejus humeros devolutum est, ut vale Bibliothecæ suæ, tantopere sibi deamata, dicere coactum se ingemiscens senserit.

Cæterum temperamento fuit cholerico-sanguineo, statura mediocri, vultu liberali quidem, sed pallidiori, oculis nigris, grandiusculis, hiantibus, sereni ac boni animi indicibus, voce virili, ast non ingrata, sed sonora, et, quod præcipuum, consona menti, corporis habitu ad maciem magis, quam obesitatem inclinante, gestibus honestis et ad gravitatem compositis : animo Deum pie reverente, in victu temperante, omnes voluptates præter eam, quæ ex literarum studiis enascitur, spernente, ad iracundiam paulo proclivior, sed facile rursus placabilis, nec vindictæ cupido, justitiæ et æquitatis amante, nihil unquam in dicenda sententia aut metu

tui

tui aut gratiæ dante , nulla denique re jucundius, quam si consiliis opibusque suis eruditi orbis commoda amplificare posset, affici solito.

Ab A. MDCCXXV. valetudo fuit satis imbecilla, et ad omnes ventorum tempestatisque injurias valde irritabilis. Patienter autem hos vitæ sedentariæ ac mali hypochondriaci in dies ingravescentis fructus tulit, nec uxori, liberis ac domesticis molestus esse querelis, nec etiam officiis deesse voluit. Hinc quotidie curiam frequentavit, licet variis languoribus obnoxius. Tandem vero, accedentibus gravissimis, quas supra attingi, calamitatibus domesticis, lenta cum febris sensim omnibus plane viribus exhaustit; unde factum est, ut A. MDCCXXXIV. d. VI. Jan. pie præparatus Vir immortalitate dignus placida analysi in beatorum sedes ex mortalium cœtu emigraret, anno ætatis primo supra quinquagesimum nondum plene exacto, spatio quidem vitæ satis angusto, sed, si facta et merita ejus pensitemus, nullis terminis circumscripto. Superstes enim est, eritque semper in omnium bonorum memoria, quamdiu decus suum magnis mentibus et præclaris meritis constabit. Mihi certe, dum spiritus hos reget artus, memoria tanti Musagetæ perpetim erit venerabilis, nec ulla unquam

beneficia, quibus me ornavit, obruet oblivio.

Psalmo XXV. in precibus ad Deum fundendis quotidie usus est. Sæpe etiam pio animi affectu in memoriam sibi revocans providam Numinis curam, in se embryonem adhuc in utero materno existentem conspicuam (z), grata in Deum mente Psalmi CXXXIX. versus 13. et quinque sequentes sibi applicavit, atque hoc pacto ad fiduciam in divina providentia rebus etiam in adversis collocandam se excitavit. Textum sibi funebrem mature elegit Psalmi XXXIX. vers. 5. ad 10. usque, bibliothecæ præsertim suæ versum septimum accommodans.

Licet Francofurti ad Mœnum Scabinis post suprema fata is haberi soleat honos, ut in templo quodam primario sepulturæ illis locus concedatur, suis tamen sæpius, et in lectulo quoque emortuali, Noster inculcavit, ne forte post mortem exhalationibus, e putrefactione oriundis, cuiquam vel molestus, vel exitiosus esset, velle se, quandocunque summo vitæ necisque nostræ arbitro visum fuerit, in communi cœmeterio, et quidem juxta latus b. Jobi LUDOLFI, sepeliri, dissolvi ac in pulverem redigi: integrum vero ipsis reliquit, si pro pietate sua tam sibi, quam posteris memoriam

(z) vid. primam Vitæ Vffenbachianæ particulam, p. V.

riam ejus conservare velient, ut monumentum aliquod honorarium, quo autem et ipso facile carere, ossaque sua etiam sine tali molliter quiescere possent, in Templo quodam, sine ullo tamen fastu atque pompa, erigant.

Curatum id est decenter a Vidua mœstissima, anno deinde nondum prorsus circumactō Maritum desideratissimum moriendo secuta, hocque in Templo, S. Catharinæ olim dicato, ipsi erectum fuit monumentum, nigro marmori insculptum.

Accede propius Viator

ac sine fastidio lege

non enim Epitaphium est quod cernis
cadaver vel putrescentia membra tegens
sed monumentum honorarium

ZACH. CONRADI AB VFFENBACH.

Reipublicæ patriæ Scabini ac Senatoris
quod amplissimi Senatus indultu
memoriæ sacrum esse voluerunt
hæredes mœstissimi.

Ipsæ enim extra Ecclesiam sepeliri maluit
in propylæo hujus Templi quod orientem
spectat

ne post obitum etiam cuiuspiam gravis esset
quod tota vita sedulo cavit.

Tantum suavit modestia viri optimi.

Sic etiam vetat marmor jactare prosapiam
insigniorum mole
quippe notam

non merita in utramque Rempublicam
civilem nempe ac literariam

nam

EXLIV VITA Z. CONR. AB VFFENBACH.

nam fasti curiæ
et permulta Eruditorum scripta
ejus servabunt memoriam
qui pro summo suo in bonas literas studio
vivere in illis
post fata meruit
Natus est in hac urbe
D. XXII. Februarii MDCLXXXIII.
Denatus. d. VI. Januarii MDCCXXXIV.

Marmorì autem, ipsi beatissimi Viri tumulo imposito, hæc incisa sunt:

Mortale

ZACH. CONRADI AB VFFENBACH

Scabini ac Senatoris

Depositum

Cujus Epitaphium in ipso Templo
versus Occidentem erectum
reliqua docet.





LV.

ERNESTO MARTINO PLARRE (a)

ZACHARIAS CONRADVS
AB VFFENBACH.



Jucundissima mihi fuit tu-
arum cogitationum de
scribendi pruritu reme-
diisque contra eum per-
lustratio. Igitur, ut me-
ditationibus istis ulterius
insistas, rogo. In maxi-
mum enim omnis rei

literariæ detrimentum crescit indies insa-
nabile istud cacoethes, nec ulla spes est
Pars II. R. de

(a) Hic, ortu Berolinensis, egregia præ-
ma-

meret illum. Ast, pace tua dicam libere,
non facile tales, quales tu requiris, Cen-

R 2

fores

bliothecæ suæ forulos diligentissime excussit, ut, quæ ad illud institutum pertinerent, in ejus gratiam enotaret; neque molestum ipsi erat, varia ex diversis auctoribus excerpta, addito sæpe de iis judicio, cum eo communicare, ac summa dexteritate omnia suggerere, quæ dubiis ab illo propositis ac desideriis satisfacere possent. Dolendum autem, historiam illam haud prodiisse in lucem. Gauderet haud dubie ista orbis eruditus, si ad LEIBNITII, nostri sæculi Phœnicis, consilium (vid. Ejus Epistolas, a b. Kortholto evulgatas, Vol. I. p. 397.) politissimus PLARRE Neocomum ad Comitem Metternichium missus, ac ipsis Tabularii Neocomensis documentis instructus fuisset. Verum Viri præstantissimi in agendo dexteritas, aliæque exquisitæ animi dotes ad altiores dignitates, ac inde enascentes labores gravissimos ei parabant aditum, calamumque, rei literariæ varie profuturum, manibus excutiebant; imo præmatura tandem mors eum in ipso vernantis ævi summæque dignitatis flore, anno ætatis trigesimo tertio nondum exacto, orbi erudito eripuit.

fores invenies. Et, si omnibus istis polleant virtutibus, sinceritatem præprimis desiderarem ego. Sine hac malum in pectus evadet, studiaque in alterum extremum, imo exitium incident. Personarum enim et inprimis veritatis, quod prohi! dolor eam semper comitatur et insequitur, odium, æmulatio, invidia communia eruditorum sunt vitia, quæ literis quam maxime obsunt. Iis ut careant Censores tui, ante omnia oportet. Alias, ut in Hispania et Italia evenisse vides, Reip. literariæ detrimento magis, quam adjumento erunt. Proprium tibi exemplum dabo, quodque ego ipse ægerrime fero, censuram nimis uti inexpectatam, ita iniquiorem propositi tui utilissimi in edenda historia Leutingeriana. Spero tamen, fore, ut vana illa obstacula brevi superes, et ad felicissimum exitum inceptos tuos labores perducas. Cautius tamen agendum tibi: nam is, cum quo tibi res, niger est, hunc tu Romane caveto. Sapienti sat! Interim de felici progressu me sapius certiore reddes. Francof. A. 1707. d. 3. Sept.



LVI.

ZACHARIÆ CONRADO AB VF-
FENBACH

ERNESTUS MARTINUS PLARRE.

Quas D. Lindheimero mihi reddendas dedisti litteras , III. Sept. exaratas , recte accepi , atque ex iis voluntatem in me tuam haut obscure vel eo intellexi , quod opem tuam studiis meis qualibuscunque non proficuum minus quam necessariam, adeo benigne pollicitus, supellectilis Tuæ ulteriorem usum concedere non graveris. Digna hæc liberalitas est homine litterato , atque hoc postulant studia , quæ cultores suos communi vinculo connectunt , ut quod uni deest , alter suppleat , publici boni causa. Quisquis enim sibi soli sapit , aliis penes se susque deque habitis, pro cive reipublicæ litterariæ haberi non debet , sed ad solipsorum Monarchiam relegandus est. Fateor ingenue, non potuisse mihi quicquam accidere magis gratum amicitia tua , quod videam recte Te sentire de Musis, atque earum pretium nosse ; quin præclare de iis mereri. Possides thesaurum auro contra carum , augescentem in dies accessionibus novis. Hunc tu non abscondis , vel Tibi servas soli ; sed directo dominio retento

forum habendus; ne munus hoc illis conferatur, qui, ut videantur sapere, dicente Phædro, cœlum vituperant. Hispanorum et Italorum, quos in exemplum vocas; Censuræ litteris nocivæ magis, quam utilis, dispar videtur esse ratio, nec illi obstant postulatis meis. Etsi enim illi conatu suo in expurgandis libris litterarum studiis obesse videantur, non tamen repenitus expensa asseri illud potest. Nam primo hæc Censura non prohibet librorum editionem (b), qui tum demum, postquam excusi sunt, expurgantur, sed lecturam tantum interdicat illorum locorum, quæ non congruunt credulitati Romanæ; Et deinde etiam illa Censura, etsi librorum editionem præcesserit, nihil detrimenti attulit litteris in Hispana Italaque ditione (c). Quin, si dicendum, quod

R 4

res

(b) Utique Censura Inquisitorum prohibet librorum ipsis suspectorum editionem, quod præter ipsam praxin testantur regulæ et observationes, Indicibus librorum prohibitorum præmissæ. De rigido et moroso librorum imprimendorum examine vid. Pauli Manutii Lib. III. Epist. xxxi. xli. xlii. quanquam in re tam evidenti testimoniis opus non sit.

(c) Mirum, hæc asserere ausum Plarrium, præ-

res est, asseverare ausim, tantum utilitatis inde cepisse studia, ut, quum in nostris

præjudicio scilicet receptæ hypotheseos abreptum; nisi forte exercitii tantum gratia hæc scripserit. Sane ubi libertas sentiendi exulat, ac Viri docti metu Inquisitionis reprimuntur, multa veræ eruditionis incrementis objecta sunt repagula. En tibi testem ex ipsis Pontificiis gravissimum, Lud. Ant. MURATORIUM, sub nomine Lamindi Pritanii, Lib. II. de ingeniorum moderatione in religionis negotio Cap. v. p. 251. edit. Paris. A. 1737. inter cætera de Censuræ ecclesiasticorum rigore ita scribentem: *In ipsam Ecclesiam, immo in totum genus humanum recidit hujusmodi injuria. Recidit demum in ipsam veritatem. Hinc enim eruditi a scribendis libris, ab explicanda ac proferenda veritate, atque ab erroribus stylo suo insectandis absterrentur. Frustra quippe, ut ait quidam, niti, neque aliud fatigando nisi odium querere, extrema dementia est. Certe novimus, qui, ne sibi consilgendum foret cum indocili quorundam Censuræ inscitia atque impotentia, dimissis theologicis ac philosophicis studiis, se totos conjecerunt in eruditionem profanam, unde si non æqua laus, certe minus periculi, et plus quietis expectandum fuerat.*
Non

stris terris videamus officinas omnes futilibus schedis refertissimas ; in illis regionibus libri nunc rarius prodeant , sed tales profecto , qui merentur locum in loculis eruditorum ; id quod Antonii Bibliothecam Hispanicam (d) et Italiae Ephemerides literarias (e) evolventi non potest esse

R 5

obscu-

Non ergo privatis tantum studiis officitur ab hisce Censoribus , sed publica etiam utilitati et Ecclesia , quæ Scriptoribus , Theologisque indiget , non assentatoribus , dum scribunt , neque zelo immoderato ferventibus , dum judicant , sed solida eruditione refertis , et omni superstitione et affectu vacuis.

(d) Quasi vero in Nic. ANTONII Bibliotheca Hispanica , opere præstantissimo , non multi Hispanorum , quorum vitas describit , insulsi ac futiles adducantur libri ! Nec etiam omnium , qui in Hispania prodierunt , librorum notitiam dedit Antonius.

(e) Inde hoc , quod vult Plarrius , minime consequitur. Præstantiores enim tantum libri in eximiis illis Ephemeridibus recensentur , rejectis futilibus , quorum magna etiam in Italia est seges. Sicmale concluderes ex libris , in Actis Eruditorum Lipsiensibus recensitis , ad omnes in Germania nostra publicæ luci exponi solitos.

præbent superiores epistolæ. Continua autem allegoria, a generatione hominis, et quæ eam antecedere, comitari ac subsequi solent, rebus argumentum hoc persequi meditabatur, cujus hæc in schedis ejus extat sciagraphia. I. Dialogus præparatorius. II. Nuptiæ mentis et sophiæ vel moriæ. III. Conceptio. IV. Tempus gestationis. V. Puerperii præparatio. VI. Ipsum puerperium. VII. Partus. VIII. Solennia puerperii post editum partum. IX. Educatio et familia. X. Manumissio. XI. Fata. XII. Mors seu interitus et immortalitas. Accessum ad illud institutum hoc sibi parare pacto constituerat. Gregorius LETI, polygraphus ille haud incelebris, cujus imagini hoc nonnemo subjecit distichon:

*Hæc LETI facies, quot sæculum continet annos
Quem solum dicas tot peperisse libros,*

post suprema fata campos ingressus Elyfios, cum multos adhuc foetus literarios in utero veluti ingenii gestaret, eque parturiendi dolore jam jam laboraret, tumultu ibi miscebantur omnia, deficiente nimirum typographia, cujus ope, obstetricantes manus præbentibus bibliopolis, in lucem alias ingeniorum partus sive libri proferri solent. Accessit suppetias illi laturus Jctus clarissimus, Andreas TIRAC-

RAQUELLUS, THUANI elogio æque ingenii ut corporis numerosa fœcundus prole, quippe qui, dum vitali frueretur aura, singulis annis singulos libros ac liberos Reip. dare consueverat, quemque propterea hoc epigrammate Theodorus BEZA celebravit :

*Est tibi natorum quæ computat agmina conjux,
 Est tibi quæ natos bibliotheca parit.
 Fortunate senex, te nulla oblivia mortis,
 Te nunquam totum tollet avara dies.
 Namque alia ex illis mox est ventura propago,
 Ex his est pridem gloria nata tibi.
 Ut vero pereant illi, illorumque nepotes,
 Hac tamen incolumis cum patre neptis erit.*

Hic assererat, si non partibus humanis, ingenii tamen et literariis dandum in iis campis esse locum, quanquam utrosque suo exemplo collaudatos cuperet. Obstitit ipsi, quantum ad illos quidem spectat, ERASMUS Roterodamus cum aliis viris doctis, a re uxoria, dum viverent, abhorrentibus, quantum vero ad hos, repugnabant nonnulli, qui, licet ingenio ac eruditione præditi, a libris tamen scribendis prorsus abstinuere. Hanc ergo litem ultro citroque agitandam hac ratione sibi proposuerat Noster, ut perpetua partuum humanorum cum ingenii fœtibus comparatione Scriptorum vitia ac nævos perstrin-

stringeret, exemplis ubique ex historia literaria adjectis. Meis in manibus versantur, ex liberalitate τῆ μακαρίτου complures ejus schedæ, meditationes hanc in rem fortuitas complexæ, e quibus, ceu ex ungue leonem, ingenii ubertatem, judicii acumen, et vastam lectionis copiam jucunde cognoscere, ac manibus veluti palpare licet. Plusquam sexcenta sunt (vere hoc, non ὑπερβολικῶς scribo) formæ quartæ folia separata, in quibus tot modis corporum fœtus et ingénieurum scite invicem comparantur, ut nemini facile id fieri posse asserenti fidem habuissem, nisi promptus ingenio, in judicando solers, et plurima lectione exercitatus id mihi suo persuasum exemplo reddidisset VFFENBACHIUS meus. En tibi speciminis loco primas colloquii, multum suavitatis et leporis, multum eruditi salis et mellis, si perfectum fuisset, habituri, lineas.

„GREGORIUS LETI. Nescio, quæ „furix me parturientem, et in ipso puerperio affectu quodam histerico laborantem velut mortuum abstulerint, ac huc „detulerint, cum adhuc vivam, et gravidum me sentiam. Annon tu ipse, „Charon, majus a me solo adhuc viventem onus sentis, quam a cæteris umbris „omnibus? CHARON. Non licet mihi „ad litus reverti: perferendus es ad thronum

„phroditus igitur eris, cum virum gravi-
„dum nunquam vel viderim, vel audie-
„rim. LETI. Ingenii foetus est, quem
„pario, qualem gestavit atque peperit
„Jupiter. CHARON. Novi, illum in ce-
„rebro genuisse Minervam. Ast qualem
„tu nobis paries foetum cerebrinum? An
„putas, te, cum mortalis ac miser homo
„fueris, paria cum Numine facere posse?
„LETI. Ipsa favente Minerva &c., Cæ-
tera promiscue tantum, prouti animum
fortuito subierunt, in chartam conjecta,
ac nondum in dialogi formam ordinem-
que digesta scitam VFFENBACHII cu-
jusdam manum exposcunt.

Si quis autem hoc scriptionis genus
persona, quam Noster gerebat, haud
dignum existimet, is, velim, ex multis
unum sibi in animum revocet Joannem
Valentinum ANDREÆ, Theologum et
pietate, et prudentia, et munerum di-
gnitate gravissimum, cui nemo facile æ-
quus rerum arbiter vitio vertit, quod
ridendo dicere verum, hominumque vitia
satyrico sale perstringere haud dubitave-
rit.

Dolendum potius est, quod nova opu-
sculorum Viri, de Ecclesia Christi optime
meriti, hodie rariorem, editio sufflamina-
ta fuerit, quam animo agitavit, ejusque
spem

spem singulari epistola Tubingæ A.MDCC-
 XIII. evulgata excitavit b. Andreas Chri-
 stophorus ZELLERUS, Abbas, dum vi-
 veret, Anhusanus. Exstant in ejus My-
 thologia Christiana, sive virtutum et vi-
 tiorum vitæ humanæ imaginibus duo apo-
 logi, eodem fere spectantes, quos, cum
 libellus parum sit obvius, in lectorum no-
 strorum gratiam huc transferre visum est.
 Uterque continetur Manipulo quarto. U-
 nus, qui ordine est decimus sextus, LI-
 BELLUS inscribitur, alter numero XXVI.
 PAPYRIPERDA. En tibi primum: „Li-
 „ber et libellus sibi obviabant. Ille, cu-
 „jus erat insolentiæ, pusillum despiciens:
 „unde et quo, inquit, immanis? Libellus
 „sarcastico irritatus: Et tu inanis, respon-
 „dit, quorsum? Ita mutuis aculeis stimu-
 „lati, cum ille mole superbiret; hic inge-
 „nio confideret, facile ad injurias verba
 „reciproca invenerunt. Doluit tamen li-
 „bro, exprobrari tot autorum spolia, et
 „impudentes descriptiones, ac plebejam
 „verboositatem, quod non nisi congestum
 „acervum rerum quotidianarum referret,
 „sine structuræ ullius artificio. Contra
 „libellus audiebat extemporaneus et præ-
 „cipitatus factus, qui, unico ceu fulgure,
 „oculos perstringeret, ac mox evanesce-
 „ret. Tandem re ad arbitros devoluta,
 „cum pro utriusque laude multa adferren-
 „tur, id tandem improbatum, quod liber
 libel-

„libellum temere irrisisset, cum rerum Hi-
 „storia id dudum innotuerit, nihil ad mo-
 „vendos, informandosque homines, ac
 „causam novam insinuandam aptius, con-
 „venientiusque esse minutis, sed ingeni-
 „osis, libellis.

Accipe etiam alterum: „Cum ex Po-
 „lygraphis quidam merita sua in Rem-
 „pub. impudentius jactitaret, non tulit id
 „Minerva, et cum risu *un geste papiers* vo-
 „cavit, quasi papyri-perdam diceret. Id
 „homini intolerabile visum, cum de injuria
 „undique conquereretur, tandem obtinuit,
 „ut Minerva audiret. Illa, ut cavilli sui
 „testes haberet, Bibliopegos, Mercatores,
 „et pharmacopolas convocavit, quæsitit-
 „que, quam maxime papyro res suas in-
 „volverent, e qua mappas suas potissi-
 „mum conficerent. Responsum est uno
 „ore, unum polygraphum hoc tempore
 „omnes officinas occupare. Quæsitus Bi-
 „bliopola, quo præ reliquis abundaret li-
 „bro, Polygraphi vasto volumine; Typo-
 „graphus etiam cum gemitu, nimium se
 „hujus pecoris divitem fassus est; denique
 „et ædium abscondita hunc scriptorem
 „agnoscebant. Hæc ut audivit, Judices
 „accedens: Fateor equidem, me hujus
 „viri famam nunquam satis agnovisse, ut
 „qui de omni hominum genere optime
 „meritus est; itaque oro, veniam meæ

„imprudentiæ det , ac ipse porro talia
„opera scribat , quæ si non Bibliothecis ,
„certe humanis usibus sint dedicata. Id
„unum metuo , ne , dum infinitorum ma-
„nibus teritur , tandem absumatur , li-
„brisque suis vivat superstes,,.

Hoc unum addo , in Observationum se-
lectarum Halensium Tomo II, p. 1. sqq. sin-
gularem exhiberi observationem de intem-
pestivo libros scribendi et disputandi pru-
ritu. Conferri quoque merentur , quæ de
hoc argumento Musageta noster ad Ma-
jum suum eleganter perscripsit in hujus
opellæ parte I. p. 166. sq. Disquisitio au-
tem doctissimi PLARRII de refrenando
immoderato scriptionis impetu , quæ lite-
rariæ inter ipsum et VFFENBACHIUM
velitationi ansam subministravit , publi-
cam lucem nunquam vidit.



LVII.

JO. CHRISTIANO LANGIO,
Philosopho Giessensi.

Quæ desiderasti , Emblemata lubens
transmitto , et , quanquam tanti non esse
probe agnoscam , mentem tamen meam de
illis ut explicem , haud gravatim feres.
Quatuor minora , Bibliothecæ meæ sche-
ma uno intuitu sistentia , velut insigne li-
bris meis , vel potius integumentis ipso-
rum per amanuensem agglutinari facio
(h) , ne nominis mei adscriptione titulos
S 2 et

(h) Figura illa ænea , quam singulis bibli-
othecæ suæ voluminibus , seu integu-
mentis potius eorum interius aggluti-
nandam , artificioso Jo. Ulr. Krausii Au-
gustani cælo æri , idque quadruplici pro
diversa librorum magnitudine forma ,
incidi curavit VFFENBACHIUS , elegan-
ter repræsentat Bibliothecam Vffenba-
chianam cum Numophylacio aliisque
ornamentis , corona rosacea circumda-
tam. In utroque latere exhibentur si-
gilla , quorum unius aposphragisma si-
stet insignia nobilissimæ gentis Vffenba-
chianæ , alterius initiales nominis lite-
ras,

et ora librorum , quod multis maximo eorum , ad quos isti transeunt , tædio solenne est , fœdare opus sit. Istis vero figuris meum in colligenda aliquali Bibliotheca studium testari , adjectaque inscriptione simul excusare volui. Tam pauci enim hic sunt æqui literarum librorumque æstimatores , ut vix numerum artium liberalium æquent. Illos enim , qui nonnisi mercenaria studia amant , et ultra *Vademecum Scherzerianum* , Juris civilis Corpus , vel Galenum non sapiunt , nil moror. Reliquos vero auri sacra fames adeo incessit , ut libros non solum , sed et eorum collectores pro inutilibus terræ ponderibus habeant , sumtus in illos factos non pro liberalibus , sed insanis et profusis reputent. Clamitent igitur :

*O cives , cives , quarenda pecunia primum !
Virtus post nummos.*

Alia

ras, artificioso ductu implicatas: superne duo Copiæ cornua impositis corollis rosaceis includunt Petronii verba majusculis literis scripta : NON OMNIBUS IDEM EST QUOD PLACET. In inferiori margine iisdem literis legitur : EX LIBRIS BIBLIOTHECÆ D. ZACH. CONR. AB VFFENBACH, M. F. i. c. Mœno-Francofurtensis.

Alia mihi mens est.

*Inveniat quod quisque velit , NON OMNI-
BUS IDEM est ,*

*QUOD PLACET , hic spinas colligit , ille
rosas.*

Quo etiam corona rosacea , quam cernis , alludit. Colligant alii spinas , id est, divitias , placent mihi rosæ , quas licet non sine tædio , quod ii , qui studio erigendæ bibliothecæ incumbunt , optime norunt , colligam. Non enim sumtibus solum , ac nummis , sed infinito plane labore et singulari industria hic opus est : ne dicam , quam difficilis comparatu bonorum librorum noticia sit. Alterum emblemata illorum gratia , qui rectius de hisce sacris judicare norunt , excogitatum , iisque dicatum est. Figura , quæ primum ac superiorem locum occupat , Musasque colludentes repræsentat , adjecta inscriptione : **SOCIETATE GAUDENT** , indicat , quam gratum ac jucundum iis , qui bibliothecam instruunt , esse debeat , si a Viris doctis invisantur , ut de libris sermonem ferere , deque sapientiæ ac eruditionis thesauris gaudere , doctioresque de illorum alloquio recedere possint. Absit , absit enim , ut illos abscondant thesauros , atque sibi aliisque otiosos ac inutiles esse patiantur. Sed etiam , atque adhuc clarius altera figura innuit , cum sua , licet in vulgus nota ,

ta, nunquam satis tamen notanda epigraphe: **NON SIBI SOLUM.** Quemadmodum enim apes, quarum industria, diligentia, et, ut ita dicam, sapientia tanta est, ut multum in œconomicis, imo politicis, homines ab istis animalculis discere posse integris voluminibus a quibusdam demonstratum sit, succos e floribus non solum in suum succum et sanguinem convertunt, sed etiam mel et ceram inde conficiunt, quorum copia aliis quoque inserviunt; ita Viri probi atque eruditi libris suis non solum propriam mentem suam pascunt, sed etiam aliis dapes literarias, et quasi cereos, quibus ad sapientiæ viam prælucent, conficiunt. Atque etiam sicuti apes flores pene illæsos servant, ac hominibus ad visum ac odoratum recreandum relinquunt; ita bonorum librorum possessor illorum usum aliis quoque non invidet, eosque, qui aliter sentiunt, bibliotaphos cum suis thesauris æterna oblivione sepeliendos judicet. Sed ad alterum huic oppositum emblemam jam venio, quod ex ingenio, præcedenti ut respondeat ac concordet, addidi. Vides autem hic primo loco apespugnantes, et inimicum molesto susurro ac strepitu sibi gravem furtoque etiam exitiosum fugantes. **ABSINT PROCUL FUCI, UT ILLIS BENE SIT.** Fucis certe, quod mecum fateberis, simillimos puto illos, qui
velut

velut fures temporis bibliothecas intrant, non animo ad hæc sacra rite initiato, sed plane rudi; quare aures possessorum aut ineptis quæstiunculis, vel, quod pejus, scurrilibus inter se jocis obtundunt, vel etiam, quod pessimum, libellos e loculis, ut fuci crabronesque mel solent, surripere student, cujus sceleris celeberrimi alias Viri, GOLDASTUS, SCHURZFLEISCHIIUS, et multi alii insimulantur. Aranearum porro hic cernis, animalculum, quod veteres animalis historiæ scriptores, jure an injuria, nunc, ne simile claudicet, non definitio, incusant, quod ex omnibus venenum fugant. Videant isti, quomodo probent accusationem, cum neotericorum de venenis sententiæ adeo discrepent, ut sint, qui plane in rerum natura dari negent. Interim non male, meo equidem judicio, araneis comparantur illi, qui non nisi male libris utuntur, bonos detrectant, et nonnisi similes insipido palato lactucas quærunt. Mus vero librum corrodens eos denotat, qui libellos, imo pretiosissima sæpe opera, mutuo ipsis benevole data, male habent, ac corrupta reddunt, vel plane retinent. Infima tandem figura pastorem sistit, more veteri amicorum nomina arbori insculpentem, scopumque meum adjecta inscriptione demonstrat, cur hancce tabulam fieri curaverim. Longe enim a me absit ulla ostentatio,

tatio , aſt delectat dulcis amicorum recor-
 datio. Maxima ſane cum jucunditate no-
 mina amicorum relegere , ac docti ſermo-
 nis memoriam non ſine fructu recolere
 ſoleo. Sæpe etiam accidit, ut ii , qui me
 præſentia ſua honoraverunt , elapſo tem-
 poris ſpatio literis me ſuis ſalutarint , ac ,
 ut evolvendis vel etiam commodandis li-
 bris iſſis ſuccurrerem , rogarint, quorum
 ne nomina quidem in mentem , ut labilis
 admodum mea eſt memoria , revocare po-
 tuerim. Aſt cum magni mea interſit , ut
 cum Viris probis ac eruditis commercium
 intercedat , neceſſe utique eſt, ut illorum
 memoriam colam. Incitavit me quoque
 optimorum Virorum , WILDII , FEL-
 LERI , aliorumque exemplum : quorum ille
 Album locupletiffimum ſuum Cimeliarchi-
 um inviſentibus , hic vero celeberrimi cu-
 juſdam Viri philopinacium Bibliothecam
 præſtantiffimam Lipſienſem perluſtrantibus
 obtulerunt. Exolevit quidem mos ille an-
 tiquus, Album amicorum conficiendi (i) ,
 per

(i) Nota eſt egregia b. Mich. LILIENTHA-
 LII Diſſertatio de Philothecis , varioque
 earundem uſu et abuſu , quæ recuſa ex-
 tat in ejus Selectorum historicorum et li-
 terariorum parte II. p. 1. ſqq. conf. b. Jac.
 Burckhardi de ſua iplius vita Commen-
 tar. p. 201. ſqq.

per abusum scilicet , quod tali instructi mendicando ostiatim victum quæsiverint , alii vero libellum obscœnis figuris , vel etiam scurrilibus nugis refertum probis ac doctis Viris præbere non erubuerint , qui nomina inscribere merito detrectaverunt , maximo bonorum ac honestorum dispendio , qui veneranda doctorum nomina magni , ut decebat , fecerunt. Ego equidem , si mihi Album , præclarorum Virorum nominibus ornatum , obvenit , magna cum reverentia asservare soleo, cum etiam ad manus doctorum dignoscendas , et ad dijudicanda MSta doctorum Viro- rum autographa inservire possit. A. MDCCXII. d. VII. Dec.



PROBLEMA LITERARIUM

de

Cultello Flaciano.

In superiori epistola mentio fit Virorum, plurimis alias in rem literariam meritis insignium, qui furti a nonnullis incusati sunt librarii; jurene an injuria, haud facile dixerim. Mirum, non principe inter illos loco nominari Matthiam FLACIUM Illyricum, qui tamen, si vera sint, quæ de ipso traduntur, omnibus in hoc egregio scilicet artificii genere dubiam facile palmam reddidit. Is enim, dissimulata persona et habitu, ad conficiendum Catalogum testium veritatis Monasteriorum in Germania Bibliothecas perlustrasse, et, vel quos commode potuit, libros integros inde clam abstulisse, vel eorum, quos surripere nequivit, pagellas aut phylaras quasdam sibi proficuas cultello excidisse fertur, adeo, ut *culter Flacianus* dudum abierit in proverbium. Parum autem abest, quin mihi ex VFFENBACHII silentio persuadeam, Optimum Virum, hujusce FLACIUM criminis injuste postulari, censuisse. Quis enim, dum illa scriberet, rem lippis atque tonsoribus notam in mentem ipsi haud venisse, credat? Quicquid vero ejus rei sit, sive hujus sceleris

reum,

reum, sive infontem habuerit ILLYRICUM VFFENBACHIUS, hoc ex beati Viri schedis exploratum mihi est, charam ipsi valdeque honoratam fuisse Flacii memoriam.

Cum enim aliquando jucunde apud Virum venerabilem Jo. Balthasarem RITTERUM, inter ceteras memorabiles epistolas ad atavum ejus Matthiam RITTERUM a Viris maximis datas, varias etiam a Flacio quondam scriptas lustrasset, interque eas unam in lectulo emortuali exaratam, magna cupiditate accensus est, ejus Francofurti in summa egestate denati sepulcrum, ac, si forte quod ipsi positum esset, epitaphium inquirendi: verum omnem in hoc operam frustra consumsit, doluitque, Viro, si errorem de peccato originis ac vehementiorem contra adversarios scribendi agendique modum, illius ævi genio familiarem, excipias, ob præclara in orbem eruditum et ecclesiam merita laude dignissimo, quique tot veritatis testes oblivioni eripuit, totque scripta eximia longo situ squalida ab internecione vindicavit, nullum plane honoris monumentum fuisse erectum, imo ne sepulturæ quidem locum ab se ullo studio investigari potuisse.

Nulla autem macula facile Viri diligentif-

tissimi famam magis inquinavisse mihi videtur, quam foedissimum furti crimen illi aspersum. Quanquam enim MORHOFIO (k) minus reprehendendi illi videantur, qui publico bono interdum compilarunt bibliothecas, ab invidis celatas, et ad usum denegatas, atque idem hoc nomine noxam Flacii quodammodo elevare haud dubitaverit: magis tamen mihi arridet Burckh. Gotthelfi STRUVII sententia, cui hoc facinus simile videtur eorum instituto, qui furantur, ut dent pauperibus (l). Haud quaquam enim facienda esse mala, ut eveniant bona, omnes christianis imbuti sacris ex Pauli effato Rom. iii. 8. novimus.

Fateor autem ingenue, hoc, quod IL-
LYRICO impingitur, scelus mihi non-
dum probatis atque omni exceptione ma-
joribus testimoniis evictum videri. Pri-
mus, si Keckermannum excipiam, quod
ego quidem sciam, qui hanc sive histori-
am, sive fabellam in famam misit, fuit
Melchior ADAMI, ad quem potissimum
alios, istam crambem recoquentes, pro-
voca-

(k) in Polyhist. liter. Lib. 1. Cap. iv.

p. 35.

(l) in Dissert. de doctis Impostoribus, p.
75. sq.

vocare animadverti. Ejus hæc sunt verba (m): *Tertium* (inter scripta Flacii præcipue commendanda) locum facile obtinet *Martyrologium illud* (n): quod hac occasione compilatum ferunt. Contexuit Abbas Joannes TRITHEMIUS catalogum auctorum. Hunc cum vidisset Flacius, temperare sibi non potuit, quin dissimulata persona et habitu, aliquot in Germania Monasteriorum bibliothecas perlustraret, quos commode posset, historicos clam auferret, atque isto adminiculo librum, qui Catalogus testium veritatis indigitatur, conscriberet. Hisce alii deinde corollarii loco istam de cultro Flaciano narratiunculam adjecere. In margine Melchior Adami fontem, unde sua hausit, indicat, Bartholomæi videlicet KECKERMANNI Methodum historiarum, unde integrum nobis locum suggessit Petrus BÆLIUS (o). En tibi illum: Ceterum quod attinet ad insidiosos occultatores historiarum, certum est, in Bibliotheca Vaticana, et aliis

Bi-

(m) in Vita Flacii, Vitis Germanorum Theologorum inserta, p. 475. edit. Francof. A. 1653. in 8.

(n) Per Martyrologium illud intelligit Adami Catalogum testium veritatis, quem nonnulli, ejus relatione decepti, ab illo minus recte distinguunt.

(o) in Diction. Hist. et Crit. T. II, f. 1542.

Bibliothecis Italiae, inprimis autem in *Bibliothecis Monasteriorum*, clam servari multos *historicos superiorum seculorum*, qui de *fraudibus Pontificum*, deque *abusibus Ecclesie Romanae*, et contra de *conservatione vera doctrina*, etiam sub *mediis tenebris Papatus*, scripserunt, id quod manifeste patet ex *Catalogo autorum*, edito ab *Abbate Jo. Trithemio*, qui istos autores ex *Bibliothecis* ante annos paulo plus centum collegit: quem *Catalogum* cum vidisset *Matthias Flacius*, temperare sibi non potuit, quin *dissimulata persona et habitu aliquot in Germania Monasteriorum Bibliothecas perlustraret*, artemque arte eluserit, quos commodè posset *historicos clam auferret*, atque adeo *eximium istum librum*, qui dicitur *Catalogus testium veritatis*, isto *adminiculo conscriberet*. Vellem, diserte in re tam gravi indicasset *Keckermannus*, *Flacio* haud coævus, sed paulo junior, unde illam *historiolam* acceperit. Inter omnes enim constat, *Flacium plurimos habuisse hostes longe infensissimos*, qui *atrocissimis satyris ac libellis etiam famosis stigmata ejus nomini imponere annisi sunt*. Si ergo ex horum lacunis, quod suspicor, derivata sit illa *criminatio*, quis, *sodes*, æquus rerum *judex* eam fide dignam censeat? *Testis enim*, qui de *accusatoris subsellio surgit*, audiendus non est.

Ipsè Melchior Adami rem hanc, addita vocula ferunt, ita commemorat, ut eam pro

pro indubitata veritate habuisse haud videatur, imitatus L. Annæum Senecam, his verbis alicubi (p) usum : *Quod historici faciunt, et ipse faciam. Illi cum multa mentiti sunt ad arbitrium suum, aliquam rem nolunt spondere, sed adjiciunt, penes autores fides esto, (vel, quod idem est, ferunt).*

Honestiori sane ratione ex libris tam editis, quam manu exaratis sua veritatis testimonia conquirendi commodæ viro maxime industrio non defuerunt occasiones, ut adeo nefario haud opus fuerit furto. Multas Monasteriorum Bibliothecas probe instructas in Saxonia tam superiori, quam inferiori, ac in aliis etiam regionibus, evangelicæ doctrinæ addicti in sua jam tum potestate habebant, unde ad laudabile institutum suum proficua vel suopte studio, vel amicorum, quibus gavisus est non paucis, opera honestissime congerere potuit. Habuit Flacius noster cum eruditis in adornando Centuriarum Magdeburgensium opere præstantissimo sociis suos emissarios, viros probos atque ingenuos, non in Germania tantum, sed exteris etiam regionibus patronorum ope vetusta monumenta diligentissime investigantes, e quibus Marcus Wagne-

(p) Natural. Quæstion. Lib. iv. Cap. iii.

Wagnerus, Wilhelmus Radensis (q), et Bernhardus Niger (r) præcipue mihi cogniti sunt. De felici inprimis Marci WAGNERI, Frimaria Thuringi, industria ex variis ad eum epistolis, libello ejus Germanico de Regno Thuringiæ olim in Pagos diviso insertis, copiose exposuit Caspar SAGITTARIUS (s). Is jam hujusce instituti causa A. MDLIII. exeunte Febuario Hafniæ diversatus fuit. Prodiit autem primum FLACII Catalogus testium veritatis Basileæ A. MDLVI. mense Martio in forma octuplici, atque adeo adhuc concinnandum membranis vel schedis, aut excerptis ex vetustis Codicibus a Wagnero in itineribus collectis jam uti feliciter poterat. Cum Viris doctissimis frequens literarum intercessit Illyrico commercium, quorum suppetias avide ac sæpe haud frustra quæsit (t).

Re-

(q) vid. Flacii Epistolam ad Cornelium Gualterum et Georg. Cassandrum in Epistolis, vel a Belgis, vel ad Belgas scriptis, p. 71. sqq.

(r) vid. b. Jo. Christoph. WOLFII Conspect. Supellect. epistol. p. 7.

(s) in Introductione in Historiam ecclesiasticam, Cap. XIII. p. 249. sqq.

(t) Exempli causa vid. Epistolas Flacii ad
Hart-

Reclamatat vero insuper huic narratiunculæ ipsa vitæ Flacianæ historia , ex qua apparet , ab eo tempore , anno nempe MDXLI. ætatis circiter vigesimo primo , quo in Academiam Wittebergensem pervenit , ad annum usque MDLXII. Illyricum pedem suum extra Saxoniam superiorem et inferiorem haud posuisse. Nosse igitur velim , quænam sint illa Monasteria , e quorum bibliothecis Codices vel furtim sustulit , vel mutilatos reddidit Flacius , qui , uti modo innuimus , A. MDLVI. Catalogum suum edidit. In Saxonia certe superiore ac inferiore hac illi arte vulturaria opus haud erat. Extra has vero provincias eo temporis intervallo itinera non instituit , quod ex Vita ejus a Melchioræ Adami et Jo. Balth. Rittero descripta , et narratione actionum et certaminum suorum ab ipsomet Flacio literis consignata (u) elucet.

Wilh. Ern. Tenzelius in Colloquiis
Pars II. T men-

Hartmannum Beyerum , Theologum
Francofurtanum , exaratas in Jo. Balth.
Ritteri Vita Flacii , p. 49. sqq.

(u) Exhibuit eam Conradus SCHLUSSEL-
BURGIUS in Catalogi Hæreticorum
Lib. XIII. p. 802. sqq.

menstruis (x) ex epistola quadam Pauli Eberi ad Christianum Farenhaid A. 1563. d. 15. Oct. scripta hunc locum depromtum dedit, *Illyricus, prætextu profectionis instituta in patriam, perreptavit totam Stiriam, Austriam, et vicinas regiones, adhuc conquirens libros ad aureum illud opus Historiæ, plus aurum tamen, quam Codicum secum Ratisponam advexit, ut ajunt.* Oppido autem fallitur Tenzelius, ratus, de uno eodemque itinere Ebero et Melchiori Adami sermonem esse, unumque alterum elucidare. Hic enim de itineribus loquitur ante editum testium veritatis Catalogum, qui A. 1556. lucem aspexit, susceptis, ille vero de peregrinatione anno demum 1563. in Stiriam, Carinthiam, aliasque regiones peracta, ut præter alia ad Centurias historiæ ecclesiasticæ promovendas subsidia congereret.

Cæterum sciscitari hæc occasione mihi liceat ex Lectoribus eruditis atque cordatis, quibusnam testibus probatis ac fide dignis Flacio coævis fulciri queat illa Keckermanni et Adami historiola, et annon potius in fabellarum censum sit referenda. Non autem me morantur ea, quæ in inventivis suis sic dicti Scholastici Wittebergenses, alique Flacii hostes aperti de
com-

(x) A. 1689. p. 16. sq.

compilatis Philippi Melanchthonis scriniis ipsi objecerunt, a qua criminatione ipse semet satis jam vindicasse videtur.

LVIII.

JO. CHRISTIANO LANGIO.

Allati sunt mihi fasciculi quatuor MSci, quibus integra famosi BOEHMII doctrina comprehenditur, ac schematibus tabulisque synopticis summo studio exponitur. Quid de Viri scriptis sentiendum, jam non definiam, cum nec locus sit, nec, cum nimis dubia illorum sit existimatio, præceps in judicando esse soleam. Interim inter reliqua mea MSta, et quidem in scrinium librorum vulgo prohibitorum et suspectorum reponenda et asservanda merito duxi, meque magnam aliquando apud Boëhmianos asseclas, quorum maxima in Belgio inprimis et Anglia etiamnum turba, gratiam inire, et alia, mihi et gratiora et utiliora, pro istis habere posse spero. Auctor nomen suum non apposuit, verum illum Electoris Brandenburgici Ministrum, olim hic Francofurti degentem, vel, ut loqui amant, Residentem fuisse, nomine SCHLEZERUM, is, qui mihi una cum magno epistolarum ejus apparatu vendidit,

persuafum mihi voluit. Naſtus præterea ſum Hugonis GROTIJ aureolum de veritate religionis Chriſtianæ opusculum , et quidem primam Pariſiis ab ipſo publicatam editionem , manu auctoris , aſt quanti Viri ! hinc inde correctam et auctam. Do-
no mihi dedit hoc cimelium Vir illuſtris LUDOLFUS , Camerae imperialis Aſſeſſor graviffimus , poſtquam librorum meorum collatorum nuper apparatus , penuriam dicam , perſpexerat. Habuit vero illum a Parente , Jobi LUDOLFI fratre germano , qui Reginae Sueciae CHRISTINAE juffu GROTIJ Bibliothecam , quam poſt ejus obitum emerat , digeſſit atque tranſmiſit , et hunc librum in aliquod laboris præmi-
um , ut manu ſua libello inſcripſit , ſibi ſervavit. Non magni equidem ſunt momenti , quæ adſcripſit GROTIUS ; aſt tanta erga hunc Virum præſtantiffimum mea eſt veneratio , ut , ſi abſque reverentiae et religionis læſione dici poſſet , id quod de ſacris literis dictum apponam :
Dolendum eſſe , ſi vel jota pereat , quod a tanti Viri manu eſt. Nec facile , Halenſibus ultro cimelium offerentibus , cum LIP-
SII calamo ſcriptorio , quam Mariae non ſine pompa ac faſtu dicavit , permutarem. Ignosce joco. A. MDCCXIII. d. XV. Mar-
tii.

LIX.

D. JO. ANDREÆ DANZIO.

Dum summam tuam , qua me , cum ante aliquot annos apud vos morarer, excepisti , humanitatem mecum reputo, erubesco plane , quod gratam tibi mentem testari hæcenus nequiverim. Ex quo enim , peractis per Saxoniam inferiorem, Belgium et Angliam itineribus , in patriam redux factus eram , Cæsaris electio et coronatio otium fecit, animumque distraxit, postea totum occupavere connubialia festa; tandem mutato lares in Angliam transferendi consilio , omnis mea cura in Bibliotheca in ordinem redigenda, novisque in itinere collectis accessionibus augenda , fuit. Prægnantes satis , spero, tibi, Vir humanissime , videbuntur silentii causæ. Quis enim tempore electionis et coronationis de feriis cogitare potuit? quot dies, tot feriæ, triumphus et pompæ solennes. Quilibet accinebat :

Tempus adest : plausus , aurea pompa venit.

Reliquum temporis amici , librariam meam supellectilem, curtam licet, invisentes, abstulere. Quid de nuptiis dicam? Ridebis hominem tanto in libros Musasque amore flagrantem , ut innatum procreandi liberos

stimulum reſtinguere atque negligere , ætatiſque degendæ in Anglia quærere locum latebroſum, Muſiſque ſacrum inſtituerit firmiſſime. Nec muſaſſem animum , niſi clima , tetro a carbonibus foſſilibus odore infectum , victus ratio , et denique peſſimi, juxta vetus de inſularibus proverbium , hominum tum temporis plane furentium mores obſtitiffent. Unicum quod allicere poterat , Bibliothecæ erant inſtructiſſimæ , quos theſauros ipſi negligunt , ſi paucos excipias , qui gentis gloriam attollunt atque conſervant , exteroſque inducunt , ut ſibi perſuadeant , Muſas in hac inſula ſedes fixiſſe. Eſt igitur , quod mireris , tam paucos eſſe , qui has colunt , ut vel in una noſtrarum Acaſdemiarum plures eruditos viros , quam in latiſſima regione , reperiſas.

Indigni igitur , quod tantis ſubſidiis inſtructi ſint , quibus , ſi noſtri gauderent , melius uterentur. Indignabundus igitur reſeſſi , ſtatimque poſt reditum divina , quam veneror , providentia honeſtiſſimam ſcœminam obtulit , Muſis ac libris , quam rara avis in terris ! amicam. Certe , niſi plane explorata mihi ejus fuiſſet mens , perſuaſumque habuiſſem , illam me , librosque meos pari amore proſecuturam eſſe , nec pactum acceſſiſſet , conjugalem amorem cum , qui erga bonas literas literatoſque
altos

altos in corde radices cepit, non minueret, nec infringere debere, constanti semper odio hymen averfatus fuiffem. Primis tamen menfibus me paululum induliffem, remiffioremque in præftandis, quæ amicis debentur, officiis fuiſſe, et ſeculi moribus meoque affectui dabis. Aft graviffima demum moræ excuſatio erit Bibliothecæ inſtructio. Quanto enim in hac ordinanda labore opus fuerit, ex curis, quas in præſtantiffima tua, Vir Celeb. impendis, facile conjicies. Poſtquam enim optatas ac ſtabiles Muſis meis ſedes figere licuiſſet, omnia in meliorem ordinem redigenda non ſolum, ſed et incrementa ſuo loco reponenda erant. Utinam præſens oculis tuis perluſtrare poſſes, quanta ſpolia, (theſauros dicam, nam multo labore nec parvo ſane pretio conſtiterunt,) ex itineribus reportaverim. Præſcine dixero, quatuor millia voluminum numerus excedit, omnium vero librorum meorum ad duodecim millia excreſcit. Multa eſſent, quæ tuis etiam uſibus inſervire poſſent, niſi, quod doleo, locorum, quæ nos ſejungit, diſtancia prohiberet. De unico ſaltim cimelio, quod in manus meas nuper incidit, nunc dicam. Nimirum cum Lugduni Batavorum agerem, plurimosque libros a Jo. Vivie, veterano hujus Academiæ Bibliopola, emerem, monſtrabat mihi Celeb. GOLII Lexicon Arabicum, propria præſtantiffimi

Viri manu ita emendatum , ut singulæ
paginæ novas accessiones plurimasque
emendationes satis eleganter adpictas ha-
berent. Asserebat optimus senex , se ab
illo , quo GOLII Bibliothecam sub hasta
vendidisset , tempore , hoc volumen stu-
diose asservasse , mihiq̃ue præ aliis , quod
meum in libris conquirendis studium cer-
neret , concessurum. Majus æquo preti-
um statuerat , nihilominus animum non
abjeci , cum tui memoria succurreret, rem-
que gratissimam me tibi præstiturum spes
esset, coemi. Offero itaque tibi illum ,
lubentissimeque concedam , hac conditio-
ne , ut meam supellectilem alio MSto, ne
detrimentum patiatur , ornare velis. Non
renues , spero , nec deerit tibi Codex vel
Græcus vel Latinus , cujus honesta com-
mutatione et tibi et mihi consultum voles.
Qui has tibi tradet amicus charissimus ,
perlustravit volumen , tibiq̃ue de illo de-
que rerum mearum statu, rationem reddet.
A. MDCCXIII. d. X. Maji.



LX.

D. BURCKH. GOTTH. STRUVIO.

Historico et Jcto Jenensi.

Summa cum voluptate mecum recolere soleo, quot quantosve Viros peractis nuper itineribus adire, illisque innotescere mihi contigerit; ast simul doleo, quod hactenus per varia impedimenta, de quibus ad Celeb. Virum Dn. DANZIUM, Collegam tuum, fusius perscripsi, dulci ipsorum commercio per literas perfrui mihi negatum fuerit. Postquam igitur otium nactus sum, nihil mihi prius esse debebat, quam ut Viros optimos salutarem, illisque pro præstitis officiis gratias agerem. Inter quos tu, Vir Celeberrime, si vel summam tuam eruditionem, vel singularem plane humanitatem spectem, inter primos occurris. Benevole enim me non solum excepisti, sed et egregia selectissimorum librorum supellectile tua, eruditisque sermonibus recreasti, aureolumque CHIFFLETII libellum, quem *Vesontio* inscripsit, cum duplex ejus tibi, mihi vero longe exoptatissima copia fuerit, cum unicuique hucce liber ex Chiffletiorum operibus mihi deesset, benigne æquissimoque pretio concessisti. Pro omnibus gratias tibi debeo quam maximas; ut vero aliquo modo referrem, offero tibi Catalogum librorum,

T r

quo-

quorum duplex mihi exemplum, idque eo lubentius facio, quod cognoverim, te præstantissimi SCHUBARTI quondam vestri Bibliothecam coemisse, variosque libros, qui vel studia tua non juvant, vel jamjam in tua Bibliotheca extant, æquo pretio vel permutationis jure aliis largiri. Ita enim decet librorum studiosos ac amantes, ut hoc modo sese invicem adjuvent. Mihi certe gratissimum erit, si quidam ex meis tibi arrideant.

Quicquid illorum sit, in schedula notabis, mihiq̃ue cum Catalogo meorum tuorumque, quibus scilicet carere potes, quam primum remittes. Dabo operam, ut MStorum meorum Indicem, si modo per alia negotia licuerit, texam, eo quoque fine, ut tecum aliisque Viris probis communicem, si quæ forsitan sint, quorum apographa desiderentur, quæ lubenti animo impertiam, modo vicissim suorum, quibus gaudent, copiam non denegent. Honestum tale commercium cum Viris quibusdam integerrimis jamjam optime mihi successit. Nec tibi id ingratum fore, confido. Quamplurimi enim mihi sunt de rebus Landgraviorum Thuringiæ Hassiæque inediti Codices, aliique, qui tibi minime displiceant. Quare jucundissimum præstabis mihi officium, si eorum, quæ vel ipse possides, vel quorum ex vestra Bi-

Bibliotheca publica apographa accurare possis, designationem dederis. Mirari certe satis nequeo, nullum locupletissimæ, qua Academia vestra superbit, Bibliothecæ extare Catalogum. Probe equidem scio, quantum in illo conficiendo tu ipse desudaveris, nullusque dubito, quin mecum consentias, in summam vestræ Academiæ gloriam, magnumque Reipubl. literariæ emolumentum cessurum, si rite confectus luci publicæ detur. Academia Lugduno Batava suæ Bibliothecæ indicem multo auctiorem denuo prælo Celeb. SENGVERDI cura subjici jussit, Oxoniensis idem, ast utinam majori cum diligentia! curavit. Giessensis Catalogum amicus mihi charissimus Dn. WEBERUS, ut ultimis suis me literis certiores fecit, dabit. Obsecro te, atque per summa tua in rem literariam historiamque merita obtestor ut diligentissimam egregiamque, quam olim præstantissimæ Bibliothecæ præstitisti, curam non plane abjicias, sed potius enitaris, quo Catalogus ejus, si non integer, MSS. ejus saltem consignatio in publicum prodeat, quod nuperrime GOETZIUS Lipsiensi præstitit. Thesaurus enim absconditus et inutile terræ pondus est Bibliotheca, cujus Catalogus non extat. Quantum vero utilitatis habeant librorum indices probe confecti, non est, quod tibi deprædicem. Ego quidem ultra quin-

quingentos collegi, omnesque, qui e Belgio a Bibliopolis mihi transmitti solent, licet non eo semper, quo decebat, studio exarati sint, asservo. Slusianum, ast quam eximium! haftenus, quod ægre me habet, adipisci nequivi. Si igitur forte fortuna in manus tuas incideret, meam faraginem insigniter ornare posses. Sumtus grato animo refunderem. d. IX. Junii MDCCXIII.

LXI.

GEORGIUS CHRISTIANUS JOANNIS,
Historicus Palatinus.

Bibliothecæ tuæ fores quod mihi nuper tam benevole aperueris, haud in ultima felicitatis meæ parte pono. Præter enim insignem, quam reperi juxta admiratusque sum, librorum optimorum, codicumque tam MStorum, quam impressorum copiam, tua maxime frui licuit eruditione pariter ac benevolentia. Quippe, quos possides, thesauros animo etiam complexus es, in omnibus bonarum artium scriptoribus studiose multumque versatus: ut non immerito te βιβλιοθήκην appellem ἑμφυχον, tantum abest, ut me falli putem.

Tum

Tum vero cum eruditione hac tua singularem conjunxisti morum suavitatem, humanitatemque, ut, qui te neget esse comem, facilem, φιλόφρονα, hunc sane iniquum esse dixerim. Quod cum ita sit, non possum, quin mihi gratuler, libensque profitear, nihil mihi evenire potuisse gratius, nil honorificentius, quam in isto tuo Musarum delubro ad tuam adrepere amicitiam. Perge modo, Vir Nobilissime, quod semel fecisti, bene mihi velle, locumque apud te relinquere. Ego, tametsi paribus tecum officiis certare haud possum, ut tamen videas, nemini me unquam pietate erga te, observantiaque concessurum, omnem usque profecto dabo operam. Quod superest, precor, qui tuæ fortunæ auctor est, Deum, det, ut perpetua floreas felicitate, bonisque litteris quam diutissime decori sis ac præsidio. Mihi certe nil optatius erit, quam te prospere semper beateque ætatem exigere, et quem tum eruditione, tum virtute tua mereris gradum, reipublicæ litterariæ non minus quam civilis bono, ad multos annos tueri fortunatissime. Biponti in Vogeso, Eid. Sept. A. MDCCXIII.



LXII.

GEORGIO CHRISTIANO JOANNIS.

Quum in tui notitiam pervenire exoptatissimum fuerit, literæ tuæ, quibus contractam amicitiam obfirmare voluisti, acceptissimæ extiterunt. Licet enim nimis in me laudibus onustæ, ne dicam graves, essent, dandum tamen id tuo erga me amoris seculique moribus duxi, cum usu receptum solenneque putetur, primas, quibus sese homines salutant, literas talibus verborum illecebris ac blandimentis cumulare. Dum vero id, ingenue fateor, mihi minime probetur, haud ægre feres, si vices tibi haud reddidero. Nihil igitur erit, quod ad tuas respondeam, quam gratissimum mihi esse, meum in colligenda aliquali bibliotheca studium tibi probari. Est vero etiam, quod doleam, ob importunum aliorum adventum te in perlustranda suppellectili, me vero præsentia tua doctisque colloquiis perfruendis præpeditos fuisse. Ast spes mihi est certissima jucundissimæque, crebriorem occasionem fore commodioremque, ut tuo meoque desiderio fieri satis possit. Ego certe non aditum solum, sed et usum bibliothecæ liberrimum tibi spondeo, de quo ne dubites, sancte tibi profiteor, unicum

cum in comparanda istac finem mihi semper fuisse, ut meis non modo, sed et amicorum commodis inserviat. Quid enim prius, quid optatius literatis hominibus esse debet, quam studia invicem promoveri? Utinam et tua adjuvare possem! nullam sane occasionem me prætermitturum experiundo cognosces. Eundem tibi animum esse, tua me dubitare non finit humanitas, imo tam confidentem, veletiam audacem me reddit, ut illico liberalitatem tuam tentare, auxiliumque implorare non erubescam. Nimirum incidit nuper in manus meas elegantissima præstantissimi HACHENBERGII Historia Friderici Victoriosi Palatini MS. quæ ob summam styli elegantiam, rerum copiam, narrationisque gravitatem adeo perplacuit, ut, cum iniquum nimis, centum scilicet florenorum, pretium exigeretur, plagium nolens volens commiserim. At licet noctes diesque in describendo cum Amanuensi desudaverim, possessoris tamen invidia ad exoptatum finem perducere non sivit, sed tertia plus minus parte carere coegit. Insigne igitur præstares mihi officium, si tuo beneficio, quod reliquum est, nancisci queam. Non denegabis, si potis es, pro singulari tua benevolentia spero. Nihil est, quod vicissim a me expectare non possis. Exige modo, quæcunque in potestate mea sunt, quam liber-

berrime. Te vero isthoc cimelio instructum esse, confido, cum rerum Palatarum diligentissimus felicissimusque sis ruspator. 1713. d. 4. Oct.

LXIII.

GEORGIUS CHRISTIANUS
JOANNIS.

Quanti cum modestiam animi tui, tum προθυμίαν ac de quibusvis bene merendi alacritatem faciam, nolim explicare pluribus, ne tibi denuo molestus sim. Potius gaudeo, occasionem mihi datam esse, qua testatum facere possim, quam hilare tibi, lubenterque inserviam. Scilicet, quum HACHENBERGII de Friderico Victoriofo annales MSti mihi sint, tuis eos usibus, quandocunque quidem volueris, oppido quam libens submittam: tametsi non sit, cur illis describendis operam enaves. Eorum namque typis evulgandorum diu est quod inierim consilium (y): quo fine etiam scri-

(y) Haud processit hoc consilium. Edidit vero ex MSto Vffenbachiano hos Hachen-

scriptores, e quibus eos collegit Hachenbergius, plerosque jam evolvi, et, quo unusquisque faciat, stellulis appositis curatius, quam quidem in exemplaribus MStis factum, adnotavi. Addam, præter stemma Leonsteinianum, quod passim Hub. Thom. LEODIO, quamvis perperam, adscribi videas (Phil. enim REINHARTUM, qui Comitum Leonsteiniorum a consiliis olim fuit, auctorem habet) fortassis etiam Hervici Amsterdami de laudibus Friderici hujus orationem, dicti Leodii de vita Friderici II., annales, quos ad exemplar MStum, a celeberrimo THOMASIO mecum non ita pridem communicatum, haud præter rem exegi: nec non Pantaleonis CANDIDI de Joanne I. Bipontino lib. IV. versu scriptos, et quod multa obtineant passim non obvia, adhæc vero raro inveniantur, utique, qui reculantur, haud indignos. Quin, nisi moram proposito injecisset præsens rerum status, difficilis is profecto atque acerbus, prelo jam commissem. Sumtus namque facere decrevit J. R. Dulfseckerus, bibliopola Argentoratensium haud incelebris. Quid igitur animi tibi huc sit, fac sciam:

Pars II. U quæ

chenbergii Annales Vir Clar. Jo. Phil.
KUCHENBECKERUS Jenæ A. 1739.
in 4.

quæ velis faciam, idque quam cupidissime. Kemnatenſis vitam Friderici, quam ſæpiſſime omnium citat HACHENBERGIUS ; fruſtra hucusque quæſivi ; fruſtra etiam TRITHEMII de rebus geſtis Friderici hujus Victorioſi libellum a FREHERO editum, cui Finarienſis de dignitate Principum ſubjunctus eſt (z) : nec ſcio, ubinam loco-

(z) Eſt mihi ille libellus ad manus, a FREHERO cum notis et additionibus variis Heidelbergæ A. 1602. in 4. editus, cui acceſſit Petri Antonii Finarienſis de dignitate principum liber, Friderico Victorioſo nuncupatus. Notandum vero, TRITHEMIUM haud ſingularem de rebus geſtis hujus Electoris Palatini librum ſcripſiſſe, ſed hanc hiftoriam decerptam a Frehero eſſe ex ejus Annalibus Hirſaugienſibus, quos repetito ſtudio copioſius et accuratius A. MDXIV. in Abbatia ſua Herbipolitana de novo recoxit, et in tantum amplificavit, ut duobus prægrandibus voluminibus, deſcripti, quadruplum primæ editionis, quæ ſola tum vulgata habebatur, conſecerint. Plenum autem illud Chronicon Trithemii Hirſaugienſe repetitæ elaborationis, duos in tomos diviſum, tandem prodiit typis Monafterii S. Galli, A. MDCXC. in fol.

locorum cum hunc, tum illam tandem inveniam. Tu, si me vel indicio, vel ope juvare potes, amabo adjuta. Nec enim mihi solum, sed toti reipublicæ litterariæ rem facies longe gratissimam. Quod si porro Philippi Ludov. HOFMANNI Genealogia Principum Palatinorum Rheni tibi suppetit, æternum me tibi devincies, si ad pauculas modo horas ipsius usum mihi concesseris. Id quod hoc confidentius abs te peto, quo liberius tuam mihi pollicitus es operam. Ego, uti me meaque omnia tibi permitto, ita precor, ut quam exoptatissime valeas, tuumque mihi perpetim serves affectum! Biponti a. d. III. Id. Octobr. an. MDCCXIII.

LXIV.

GEORGIO CHRISTIANO JOANNIS.

Nuperrimo desiderio meo plusquam satis fecisti, dum HACHENBERGII Annales benevole non modo mihi, sed universo orbi literario offerendi animum monstrasti. Magnas tibi gratias ago, quod petitis meis annuens, bene merendi promittundinem testari volueris, majores vero, imo maximas habiturus sum tibi, si et mi-

hi et publico simul gratificeris. Non enim illorum gregi annumerari velim, qui non nisi propria commoda curant, vel, quod pejus adhuc est, quævis corradunt, modo ut possideant, vel denique, quod pessimum, invidia adeo occæcantur, ut insignibus, quæ fortuna, ut prodiga est, talibus Harpyis concedere solet, cimeliis nec ipsi frui, multo minus cum aliis de iis lætari velint. Mihi sane ipsi gratulor, imo gloriator, de meliori luto fictam mihi mentem esse, quæ adeo a dictis vitiis libera est, ut uno eodemque die omnia anecdota mea, et quæcunque modo alicujus sunt momenti, ex penu mea depromere, amicisque ad eadem evulganda copiam facere, nullus dubitarem, modo in Reipubl. Literariæ commodum vergat. Facile inde cognosces, quantopere mihi tuum in edendis HACHENBERGIANIS annalibus studium probetur. Quam lubenti igitur animo KEMNATENSIS vitam FRIDERICI VICTORIOSI, HACHENBERGIO tam sæpe laudatam, veletiam TRITHEMII de ejusdem principis rebus gestis libellum largirer, si mihi suppeterent, aut unde haberi possint, vel procurare, vel saltem indicare possim. Utinam STRUVIUS, qui majores FREHERI Tomos Germanicorum scriptorum edet, hunc quoque a Celeb. Viro olim publici juris factum Trithemii librum adjungeret, vel etiam Sandius, Bibliopo-

la noster, qui omnia a Frehero in lucem prolata in unum colligere molitur, id præstaret ! Sed ille extra sphæram reputabit, hic vero Bibliopolarum mores sequetur, qui multa parturiunt, ast parum vel nihil enituntur. Nec HOFMANNI genealogiam Palatinorum Rheni principum, quod equidem doleo, suppeditare potero. Aegre sane me habet, quod in his inservire tibi nequeam; erunt tamen aliqua tibi forsitan non injucunda, quæ ab amico quodam meo comparare possem. Perscripsit is nuper, se inter alia egregia manuscripta veteris ævi monumenta, quibus gaudet, p. s. fidere literas Friderici tui Victoriosi ad Imperatorem ejusdem nominis tertium de Præfectura Hagenoensi (*Landvogtey Hagenau*), quam Sigismundus Imp. Ludovico Palat. ejusque hæredibus Anno 1423, ut inter alios Bernh. HERTZOG Lib. 9. Cap. 3. Chronici Alsat. p. m. 150. et 152. testatur, ob solutos 50000. nummos, quos florenos vocant, pignori dedit.

Scriptæ sunt literæ illæ Heidelbergæ, anno 1471. Habet porro fœdera, unum, quod Marchio Badensis Carolus contra Fridericum anno 1463. cum quibusdam Principibus, de quo in Hachenbergio me legisse memini, iniit, alterum, quod eodem anno cum Nobilibus seu Equestri ordine sancivit. En verba ipsius: *Verbündniss*

Marggraff Carlen von Baden, gegen den Churfürsten Friederich von der Pfalz, anno 1463. Item: Verbündniß der Ritterschaft, so mit abgedachtem Marggraff Carlen niedergelegen sind.
 A. eodem. Horum apographum non denegabitur mihi, tibi vero, si aves, ambabus, quod ajunt, manibus a me porrigetur. Spes etiam affulserat, cum nuper BROWERI Sidera Sanctorum a me per Acoluthum Müllerum nostrum exigeres, me de S. Pirmino in insigni quodam Codice meo, in membranis exarato, quædam reperturum. Dubito, an præ angustia temporis prægrande istud volumen animadverteris. Martyrologium, ut vulgo loqui amant, vel potius Hagiologium est, ultra centum Sanctorum vitas complectens, quod aliquando, si Deus voluerit, Hieronymique collatio, quam nunc sacris diebus præ manibus habeo, absoluta erit, cum editis conferam, nullus dubitans, quin multo meliores, (foran etiam nondum vulgatas) vitas in illo contentas sim deprehensurus, quam spurias ac interpolatas illas a SVRIO aliisque editas. Verum Sanctus tuus Pirminus in meorum cœtu haud comparebat. Boni igitur consules voluntatem meam, de cujus in te præprimis integritate atque propensione ne dubites, rogo atque obsecro. d. 26. Oct. 1713.

LXV.

GEORGIUS CHRISTIANUS
JOANNIS.

Redit ad te fartus, ut puto, tectusque,
quem nuper benevole mecum communi-
casti, FROWERUS: nec sine multa re-
dit gratiarum actione. Quam, cum paria
officia tibi præstare nequeam, hoc facilius
admittes. Descripsi vitam Pirminii olim
nostri, per Othlonum, vel potius War-
mannum scriptam: quam ad editionem,
quam SURIUS nobis dedit ac MABILLO-
NIUS, ille quidem ad III. Nov. hic sæ-
cul. Benedictin. III. P. II. p. 136. exigere
animus mihi est, si modo Deus et fortuna
votis adspirent. Quum enim Mabillonii
liber carus omnino sit, rarusque, nescio
sane, ubinam locorum illum invenire li-
ceat. Surium vobis esse, non prorsus de-
spero. Cæterum Broweri quædam et cor-
rigere et illustrare, diu est, quod mecum
constituerim, speciatim quod ad cœno-
bium attinet Hornbacense, vicinum no-
bis, dtionisque nunc Bipontinæ. Utrum
vero quid eniti liceat, *θεὸς ἐν γένησιν
κρίτας*. Manum admoverem operi, si CO-
INTII Annal. eccles. Francor. VALESII
Notit. Calliar. BROWERI Annal. Trevi-
renses, illicque id genus libri mihi sup-

peterent. Comparandis autem (ut ad reliqua epistolæ tuæ deveniam) Friderici Victoriosi ad Imp. Fridericum III. litteris, A. MCCCCLXXI. scriptis, non est, cur operam opemque impendas: eas namque in FUGGERI speculo honoris Austriaci (*Oesterreichischen Ehrenspiegel*) jam publici juris factas, reperire est. Fœderum vero a Badensi adversus Fridericum initorum formulas si consequi posses, gratissimum mihi esset, quamvis nesciam, an diplomatum quid, litterarumque publicarum, uti quidem primo facere decreveram, subicere velim. Essent quidem, quas appendicis loco subungere liceret: siquidem in tabulario Bipontino plures huc facientes latere novi. Sed, uti dictum, nunc quidem nil certi cum animo statutum habeo ac deliberatum. Utrum Sandius Fridericanorum uno volumine comprehendendorum consilium inierit; certo scire perverlim. Est enim (quod tibi in aurem dico) et alius quidam bibliopola, et is quidem non incelebris, qui id facere animo præsumsit: eoque fine non meam solum requisivit operam, sed suasu etiam meo, litteris ad Illustrem LEIBNITIUM scriptis, id operam dedit, ut e Wolfenbütelensi, in quam Freheriana magnam partem translata est, si quæ viri *avensola* haberentur, erueret. Biponti III. Eid. Novembr. A. MDCCXIII.

LXVI.

GEORGIUS CHRISTIANUS
JOANNIS.

Redit ad te Catalogus bibliothecæ tuæ , testis omni exceptione major , quantum bonis tribuas litteris, librisque. Hachenbergii vero oratio pace tua mecum ibit ad montes Vogesi, reditura tamen, simulac eam expediero. Historiam Friderici Victoriosi vadis interim retineas loco, et cum tibi Barlandi, Hincmari, aliorumque, quos frustra quæsi, copia sit, laboribus tuis nonnihil subcesivi surripias temporis, ad loca, quæ nondum inspicere mihi licuit, inspicienda, illucque, quo faciunt, stellulis vel aliis signis referenda. Ne vero grave tibi sit, quod id petam. Peto enim litterarum causa, et quidem a te, quem litteris ornandis juvandisque natum, deditumque esse, mecum norunt omnes, prædicantque. Raptissime abituriens Francof. prid. Kal. Maji A. MDCCXIV.



GEORGIUS CHRISTIANUS
JOANNIS.

HACHENBERGII de præstantia Palatinatus orationem , quam nuper benevole mecum communicasti , his tibi , non sine grati testificatione animi, lubens meritoque defero. Tum vero , quod nuper abs te petii , repeto ; ut scilicet studiis tuis , negotiisque ; si fieri potest , non nihil decerpas temporis , ac loca auctorum in Hachenbergii historia nondum a me evoluta evolvas ; speciatim vero , utrum unusquisque ad rem , cujus gratia adducitur , faciat , dispicias , et quorsum proprie pertineat , signis additis , ut ego quidem feci , notes. Facies sane hoc ipso rem non mihi solum , sed toti reip. litterariæ quam maxime gratam. Quænam vero loca illa sint , sine negotio cognosces , si modo indicem locorum peculiari plagula a me comprehensum , vel partem modo illius frontispicio libri a me præmissam , inspexeris. Matthiam Kemnatensem , qui omnium creberrimè citatur , frustra adhuc quæsi , nec scio , ubi reperire liceat (a). De reliquo cum

(a) Freheri ævo asservabatur Matthiæ de Kem-

cum ex historiæ Palatinæ tractatione hæc, quæ hic vides, mihi enata sint *ζητήματα*, non possum, quin ea tecum communicem, rogemque, ut tum ipse ea perpendas, tum etiam aliis, qui in hoc studiorum genere versati sunt, discutienda proponas. Merentur namque mea sententia, ut sub accuratiorem veniant disquisitionem. Speciatim curatius edoceri velim, num Eberhardus, Conradi frater, revera Palatinus fuerit Rhenensis? Fuisse dicit TOLNERUS, et qui ejus vestigia legunt, HUBNERUS ac LUDEWIGIUS. Ego dubito; tametsi haud sum nescius, Alberico, Engelhusio, aliisque Comitem vocari palatii. His vale, Vir Nobilissime, et audaciam hancce meam mihi benevole condona. Biponti Non. Jun. an. MDCCXIV.

Utrum singulæ regni Germanici provinciæ, Conrado I. rerum potente, suos jam habuerint Comites Palatinos, an vero sequentibus demum eos acceperint temporibus?

An

Kemnaten, quem Theologum, Principis Capellanum et Mathematicum nominat, Historia Friderici Victor. in Archivis Palatinis. vid. ejus Notas ad Trithemium, p. 2.

An regnum Lotharingicum, quando ab Henrico aucupe fuit recuperatum, an vero post demum acceperit comitem Palatii?

An qui comes Palatinus regni Lotharingiæ fuit, idem fuerit comes Palatinus Rheni?

Utrum diviso postea in duos ducatus Lotharingiæ regno, superiorem scilicet ac inferiorem, unus idemque in duobus hisce ducatibus comitis munus Palatini obierit, an vero in unoquoque illorum peculiaris comes Palatinus fuerit constitutus?

An Comes Palatinus Rheni fuerit comes Palatinus regni Germanici, κατ' ἔξοχον ita dictus, et is quidem solus; cum ceteri, qui in Bojaria, Saxonia, Suevia comitum Palatinorum munere functi sunt, comites tantum Palatini provinciarum fuerint, e. g. Bojariæ, Sueviæ &c. et si res ita habet, quando ad id dignitatis culmen dicti comites Palatini ad Rhenum adscenderint?

Utrum comes Palatinus Rheni aulam Cæsaris semper sequutus sit, et Cæsare in Saxonia, Bojaria, Suevia commorante, jus in Saxonia, Bojaria, Suevia dixerit?

An

An qui comes Palatinus Rheni fuit, non ceteros modo ceterarum provinciarum comites Palatinos, sed duces etiam principesque, Othonum jam Henricorumque temporibus, dignitate, auctoritate, eminentiaque anteiverit?

An comites Palatini Rheni tam ampla terrarum spatia in utraque Rheni ripa, regnoque Lotharingæ sua sub ditione habuerint, ac vulgo quidem adseritur?

Utrum bona, quæ Palatinorum in ditione sunt, omnia Palatinatui Rheni contributa dici possint, nec ne? maxime quod constet, pleraque illorum in patrimonio esse Palatinorum, variis quidem titulis, hereditate, emptione, permutatione, bello &c. acquisita?

Quænam illa sint bona, locaque, quæ Palatinis Rheni olim a Regibus et Imperatoribus Germaniæ sustinendæ dignitati Palatinæ fuere contributa?



GEORGIO CHRISTIANO JOANNIS.

Non ægre feres pro singulari tua humanitate diuturnum silentium , quod e longa ad acidulas Swalbacenses absentia , aliisque negotiis quam plurimis enatum est. Postquam vero incolumis , Deo duce, domum redii, ulterius differre nolui , quin tibi HACHENBERGII elegantissimam Frederici Victoriosi Historiam debita cum gratiarum actione remitterem. Doleo autem, quod ob easdem , quas supra adduxi, rationes petitis tuis satisfacere nequiverim, nec, quando possim , per varia , quæ me remorantur, impedimenta dispiciam. Multum enim temporis locorum , quam exigis, requirit investigatio, illæque , quas proposuisti, quæstiones altioris sunt indaginis , quam ut solvere e vestigio illas , vel apposite respondere jam possim. Kemnatenis mihi æque ac tibi ignotus est ; non periisse tamen scriptorem gravissimum spero , sed in lucem aliquando protrahi posse confido , cum ea nostri seculi sit felicitas , ut studii historici amor indies crescat , multaque egregia veteris ævi monumenta ab interitu vindicentur. Virum in his præter alios se præstat Jo. Joachi-

achimus MULLERUS , qui vastissimum opus aggressus , longe desideratissimam Comitiorum Historiam texere conatur : sed nonnisi a Friderici I. temporibus usque ad Rudolphum secundum , cum maxime optandum fuisset , ut altius repetisset. Sed plusquam Cimmerias procul dubio metuit tenebras , quæ anteceden- tia obvolvunt secula. Priora duo jamdum publici juris fecit volumina, quæ acta inter annos 1440. usque ad 1493. Comititia celebrant , atque illustrant. Quæ an tu jam videris , nescio , ideoque illorum apud te mentionem facio eo lubentius , quod multa egregia , quæ Friderici tui Palatini Historiam ornare possunt , præbeant. Subiitne illa jam dum prælum , an brevi experietur ? Vereor enim , ne typographi tui , quem Dulsekerum esse suspicor , operas alia exerceant. Nam illi , ut audio , animus est , FREHERI aliorumque rerum Germanicarum collectiones sub incudem revocare , STRUVIIque opera auctiores reddere. Quod equidem institutum non improbo ; nescio tamen , an publico magis quam privato Bibliopolaæ atque editoris commodo, ea, qua ineunt , ratione , prospiciatur. Illorum enim , qui istis adhuc carent , æque ac eorum , qui jam instructi sunt , interest , ut tales libri prioribus editionibus ad amussim respondeant.

ant. Quod nisi fiat, citata a scriptoribus hæctenus loca difficillime ab istis evolvi atque inveniri possunt, his vero ob pauculas parvique sæpe momenti emendationes atque accessiones novæ tales editiones non sine magna pecuniæ jactura coemi debent. Omnibus vero consuleretur, si peculiari volumine additiones istæ donarentur publico. Id etiam consilium Sandio Bibliopolæ nostrati dedi, qui REUBERI scriptores rarissimos luci restituere in animo habet. Quod vero is, qui operam ipsi navat, audire non vult, sed multa attexere gestit, etiam quæ novissime prodierunt, atque in omnium manibus sunt, e. gr. Eginhardum ex SCHMINCKII recentissima illustratione, Ligurinum cum RITTERSHUSII notis, et alia. Hoc sane modo et librorum pretium, et moles, qua jamdum orbis literatus laborat, sine necessitate augetur. Sed veteres justæque sunt Eruditorum querelæ, quibus aures tibi obtundere amplius nolo.

d. 23. Aug. 1714.



LXIX.

JO. ERNESTO A GLAUBURG.
Patricio Francofurtano.

Accedit sine veste, h. e. incompactus, Libellus Heraldicus a Jo. Wolfg. TRIER novissime editus, quem nondum, ut existimo, vidisti, ideoque gaudeo, quod in aliqualem gratitudinis tesseram tibi offerri a me queat. Lætaberis una mecum, quod in Germania nostra cum reliquis Historiarum studiis præstantissima hæc quoque disciplina excoli incipiat. Rem vero præstabis gratissimam, si tu harum deliciarum studiosissimus optimusque judex mentem de libro explicaveris. Autor novellus admodum in Republica litteraria homo est, et nonnisi duobus, quod sciam, moralibus scriptis notus, nescio an ita hoc in studio se gesserit, ut præconem hæc ejus opella mereatur. Utinam vero et Germani nostri in hæc sacra diligentius inquirerent, Germanicæque historiæ nostræ utilissimo hoc studio lucem afferrent, ob cujus defectum summis adhuc tenebris difficultatibusque caligat. Unicus sane SPENERUS, vir æterna memoria dignus, virum in hoc se præstitit, cujus sane vitulo ararunt postea omnes. Mirandum, nos hæcenus tam negligentes hac in par-

Pars II. X te

te fuisse, cum et Galli et Angli excelluerint. Mirari satis non potui, quanto studio, quantove apparatu Heraldica ars excolatur in Britannia. Singulis enim ejus Provinciis non solum ab antiquissimis temporibus ministri quidam præfecti sunt, qui in nobilium jura, titulos, arma, lites inquirunt, quos *Kings of Arms*, i. e. Reges armorum, *Lords Clarencieux*, a Clarentiæ ducé, qui primus hoc officii gessit, (qua dignitate celeberrimus ille Georgius CAMDENUS defunctus etiam est) et pluribus aliis nominibus salutant; sed in Regia etiam spectabile insigneque Collegium floret, *the Heraldsoffice* vernacula nuncupatum, cujus illi membra, et ubi res altioris indaginis tractantur atque absolvuntur, monumentaque adservantur huc facientia. Maxima sane cum veneratione vidi ibi illa, cum Londini degerem. Eximiam enim illic conspexi supellectilem Documentorum, Chartarum, Privilegi-
 orum, Instrumentorum, Litterarum, quas vocant, Nobilitatis &c. ut taceam ingentia volumina, in quibus familiarum nobilium Genealogiæ descriptæ sunt, quorum tantus apparatus, ut nulla sit in tota regione, de qua plenissima notitia hauriri nequeat. Ubi hoc etiam memorabile atque laudandum, quod quilibet numerata levi pecuniæ summa de omnibus, quando et quotiescunque libeat, inquirere queat.

Præ-

Prædicare certe satis nequeo liberalitatem facilitatemque gentis hujus in exteros, alias satis morosæ, quod scilicet omnibus, advenis etiam, nullibi aditum præcludant, adeo, ut regium etiam tabularium, seu archivum in turri, quam vocant, Londinensi (*the Tower*,) patefactum nobis sit, ubi præstantissima quævis totius regni monumenta non sine præ antiquitate reverentia intueri licuit, quæ Celeb. RYMERUS regia vere autoritate in publicum cedere cœpit, jamque XII. ni fallor, Volumina in Fol. complevit. Quæ summa cum voluptate coemissem, nisi tam rara atque cara (quod Regina ultra ducenta exempla typis exscribi prohibuisse dicatur) fuissent. Haberent aliæ quoque nationes laudabile sane exemplum, regiumque plane, quod imitentur. Sed pudeat illas, nostramque inprimis patriam, ubi talia ex vanissimo, ne præjudicia inde enascentur, metu premuntur potius, pulvere obruuntur, ac tineis blattisve in escam relinquuntur. Quanta, quæso, cum morositate non exteri modo, sed et ipsi indigenæ a Principum, imo Civitatum tabulariis arcentur! adeo, ut pro gratia reputandum sit, si apothecæ, repositoria, atque loculamenta, in quibus hæc mysteria reclusa, extrinsecus, vel per transfennas, quod dicitur, monstrentur. Sapienti tibi satis! nec nostræ etiam Reipublicæ

blicæ ulcus vel callum in his tangam. Nec edocendus hac occasione mihi primum es, de novo, quod Berolini Rex Borussiae paucis abhinc annis erexit, Officio Heraldico. Vereor autem, ne ex solenni curiæ huic imitandi æmulandique exteris studio vel ad fiscum potius locupletandum, velut novum nummos conficiendi arcum, quam in Reipublicæ etiam litterariæ commodum prænobilissimæque scientiæ augmentum excogitatum sit. Interim aliqua inde emanarunt scripta, e quibus illud, quod SPENERUS filius, patre tamen sine dubio opitulante, de Fecialium Origine, dignitate, atque officio conscripfit, possideo. d. XXI. Febr. MDCCXIV.

LXX.

JO. ERNESTUS A GLAUBURG.

Tractatum, quem transmisisti, Heraldicum TRIERI nunquam a me visum, tua cum venia perlustrabo, perlustratumque haud viciatum cum gratiarum actione reddam. Laudandum sane viri conamen, artem, Germania oriundam nostra, patriæ laborantis vindicare linguæ, lectionis opus et laboris haud exigui, Latinæ, Galli-

licæque inprimis , linguarum ignaris nequaquam inutile. Autorem autem, dicam, si licet , quid sentiam , hominem ut novellum in Republ. litteraria , sic peregrinum plane in antiqua et genuina esse Heraldica palam est , in antiquitate , monumentis scilicet et sigillis chartisque aut minime , aut nunquam versatum. SPENERI inprimis nostri arasse vitulo, absque mendacio est. At ut Herculeum sane optimus hic operis Heraldici parte speciali perfecit laborem , primusque Germanorum hac in materia et unicus virum se præstitit ; ita parte generali minime scopum tetigit , Gallos sui temporis (antiquorum etenim , et omnium Europæ una eademque erat populorum) scriptores artis secutus , antiquitatis expers , non sua ex culpa , sed officii partim onere et gravitate monumenta antiquiora , adversæ inprimis Ecclesiarum et Monasteriorum religionis , perlustrare prohibitus , partim hominum invidia insulforum documentis plane destitutus. Ut autem nostrum redeam ad autorem : multos is terminos artis Germanice minime Germanice reddidit , cum interpret non tam verbi , quam sensus rationem habeat necesse sit ; e. g. pag. 125. occurrit figura , *pairle gallice* , pythagorica littera latine dicta, quam sic interpretatur , *ein Schæcher - Creuz , oder Gabel* , sic porro : *die Deychfeler in Nürnberg*

führen im rothen Feld ein silbernes Schacher-Creuz.
 Cur ein Creuz oder Gabel ? vel littera ? cum
 nomen familiæ et figuræ forma nos doceat
 Temonem , eine (Wagen-) Deychfel esse.
 &c.

Hos autorum nostrorum errores emen-
 dandi animus eo me sæpius induxit , ut
 paucula , quæ de hac arte monumenta,
 sigilla , autoresque pluribus annis edocu-
 erunt , cum publico communicare statue-
 rim ; Bibliopolarum vero nostrorum in-
 curia mentem hucusque avertit. Litteris
 tamen observationes mandabo , quam pri-
 mum negotia permiserint , mecum ne pe-
 reant , posteris spero profutura. Quod
 de Britannorum studio hujus admones ar-
 tis , perquam me delectat ; unicum , quod
 doleo , est raritas atque caritas autorum
 hujus nationis de hoc argumento. Uti-
 nam nostrates resipiscant , exterorum lau-
 danda magis , quam detestanda recipiant,
 virtutesque vitiorum loco imitentur !
 meliora speranda etiam essent tempora , nec
 tot patriam inutilia terræ premerent pon-
 dera. Interim occasione litterarum tua-
 rum , Vir Humanissime , diplomatibus
 Nobilitatis , vulgo *Adels-und Wappen-Briefe* ,
 proprium abhinc destinavi volumen , cujus
 de successu minime dubito , ope fretus a-
 micorum , et tibi spero inserviturum. Hei-
 neccium nostra patria si haberet , multa
 ex

ex latebris in lucem prudentia sua , Catholic. saltem ecclesiarum monasteriorumque e tabulariis exemplo Corbejens. aliorumque , quin reduceret , nullus dubito. Bibliothecarium interim et Canonicum S. Bartholomæi , Dominum Straub , iterum atque iterum tibi commendo , ut et Dn. Decanum ejusdem ecclesiæ , quem omnia Ecclesiæ suæ documenta summa perlustrare cum diligentia audio , viros certe humanissimos , quorum amicitiam adipisci si queas , multum tibi profuturam existimo. Novum quod attinet , Berolini quod est , Heraldicum officium , ad fiscum potius locupletandum inservire , quam antiquitatis sollicitum esse , ex SPENERI nostri filio natu minimo annos jam ante aliquot audivi. De junioris autem scriptis ne litteram usque huc vidi Speneri , ordoque areolarum regii scuti Borussici (quod nuperrimo electionis die , vulgo *Wahltag* , corrigendum a legato mihi commissum erat) inversus et perversus , seriesque , de officii hujus , seu Collegii imperitia sat certiore fecit. Dabam Alnorum in Castro (*Erlenburg*). diē V. Martii , A. D. MD-CCXIV.



LXXI.

Joh. Henrico MAJO

suo

Zacharias Conrad. ab VFFENBACH

S. P. D. (a)

Liceat mihi Romano te more, omiſſis , qui non niſi bullæ , fumus , fucus, ampullæ et ſeſquipedalia verba, titulis, te compellare. Firmior integriorque amicitia noſtra eſt, quam ut hiſce captandæ benevolentia mediis , ne potius nugis atque ineptiis dicam , egeat , ſanctior atque ſincerior autem, quam ut hiſce colî debeat. Aulæ mancipiorum , et qui ea imitantur, non amicorum eſt, verba ſibi invicem dare. Hiſce præmiſſis , quæ mecum probabis, amice dilectiſſime , ac ſequeris , ad tuas accedo , haud infucati dulciſſimique pleniſſimas amoris. Amantiſſimis ſane verbis tuis animum adeo affeciſti meum, tantæque voluptate beaſti, ut quæ illo ſentiam, explicare plane nequeam. Hoc vero af-

-
- (a) Hac epiſtola Mæcenâs noſter reſpondit ad literas MAJI ſui, quæ exhibentur in prima hujusce Syllogæ particula, p. 230. ſqq.

affirmare queo , quod me nunc demum
reviviscere ex Tuarum lectione sentiam.
Vivamus igitur læti , vitamque confici-
amus una longissimam. Nunquam sane
diuturnioris vitæ desiderium vexavit ; ast
nunc flagro illo penitus , dum Tu , o al-
tera dulcissima pars mei ! et mori et vive-
re mecum desideras. O fide Achates , in
cujus pectore revixit ævo celebrata Pyla-
dis et Orestis (unici illi , Poeta teste ,
erant , qui mallent ipsi mori) amicitia ,
transigamus molliter , in mutuis amplexi-
bus , in intima familiaritate , in suavissi-
mis coram et litterarum colloquiis bre-
vem , ut in proverbio est , vitæ Isthmum.
Si vero , quod tui nunc causa absit , is ,
qui omnia solvit , nostrum quoque amici-
tiæ vinculum , Gordio nodo durius , Ale-
xandri illius exemplo , ipso fortior ac in-
vincibilior , utpote illius etiam victor , fal-
ce dissecaret , rumperetque , esset , quod
in ipso mortis articulo , qui tamen , ut
Aristoteles deliravit , omnium rerum hor-
ribilissimum , gauderem , cum petitis an-
nueris , librorumque meorum , quos libe-
rorum instar amo , curam in te suscipere
non detrectaveris. Lætor etiam , quod i-
dem velle , ac idem nolle nobis sit , utpo-
te quod demum firma amicitia merito di-
ctum : lætor , inquam , quod fieri possit ;
ut , quos relinquimus , libelli , utrique no-
strum charissimi , post cineres conjuncti
X ; sint,

sint, velut nosmetipsi extitimus conjunctissimi. Sed cum pro tua, quæ maxima est, benivolentia mihi potius filium preceris meum hæredem legitimum, et quidem mihi similem, hoc est, (ut ego quidem accipio) librorum studiosum atque amantem, nam hæc sola virtus est, quam in me agnosco, quæve, citra arrogantiam tamen, gloriôr: cum, inquam, talem mihi optes, omnes nervos viresque intendam, ut amantissimum votum tuum impleatur. Annuat modo atque secundet divina, a qua omnia pendent, providentia, ne omnis mea, (Neotericorum de procreatione sententia, qua omnem et viro et fœminæ potestatem plane adimunt, sortique fortuitæ committunt) expectatio ac conatus frustrantur. Utcunque tandem fors cadat, sit ovulum masculini aut fœminini generis, sit modo punctum salvum, contentus ero, cum tu mihi sis, Amice dilectissime, in quo omnem spem meam collocare queam, qui et recularum mearum, et famæ quoque meæ curam tam libenter in te suscepisti. Nec spem meam falli posse confido, cum non longo quidem usu, ast certissimo insignique cognitus mihi sis. Quæ enim tua est humanitas, quæve inserviendi promptitudo! novissimo gratissimoque exemplo utramque mihi probasti, dum solus librorum meorum Ebraicorum evolutionem in te suscipiendam,

at-

atque aliquot indies horas illis impendendas spondeas. Religioni mihi ducerem, tantum pretiosissimi et tibi et rei litterariæ temporis tui a te infumi, nisi considerarem, te non solum deliciis hisce delectari, sed officii etiam, quod exornas, partes a te eadem opera expleri, vel saltem desiderari nequire. Ad minimum viri boni, officiosissimique amici officio, cui nunquam deesse soles, defuncturus es, de quo ego inprimis, mecumque universus orbis litterarius lætari aliquando poterit. Ut taceam, nefas fore, si recusares, cum neminem ad hæc te magis idoneum sciam. Sed nolo his immorari, ne molestus tibi esse, animumque, quem jam promptissimum demonstrasti, addere velle videar. Hoc solum addo, me novos semper libros, et meis quidem sumtibus (quod præter voluntatem meam, contraque decori leges Bibliopolæ, cui demandaveram, culpa, neglectum nuper fuit) suppeditaturum, ac quavis data occasione curaturum, ne Musis tuis, quas nimis aggravo, ingratus videar. Cum vero nonnisi litterariis donis placari atque conciliari eas sciam, gaudebo, si quædam munuscula parare potero. Sed nimis verecundæ, vel liberales nimis mihi videntur, ut munificentia meam bene merendi voluntatem semper vincant, vel anteveniant. Suboles, Amice humanissime, quid sibi hæc velint. Rixari gestio,

stio, quod omnem tibi inserviendi occasionem præripias. Scholasticos aliquot libellos tibi offero, optimos illico libros retribuïs. An ignoras inverecundiam meam, an nescis inexplebilem librorum aviditatem? Putasne, me catalogum librorum inspicere posse, absque summa, si vel unicus sit, quo caream, potiundi cupiditate? Primo statim indiculi tui intuitu manum cohibere non potui, quo minus tot, quot hic in schedula vides, notaverit. Puduit me facti, sed tua humanitate fretus notam mitto tibi, hac tamen conditione, ut nonnisi aliquos, quibus facilius carere possis, tribuas impudentiæ meæ. Unicum tamen excipio, quem vehementissime etiam efflagito, imo exigo, Adagiorum scilicet Volumen, utpote tua, aut quam chara! manu notatum. Non dico ob eruditionem, quam in notis istis, cum a te proficiscantur, reperiaturum me certissimus scio; ne tuam, quæ cognita mihi dudum est, modestiam lædam, eo magis cum Viri docti nomen urbane atque facete respuas, quod in Republica litteraria cum maximo splendore, invita etiam modestia tua, possides, æternumque servabis. Pauculos, quos a me desiderasti, libellos Domino Raumburgero reddendos curavi, excepto Ptolemæo et Ammiano. Illius enim nuda versio Latina erat; hic vero, quod oblitus eram,

ac

ac dolebam, jam alii cesserat. In ejus locum HOLSTENII notas in Stephanum de urbibus substitui, quas si tibi desint, retinebis, exspectans plura, quæ mihi obtingent successu temporis. Interim malum tibi nomen manebo. Secreta Secretorum Soc. Jesu secreta forsan amplius non erunt, postquam Belgæ in contumeliam Soc. Memoriis, ut titulus habet, Trevoltiensibus, quæ ab hac ipsa Societate, uti bene nosti, proficiuntur, Secreta talia, ut ibi dicuntur, monita Soc. in sua editione adjecerunt. Nuperrime etiam prodiit libellus contra Societatem, qui multas Societati turbas dedit, quem an videris, nescio. Titulus ejus: *Tuba magna mirum clangens sonum ad Sanctiss. D. N. PP. Clementem XI. de necessitate longe maxima reformandi Soc. Jesu per eruditiss. Dn. D. Liberium Candidum, S. Theol. LL. Argentinx (credo potius Lipsiæ) 1713. in 8.* Collectio est rarissimorum, et aculeatissimorum quorundam libellorum, quibus appendicis loco etiam annectuntur Monita hujus Societatis Secreta, pag. nimirum 359. usque 399. Nisi Epistola jamdum proluxa satis esset, summa ex illis capita heic transcriberem, ut cum manuscripto tuo conferre posses, sed malo utrumque libellum data occasione tibi transmittere, ut commodius queas. Si tua ista Secreta a jam dictis

etis diversa essent, rem utique gratissimam
 faceres, si describenda curares. Addam
 nunc antequam finiam librorum, quos e
 notatis abs te coemi, titulos, adjectis E-
 ditionibus. *Iggéres báale chájim*. Francofurti
 1697. 8. (2.) *Iggéres hatt ijul*. Francofurti
 ad Oderam 1693. 8. (3.) *Sevach Péfách*.
 Venetiis 1545. 4. (4.) *Chánóch*. Amstelod.
 1713. 8. caractere, quo in scribendo
 utuntur Judæi. (5.) *Cáphor vaphaérach*.
 Amstelod. 1706. 4. (6.) *Meor enójim*. Ve-
 net. 1640. Fol. (7.) *Moreh nevochim*, Liber
 manu exaratus 4. (8.) *Pitron chalomos*. (9.)
Schechitos obedikos (horum duorum Editiones
 annotare oblitus sum). (10.) *Scephatal*.
 Hanoviæ 1612. Fol. cum fig. (11.) *Sepher*
hattajm. Cremonæ 1566. 4. (12.) *Tanchume*.
 Francofurti ad Oderam 1670. (13.) *Jalkut*
chádasch. Amstelod. 1670. 4. (14.) *Jalkut Ru-*
beni gadól. Amstelod. 1699. Fol. (15.) *Ir*
Gibborim. Basileæ 1580. apud Frobenium
 Fol. (16.) *Maasél Jeruschalmi*, Hamburgi
 1710. (17.) *Mechilta*. Amstelod. 1711. cum
 commentario Moïsis Francofurtensis. (18.)
Sepher Gilgulim, Francofurti 1683. 4. (19.)
Sepher Cerinthus, Amstelodami 1705. 8. una
 cum aliis tribus libellis, uno volumine.
 Hos tibi denunciandos duxi non solum, ut
 rationem tibi, amice optime, redderem,
 quæ lucratus hætenus fuerim, sed etiam,
 ut, quæ inspicere ipse velis, indicare pos-
 sis.

sis. Transmittentur enim tibi omnes, utpote cui quidquam negare nefas, inservire autem facinus reputo. d. 27. Febr. 1714.

LXXII.

Zachariæ Conrado ab VFFENBACH

suo

JO. HENRICUS MAJUS FIL.

Intelligo, VFFENBACHI amicissime, gaudio non tantum me perfundi, sed transfigurari, ut cum Seneca loquar meo. Magnitudini id tribue tui erga me adfectus, quem augeri indies cupidissime sentio. Vera esto amicitia nostra, quam non spes, non timor, non utilitatis suæ cura divellat, cum qua et pro qua moriamur. Amplector te, amicorum princeps, et veneror, et in oculis fero, feramque, usque dum lumine oculorum priver ipse. Magnum est, si recte rem æstimaverimus, amici nomen; quo non obvios omnes compellare decet, sed quos in societatem honesta cupiendi par voluntas trahit. Quare cum eo me adfeceris honore, gratias tibi habeo maximas, daturus operam, ut
nec

nec amico , nec amicitia te destitutum
conqueri possis. Tune , inquis , tam ma-
gnifice amici nomen et amicitiae laudas ,
tune illo decore superbis , quum ne mi-
nimam quidem amicorum officii partem
fueris exsecutus, multus in promittendo,
in praestando nullus ? Bona verba, quaeso,
meum delictum ! Pollicitus sum, fateor ,
me proxima occasione ad te daturum lit-
teras ; neque pollicitus modo sum, reap-
se etiam praestiti. Ante octiduum , hoc
ipso Veneris die, epistolam ad te, dulcis-
sime amice , exaravi , tibi non redditam,
sed mihi Francosurto remissam , singulari
quodam casu. Quum enim Raumburge-
rianis litteris inclusissem tuas , accidit, ut
illo legente , quae ipsi scripseram , catel-
lus, eo inscio , epistolam de mensa clam
sumtam , virulento dente laceraverit ,
fragmentis quibusdam tristibus , quae ejus
effugerant saevitiam , relictis, mihiqae ,
veluti viva caninae rabiei indicia , trans-
missis. Indicaveram illis , quid de duobus
libris a Judaeo emtis, sentirem. Quantum
litterarum ductus male scribentis Ebraei
adsequor , unus , et is quidem manuscrip-
tus (ita suspicor) preces continet Judaicas,
quas inter exstare dicitur integra , quae
contra Christiani nominis gloriam est dire-
cta , et quam in aliquo pariter anteceden-
tium manuscriptorum tuorum observavi.
Alterum volumen tres complectitur libros,
in

in quorum uno divinando negotium mihi fecit imperitia Judæi tui, egregii procul dubio Rabbinus, et rectoris Academiae Pragensis (hoc enim ignorantia ejus dudum meruit) magnifici. Is enim ridicule titulum libro dedit תחלת חכמה quod est, *timor Sapiencie*. Id vero quid sibi velit, ignoro. Scribendum enim unica mutata littera תחלת חכמה *initium Sapiencie*. Et sane hic liber una cum aliis, ab olente Apella tuo adscriptis, prodiit Veronæ 1647.8. tibi autem recentior, ut memoras, contigit editio. Bonus quidem liber est, neque tamen tanti æstimandus, quanti a Judæo laudatus, qui tot verborum phaleris ea tibi de causa forsan commendavit, quia prior ille, et qui in fronte voluminis legitur Sepher Cerithus, modos docet explicandi sterquilinum Talmudicum, Gemaram cumprimis, elegantes, acutos, divinos, nihil supra. Humanæ eruditionis et ingenii apex habetur illa interpretandi facultas, ad quam excellentium Christianorum ingenia acutissima penetrare non possint, ne Lockii quidem, aut Leibnitii, aut quicquid vel Germanici est acuminis vel exteri. Ego itaque non magni facio illud scriptum; majori apud me in pretio est volumen illud alterum manuscriptum, vel ea de causa adservandum diligenter, quod novum perfidiæ præbeat et calumniarum Judaicarum argumentum.

Pars II. Y aqui-

a quibus etsi purgare sese in hoc negotio conentur versuti Ebraei, convicti tamen sunt dudum. Hæc quoad summam epistolæ meæ dilaceratæ; venio nunc ad tuam. Gratum adversum te fuisse votum meum, de filio hærede, ex animo lætor. At quam suave est, quod de tuis eam in rem conatibus scribis, quibus ut felix respondeat eventus, toto pectore adprecor. Nullæ hic sunt meæ partes, immo ne quidem tuæ: pendent enim omnia aut ex fati benignitate aut malignitate. Si veterum ineptias sequi velis, haberem forsitan, quod in usus tuos convertere possis; et vel solum CARDANUM de Subtil. Lib. XII. ineunte, tres modos creandi filios masculos tradidisse recordor; quorum duos experimento didicit esse veros; tertium, inquit, nondum experiri contigit. Memini et in Holsatia meo tempore accidisse simile quid, consule civitatis Kiloniensis filium, quem tanto desiderabat opere (erat enim quatuor filiarum jam pater) consecuto, joculari auxilio quodam. Sed quo labor? Nondum poema legi, nondum virginale corpusculum referavi, nondum in maritorum familiam receptus sum, et de his sine pudore loquor? Dabis veniam, dilectissimum pectus, licentiæ meæ, et joci, et ineptiis. Ego, qui in emendandis veterum auctorum locis occupor, ab emendatione unius lo-

loci in corpore humano excludor, neque tamen moleste id fero, gnarus, alios dari, qui plenis velis in hunc portum irruant. Quod si tamen sine mascula sobole te decedere ex hac vita jusserit Deus O. M. mihi que remanere paulisper et in squa-lore mœroreque vivere imperaverit, faciam, quod ei convenit, qui tot abs te beneficiis ornatus est. At de his cogitare nolo; adveniat potius illa dies, quæ patrem te faciat filii pinguis, jucundi, delicati. Interea librorum, quos subinde ad me mittis, curam gnaviter suscipiam; jamque lustravi manuscriptos tuos, sequenti hebdomade, ubi occasionem nactus fuero, ad te deferendos: unico excepto GOLIO, in quo nonnulla adhuc describenda restant: sed et hic nundinis proximis ad te redibit. Adjiciam illis, quos notasti nuper e meis, libros, quosque accipies ad unum omnes, ne unica quidem demta schedula. Noli mecum rixari, amicissime vir, de levi catalogo: rixabimur de paupertate mea, atque inferior ex illa pugna discedam. Nosti, pauperis esse numerare pecus. Et unum forte alterumve invenisti librum non plane ingratum. Quid? invides mihi felicitatem meam (ita enim voco illam) qua factum, ut, post tot exhibita beneficia, in re minima inservire tibi possim. Gaudebis potius mecum, qui aliquo promeritorum tuorum cumulo le-

vatus, cogitare quiverim de folio, loco libri. Nempe hæc sunt ex Græcorum proverbio χρύσια χαλκείων. Libros a tua benignitate Raumburgero datos, ut ad me curet perferendos, non modo ex tuis, sed ipsius etiam litteris intellexi. Quales nunc tibi agam gratias, præstantissime virorum, quibus verbis tibi consecratam mentem declarabo, quibus modis tuo me liberabo ære? Hic cura opus, hic labore et consilio. Non animus in culpa est, sed facultas, gratum ostendendi animum. Neque etiam verbis id faciam, verum factis. Jube, impera, manda, præcipe, quicquid libuerit, parebo libens. Quum alia petenda nunc mihi sint ad legendi statum manuscripta, nominabo illa, quod tua pace fiat. Compendium epistolæ ad Ebræos, Græce, duobus in foliis constans, et Epigrammata Græca MSS. ex bibliotheca Isaaci VOSSII descripta; illud item volumen MAIMONIDIS, quod nondum indicabat editum esse Apella. His adjicere poteris, quicquid volueris, et, ut adjicias, rogo: feriæ quippe nunc sunt, et tempus hæc talia suscipiendi maxime opportunum. HOLSTENII in Stephanum notæ nondum mihi fuerunt: quare denuo tibi gratias et de hoc grato munere ago. Soc. Jesu Secreta Secretorum typis impressa fuisse, et quidem iterata vice, omnem adhuc meam effugit industriam. Transcribam

bam huc capitum summas : Cap. I. Qualem se Societas præstare debeat, cum incipit alicujus loci foundationem. Cap. II. Quomodo principum, magnatum, et primariorum, Patres familiaritatem et acquirant et conservabunt. Cap. III. Quomodo agendum Societati cum illis, qui magnæ sunt auctoritatis in Republica, et quamvis divites non sint, aliis tamen modis juvare possint. Cap. IV. Quæ commendata esse debeant concionatoribus et confessionariis magnatum. Cap. V. Quomodo faciendum cum religiosis, qui iisdem in Ecclesia, quibus nos, functionibus vacant. Cap. VI. De conciliandis societati viduis opulentis. Cap. VII. Quomodo conservandæ viduæ, et disponendum de bonis, quæ habent. Cap. VIII. Quomodo faciendum, ut filii et filiæ viduarum religiosum aut devotum statum amplectantur. Cap. IX. De redditibus collegii augendis. Cap. X. De disciplina rigoris in Societate. Cap. XI. Qualiter se nostri unanimiter præstabunt contra dimissos e Societate. Cap. XII. Quinam conservari et fovendi debeant in Societate. Cap. XIII. De delectu juvenum ad societatem admittendorum, et modo eos retinendi. Cap. XIV. De casibus reservatis, et causa dimittendi e Societate. Cap. XV. Quomodo agendum cum monialibus aut devotariis. Cap. XVI. De contemptu divitiarum præ

se ferendo. Cap. XVII. quod et ultimum, de mediis promovendi Societatem. Si igitur aut diversum invenies editum quod est ab scripto, aut me illud cum hoc conferre volueris, ut significes, enixe rogo. Librum, cui titulus, *Tuba magna* &c. nondum profecto vidi, et ubi viderem? non hic loci, ubi vetera fere habemus sola et nota omnibus. Denique ex libris Rabbini- cis a te comparatis, unicum illum, cui titulus est, *Meor Enoim*, et quem tibi obtigisse impense gaudeo, perlegendi voluptate teneor; est enim varietate rerum et utilitate laudatus liber, historica, moralia, philologica, theologica tractans, et quid non? Hunc, si ceteris, a te mittendis, adjicere velles, poneres in eo rem mihi gratissimam, et Musis meis, utilissimam. Habebis me et bonæ fidei debitorem, et virtutum, bonitatisque tuæ laudatorem perpetuum. Vale nunc, mea voluptas, et me amare perge. Prostridie Kalend. Martii MDCCXIV.



LXXIII.

JO. HENRICUS MAJUS FIL.

Occasionem ad te, amicorum princeps, scribendi, quem heic vides, dedit libellus (b). Inscriptus est nomini tuo, cujus nunquam sine honore et summa voluptate recorder. Audaciam non interpretaberis, scio, factum meum, neque gratiarum actiones, quas publice exsolvi, invitationem existimabis ad plura præstandum, quod equidem communis vult regula. Ego vero longe ab illa hæresi alienus, arbitror, te et causas et finem dedicationis meæ facile cogniturum, etiam me tacente. Ad causas equidem quod attinet, fusius exposui illas in limine: finem vero nullum putabis alium, quam validius amicitiae vinculum. Deferui morem meum pristinum, et quum antecedentium observationum duas partes nulli consecraverim, hanc tamen tertiam, et cum ea priores, tibi sacras esse volo. Multa sunt, quæ impediverunt, quo minus receptissimam consuetudinem observare antea voluerim, quas inter potissima est, quod dedicationes vendere noluerim. Habui enim semper animum, pecunia majorem, neque caput inde referre paulo unctius studui, quin potius damnavi illorum institutum,

Y 4

qui

(b) Tertius nempe Observationum Sacrarum Liber, VFFENBACHIO a MAJO nuncupatus.

qui lucri tantum causa libros confarcinant. Ad te autem, o spes mea, dum animum converti, e vestigio pertinaciam meam valere jussi, inprimis quum nihil eorum metuendum sit, ob quæ virorum clarorum nomina schedis adhuc meis præfigere dubitaverim. Amicus enim es, meumque nosti pectus, meamque conditionem et indolem: amico ergo (quidni sperarem?) animo excipias, quod ingenua ex mente ad te venit. Pollicetur id humanitas tua, non mihi soli nota, sed, qui tecum locuti unquam sunt, omnibus. Quid? quod jure postulare id a me potueris tanquam debitum, quod non ita pridem litteris pollicitus fueram tacite. Itaque non doni locum (vix enim adeo vilia donamus) sustinebit misera observationum mearum caterva, sed omnino debiti, ab eo profecti, qui tot nominibus se tuum, VFFENBACHI amicissime, deprædicat debitorem. Sufficiant hæc: neque enim ineptiarum mearum causam agere volo atque patronum. Tu quidquid a me admissum, benevola faventeque manu excipies, quidquid bonæ frugis inveneris, tibi, mala omnia et secius posita minusque recte elaborata, mihi tribues; atque, ut tribuas, omni studio precor. Sed et Genesios Ebraicæ plagulam primam, a Burcklinio (qui se tibi commendat) datam, ad te, Conrade jucundissime, transmittito, et tui et frag-
menti

menti Bibliorum inferens mentionem. Commodum memoriam subit recordatio librorum tuorum, nunc meorum, Holstenii puta, Aufonii, Flori, Statii, Mythologorumque omnium. Accepi illos, et exosculatus sum: muneris autem splendor me obstupefecit totum. Quid enim præstantius poterit esse elegantissima Mythologorum editione, quid pretiosius Holstenianis ad Stephanum observationibus, quid carius Aufonio Tolloiano, quid Floro Freinshemiano præstabilius? Magnum intuli decus familiæ librorum meorum: at longe major est nominis tui gloria, quæ penes me erit æterna. Manuscriptos Codices tuos, ut et eos, quos ex mea potestate in tuam transituros gaudeo, jam fasciculo conjunxi, jam colligati sunt et insuti, tantum aurigam expectant, qui ad te deferat. Vale nunc, o alter Aristogiton, et Harmodii tui perpetuo memor esto. VII. Id. Mart. 1714.



LXXIV.

JO. HENRICO MAJO FIL.

Indignatus sum, sine supercilio tamen atque rancore, sed exporrecta potius, et ad risum explicata fronte, catello, quod tuas ferratis rabidisque dentibus suis lacerando, illis me non solum spoliaverit, sed posteriorum etiam tuarum desiderium tam diu frustraverit. Buccem Thessalicam cibi, cui præ aliis inhiare solet, petulanti non invidissem, si salvas Tuas reliquisset; maluissem etiam, ut Molossus meus Britannicus, in Belgio, ut liberos meos equi instar curru vehat, edoctus, leporem de veru, pro sua, qua unice pollet scil. sagacitate, venatus fuisset, quam quod catellus iste tuis me orbasset leporibus. Hebescant illi a facinorosis moribus dentes, vel, nisi jam dum ferulam expertus fuerit, virgarum pro meritis afficiatur supplicio. Ad seria nunc pergerem, nisi Tui, amice mellitissime, joci de mascula procreanda sobole indulgere hilaritati facerent. Præter illum, quem tu nominasti, CARDANUM, plurimos ex instituto tradidit modos Hispanus quidam (c),
cu-

(c) Janus videlicet Huartus, cujus liber
Exa-

cujus libellus Morhofio ob elegantiam laudatus nuperrime in Saxonia recusatus fuit. Sed ut recte mones, steriles omnes sunt artes, quas illi docent, nisi casus vel propitia faveat Lucina. De istis igitur haud sollicitus, divinæ omnia relinquam providentiæ. Quod tu autem, amice dilectissime, spretis Veneris illecebris, Minervæ Musisque te devoveris, non inconsulte fecisti. Idem sane mecum constitueram, eoque animo in Angliam quoque transigraveram, ut fixas Oxonii sedes quærerem, castoque Pieridum connubio fruerer. Aliter tamen divino, quod placido regit omnia nutu, visum fuit Numini, quod uxorem mihi obtulit, quam certo sciebam, et me et Musas meas pari amore complexuram, eandemque mihi sine zelotypia, aut livore concessuram dulce, quod a teneris cum illis habui, commercium. Quo de nisi fuisset certissimus, (quasi

Examen des ingenios para las ciencias Barcellona A. 1607. in oct. editus, ex Hispanico in Latinum sermonem translatus ab Æschatio Majore, sub titulo: *Scrutinium ingeniorum* Jenæ A. 1663. prodit. In illo præter alia modum tradere non dubitavit, quo parentes gignere possint filios sapientes, ac ad litterarum studia idoneos.

(quasi scilicet in ipsis matrimonialibus Tabulis cautum de hoc esset) nunquam sane ad aleam hanc subeundam adduci potuissim. Probe enim mihi cognitum erat, quam multa necessarium hoc malum incommoda comitari, quamque perniciosum Litteratis, Aonidibusque invisum esse soleat matrimonium. Habet sane conjugium voluptates suas, affert delectationem liberorum, si bonæ frugis evadant, procreatio; ast quam incerta harum fruitio, dubiaque maxime spes est! Et si probe perpendas, nullæ vel exiguæ sunt præ illis, quas dulcis cum Musis consuetudo creat. His tu perfruere, Amice dilectissime, ac in sinu lætare. Nullos te liberos suscepturum, ne doleas, sed, quantis molestiis, quantisque curis te liberatum, perpendas. Librarii tui partus, quos tam bellos, tamque elegantes enixus es, quosve tanta facilitate, tantave voluptate edes in posterum, liberorum vices præstabunt, æternum tecum victuri, nomenque tuum ad immortalitatem consecraturi. Sed quo delabor? Vides, Amice charissime, dum tecum mihi res est, a loquacitate temperare mihi nequeo. Ast vitium hoc aliis videatur, inter familiares affabilitas, quæ virtutes inter numeratur, reputatur, veræque amicitiae, ut oratio index mentis aliis dicitur, character. Citra ulteriores tamen ambages ad libros
nunc

nunc venio, et quidem eos, quos a tua liberalitate exspecto. Accipiam illos, quoniam ita jubes, sine longiori excusatione. Ea tamen lege, ut tuum me debitorem manere sinas, credasve, usque dum occasio mihi sit persolvendi residuum. Libros, quos perlustrare gestis, lubenter transmittam ad unum omnes, quamprimum sese præbuerit opportunitas. Quanquam enim, ut omnia mea, ad usus publicos conferre potius, quam in scriniis inutiliter premere malim, antiquissima illa folia, Epistolæ ad Hebræos Synopsin complectentia, et recentius Græcorum Epigrammatum ex Codice Vossiano apographum aliis ad edendum committenda decreverim, gaudeo tamen, quod tu, Amice optume, in tempore monueris, illaque tibi expetieris. Epistolæ quidem ad Hebræos compendium FABRICIO Hamburgum destinaveram, ut vel suæ Bibliothecæ Græcæ, vel alii opusculo pro more suo annecteret, Epigrammata vero LEDERLINUS, Prof. Argentoratensis, Germani mei, ibidem, uti nosti, studiorum causa degentis, ope obtinisset. Certiorem enim me fecerat, editionem, quam CLERICUS tamdiu molitus fuit, vix amplius sperari posse. Quod eo probabilius videbatur, quod magnus ille Aristarchus, postquam a BURMANNO et BENTLEJO tam male exceptus fuerat, manum de tabula subducturus, animumque
in

in Græcis quicquam audendi abjecturus sit. O si tu igitur, Amice dilectissime, doctam manum admoveres ! Insigne fane et mihi, et universo orbi litterario officium præstares. Haud inconsultum etiam existimo, si Epistolam Paulinam cum Latina versione, notisque tuis doctis, observationum tuarum Tomo tertio interfereres. Facies tamen de omnibus, non ut mihi, sed ut tibi videbitur. De Epigrammatibus, si vel unum, alterumve commodo in loco publici per te juris fieret (si omnium editionem detrectares) satis foret, modo constet mea publico litandi voluntas. Præter librum *Meor Enoim* dictum, Maimonidisque, quem nominasti, codicem, duos insuper addam alios. Spero enim, atque enixe etiam rogo, ut Ebraicorum meorum manuscriptorum rationem habeas, nec illorum curam deponas. Adjiciam denique utramque Leoninæ vel Vulpinæ Societatis Monitorum editionem, Latinam scilicet, et Gallicam, ut cum manuscripto tuo conferre possis. Fieri enim omnino posset, ut manuscripta differrent a typis exscriptis (ut versipellis est Societas) in quibusdam nimirum locis, licet rubricæ capitum omnino concordent. Eadem opera librum ipsum adversus Societatem editum, de quo nuper scripsi, non sine voluptate perlustrare poteris : multa enim de iis, qui Christi socios se mentiuntur, licet

licet e latronibus, qui resipuerunt, tales fieri possint, arcana continet, quæ frustra alibi requiras. d. 10. Mart. 1714.

LXXV.

JO. HENRICO MAJO FIL.

Quibus tibi nunc verbis gratias agam, nescio. Maximus, imo nimius tuus in me amor est, ut et collaudare et improbare, imo castigare illum debeam. Ingratus atque injurius forem, nisi quas mente concipere possum, maximas tibi, Amice dilectissime, referrem gratias, quod elegantissimarum, doctissimarumque Observationum tuarum Tomum tertium, o munus acceptissimum! donare, imo nomini meo, in Republica litteraria atque civili etiamnum obscuro, inscribere dignatus sis. Ast animadversionem, amicam tamen, meretur præfixa dedicatoria epistola, quin potius panegyricus in meas, quas nullas tamen in me agnosco, laudes effusus. Erubui, ita me Deus amet! nec repetitis etiam vicibus absolvere lectionem sivit pudor, atque justa in te indignatio. Hanc etiam probe experturus fuisses, atque experiri meruisses, nisi duo essent, quæ excusare

te mihi viderentur , quæque ardorem in me restinxerunt. Primum, quod seculi mores secutus sis, qui exigunt , ut omnis dedicatio abundet encomiis, adeo, ut nisi quævis ornamenta et laudes congerantur cumulatissime , solœcismum fecisse, et contra decori, urbanitatisque leges peccasse credatur Auctor. Alterum est, quod amplissima, quibus me ornare studes, verba, laudesque, quibus me afficis, amorem tuum simul demonstrent, prodantque, quo ex fonte manarint. Nemini igitur imponetur istis; minime mihi met ipsi, cum longissime a me absit, ut meis ipse laudibus faveam; nec etiam aliis, dum omnia encomia tua et consuetudini, et amor tuo erga me plane singulari adscribentur. Hoc etiam movet me, facitque, ut commissum, contra amicitiae leges, facinus condonem, hac tamen conditione, ut in posterum ab omni laudis specie abstineas, adeo, ut nec epitheton (nisi quod amicis, familiaribusque dari assolet) nomini meo, ubi codicis, aut alius libri mentio facienda, adjicias. Satis mihi certe fuisset, summæque gloriæ duxissem, si solum nomen meum adparuisset ubique. Hæc etenim unica gloria est, cujus cupiditate teneor, hanc etiam citra arrogantiam aucupari me posse confido. Hoc jucundissimum præmium est, quod meo librorum studio indefesso deberi, nisi iniquior sit, nega-

negabit nemo. Nec majus unquam expectam, nec requirere possum. Quod enim insignius famæ ornamentum esse possit, quodnam præstantius decus, quam quod tu, Amice honoratissime, quibusdam, quo hætenus tam bene usus es, Codicibus, quosque ego e sacrilegis Judæorum manibus, imo ab ipso interitu vindicavi, doctissimas observationes tuas augere illustrareque potueris? O me terque quaterque felicem, qui et tibi et universo orbi litterario inservire potui. Improbis ac stultis concivibus meis labor videatur, qui libris colligendis impenditur; mihi nunc aliter probatur. Et nisi jamjam maximus esset in comparandis, tibi que ac omnibus bonis consecrandis hisce thesauris, ardor meus, cresceret multum. De quo ne dubites, omni allaborabo studio, ut meam in his inserviendi tibi promptitudinem, quavis data occasione, perspicias. Jubet id amicitia nostra, imperat publicum juvandi, quæ omnibus bonis incumbit, religio, suadent tua in me merita, exigat denique gratus, qui omnes decet, et quem nunquam in me etiam desiderabis, animus. Hunc utinam probare ac demonstrare tibi majori facultate, majoribusque monumentis possem! Ast tanta est liberalis tua magnanimitas, ut quibus alias hominesque Diique placantur, ex auro argentove muneribus, tuam potius iram in me com-

motum iri metuam ; ut in his mortalibus
 palmam præripias , ipsosque etiam Genti-
 lium Deos superes. Chartacea tamen do-
 na , atque munuscula non respues ; qui-
 bus comparandis , dum capillatam exspe-
 cto occasionem avidus , in votis nunc de-
 sinam. Faxit Deus T. O. M. ut novum,
 quod gratia ejus absolvesti , si molem spe-
 ctes , opusculum , si gravitatem atque præ-
 stantiam , opus insigne cedat in ejus glo-
 riam , ad Sacrorum Scriptorum illustratio-
 nem , tuæque famæ immortalitatem ver-
 gat ! Sosпитet te quoque Numen benignis-
 simum , ut Nestoris , aut quot nostræ æ-
 tatis caducæ hominibus contingere pos-
 sunt , annos vivas , multisque scriptis mul-
 ta exquisitaque eruditione tua refertissi-
 mis orbem litterarium augeas , atque ornes.
 d. 13. Martii , 1714.

LXXVI.

JO. HENRICUS MAJUS FIL.

Binas benevola manu tua exaratas ac-
 cepi litteras , ad quas eo ordine , quo ad
 me pervenerunt , respondebo. Recte fe-
 cisti , quod risu exceperis fata epistolæ
 meæ , a catello discerptæ , cujus ventri
 nisi

nisi Rabbinica quædam librorum nomina ,
 et characteres Coptici. summum intule-
 rint dolorem , cum vomendi studio jun-
 ctum , equidem dignum admiratione fuis-
 set. Quod vero lepores meos (ita enim
 nuncupas) lepori culinario præferre vo-
 lueris , in eo fatis es lepidus. Ego qui-
 dem neque canem precor nimis discendi
 avidum , neque ea sagacitate præditum ,
 qua Molossum tuum scribis egregie instru-
 ctum : illud libris , hoc stomacho nocet.
 Placet mihi meus Achilles , (hoc nomine
 prisco adpellavi canem meum) qui Pyr-
 rhonica quadam abstinencia ἀπέχει , nisi
 quod Crispinum imitaturus , corio adhuc
 sit infensus. Hæc in memoriam et sepul-
 tæ epistolæ , et canum nostrorum dicta
 a me sunt , qui , si quisquam alius , ve-
 re sum κυνομαρής , Justo LIPSIO hac in
 re non inferior. Tædium solitariae vitæ
 discutit ille solus , insignis ineptiarum ar-
 tifex , et fidus comes. Hic est mea Hele-
 na , cum quo et ludo , et jocor , et , quic-
 quid in mentem venerit , ago : placidus
 est , et ad nutum monentis intentus , pla-
 ne ut ex Alexandri M. militibus aliquem
 putare possit , qui a μετεσωματώσει ani-
 marum non plane alienus est. Ignosce , a-
 micissime VFFENBACHI , ludicris hisce
 et jocularibus , quæ tamen in epistolis fa-
 miliaribus habent quandoque locum. Quan-
 tum vero differt mea vivendi ratio a tua!

Tu cum blanda conjuge et ad unguem facta, cum liberis, fratribus, cognatis, vivis; ego cum bestiis, et uxore carens, et fratre, et amicis, quos heic invenio nullos. Neque tamen hanc tibi, mellitissime amice, invideo felicitatem, neque adversa mea accuso fata. Gaudeo potius esse aliquem, qui his omnibus sit instructus, quibus ego privatus. De meis libris plura speras, quam in iis est. Quamvis enim accepturus sis omnes, pauci tamen sunt, et nullius pretii; id quod de notis potissimum manuscriptis ad Erasmi adagia dictum volo: perfeci enim per brevi tempore, easdemque inter legendum orae allevi. Synopsis Epistolæ ad Ebræos, et Epigrammata Græca ex Codice Vossiano descripta avide exspecto. Plane de his consilium meum fuit, et adhuc est, inferendi illam observationum mearum secuturæ parti, horum autem unum alterumve data occasione proferendi: adeo cogitationes utriusque nostrum amice conspirant; neque melius ex me ipso addiscere potuisses, quæ moliar, quam tute divinasti. Epigrammata adhuc inedita, et forte ex Vossiano apographo desumpta, adducit subinde ad Suidam KUSTERUS, quem possideo, et quem proinde conferam. Quum vero de communicandis cum eruditis manuscriptis tuis rationes te ini-
visse conjecerim, hoc saltem ex te peto,
ut

ut pretiosissimum bibliothecæ Corvini thesaurum, historiamque Byzantinam illustrantem, nulli alii, quam mihi, perlustrandum concedas. Non desidero prius illum codicem, quam semel adhuc apud te coram inspexero, ut mutuo consultare de illo evulgando possimus. Effet hæc res et antecessore tuo in matrimonio, et te, et Germania etiam nostra omnino digna: quum enim Galli hanc sibi gloriam quasi fecerint propriam, ut historiæ Byzantinæ splendidum corpus, accessione quoque Banduriana nuper auctum, ediderint, tu solus certare cum illis posses, et hanc ipsis palmam reddere dubiam. Ne itaque Francofurto exire permittas tantas opes, neque alii copiam istas usurpandi divitias temere concedas, quam mihi. Nulla equidem spe ducor argentaria: at librorum me esse perquam cupidum, inficiari nequeo. Fieri hoc negotium poterit totum in tempore et loco. Prosequar telam a B. D. Schneidero coeptam, interferam, quæ et ille, et tu cum illo pro Imperatoris gloria suscepistis, atque his demum nugas subjiciam meas. Verum de his tu rectius judicabis. Monita Jesuitica libens cum meis scriptis componam; proderit enim labor ille utrique nostrum. Hildebrando tradidi litteras tuas: cum D. WEBERO nondum collocutus sum; interrogavissem alioquin de Butkeniano opere.

re. Chronicon Franckenbergense editum equidem est: at desiderari in eo ajunt, quæ Weberus noster adtulit in disputatione de Societate Leonina. Narravit mihi etiam Eberweinius, pastor hujus loci, natus Francobergi, adfinisque Hildebrandi, esse sibi chronicon Francobergense plenissimum manuscriptum, diversum adhuc ab aliis, quorum heic circumferuntur non pauca. Ex posteriori epistola tua, Amice dilectissime, libens intellexi, meum tibi placendi studium non ingratum fuisse, etsi castigatione quadam dignum me existimes, qui non amici, sed declamatoris partes obierim. Primum scias velim, non pœnitere me nec pudere, si quid nimii vel inveneris ipse, vel alii deprehendant. Tum et rhetorum præcepta eo tempore, quum in dedicatoria epistola concinnanda occupatus fueram, ne inspexi quidem, neque animo volvi, solam secutus indolem meam, et veritatem meram. Nihil dedi auribus tuis, sed ex animi sententia homo ad nullam rem minus, quam ad adulationem factus, publice testatus id fui, quod toties narravi aliis. Egone reprehendus essem, qui lectoribus quoque meis ostendere volui, qualem mihi dederit Francofordia amicum, quantum litterarum orientalium vindicem, quantum eruditorum fautorem? Jam nemo ex meis est
au-

auditoribus omnibus , qui tuum ignoret nomen , quum Codices Ebræos tuos impense , quod merentur , laudaverim omnibus. Gratias habeas maximas , o altera animæ meæ pars , ob favorem et benevolentiam , qua me measque schedas excipere voluisti. Nunc demum placere mihi aliquantulum incipiunt observationes meæ , posteaquam non displicuisse illas tibi intellexi. Nunc me felicem adgnosco , qui tricis conciliare potuerim animum tuum. Quid enim aliud sunt meæ observationes , quam nugæ nugarum , et si quid vilius istis ? Quum in me coercendo proclivis fueris , Amicorum optime , non vitio vertès , si eodem in te jure uti libuerit. Elogia scribis libelli mei , laudibus effers , immo ut insigne opus deprædicas. Quid hoc sibi vult ? Facinus mihi tribuis contra amicitiae leges commissum ; at ego hoc te gladio petam. Quantum recordor , ex mutuis epistolis privatis verborum relegamus pompam , non item ex publicis. Et si vel maxime has simul comprehensas dixeris , malim tamen vel publicæ utilitatis causa leviter peccasse , quam non peccando tuas virtutes siluisse. Faciam tamen in posterum , quod fieri desideras , neque alio , quam amici optimi maximi nomine te compellabo , quum jam satis de mea erga te voluntate nostraque amicitia per-

suavos existimem lectores meos. Hoc precor unicum, ut, quem divina sorte nactus sum amicum, diu mihi servet factorum clementia, humanis saltem rebus non ante eximat, quam ego fatum occupaverim meum. Faxit itaque Deus O. M. ut te uti, frui queam ad extremum vitæ halitum usque: sospitet ille te, tuam conjugem, et quidquid ex ea est liberorum, ut omni felicitatis genere cumulatus sero recipiatur cœlo anima tua, unde orta est! XVII. ante Calendas Aprileis MDCCXXIV.

Veniet sequente hebdomade in civitatem vestram Theologiæ in hac Academia Professoris, RUDIGERI, filius, cognatus meus, et BARCKHAUSII vestratis ephorus. Huic quum per tempus aliquod commorandum inter vos sit, ne inutiliter istud terat, per me decenter rogat, velis ei aditum permittere ad bibliothecam tuam, ut cum mortuis hisce doctoribus colloqui possit, separatus a vivis magistris degens. Nolo multis hoc a te contendere, cujus humanitas peregrinum excludit nullum. Ajo, et dignum esse, cui id beneficii præstes, et memorem futurum perpetuo. Libros et tuos manuscriptos et meos uno fasce constrictos, mittere ad te non-

nondum quivi, destitutus omni opportunitate. Noli itaque, dilectissimum caput, moram hanc mihi adscribere, culpa omni vacanti. Vale iterum, et nostris Musis favere perge. Boethium de consolatione Philosophiæ manuscriptum hoc ipso momento ex bibliotheca Butisbacensi publica obtinui, conferendum cum editis. Sed quia nullum mihi exemplum est ejus, nisi quod in forma librorum minutissima ex officina Plantiniana Raphelengii 1601. nulla propemodum margine prodiit: te rogo, ut, si duplex forsan tibi ejus est copia, mecum eam communem facere non dubites: sin unico duntaxat instructus es exemplo, nec hoc velim deneges: remittam enim illud ipsum variis lectionibus manuscriptis auctum, atque de proprio interea comparando cum plena margine, ero sollicitus.



LXXVII.

JO HENRICO MAJO FIL.

Nolui prius ad te scribere , quam libros a te desideratos transmiserim , quos nunc demum te accepisse spero. Jamdudum habuisses illos , nisi et aurigam , qui deferret , et negotii cujusdam exitum expectassem. Obtulerat nimirum amicus opus quoddam , quod tibi destinaveram , cum reliquis mittendum. Thesaurus erat Græcæ linguæ Henr. STEPHANI , quem non ingratum tibi credebam. Ast cum adportaretur liber , ægro animo ultimum Tomum deesse vidi ; appendicem nimirum, Glossaria vet. Grammaticaque opuscula complectentem. Nolui igitur mancum tibi , Amice optume , offerre , sed possessori sic satis moroso ac tenaci relinquendum duxi. Interim reliqua congeffi , quantum quidem critici , hoc est Tui , quo delectaris , et delectas , argumenti comparare potui. Levidensia sunt opuscula , ac maximam partem sine indumentis , quod moram facere nolebam , solitumque tuorum ornatum ignorabam , parum decore oculis tuis se sustentia. Ast dicam tibi , Amice dilectissime , quod res est , ingenue. Omnes librorum meorum abundantium loculos , nec non Bibliopolarum tabernas excussi,

cussi, sed parum aut nil invenire licuit, tuo palato dignum. Meorum enim tantus, uti nosti, numerus non est, hæc vero, Bibliopolarum scilicet officinæ, bonis libris vacuæ, falsamentariis, ac fornicariis potius schedas, quibus mercimonia sua obvolvunt, quam eruditis probas merces ministrant. Volui igitur omnia corrâdere, ut aliqua saltem cum cæteris libris, quos petieras, transmittere possem donaria. Succedent tamen his plura; imo do tibi fidem, omnes libros, qui in manus meas incident, Tuisque studiis inservire poterunt, me tibi comparaturum: interim frui præsentibus. Reliquorum etiam, quos perlustrandos poposceras, usum, quamdiu volueris, concedo liberrium. Boethium, cum per oblivionem cæteris non addiderim, peculiari fasciculo inclusum ad te perferendum dedi. Doleo autem, quod meliorem editionem ministrare nequiverim. Emeram equidem omnia Boethii opera in fol. ut vocant, Basileæ edita, sed cum plagula deficeret, Bibliopolam redhibere jussi. Nollem enim librum aliquem vel tantillo vitio laborantem Bibliothecæ meæ, etsi exiguo vel nullo pretio habere possim, conscius inferre. Exiguam vero istam editionem insigniter ornabis, Amice humanissime, si tua manu varias ex manuscripto lectiones marginibus adpingas. Nova erit amicitiae tuæ
tes-

teffera , meumque collatorum apparatus augebit. Quo vero splendidior accedat , Tuum fodes nomen adscribas , ut omnes videant , quanti viri industria præstitum id sit. Pateat enim velim , quanta tua in me sit benevolentia , quantisve ornamentis me librosque meos decorare studeas. Novissime studium hoc tuum bene merendi comprobasti , dum ultro obstrictes Codici meo Byzantino manus porrigis. Quo de negotio pluribus coram agemus. Erat alias mecum constitutum , ut , postquam Celeberrimus FABRICIUS quinto Bibliothecæ suæ Græcæ , quam orbis litterarius avide mecum exspectat , libro , pleniorum hujus Codicis notitiam , quod utique facturus est , dedisset , BANDURIO , qui reliqua hujus Imperatoris Excellentissimi opuscula operi suo inseruit , illum concredere , quo egregio Byzantinæ historiæ corpori annecteret , lucem atque splendorem tam sacræ , quam profanæ allaturum haud spernendum. Plurima enim atque eximia continet volumen , quæ in Codino atque aliis , qui idem argumentum tractarunt , frustra requiras. Thesaurum sane præbebit , si tua inprimis docta opera in lucem proferetur , tuaque eruditione illustrabitur. Unicum vero erit , quod desiderabimus ac deplorabimus. Videlicet in Germania nostra editionem ejus eo , quo par erit , et qui Parisinam æmu-

æmuletur, splendore procurare haud poterimus, nisi Lipsiensium industria accedat, ac præstet. Sed de his, uti dixi, coram. Quæ de alio manuscripto Franckenbergen-
si, quod amplissimus Dn. Eberweinius possidet, narras, jucunda fuere; rem vero faceres gratissimam, si illud ad breve temporis spatium expetieris mihi, siquidem typis vulgatum non est. Renuet minime Vir optimus, quem meo nomine salutabis, et Fratris et affinis causa. Fini-
rem epistolam, aut vacuum amicis, uti Philosophis, non conceditur, ac sine joci etiam dimittendus non es mihi, cum recte his quoque in familiaribus locum statuas. Accepi nuper Argentorato insignem librorum cumulum, quos inter Aeneæ SYLVII, qui post adeptum Pontificatum PIUS II. appellatus est, Opera, mihi sane acceptissima, Basileæ ex officina Henr. Petrina MDLXXI. in fol. edita. In his extant quoque Epistolæ, quarum XV. demonstrat, PIUM II. non adeo pium fuisse. Excusat se illa Sylvio, Genitori suo, et quidem satis leviter atque irreverenter, quod ex peccato genuerit filium. Labet eam ob sales, et quod, cum obvia non sint opera, forsitan nondum lecta tibi sit, describere, cum etiam nuper de filiorum procreatione joco egerimus. Extat autem illa pag. mihi 511. „Læteris, an doleas,
„quod

„quod mihi sobolem Dominus dederit, in-
„certum te scribis, Pater. At ego læti-
„tiæ causam video, doloris non video.
„Quid enim dulcius in humanis est, quam
„gignere sibi similem, tanquam extendere
„sanguinem, et habere, quem post te
„relinquas? Quid in terris beatius, quam
„natos videre natorum? Mihi equidem
„ingens voluptas est, quod semen meum
„foeticaverit, quodque, antequam mo-
„riar, aliquid de me supersit, gratiasque
„Domino refero, qui partum foeminæ fi-
„guravit in marem, ut apud te patrem
„meamque matrem aliquis parvus ludat
„Æneas, et solatia præstet avis, quæ de-
„bebat pater impendere. Quod si tibi,
„genitor, gaudio fuit meus ortus, cur
„filius meus mihi non sit lætitiæ? Anne
„te quoque lætificabit infantuli vultus,
„cum meam videbis in illo effigiem? Nun-
„quid tibi jocundum erit, cum parvulus
„pendebit ex collo Æneas? puerilesque
„blanditias agitabit? Sed ais fortasse do-
„lere meum crimen, quod ex peccato
„genuerim filium. Nescio, quam de me
„finxeris opinionem. Certe nec lapideum,
„nec ferreum genuisti filium, cum esses
„tu carneus. Scis, qualis tu gallus fuëris.
„At nec ego castratus sum, neque ex fri-
„gidorum numero. Nec sum hypocrita,
„ut videri bonus, quam esse velim. Fa-
„teor

„teor ingenue meum erratum , quia nec
„sanctior sum David rege , nec Salomone
„sapientior. Antiquum et vetus est hoc
„delictum , nec scio , quis hoc careat. La-
„te patet hæc pestis , (si pestis est natu-
„ralibus uti) quanquam non video , cur
„tantopere damnari coitus debeat , cum
„natura , quæ nihil perperam operatur ,
„omnibus ingenuerit animantibus hunc
„appetitum , ut genus continuaretur hu-
„manum. Sed dicis , ut arbitror , certos
„esse limites , intra quos hoc liceat , nec
„extra legitimas matrimonii faces progre-
„di debet hic appetitus. Ita est sane , et
„sæpe inter ipsa nuptiarum claustra scelus
„admittitur. Et bibendi quoque , come-
„dendi et loquendi certi sunt termini , sed
„quis servat illos ? Quis tam justus , ut
„septies in die non cadat ? Loquatur hy-
„pocrita , seque nullius culpæ scium dicat ,
„ego nullum meritum in me scio , solaque
„mihi divina pietas spem facit misericor-
„diæ , quæ nos labiles scit , et ad lasci-
„viam proclives. Nec nobis , qui patet
„omnibus , fontem veniæ claudet. Sed de
„hoc satis. Nunc quia conjecturas petis ,
„ne alienum pro meo nutrias , quomodo
„res se habuerit , paucis exponam. Non-
„dum anni duo effluxerunt ex eo tempo-
„re , quo Argentinæ gerebam Oratoris
„munus. Quinquagesima tunc currebat ,
„quæ ante proximam præteritam fluxit.

Ibi

„Ibi cum otiosus diebus essem pluribus ,
„mulier ex Britannia veniens , diversori-
„um meum petens , in unis ædibus me-
„cum fuit , non invenusta , nec ætate
„confecta. Hæc, quia sermonem Italicum
„egregie norat , me verbis salutabat He-
„truscis , quod illa in regione tanto magis
„placuit , quanto rarius erat , oblectatus
„sum facetiis fœminæ , cujus in ore maxi-
„mus lepor erat. Moxque in mentem ve-
„nit Cleopatræ facundia , quæ non solum
„Antonium , sed Julium quoque Cæsarem
„eloquentia inescavit. Mecumque , quis
„reprehendet , inquam , si ego homuncio
„faciam , quod maximi viri non sunt asper-
„nati? Interdum Moysem , interdum Ari-
„stotelem , nonnunquam Christianos in ex-
„emplum sumebam. Quid plura ? vicit
„cupido , incalui , mulierem arsi , multis-
„que blandimentis adorsus sum. Sed ut
„asperis cautibus unda repellitur freti , sic
„verba mea hæc contempsit , triduoque
„suspendit. Erat illi filiola annorum quin-
„que , quam Milinthus pater hospiti no-
„stro commendaverat , verebaturque mu-
„lier , ne quid hospes persentiret , filiam-
„que posthac quasi moris materni abdicar-
„et. Instabat nox , sequentique die mu-
„lier recessura erat , timeo , ne abeat præ-
„da. Rogo in noctem , ne ostio came-
„ræ pessulum obdat , dico , me intempesta
„nocte venturum , negat , nec spem ullam
facit.

„facit. Insto, semper idem responsum est:
 „itur dormitum. Mecum ego quid? sciam
 „an illa, ut jussi, fecerit. Recordor Zi-
 „mæ Florentini: forsitan illius amicam hæc
 „imitabitur. Tentandum est, inquam.
 „Postquam silentium undique sentio, thala-
 „mum mulieris accedo. Clausum ostium
 „est, sed non obfirmatum: aperio, ingre-
 „dior, muliere potior, hinc natus est fili-
 „us. Mulier Elisabeth vocatur. Ex idi-
 „bus Februarii usque ad alias idus Novem-
 „bris, menses currunt, qui partui dantur.
 „Hæc mihi dixerat mulier, dum Basileæ
 „postea erat. Ego quamvis ipsam non pe-
 „cunia ulla, sed maximis emissem preci-
 „bus (ut est ars foeminarum) credebam
 „hæc auri corradendi causa dici, nec ver-
 „bis præbui fidem. Nunc quia eam hoc
 „asserere, quando nihil sperare a me po-
 „test, quando nomen convenit, tempus-
 „que, puerum meum puto: teque, mi
 „pater, rogo, ut nepotem suscipias, alas-
 „que, donec grandiusculus factus ad me
 „valeat proficisci, meisque imbui discipli-
 „nis: nec puta foeminam divitem mentiri
 „velle in filio,,. d. 24. Mart. 1714.



JO. HENRICUS MAJUS FIL.

Heri litteras tuas cum Boethio, hodie et quos lustrandos mihi concedis libros, (inter quos tamen nec epigrammata invenio Græca, nec epistolæ ad Ebræos compendium) et quos dono dedisti, accepi. Erubui, amicorum princeps, simulac te missurum denuo libros, legi; nunc postquam intuitus illos sum, plane, quid sentiam, quid dicam, ignoro. Video, me longe majora consecutum, quam speraveram: video benignitatem tuam superasse omnem modum, atque nimis te erga me esse profusum. Causam vero muneris, et numero et mole præstantissimi, ne conjectando quidem adsequi valeo, uti nec verbis exprimere et gaudium, quod nondum visorum librorum aspectus me exhilaravit, et beneficii tui magnitudinem, et animi mei, recenti promerito tibi nunc obstricti, devotionem. Nulla spes mihi relicta est emergendi ex debito, inprimis quum tua indies beneficia crescant, quorum oneri necesse est succumbam. Gratias tibi et ago et habeo, quas mente concipere possum, maximas: referre queo nullas. Si quid vero in me esse cognoveris, quod usui tibi, dilectissime amice, esse pos-

possit, solenni illud formula tibi offero: ego certe paupertatem meam intelligo, et profiteor ingenue. Manuscriptos Codices interea te accepisse tuos arbitror, sub initium proximæ hebdomados ad te missos, una cum libris e paupere regno meo in tuum oceanum inferendis. GOLII Lexicon absolvi describendo, memor tui semper futurus, quoties aliquid ex notis manuscriptis mihi adducendum. Remittam itaque illud occasione opportuna. STEPHANI thesaurum te non integrum potuisse adipisci gaudeo, non ideo, quod spes tua decollaverit, sed quod mei in gratiam acquirere nequiveris: jam enim possideo illum, juxta cum indice et Glossario. Noli quæso, si me amas, tot tibi negotia creare mei causa, Vir amicissime. Satis enim nosti, gnaviter me incivilem esse, et in petendo rusticum, cujus rei specimina expertus es non vulgaria, daturus posthac ero pluria. Chronicon Francobergense Eberweinius e vestigio tradidit, crastina die cum Zangio vestrate ad te perferendum. Ad historiæ Byzantinæ manuscriptæ volumen quod attinet, ut a FABRICIO recenseatur, tum a BANDURO imprimatur, consentio, et quidem libens: ita enim nominis tui famam non modo extra Germaniam produci impense lætabor, sed et eruditi gaudebunt, si tam cito illos beaveris dono tam illustri. Nam

si ego hanc laboris partem in me suscipere vellem, nec ante annum de adgrediendo cogitare deberem, quid dicam de absolvendo? BANDURIUS vero in ipsa nunc versatur historia Constantinopolitana; nota ei sunt abstrusa omnia, quæ mihi, utpote tironi, discenda adhuc essent. Neque dubium, quin prompto animo executurus sit, quod per te illi imponitur. Audio, Germanum tuum iter meditari in Gallias; hoc si ita est, facili negotio et ingenium BANDURI, et adfectum erga nos Germanos ediscere poterit; quem si non alienum a nobis cognoverit, per me licet, assignetur ei hæc provincia, ea tamen conditione, ut ejus cum summis laudibus mentionem injiciat, qui codicem, plane nullo pretio æstimandum, e tenebris non eruit modo, sed et communi usui consecravit. Quod si vero BANDURIUS, quacunque demum ex causa, aut alius, quem me nosti aptiorem, detrectaverit hunc laborem, en humeros offero meos, temporis diuturnitate et sedulitate, quod spes est, ea adhuc consecuturus, quæ meam nunc effugiunt notitiam. Vides, vir amicissime, utilitatem multorum longe me præferre honori proprio, ex tanti operis editione in me sine dubio redundaturo. Tui modo memoria orbem impleat, habeatque etiam Gallia, de quo Germano agat gratias. Nimum mihi accedet honoris,

ris , si te ubivis coli intellexero : jam enim vindicare mihi incipio , quæ tua sunt , ex jure amicorum . Ad extremum significare debeo , quanta non me solum , sed et amicos alios , lætitia perfuderit Æneæ SYLVII lepidissima epistola , quæ nisi ad patrem data fide inscriptionis constaret , merito ad familiarem quendam scripta videri possit ; adeo sine pudore et libere , et quasi re bene gesta , historiam enarrat omnem , ne levissima quidem circumstantia neglecta . Ego tibi loco gaudii , quod , communicando mecum festivas istas litteras , excitasti , verum adprecior gaudium , juvenem scilicet Æneam , vel quocunque adpellare volueris nomine , qui ex tuo pendeat collo , ludatque nucibus , donec ad maturam delatus ætatem , connubio Musarum jungatur . Fiat ! VII. ante Kal. Aprileis MDCCXIV.



JO HENRICO MAJO FIL.

Surrexit Dominus. Solenni hac veterum Christianorum formula te hoc tempore, quod nobis iterum divina gratia illuxit, compello, precorque, ut festos hosce dies lætus transigas! Quibus præmissis nuncio, quod initio elapsæ hujus septimanæ Codices a te remissos, una cum donariis tuis, ea, qua par erat, gratia, acceperim, tuam et in me liberalitatem, et in codicibus illustrandis ac recensendis studium veneratus. Te quoque libros, quos perferendos dederam, consequutum, tibi que, Amice charissime, non displicuisse, ex litteris VII. ante Kalendas Aprileis datis, non sine gaudio intellexi. Miratus autem sum, quanto verborum apparatu, cum tanti non sint, gratias agas, causamque munusculorum inquiras. Non una certe fuit, sed plurimæ, eæque gravissimæ, quæ me impulerant, deque majoribus impofterum cogitare adigunt. Eas tamen enarrare supervacaneum duco. Ipse enim probe nosti, quæ tibi debeam, ego vero contra præscriptas nobis invicem, totiesque repetitas, ab omnibus verborum phaleris abstinenti leges peccare metuerem, si vel nudam meritorum tuorum in me rationem
inire

inire vellem. Citra omnem igitur tergiversationem, ni amicitiae jura violare velis, accipies, quaecunque tibi obtuli, atque in posterum offerre potero, nilque plane aliud, quam mei in te animi propensionem dispicies, a qua sane multo majora, modo occasio daretur, expectare merito poteris. Quod quum reapse potius, quam verbis te intelligere, Amicorum optime, malim, ad alia pergo. Spero autem, te ea, quae desideraveras, manuscripta jamjam reperisse. Inserui illa Codici majori Ebraico, ne, cum integumentis carent, damnum capere, id est, ne a reliquis atteri, dilacerari, vel etiam, quod aurigae incuria saepe accidit, madefieri possent. Integrum tibi erit illis uti, frui, quam diu volueris. De Byzantino autem Codice mentem meam plenius coram explicabo. Nolim vero suspiceris, Amice dilectissime, me BANDURIO illum potius concedere malle, quam tibi. Summam sane injuriam mihi faceres, si, quae nuper scripsi, in tam malam partem serio sumere velles. Nemo sane, nemo, inquam, est in toto, quacunque patet, terrarum orbe, quem tibi anteponam, cum nemo sit, a quo plura atque majora sperare queam, nemoque, a quo tanta ingenuitate, tantoque cum foenore, quae concedo, recipere una cum publico in aureis tuis scriptis possim. De quibus omnibus, si vel tantillum du-

bites , ignoras me plane , meamque in te , quod absit , benivolentiam , ac fidem , si unquam in mortalibus fuit , intemeratam affligis , dubiamque facis. Ast meliora de te spero , Amice cordatissime. Omnia igitur mea , tuto credas velim , tibi sacra , unaque mecum devota. Nullum gaudium est , quod ex iis , quæ benigna mihi fortuna tribuit , capio , nisi tu , Amicorum dulcissime , mecum percipias , quod demum lætitiæ cumulum affert. Accipe igitur novam gaudii voluptatisque causam , mecumque exulta. Inciderunt nuperime in manus meas , o me ter , imo decies beatum ! decem prægrandia volumina docta Polyhistoris illius , Joh. Petri LOTICHII manu ad unum omnia exarata , tibi æque ac mihi , cum critici maximam partem sint argumenti , jucundissima futura (d). d. 31. Mart. 1714.



LXXX.

(d) Sequuntur nunc ea , quæ in prima hujus Sylloges particula p. 26. sq. leguntur.

JO. HENRICUS MAJUS FIL.

Invenisse me , et quidem sine magno labore, epigrammata Græca , et compendium, quod arbitrabamur , epistolæ ad Ebræos , indicandum tibi duco, Amice optime maxime , ne aut decipere te voluisse videar , aut eruditorum more servare , quæ arrident. In caussa est prava mea libros veteres evolvendi consuetudo , dum neque frontem eorum intueor , aut limina adoro , neque calcem lego : sed ipsum medium ante omnia considero , profectuum meorum experimenta sumpturus ; quum longè facilius sit vel ex capite vel cauda libri , quam corpore ipso, quæ continentur illic , addiscere. Dum itaque Ebræum codicem , cui Judæus inseruit schedulam , primum lustro , eundemque ordine perlegere instituo , inciderunt in manus meas, quæ tanto desiderabam opere. Protinus summa cum aviditate bina folia membranea oculorum arbitrio subicio , stanteque pede lego , relego. Nul- lum invenio epistolæ ad Ebræos brevium, sed ipsissimam epistolam , initio tantum et fine gaudentem, deficientibus foliis intermediis. Primum etenim folium cum exordio ipsius epistolæ incipit , finiturque in

Cap. IV. 3. verbis : ἐν τῇ ὀργῇ μου, ἐν ἰσχυρίσιν μου εἰς τὴν. Alterius folii prima vox est (λίθο) βοληθήσεται. καὶ ἔτι φοβερόν ἦν &c. Atqui hæc exstant Cap. XII. 20. 21. quibus succedunt ordine omnia, usque ad finem epistolæ ; subscriptione, quæ finem occupat in editis , heic in MS. tua posita in fronte. Doleo proinde insigniter, te, Amice dilectissime, deceptum fuisse, magnamque pecuniæ vim foliis jam evulgatis impendisse. Ne vero frustra locavisse argentum tuum putes, quod facere unicum potui, feci, annotando diversas lectiones : atque lætor, unam me reperisse et alteram, quam Millius in multis non invenerat codicibus. Epigrammata Græca pleraque omnia argumenti sunt amatorii ; eaque ad Anthologiæ editæ Librum septimum supplendum facere possunt : deprehendi unum ex illis exstare jam in collectionis libro citato, quod ideo margini epigrammatum tuorum MS. tua tamen cum pace, adlevi ; facturus id cum aliis quoque, si ea offendero : nam illud felix suppeditaverat memoria. Quantum conjicere valeo, plura sunt, et volumen omnino conficiunt non mediocre, quæ in Vossiana erant epigrammata MS. Sane, quæ Kusterus ad Suidam attulit, superant omnino numerum tuorum, et tamen diversa ab illis sunt : plane ut nova nobis expectanda adhuc sit Anthologia. Pauca
vero

vero illa, quæ tibi obtigerunt, descripta cenſeo ex innumeris, a quodam, qui Cupidinis vexabatur igniculis. Erit nihilominus locus, quo et varias lectiones, et epigrammatum unum alterumve, in tuam memoriam, adducere potero. Chronicon Francobergense nunc demum per Zangium nostrum ad te delatum arbitror. Inter libros, quos nuper mihi dedisti dono, sunt quos jam habeo, Mericus puta Casaubonus, Seldenus, et Meursius; hic quidem in thesauro Gronoviano; illi autem seorsim excusi. Curabo igitur, ut ad te, veterem possessorem, remittantur, quæ a te venerunt. Adjecissem his Salmasii quoque epistolas (nam et illæ dudum mihi fuere) nisi eo ipso tempore, quo gravia tua ad me pervenerunt dona, præsto fuisset Zangius, qui, quum novisset, jam me illis esse instructum, non cessavit prius, quam invitus nonnihil ei committerem opus, cui inhiabat, ea tamen conditione, ut Rutilium et Boethium, et quicquid ei geminum est, vice hujus reddat. Quam permutationem, cum libro tuo institutam, non ægre feres, vir optime, ubi cogitaveris, tantum me illo lucratum fuisse. Vivit inter nos Suecus (e), ex oriente huc de-

(e) Michael ENEMANNUS, cujus laudatio

delatus , vir egregius , multarum linguarum peritus, et moribus suavissimis : is in Italiam , jussu regio , vel Belgium et Angliam meditatur iter, quod, ubi suscepturus est, per vestram necesse est transeat civitatem ; atque hac occasione adparatum tuum inspiciet orientalem , ipse multis orientis spoliis , et Turcicis maxime atque Arabicis , onustus. Retulit ille , magno pretio in Turcia vendi Alcoranum , 40. scil. vel 50. imperialibus ; quod jure mire-
ris. Scio equidem, Jos. SCALIGERI temporibus , 70. vel 80. immo et centum imperialibus æstimatum fuisse unicum exemplum Coranicum : at nostra ætate durare eam adhuc caritatem vix credidissem. Quare meas nunc video divitias , antea ignotas , cui paterna ex hereditate duo obtinent Alcorani. Ecquid vero de Acolutho dicemus ? triginta omnino possedit ille : incertum , quo post obitum ejus deven-
rint : Jam occupatus sum in describendis Græcis epigrammatis , quorum aliquod in Latinum conversum , ut materiam haberes ridendi , adponerem , nisi jam tibi cognita crederem illa. De meo nil ha-
beo ,

tio funebris , ab Erico BENZELIO fil. scripta, et Upsaliæ publice perorata, extat in Cl. Chr. NETTELBLADT Memoria rediviva Virorum in Suecia eruditissimorum, Semi-Dec. IV. p. 209. sqq.

beo, quod lepores spiret et salem: adde
quod neque Saturnalia nunc sint, neque
jocandi tempus. III. ante Kal. Apr.
MDCCXIV.

LXXXI.

JO. HENRICUS MAJUS FIL.

Placent, quæ de Codice Byzantino statuis, quem vel ideo summa tractabo cum diligentia, ut posteri cognoscant, me in tuis illustrandis codicibus non fuisse segnem; animum certe defuisse nunquam. Quanti vero subeundi mihi labores! quam plane imperitus ad hanc accedo provinciam. Destituor corpore scriptorum Byzantinorum, supplemento Banduriano, glossariis du Fresniano et Meursiano, tot adhuc subsidiis aliis, sine quibus aliquid in ejusmodi opere conari prorsus est impossibile. Lotichianas opes divina tibi sorte contigisse, gavisus ex animo sum, et tui, Vir amicissime, et mei causa. Erit enim tempus, quo mihi prodesse poterunt doctissimi viri monumenta. Magis adhuc intra finem gaudeo de Græcis, quos speras, codicibus. Quamvis enim et Latinos et Ebræos, et alios quoscunque auctores legam,

gam, non sine aliquo jucunditatis sensu: tamen, si Grajum video hominem, plane me transfigurari sentio. Quare epigrammata illa tua, amicorum optimè, quæ amatoria, ut nuper dixi, sunt fere omnia, tanta cum aviditate legi, vix ut verbis declarare queam; non ideo, quod Veneris arcana exponant, sed quod summa in iis sit Græcæ linguæ venustas. Basilii Magni libellum, vel homiliam, vel orationem, ut alii malunt, de legendis Græcorum libris, aut, ut iterum alii, quomodo cum fructu juvenes legere possint Græcorum libros, constitui propediem edere, cum H. GROTHII et ARETINI versione rarissima, meisque notis. Vellem et aliorum inferere observationes, atque eruditissimam D. Patris orationem, cum variorum notis evulgare, siquidem mihi aliæ essent, præterquam Jo. POTTERI, qui hunc ipsum libellum una cum Plutarchi libro de audiendis Poetis Oxoniæ 1694. 8. in lucem emisit. Prodiit et hæc oratio Basiliana Parisiis 1623. 8. ac Helmstadii 1637. per SCHEURLIUM Professore: neutra mihi editio visa, uti nec operum editio Parisina, de anno 1618. in qua num forte notis instructa sit illa homilia, scire desidero. Si quid igitur nosti, Vir optime, aut ipse habes hujus Patris, ut mihi significes, rogo, faciam, quod decet, tui mentionem favoris. Constitueram his
ad

ad vos venire nundinis : sed tribus adhuc indies detineor collegiis privatissimis, quæ propositum meum mutare jusserunt. Suecus ille, de quo in proxima mea epistola, tuam nunc puto lustravit bibliothecam. Est ille Professor linguarum orientalium in academia Upsaliensi. Non temere vidi Suecum, qui eruditione hunc æquet. Qui litteras in domum tuam, te absente, detulit, est omnino cognatus meus, quem sæpius eandem ad te viam instituere, videndorum librorum tuorum causa, facile, qua es illustri humanitate, concedes homini litterarum studiis flagranti. Invideo propemodum ei hanc tecum conversandi felicitatem, qua ipse frui nequeo. Deum me existimarem, si uno tecum, eodemque in loco commorari possem, utpote quod et jucundum mihi et utile foret. Dum vero sejunctos nos vivere voluit fortuna, pareamus necesse est, eandemque clementem adhuc existimemus, quæ immensas locorum intercapedines inter utrumque non posuit. Quamvis vero remotus a te sim corpore, animo tamen te habeo præsentem, quin et tuis in ædibus verfor, somniis mecum ludentibus. Videre enim mihi videor Erasmi statuam (f),
li.

(f) in Bibliotheca Vffenbachiana conspicuam.

libros et editos et ineditos, in quibus et noto multa, et lego, sed nonnisi cum indignatione; dum vanitatem horum laborum ostendit aurora. Vale nunc, mea sola et sera voluptas, et me ama. Octavo Iduum April. MDCCXIV.

LXXXII.

JO. HENRICO MAJO FIL.

Una fidelia, ut vetus habet, duos dealbabo parietes, h. e. ad binas tuas una vice respondebo. Ut autem ordine procedam, priores tertio ante Kalendas Aprilis datas, præ oculis primum habebo, quarum statim in initio tuam libros evolvendi consuetudinem lego atque approbo. Tu vero, Amice charissime, non improbabis etiam, quod illam non secutus, Titulo veteri membranarum Græcarum deceptus fuerim. Eo facilius inductus sum, quod ab eadem manu, quæ reliqua exaravit, inscriptus videatur, et disertis verbis compendium dicatur. Ad collationem autem non vacaverat hæcenus tempus, nec sane, si omnia, quæ indies comparo, excutere vellem penitus, edendum, nec dormiendum nec respirandum foret. Gau-
deo

deo igitur, si amici auxiliatrices manus porrigant, ac unum atque alterum codicem perlustrent. Quod tu, amice princeps, egregie præstas. Rogo autem te, ut in margine vel in fine varias, quas notasti, lectiones mihi adnotes, dataque occasione publico impertias. Faciet hoc, ut magnam adeo pecuniæ vim non credam inutiliter profusam, nec impensæ pœniteat, eo minus, quod ob venerandam antiquitatem, si quidem Montfauconio, optimo alias harum rerum judici, credendum, merito suspiciam. Antiquissimis enim manuscriptis annumerari posse suadet character, atque scribendi ratio, quod, si alphabeta, a dicto Montfauconio vulgata, contuleris, mecum fateberis. Emi, absens feci, membranas istas ex celeberrima olim Bibliotheca Marckiana, ubi Chrysostomi scripta continere dicuntur ineptissime. Nec rari sunt ejusmodi errores, imo fraudes in Catalogis librorum publicis sub hasta vendendorum, quos si metuere atque evitare velis, nullus omnino liber emendus esset. Quod nuper veritus fui de Nili Epistolis ab Allatii manu emendatis, accidit omnino, quod scilicet non eruditæ tanti viri sint animadversiones, sed stulti cujusdam manu lemmatibus deturpatæ margines libri præstantissimi. Multis certe hoc solenne est, hoc modo abuti libris, cum tamen nec

Pars II. Bb uti

uti libris , nec docti sibi videantur , nisi conspurcatis illis. Sed eo patientius illud fero , cum reliqui libri , quos una accepi , eo præstantiores , justique satis pretii sint. De Epigrammatibus , utcunque libuerit , facies. Libros vero , quos nuper transmissi , tu vero , amice charissime , jam jam possedisti , ideo ad me redire , meosque iterum facere cupis , sententiam muta quæso , ne donaria , quæ exigua sic satis fuere , prorsus inanias. Illos etiam ex indice expunxi meo , tu vero , amice dulcissime , quod cum Salmasii epistolis fecisti , ages. Dn. Enneman , de quo nunciasti , me compellavit , meamque librariam supellectilem perlustravit. Probavit se mihi talem , uti scripsisti. Miratus autem sum hominis non solum eruditionem , atque experientiam , sed et humanitatem , quæ tanta est , ut ejus similem ex hac natione vix unquam invenerim. Suecica enim gens climatis , an naturæ vitio nescio , elatior morosiorque esse solet. Ea vero , quæ secum ex oriente tulit , spolia visu admodum jucunda mihi fuere ; optassem autem , ut reliqua , quæ in Patriam transvehi curavit , quorumque indicem monstravit , cernere quoque licuisset. Alcoranorum caritas , cujus me quoque certiores reddidit , singularis plane est. Hæc vero inde puto provenit , quod pauci sint , qui illis describendis operam navare velint , cum
illius

illius confarcinator Mahomet æterna eis supplicia , qui in exarandis ejus codicibus aliquot mendas commiserint , mine-
tur , nec in Christianorum manus incidere facile patiatur gens superstitiosissima. Iæ-
tor igitur , et mihi exemplum ejus olim obtigisse , cum in infimis adhuc scholarum subselliis hærerem , a commilitone quodam meo dono datum. Nunc ad postremas tuas accedo , ubi votum tuum de felici-
tate , quam sub ipsum futuri mensis au-
spicium obvenire precaris , initium facit. Miror sane rumores istos , qui hic spar-
guntur , jam ad vos pervenisse , tuum-
que in me affectum , benivolumque ani-
mum exosculor. Ast quod in aurem tibi ,
amice charissime , dico , nescio , an felici-
tatem reputare debeam , quæ libertatem vendere coget. Mihi sane , Musis atque
amicis vivere unice percuperem. Enim-
vero cum Patriæ quoque , Tullio asser-
tore , nati simus , cedendumque sit co-
gnatorum precibus , divinæque , quam
primo omnino loco ponere debuisssem ,
providentiæ , refragari vix potero. Sed
incerta dubiaque hæc sunt , atque a di-
vini Numinis dependent nutu. Cum Grajis
te delectari deliciis affirmas , non sine vo-
luptate intelliges , quod nuper admodum
recentius , eximium tamen volumen na-
ctus sim , quod complectitur Gregorii Nyf-
seni majorem , ut vocat , catecheticum ,

et quædam Synesii, qui omnes Attica venustate superat Patres. Fuit hic codex olim viri celeberrimi, Joachimi CAMERARII, quem ex Bibliotheca abnepotis ejus, quæ Erlangæ sub hasta divendita fuit, redemi, una cum aliis libris præstantissimis. Inter hos quoque erat Herodotus, Græce ab ALDO typis exscriptus, doctaque CAMERARII manu plurimum illustratus. En quæ in fronte voluminis notata sunt: *Librum istum Joachimus CAMERARIUS tam carum habuit, ut, cum aliquando Lipsiæ collegiorum expugnatio ab opificibus metueretur, hunc cum cæteris, quos habebat partim, partim descripserat, Græcis authoribus, in sinu gestaret, expectans eventum. Hoc quippe Exemplum primum e melioribus, et illi in thesauri vicem erat, et ex illo Græca potissimum didicerat. vid. vitam impressam, et manuscriptam anno 1516. Item anno 1572. Cum Lipsiæ in mola vicina incendium exortum esset, impenderetque a scintillis in ades vi ventorum impulsis periculum, nihil exportari jussit, solum uni ex filiis tradidit servandos Testamentum Nov. Græcum, Platonem græcum et Herodotum hunc ipsum. Quod Basilii M. libellum edere constituas, impense gaudeo, lubentissimeque, quæ mea suppeditat penuria, concedam. Sunt vero mihi Divi hujus Patris opera cum ERASMI præfatione Græce solum edita Basileæ 1532. ex officina Frobeniana. Fol. Ejus vero, cui tu, Amice dilectissime, in-*
fudas

fudas, libelli editionem, si Potterianam excipias, quæ separatim prodierit, possideo nullam. Opera igitur, si jusseris, transmittam. Doleo autem, quod dulcissima te hisce nundinis amplectendi spes evanuerit. Non denegabis tamen gaudium istud, quam primum poteris. d. 14. Apr. 1714.

LXXXIII.

JO. HENRICUS MAJUS FIL.

Ut a communibus initium faciam, ver aperire se cœpit, sed quod in hiemem revolvitur. Ea enim est frigoris vehementia, tanta nivis copia, ut non Pascha celebrasse, sed natalem Salvatoris nostri diem instare existimare possis. Rideo homines, qui tempestatem accusant, et in publicum prodire detrectant, ne inclementia cœli lædantur. Adeo nec Jupiter pluvius nec serenus æque arridet omnibus. Videas nunc multos pænula indutos, nec tempori fidere, cujus tamen potestati subiecti sumus, quotquot vivimus. Vis tibi dicam, quid ipse et sentiam et agam? Non me terret frigus, neque omni moveor varietate; unus sum, idemque. Cum

libellis mihi plurimus sermo est. Si quando interveniunt epistolæ tuæ, tecum esse mihi videor : et sic adficio animo, tanquam tibi non rescribam, sed respondeam. Itaque et de his, quæ scire desideras, quasi colloquar tecum. Ante hos duos dies redire ad te jussi GOLIUM, folia Græca, epigrammata, Meor Enoiim, Memorias Trevoltinas, Tubam denique feralem sonum adversus Societatem Jesu clangentem ; reliquos libros mecum adhuc servo. Illos vero commisi typographi quondam hujus Academiæ relictæ viduæ, quam rite illos curaturam non dubito. Paucis verbis, more solito, gratias, quantæ maximæ agi possunt, ago, et majores etiam, quam quantas agere possum, debere, ultro profiteor. Habeo quædam de omnibus monenda. GOLIUM meum ex tuo, amicorum optime, locupletavi, quod plagium ut æquo feras animo, impense rogo, memor et Golii et tui futurus, ubi occasio tulerit. Verum est, membranas illas Græcas Compendium promittere ; sed non præstant. Noli fidem mihi adhibeas : quin ipsas illas nunc inspicias, si libuerit, atque sic, verene an falso judicaverim, decernes. Veneratus sum decrepitæ antiquitatis scripturam, planeque vetustissimam esse, etsi MONTFAUCONIUM nec inspexerim, nisi fugiente oculo in tua bibliotheca, nec seculum designare

gnare queam, quod, si absque molestia tua fieri possit, ut ex viro doctissimo mihi indices, peto. Ego octingentorum annorum ætatem habere minimum puto. Varias lectiones adjecta exhibet schedula. Nili epistolas non Allatii, sed asini cujusdam manum præ se ferre, tecum doleo. Pars est impurissima librorum, ubi indocti calamus quædam adscripserit. De epigrammatibus non muto sententiam, quorum unum, ut monui, alterumve suo loco exhibebo. Omnia autem publici juris facere ego quidem nolo, quamvis illa descripserim omnia. Sunt enim non pauca in illis, quæ rectius ignorantur. Liceat mihi de collectore, vel potius auctore istarum inscriptionum, pronunciare idem, quod de Petronio tuo judicat nonnemo: Morum interfuisse, si nunquam scripsisset: elegantia linguæ, si aliud. *Meor Enojim* non est ille liber, quem expectaveram, quamvis eundem gerat titulum. Meam vero effugit notitiam, adhuc exstare similis nominis alium; alioquin signatius expressissem. Tuus enim ille, neglectus BUXTORFIO, commentarius est in priorem partem libri Rabbinici, *En Israel*, compositusque a Josia Pinto; alter autem auctorem agnoscit Rabbi Asariam Edomæum, prodiitque Mantuæ, an. 1574. 4. historica continens, ex scriptoribus etiam Græcis atque Latinis collectus. Neque sic

tamen pœnitet lustravisse tuum librum, o caput suavissimum, quem antea videram nunquam, et qui non ubivis inveniendus, et si præstantia atque raritate non accedat ad illum, quem adhuc quæro. *Tubam anti-Jesuiticam* (ut ita loquar) legi, nec sine risu, placuitque mirifice. Secretis Jesuitarum, in Memoriis Trevultinis exstantibus, adscripsi, quæ in meo discrepant exemplo, ne omissis quidem minimis, et parum aut ad illustrandum aut eruendum sensum vel legitimum vel alienum pertinentibus. Ennemannum tibi arrisisse, gaudeo, mihi que gratulor, qui amicum tibi, amicorum principi, conciliare valui, non indignum amore tuo. Magis est eruditus et humanus, quam Suecia ferat, in qua pauci dantur vere eruditi, humanus fere, ut recte judicas, nullus. Joachimi CAMERARII thesauros tibi contigisse, majorem in modum lætor, precorque, ut eadem fortuna plures posthac Græciæ auctores, sive scripti manu, sive emaculati a viris doctis ad te veniant, quorum fructus in me simul redundabit. Jam video, me, ubi semel ad te venero, non tam cito huc redire posse, quum tam multa sint, quæ penitus intueri gestio. Sed et gratias ago, quod notabilia illa de CAMERARIO, (cujus opera junctim edere in animo quondam habuit WEBERUS noster, qui cum alia tractare nunc debeat,

ab

ab humanitate aliena , vix de popularis
fui operibus cogitabit amplius) non igno-
ta mihi esse volueris. Basilii M. opera, ut
componere cum editione mea Basileensi
possim, enixe rogo: nulla tamen hic fe-
stinatione opus: poteruntque fratri meo
tradi, qui una cum libris aliis, quos ex-
specto, ad me mittet. Quod superest pa-
ginæ, implebunt manuscripti codices E-
braei tui. Unum ex illis excussi, qui quum
Geneseos quædam, Exodi item ac Deute-
ronomii, nec non Jobum integrum com-
plecti deprehenderetur, missus a me fuit
ad BURCKLINIUM, in edendo opere
Biblico jam occupatum, sumtu Andreae
propediem edendo. Dabis et hoc amicitiae
meae, neque ægre feres, de alieno me
fuisse ad tempus aliquod, quod aut tu
præscribere poteris; aut ego, liberalem.
Alter Codex, major ille, nondum a me
acri et diligenti oculo lustratus, quare
quid singulare habeat præ editis precum
(nam has exhibet,) libellis, dicere ne-
queo. Ille liber, qui in forma quarta
scriptus, et qui primum occupabit manu-
scriptorum tuorum Ebraicorum in quarto,
uti vocant, locum (sic enim numerare so-
leo, vel mei in usum, si forsân repeten-
dus aliquis esset codex, aut denuo inspi-
ciendus, aut quod inde allatum, sed in
dubium vocatum a malevolis comproban-
dum esset, servato temporis ordine, quo

mecum abs te communicantur) continet à principio plenum orationum Judaicarum volumen, in quæ multis occurrunt, quæ in editis secus se habent contra Christianos composita. Notavi illa, schedæque pro consuetudine mea inscribam. Alteram vero ejus voluminis partem à Maimonide esse profectam, aut, ut rectius loquar, ad eum referendam, dubito. Etsi enim eo usque nondum in ordine, quem mihi ipsi imperavi, pervenerim, quantum tamen ex stylo et toto habitu, atque lemmatibus quibusdam judicare valui, recentioris est scriptoris; de quo magis certa scribam proxima occasione. Ad extremum, ne alius videar factus, tua mihi denuo imploranda est benignitas. Scio Acta litteraria omnia, tam Gallica, quam Belgica tibi esse; quod si igitur in his videris alicubi observationes meas castigatas, velim significes. In Actis Eruditorum Germanicis, et in Aula libraria inveni illas recensitas, cum majori, quam merebantur, elogio; video tamen quædam aut non rite intellecta, aut præter rationem reprehensa, quæ omnia colligere, et ultimæ parti mearum observationum, (quæ sexta erit, si Deo visum fuerit) præfigere, cum uberiore mentis meæ declaratione, objectorumque modesta declinatione. Non ita vanus sum, ut Gallos aut Batavos ineptiis meis percensendis elegantes chartas commaculatu-
ros

existimem ; id tamen , si fecerint , num rectius in hominis Germani mente (quam brevitās , fateor , facit obscura) consequenda fuerint versati , cognoscere equidem a-
veo. Tu , sive stultum meum desiderium , sive non plane ineptum , vehemens certe , et tui unius ope restringendum , implebis : atque ut facias , denuo rogo. Tandem vale , et garrulo amico tuo fave. Giesſa
XVI. ante Kalendas Maii MDCCXIV.

LXXXIV.

JO HENRICO MAJO FIL.

Ita est, Amice suavissime, cum Musis non nisi bene nobis esse potest , fallunt nobis non tractabile tempus , cœlique asperam tempestatem experiri non patiuntur. Imo

Est , ubi plus tepeant hyemes , ubi gratior aura.
Ego sane dubius semper fui , an æstatem an hyemem præferre debeam. Multum, fateor , delectat illa , ast voluptatibus atque otio indulgere etiam nos facit ; tristior hæc videtur , sed diligentiores nos reddit ; uti etiam bonæ frugis homines id , quod affert , tædii , gratis laboribus dulcibusque studiis facile vincunt. Nec sane æstas suis caret molestiis , nec scio , an calor an frigus
stu-

studiosis plus adferat incommodi? eo magis, quod illum nulla ratione evitare, hoc vero fornace probe calente abigere queas. Physicas ac medicas rationes bene multas in medium afferre possem, quibus aptius esse studiis hybernū præ æstivo tempore evincerem. Sed nolo istis tempus jam terere, sufficit, quod intelligas, in hoc etiam conspirare animos nostros, meque tecum ridere homines, qui Rectorem Poli arguere non verentur, dies, ut est in veteri illo, humeris protrudunt ac conficere nequeunt difficiles. Nullam sane temporis molestiam experitur, qui suavissima Musarum societate gaudet, qui dulcissimo amicorum in præsentia ac per litteras fruitur commercio. Nullum de te, amice dilectissime, nullum mihi est dubium, quin ex animo loquaris, nec etiam de me aliter, spero, senties. Sancte alias tibi adfirmare possem, quod, si calamum ad te scripturus arripiam, manus cum corde saliant mihi, adeo ut præ immoderatione verborum efferar, nec tamen commoda satis verba, quibus meam tibi voluptatem animique propensionem declarem, invenire queam, ut garrulus tibi procul dubio videar sæpius, molestusque fiam. Quod ne jam quoque accidat, ad alia pergo. Libros a te remissos recepi in tempore, nec sine gratia. Quotiescunque enim libri vel ad te mittuntur, vel a te mihi redeunt, magnum

magnum mihi videtur facinus, Disque gratias ago, quod egregia studia tua adjuvare aliquo modo queam. Ne igitur bene merendi occasionem prætermitterem, illico Dno Raumburgero D. Basilii Opera jussu tuo dedi. Doleo autem, quod Judæus utrumque nostrum fefellerit, alium librum substituendo, quam tu, amice dilectissime, egoque tui causa desideraveramus. Adigam vero illum, ut genuinum etiam procuret. Quod Jesuitica monita conferre, lectionesque e vetustis membranis notare volueris, rem gratissimam fecisti. Insigni autem beneficio me obstringes, si quæ de Ebraicis codicibus manuscriptis mones, ac in posterum comperies, in schedula, ut jam alias rogavi, notaveris. Illos enim in fronte voluminis suspendo, velut hederam, ab exacto judicio tuo, profundaue in his cognitione, insignem. Codicem Biblicum BURCKLINIO te concessisse, tantum abest, ut improbem, ut potius gaudeam, id a te factum esse. Utinam vero inveniat, quæ ad illustrationem sacrarum paginarum facere possint! Litteraria Diaria, seu acta lubentissime pervolvam, imo hoc ipso momento in eo eram, sed Cæsaris, non Romani, sed vestratis præsentia me avocat. Salutem tuo nomine dixit, amice dilectissime; eo lubentius igitur, apertisque, ut ajunt, in proverbio, januis, Bibliothecæ scilicet meæ, excepi

cepi eum, qui ob morum suavitatem, notitiamque, quam ex probe peractis itineribus reportavit, alias me cepisset. Proxime igitur desiderio tuo, meoque, utpote laudum tuarum avidissimi, satisfaciam. d. XXI. Maj. 1714.

LXXXV.

JO. HENRICUS MAJUS FIL.

Quod in Senatu Areopagitarum apud Athenienses facere debebant rhetores; id mihi nunc dictum putabo, *ἀντὶ προσιμίου καὶ παθῶν* ad tuas jucundissimas responsum. Basilii M. opera, curante fratre meo, rite accepi, satis egregia illa, et ERASMI præfatione illustria, quæ me ita cepit, ut bis, ter, relegere non dubitaverim. Attulit quoque secum Rudigerus Psalterium Arabicum, forte mihi donandum. Quod si ita est, pro mea rusticitate lubenti ac grato animo illud accipio. Recusaveram illud nuper, amicorum optime, non quod eam ipsam editionem jam tum possederim, sed quod, cum optionem, aut librum istum Arabicum, aut SCHOTTI bibliothecam designandi feceris, ego hanc maluerim, illum me possidere

possidere in Bibliis Polyglottis indicaverim. Jam quia raram et pretiosam illam editionem, quæ recusa est Parisiis 1619.4. et quam evolvere in bibliotheca Wagenfeiliana datum fuit, mihi offers, et contra tuam liberalitatem, et in meam utilitatem injurius essem, si in tui memoriam adservare ad splendorem libellorum meorum detrectarem, quod a tam illustri amico provenit. Accipio, inquam, Psalterium istud, sed ea conditione, ut nullos posthac mihi libros dones, nisi quos ipse, jam in rogando incivilis, abs te petiero. Pudet enim me, tot indies a te beneficiis adfici, nec benevolentiam tamen tuam similibus officiis a me ornari posse. Idem Rudigerus et gratias tibi, amice suavissime, agit maximas, ob humanitatem insignem, qua illum excepisti, et per me nunc tibi nunciat, inquisivisse se Butisbaci apud D. Klotzium de historia Francofurtensi manuscripta, in Dietericianis libris latente; at possessorem adfirmasse, nullam plane inter eos inveniri; sive vere ita se res habeat, sive truncus ille, quod ab ejus ingenio maxime moroso non alienum est, usum ejus invidet. Codicem illum manuscriptum tuum, qui Maimonidis quædam continere creditur, accuratius volvi, neque volam ejus Doctoris, neque vestigium in eo deprehendo, quod impostori tuo inculcare poteris, ne asinum me putet.

Est

Est liber aliquis *Taschbez*, ut Judæi vocant, ritualis, et nondum editus, quantum novi; neque enim aut in catalogo librorum Rabbinico, *Siphte Jeshcherim*, aut in Bibliotheca Buxtorfiana, occurrit, aut mihi, (qui alium hujus nominis habeo, sed non tam plenum, copiosum, elegantem, et prorsus a tuo discrepantem,) visus; nisi forsan in Bartolociana, qua destituor, exstet. Intra octiduum absolvam lustrationem librorum tuorum, quos, oblata occasione, ad te remittam, demto forsan codice illo, quo jam BURCKLINIUS utitur. Si interim submittere volueris alios, et illos avidissime pervolvam. Cum Boethio lente procedit negotium, eo quod nonnisi subsecivas horas ei impendere debeam. Ceterum, quod et in mei gratiam Acta litteraria inspicere, et nuper KAYSERUM, popularem nostrum, tanta benevolentia, mei causa, excipere volueris, signum est solitæ humanitatis tuæ, summeque erga me propensi animi. Perge ita, vir amicissime, et quem semel benefactis reddidisti tuum, eum favore tuo, quantum libet, obrue: nam a te solo vinci gloriosum est. Adderem nunc plura, si, quæ adjicere possem, superessent; sed ita me exhausti, ut pumice existam aridior. Neque etiam MANUTII eloquentia præditus sum, qui amicum in epistolis castigat, scribere nolentem, quia nulla superpetebat

petebat scribendi materia. Quam tamen ipsam sterilitatem suo exemplo satis esse fecundam ostendebat MANUTIUS. Vir quidam nobilis et pius in Belgio consilium coepit edendi Biblia Polyglotta occidentalia, versionem Latinam, Hispanicam, Italicam, Gallicam, Germanicam, Belgicam, Suecicam atque Anglicam, complectentia. De versione Germanica eligenda dubitatur: sunt, qui eam, quam nunc habemus LUTHERI, alii antiquiores, alii recentiores et interpolatas, admittendas volunt. Mihi totum opus ad pompam magis, quam utilitatem, accommodatum videtur. Nec enim versiones hæ sunt occidentales omnes, neque adeo etiam rariores et præstantiores, quas vel maxime in tam illustre opus inferendas oportebat. Ubi Hibernica, Sclavonica, Danica, Vngarica, aliæ? Tabulas quasdam æneas, chorographicam puta, et eam, quæ ad cultum Leviticum pertinentia, item ad nummos et pondera facientia exhibet, adjicient. At hæc ipsa jam in tot comparent libris, unde petentur. Denique præfatio accedere debet, introductionis vicem gerens, et instituti rationes edisserens. Ego ne teruncio quidem redimam universum et molestum illud opus, quamvis illuminatum forsan egregie. V. ante Kal. Majas. 1714.

JO HENRICO MAJO FIL.

D. Basilii opera, Arabicumque Psalterium te accepisse gaudeo ; ast ægre me habet adjecta protestatio, favori, meæque in te voluntati plane contraria. Ne igitur repetas unquam quæso, Amice charissime, nec enim curabo illam, sed quavis data occasione contraibo. Licet enim in omnibus obsecundem tibi, meus tamen in te amor nullis a verecundia tua legibus vel limitibus se circumscribi patitur. Utinam pluribus sese exserendi facultas frequentior modo foret. Klotzium Dietericianam de Civitate nostra collectanea negare non miror, cum de summa hominis, vel stipitis, nam nomen et omen habet, invidia certior me nuper reddideris. Gratias autem cognato tuo, quem salvare jubeo, habeo, quod auriculas moroso vellere non detrectaverit. Codicem Hebræum Maimonidis non esse, Impostori, qui vendidit, exprobrabo. Ast sufficit, quod ineditus, nec spernenda continere tibi videatur. Submittam vero, uti jubes, brevi alios, quibus adjiciam insignem aliquem Æthiopicum, quo hisce nundinis potitus sum. Mil-le flor. æstimasse illum, qui ex Abyssinia detulit, asseverabat Wetstenius, et in
schedula

schedula capsulæ , qua includitur , agglutinata ab Abyssinæ Imperatoris Legati Chodja Morad filio descriptus dicitur (g). Evangelia continere inscriptio promittit : verum Psalterium , Proverbia ac Canticum complecti Reverendus Dn. MIEGIUS Professor et Consist. Heidelbergensis , qui eum manibus tractavit , certiore fecit. Quod an ita se habeat , et an editus melior sit Codex , intelligere abs te aveo. Nitide in membranis exaratus , et satis antiquus videtur utique. Cum nullus adhuc ejus idiomatis mihi fuerit , lætor , quod meam Orientalium supellectilem illo ornare æquo satis pretio potuerim. Acta Literaria summa diligentia excussi ; ast nullibi adhuc auream Observationum tuarum mentionem , præterquam in locis a te ipso , amice dulcissime , indicatis inveni. In culpa procul dubio est exiguum Editoris tui cum exteris conmercium. Magis tamen h. e. pro merito innotescere brevi spero. Doleo autem , quod , quæ singulis mensibus eduntur ab Exteris , Diaria habere nequeam , sed singulis saltem nundinis expectare debeam. Cæterum inquiram sedulo , teque , amice mellitissime ,

Cc 2

mo-

(g) vid. de hoc Codice Bibliothecæ Vffenbachianæ MS. Tom. I. Part. III. f. 695. sq.

monebo. De Bibliis Polyglottis occidenta-
libus, quæ in Belgio parari scribis, tecum
plane sentio. Quam plurimis, rarioribus-
que ejusmodi versionibus Bibliothecam me-
am superbire non ignoras, quas omnes
in unum congerere sumtuosum potius ac
operosum, quam utile futurum. Moris
nunc est, ut in Bibliopolarum gratiam,
commodumque ingentia talia opera consar-
cinentur, quæ Reipublicæ Litterariæ one-
ri magis sunt, quam utilitati. Ego certe
institutum istud semper improbavi, dam-
numque exinde sensu haud leve, mecum-
que omnes, qui aliqualem Bibliothecam
exstruunt. Certe nonnisi Schedæ, libelli-
que minores in unum colligendi essent;
majora vero opera seorsum luci reddenda,
ut cuilibet integrum esset, sibi seligere,
quæcunque arrident atque conducunt. Imo
ne opera quidem unius auctoris, inprimis
cum varii argumenti sint, conjungere, quod
solemne hodie est, consultum duco. Hinc
enim fit, ut nonnisi ditiores comparare
queant, aliis carendum sit. Imo fraudi
multis est, qui cum pleraque auctoris
scripta, ab ipso, dum in vivis esset, tem-
poris successu edita, jam dum possideant,
ob unius alteriusve libelli posthumi cau-
sam, omnia iterato, multaque sæpius, quæ
studiis suis non inserviunt, inviti acquire-
re cogantur. Quæ omnia, quam sæpe
mihi maximo meo incommodo accidere so-
leant,

leant, facile conjicis, ipseque, amice dilectissime, non raro, quod nullus dubito, experiris, ideoque non malam in partem interpretaberis, quod hisce querimoniis chartam impleverim, d. 8. Maj. 1714.

LXXXVII.

JO. HENRICUS MAJUS FIL.

Quod Judæus codicem putabat Maimonideum, id verius compendium Maimonidæ dici possit; quum ad hujus doctoris ductum sit compositum. Alterum illud majus volumen vere complectitur omnia, quæ prædicabat Apella; estque magni pretii liber. Dicam vero de his suo loco, in schedis puta peculiaribus. Impense gaudeo, Æthiopicum quoque codicem ad te, amice suavissime, perlatum esse. Is enim, quo rarior, eo pretiosior. Paucae sunt in Germania nostra, immo Europa, bibliothecæ, quæ ejusmodi ornamentis superbiant. Judicium D. MIEGII verum esse, non dubito; neque tamen detrecto, ubi volueris, eum conferre, et varias inde lectiones, ut bene mones, excerpere. Bonas te horas, Amice, in evolvendis actis litterariis, mei causa, perdidisse, sanc

perquam vehementer doleo. Stultum, fateor, fuit petitum meum, quamvis aliqua ratione necessarium. Dum enim secundam editionem libri primi mearum oblationum hac æstate edendam denuo augere studeo: molestus tibi, in negotio inutili, fui. Veniam da, quæso, impudentiæ ac vanitati meæ, atque tædii, quod tibi creavi, non recordare amplius. Prævidi equidem, frustraneum fore laborem tuum; at desiderium me fecit ridiculum. Petieram nuper, ut ætatem characterum, quibus folia tua Græca sunt exarata, ex Montfauconio indicares; repeto nunc id ipsum, sed ea conditione, si absque incommodo fieri potest. Estne tibi, amice mellitissime, vita Basilii M. ab Amphilochio consignata? Si est, inquiras tantum velim in indice, quid de Eubulo, præceptore Basilii, cum Athenis daret operam litteris, referat, et mihi Græco pariter Latinoque sermone nuncies. Scire pariter gestio, an ad tuas manus sint excerpta Grotii Poetica, edita Parisiis 1623. 4. Ceterum justa est tua querela de operibus, inutilibus accessionibus auctis, item de vastis corporibus, exhibentibus ea, quæ sparsim fuerunt edita. Sequor iudicium tuum, et doleo. V. Id. Maj. 1714.

LXXXVIII.

JO. HENRICO MAJO FIL.

Folia Græca, Epistolam ad Hebræos exhibentia, quæ nuper oblitus sum, septimi vel certe octavi sunt seculi. Scripturæ enim, vel characteri specimen codicis, quem MONTFAUCONIUS lib. III. cap. 5. p. 223. seq. inter præstantissimos omnium codices jure numerandum censet R. R. P. P. Jesuitarum Collegii Ludovici Magni &c. ad amussim concordat atque respondet. Nec Amphiloerii vita Basilii M. nec GRO-
TII Excerpta Poetica Parisiis vulgata ad manus sunt, ambabus alias offerrem tibi, cum nihil mihi sit jucundius, nilque antiquius, quam studiis inservire tuis. Ast quantum est in tanta librorum multitudine, quo carendum nobis! Postrema nec cognita, nedum visa mihi unquam fuere; aliena enim a Philosophorum de fato sententiis a viro Illustri Elzeviriorum typis editis, quas utique possideo, existimo. Quo de certiore me reddas velim. Tantum ad ultimas tuas reponendum fuit. Nunc arrige aures, amicorum dilectissime, atque quæ benigna sors larga manu novissime obtulit, accipe, Codices nimirum manuscriptos quatuordecim, una vice, præstantissimos. Inter hos erant Græcus,

Homilias S. Macarii complectens , porro Statius , Virgilii Georgica , Juvenius , manuscripta aliquot Turcica , ac denique Fasciculus Epistolarum autographarum a Celeberrimis Viris scriptarum. In his eminent quædam GROTII , Caroli PATINI , Jo. DURÆI , irenicum studium , quod tanto urgebat ardore , probantes ; ac denique SCHMIDII ad SCHICKARDUM quam plurimæ. Quas ultimo nominavi loco , critici sunt argumenti , ideoque tibi , amice charissime , præ reliquis arribunt. Impense sane gaudeo harum quoque deliciarum aliquid propitiam alias fortunam , in his tamen hætenus parcam , dedisse. O me fortunatum ! si tales mihi sæpe eveniant dies , albo lapillo notandi ! Epistolarum mentio Meisnerianarum Thesauri , quo tu gaudes , memorem facit , atque simul impudentem , ut scilicet illud , quod de edendis illis ad Eruditos scripsisti , Schediasma expetam ; Illius enim compos nondum factus sum. Significabis etiam , an consilium , quod nolim , mutaveris , et quæ causæ sint , quæ impediunt , vel retardent. d. 19. Maj. 1714.



OBSERVATIO

de

Epistolis Virorum Cel. autographis
ad Wilh. SCHICKARDUM.

Quantum VFFENBACHIUS meus, ὁ
μακρίτης, epistolis Schmidii (Ulrici haud
dubie (h), Ecclesiastis ac Philologi quon-
dam Ulmenſis egregii) ad Virum ſummum,
Wilhelmum SCHICKARDUM, Mathe-
maticum atque Philologum Tubingenſem
famigeratiſſimum, exaratis gaviſus eſt,
tantum egomet mihi gratulor de epistolis,
ad eundem SCHICKARDUM a Viris cele-
berrimis olim datis, iisque autographis,
quarum quinquaginta circiter ſupra du-
centas inter reculas meas aſſervo. Inter-
eſt autem rei literariæ, noſſe, ubi iſtius
modi cimelia lateant, cum præſertim pa-
rum abſuerit, quin prorsus cum reliquis
Viri optimi ſchedis interciderint: de quo
ſiniſtro earum fato Theophilum SPIZELI-
UM audire juvat, ita differentem (i): *Ut*
Archimedis doctum olim et eruditum pulverem
Cc 5 *ferox*

(h) vid. b. J. C. WOLFII Conſpectum
Supelleſtilis Epistol. p. 26.

(i) in Templo honoris reſerato, p. 340.

ferox et impius miles turbavit , cumque ipso disjecit domino ; ita simile propemodum fatum alter hic Archimedes subiit. Etenim in Schickardum fera immanis ; lues scilicet pestifera post elata suorum funera anno ævi currentis quinto et trigesimo (1635.) deseviit , tot egregios ejus turbavit circulos , imo vim truculentiamque in ipsas etiam chartas et scrinia , atque hinc inde varie sparsa et disjecta opuscula furiose convertit , ita ut in communi illo metu et terrore , ut fit , inter hominum imperitorum manus , qui servanda domui adhibiti , vel prorsus perierint , vel ab aliis forsan clam inde subrepta fuerint. Ipsemet SCHICKARDUS id veritus est , paulo ante præmaturam mortem , dum pestem fugiens in Alpibus Wirtembergicis oberraret , Duslinga , quam Pathmum suum nuncupat , die Michaelis A. 1635. hæc ad BERNEGGERUM suum perscribens (k) : Subito sum domo mea exturbatus lamentabili morte sororis , quam ex Herrenberge cineribus profugam illuc recepi. Cum enim ipsa communi lue corripereetur , vidi meam quoque vitam periclitari , nisi fugerem illico. Ita cum puero , quem solum habeo , emigravi statim , et hætenus in montanis Alba oberravi miserabiliter , ut vitam quo-

(k) vid. Epistolas Wilh. SCHICKARDI et Matthiæ BERNEGGERI mutuas , Argentorati A. 1673. in 12. typis excusas , p. 214. sqq. conf. p. 209. et. 212.

quomodocunque redimerem. - - Nisi vererer
 adium mearum, inprimis bibliotheca, direptionem,
 nec id minus a ciue auido et invido, quam præ-
 fidiario milite, proficiscerer omnino hinc aliorsum,
 et secederem in Helvetiam vel Genevam, quan-
 do adhuc licet, ante imbres hyemales. At incer-
 tus consilii sum, neque mihi consto in istarum
 curarum ancipiti fluctuatione. Clementer invita-
 vit ipse illustris D. PETRISCIUS, nec terreret
 via longinquitas, obstat unus ille omnia interim
 amittendi metus. Ita toto fere anno hactenus
 nunquam licuit mihi esse securo, aut studiis at-
 tente animum applicare. Durabo tamen Dei gra-
 tia, et spe meliorum hac presentia boni, consu-
 lam. Insignem igitur percepi animo læti-
 tiam, cum bonis avibus meas in manus,
 istiusmodi cimeliorum avidissimas, incide-
 rent illæ epistolæ, tanquam pretiosæ ex
 isto naufragio tabulæ, eoque majoris fa-
 ciendæ, quod pleræque a Viris illius ævi
 celebratissimis profectæ fuerint. En tibi
 eorum nomina. Sunt autem Jo. Henricus
 ALSTEDIUS, Jo. Valentinus ANDREÆ,
 Jo. BAINBRIDGIUS, Jac. BARTSCHI-
 US, Matthias BERNEGGERUS, Jo.
 Henricus BISTERFELDIUS, Guilielmus
 BLAEU, Ismael BOULLIALDUS, Joan-
 nes BUXTORFIUS, Pater et Filius, David
 CLERICUS, Christophorus CRINESIUS,
 Ælius DEODATUS, Jo. Georgius
 DORSCHÆUS, Theodorus EBERTUS,
 Melch. Sylv. ECKHARDUS, Christopho-
 rus

rus FORSTNERUS, Jo. FREINSHEMIUS, Petrus GASSENDUS, Jac. GOLIIUS, Jac. GOTHOFREDUS, Hugo GROTIUS, J. J. HAINLINUS, Isaac HABRECHT, Jo. Bapt. HEBENSTREIT, Martinus HORTENSIUS, Jo. JONSTONUS, Jo. KEPLERUS, Petrus KIRSTENIUS, METROPHANES Critopulus, Daniel LIPSTORPIUS, Petr. MEIDERLINUS, Jo. Bapt. MORINUS, Nicol. Claudius Fabricius PEIRESCIIUS, Nicolaus PETRÆUS, Jac. REIHINGIUS, Andr. RIVETUS, Jac. SCHALLER, Jul. SCHILLERIUS, Jo. SCHMIDIUS, Gabriel SIONITA, Paulus TARNOVIUS &c. Taceo epistolas a doctis quibusdam Rabbiniis ad eundem Ebraice scriptas.

Notum est, Mich. Gottl. HANSCHIUM Vindobonæ A. 1718. in majori forma edidisse Jo. KEPLERI, Mathematici quondam Cæsarei, aliorumque Epistolas mutuas. In ea collectione f. 668. sqq. plures quidem SCHICKARDI nostri ad KEPLERUM exhibentur epistolæ, unica vero tantum f. 670. hujus ad illum responsio. Reliquæ ergo Kepleri, quæ penes me sunt, ineditæ cum Schickardi epistolis, ibi vulgatis, utiliter conferri possunt. Hugonis GROTIJ, Belgarum Phœnicis, sex mihi in promptu sunt eximiæ ad SCHICKARDUM epistolæ, quarum nulla comparet in grandi

di illa Grotianarum Epistolarum collectione, quæ Amstelodami A. 1687. in fol. prodiit. Supra jam provocavimus ad Epistolas SCHICKARDI et BERNEGGERI mutuas, Argentorati A. 1673. in 12. publici juris factas; una tamen vel altera Berneggeri inter nostras latitat adhuc inedita. Omnium vero præstantissimæ sunt magni illius PEIRESCII, immortalium in bonas literas meritorum Viri, cujus vel solum nomen elogium est, ad Nostrum Epistolæ, omnes fere ita copiosæ, ut integræ veluti dissertationes esse videantur, dignissimæ proin, quæ luci aliquando exponantur publicæ. Quanti SCHICKARDUM, ceu Virum publico bono natum, fecerit PEIRESCIIUS, ex ejus vita a Petro GASSENDO eleganter descripta, passim elucet. Multo autem clarius id patet ex epistolis Peirescianis, in quibus tantis SCHICKARDUS effertur laudibus, ut unius margini hæc Vir modestus adscripserit verba: *Hæc enormia et nimis Gallica non agnoscit mea tenuitas.*

Ipse SCHICKARDUS supra ad BERNEGGERUM meminuit, clementer se a PEIRESCIO invitatum esse, ut in illis belli calamitatibus, quibus tum Germania nostra undique premebatur, in Galliam se ad eum tanquam asylum reciperet. Sunt illæ literæ longe humanissimæ mihi ad manus,

nus, quibus omnia ipsi sua ultro et liberaliter obtulit literatorum ille Mæcenas plane incomparabilis , Aquis Sextiis A. MDCXXXV. d. X. Julii scriptæ. Gassendus quoque hujus rei mentionem facit (1), cujus en verba : *Audita morte optimi SCHICKARDI, quem pestis a Novembri usque superiori (A. 1635.) abstulerat , omnem diligentiam adhibuit , ut inedita ejus opera servarentur , lucemque acciperent : id agens præsertim Matthia Berneggeri Argentinenfis, Viri celeberrimi, interventu. Præterea autem, ut ad ipsum, intercedente Ælio DEODATO , miserit varia Epicedia , quæ dum evulgarentur , Thomas LANSIUS, Actorum decus, et T^u μαχαρίτης Achates, edi simul procuravit orationem funebrem , in qua Zacharias SCHÆFFERUS , insignis eloquentiæ et historiarum apud Tubingenseis Professor, tacere non potuit , SCHICKARDUM fuisse a PEIRESKIO prolixè , splendideque invitatum, ut tumultus patriæ declinans , ad ipsum diverteret , quietem studiis affecuturus. Literæ PEIRESCII, quibus BERNEGGERO negotium illud imposuit, annexæ sunt mutuis Schickardi et Berneggeri Epistolis p. 217. sqq. e quibus nonnulla huc transferre non piget. La funeste nouvelle du décès de feu Mons^{ieur}. Schickard, que Mons^{ieur}. Deodati nous a fait sçavoir de
vostre*

(1) in Vita PEIRESCII, Lib. V. p. 456. sq. edit. Hagienf. A. 1651. in 12.

vostre part, nous a grandement affligez Mons.
Gassend et moy, et tout ce qu' il y avoit de plus
curieux en ce quartier de deçà, ou sa vertu et son
erudition singuliere estoient en veneration tres
grande, et comme du premier homme du siecle.
Pour moy je vous puis asseurer, que la perte de
feu mon Pere, qui estoit la plus sensible que j'eusse
eu de ma vie, ne m' avoit pas touché plus avant,
que celle de ce grand personnage, que je n' ho-
noroy pas moins, que mon propre Pere, et ne
l' eusse pas moins volontiers servy, si j' eusse peu,
ne avec moins de reverence et charité. Car je
m' estois desvoué tout a luy du meilleur de mon
Coeur, et sans reserve de rien, qui me peusse
estre loisible. Regrettant infiniment de ne luy en
avoir peu bailler des preuves conformes a mes
voeux. - - Vous suppliant de nous en vouloir
tenir advertis par l' entremise de Mons. Deodati,
a qui je ne suis pas moins acquis que Vous, et par
qui je ne manqueray, de Vous faire tenir tout ce
peu que je pourray recueillir de nos amys, sur le
sujet et a l' advantage de ce grand Genie de la
nature, que Dieu avoit fait naistre en nos jours,
et qui meritoit bien, d' estre mieux reconnu, qu'
il n' a esté. Mais je ne sçay si nous pourrons
rien contribuer qui soit digne de l' eminance de
son merite. Principalement en ce chetif pays, qui
est si sterile, &c.

Inter alia Epicedia, quæ, ergo dicitur PEI-
RESCIO, a Viris magni nominis SCHI-
CKAR-

CKARDO scripta sunt , in promptu mihi quoque est unum, a Luca HOLSTENIO profectum, quod, num editum jam sit, ignorans, in præstantissimi Viri, quo Suevia nostra superbit, laudem hic inferam. Ita autem de eo Ælius Deodatus Lutetia Parisiorum A. 1637. d. 27. Apr. ad Berneggerum : *Depuis Mons. de PEIRESC m' a encores envoyés les enclos vers sur le mesme subject (sur la memoire de feu Mons. Schickard) qui sont de Mons. HOLSTENIUS, Bibliothecaire du Cardinal Barberin, que vous trouverez tres beaux et d' un sens fort relevé, le quel toutes fois ne desire point estre nommé, au cas que l' on lis public, comme vous verrés par l' extraict de sa lettre. L' on pourra y supposer quelque nom seinct, ou bien anagrammatiser le sien. Mons. PEIRESC m' escript de faire le mesme de ceux de Mons. Dormalius, c' est assavoir de supprimer son nom, ou de le desguiser : mais je prevoy, qu' il sera trop tard, et qu' ils seront desja imprimés. Toutes fois vous en pourrés escrire à Mons. Lansius.*

Ipse vero HOLSTENIUS hæc ad PEIRESCIUM Roma anno eodem d. 7. Martii perscripsit : *Mitto nunc versus aliquot, Musis invitis, extemporali fere abortu effusos, qui si tibi minus placuerint, nec mihi placuisse scias. Mitto tamen qualescunque, ne hac quoque in parte diutius officium meum desideres. Id fateor, et tuam expectationem, et insignem magni illius Viri eruditionem meliori fuisse carmine dignam. Sed bonum factum,*

factum, quod vel hosce tandem ab genio meo
 ἀμύσσω extorserim. Si in doctorum manus di-
 vulgare cum aliis tibi constitutum est, quaeso no-
 mini meo parcas, et quod versus mali sunt, et
 ne quis ex scrupulosis illis magistris me homini
 non-Catholico lessum fecisse cavilletur. Sed ac-
 cipe jam ipsum Epicedium.

In obitum Clar. et Doctissimi Viri,
 Guilielmi Schickardi, Professoris Tu-
 bingensis.

Abdita qui magni lustrans penetralia mun-
 di

Descriptit radio singula et eloquio :
 Qui linguas ritusque hominum cognove-
 rat omnes,

Aptavitque novis prisca, profana sacris:
 Ausus Idumæis Nicarim præcingere palmis,
 Subdens cum Solymis Susa, Tubinga,
 tibi :

SCHICKARDUS jacet hic, fatis præreptus
 iniquis,

O nimium studiis fata inimica bonis!
 Patria quem moriens communi funere
 meruit,

Mortuaque extincto pro tumulo incu-
 buit.

Sors indigna quidem, sed non miranda :
 sepulchro

Non potuit virtus tanta minore tegi.

Adjicere placet epistolam Caroli Bardili,
 Pars II. D d artis

artis salutaris Doctoris , qua consilium medicum suggessit SCHICKARDO nostro, Viro immortalitate digno, cum jam quædam suorum, peste extinctorum (m), funera mœstus vidisset, Tubingæ A. 1634. vigiliis natalitiis exaratam :

„Salve

„omnibus e meis amicis

„Antistes mihi , si forent , trecentis.

„Quamvis optima tibi suaferim, Excellen-
„tissime Vir , adhuc tamen in pectore
„meo delitescit remedium, quo majus sol
„non vidit, omnibus Chymicorum destilla-
„tionibus, coagulationibus, filtrationibus,
„panacæis , longe longe excelsius : Arri-
„ge aures , quatuor solum literis confla-
„tum : FVGE. Non quod nostra Medici-
„na probatis non sit undiquaque plena
„pharmacis , sed, quod omnes , quo do-
„ctiores, quo magis periculum hoc comi-
„nus non eminus inspiciunt Medici, tuti-
„us existiment abesse, et aeris aliam faci-
„em et ideam induere. Causas habes sex-
„centas. Imaginatio choragus esto. Quid?
„cum mundus regatur opinionibus, trans-
„acto etiam in solitudine , opinione ho-
„minum nullus dies decursus est, et tot
„dies

(m) vid. Epistolas Schickardi et Bernegge-
ri mutuas, p. 209. 211.

„dies formidabilis es , quot in casa illa
 „delitescis : ut principium numerationis
 „opinione hominum incunabula ducat a
 „die illo , quo ex ædibus egressus es.

„Crede mihi haud istis ars mea majus habet.

„Domestica facile dispones , et filiolum
 „hujus rei ignarum victui tuto locabis :
 „Si vel sola Herenbergæ sit , vel locus
 „paganus ; quæ tuo relinquuntur judicio.
 „Crede mihi hæc ex candido et sincero
 „animo proficisci. Neque aqua , neque
 „quidquam , quod in mea , adeoque me-
 „dica est potestate , te deficiet. Spondeo
 „etiam tibi operam fidelem et promptam,
 „qualem necessitas et occasio rerum agen-
 „darum requirit. Thoracem meliorem
 „non habebis , quam si animum OBFIR-
 „MES , in qua obfirmatione discedens uno
 „die plus proficies , quam hic integris se-
 „ptimanis. Summa : Galeni consilium
 „est :

„Mox , longe , tarde , cede , recede , redi.

„Melius redivivus Hippocrates non da-
 „bit , et resuscitatus Galenus. Nam cum
 „fomes in aere sit ædili , et in immate-
 „riali contagio , aer autem nullis parti-
 „bus corporis , etiam nulli victui , sit in-
 „accessus , absentia tua medela erit. Va-

„le, et occupato ignosce , et me brevi
„tuis literis recrea,,.

Sed SCHICKARDUM σοφὴν et bibli-
otheca prohibuit , quo minus tum salutari
huic consilio locum daret , domoque sua ,
pestifero aere infecta , excederet : quod
dum sero nimis , anni scilicet posterioris
autumno , lamentabili sororis morte com-
pulsus , fecit.

Tandem addo , SCHICKARDO nostro,
pestifera lue A. 1635. mense Novembri su-
blato , unicum fuisse fratrem Lūcam, cujus
honorificam mentionem in literis supraci-
tatis p. 218. et 223. instituit PEIRESCI-
US. Fuisse illum elegantis ingenii et do-
ctrinæ Virum , vel hinc apparet, quod Se-
renissimus Wirtembergiæ Dux JO. FRI-
DERICUS eum Filii Principis FRIDERI-
CI constituerit præceptorem. Præsto mi-
hi sunt variæ et ad ipsum scriptæ episto-
læ , quas inter nonnullæ THEVENOTI ,
Bened. TURRETINI , Tobiaë WAGNE-
RI &c. Adest quoque Instructio a Sere-
nissimo Duce JO. FRIDERICO ipsi A.
1627. præscripta , cum Filium Principem
FRIDERICUM ejus institutioni et fidei
demandaret.

LXXXIX.

D. JO. HENRICUS BARTHIUS
Theologus Argentorat.

Tuam, Vir Nobilissime, amicitiam jam dudum expetieram animo meo, cum inter literatorum principes fama pridem jam te collocarit; permitte, ut eandem jam verbis quoque mihi parem occasione quadam, quæ forte tibi non ingrata erit. Commoratus est apud nos per anni fere spatium Antiochenus quidam, Carolus DADICHI, in omni scientiarum genere fere literatissimus, qui, postquam in patria apud Orientales studiorum fundamenta posuit, Romæ et Parisiis eadem continuavit. In Arabica et Syriaca lingua, quæ ipsi vernaculæ, Latinis non minus, quam Græcis scriptoribus, quorum utrorumque fere omnes, qui extant, legit et relegit, in Gallica etiam lingua, philosophia Cartesiana, præcipue rerum orientalium Turcarum et ecclesiæ Græcæ, cui addictus est, notitia aliisque studiorum generibus est versatissimus. Id non scriberem, nisi expertus essem, utpote quo familiariter usus sum. Ego reliqui ipsi suam religionem, et in Arabicis, Syriacis atque ecclesiæ Græcæ et Turcicæ notitia multum ipsi debeo. Jam per Germaniam, Bata-

viam et Angliam ad suos redibit, a quibus cum multum abstractus sit, hætenus informando alios vixit, et quo venit, ob morum suavitatem est receptus ab aliis, tuam autem in primis amicitiam ambit, cum Francofurti per aliquot dies commorari decreverit, quo propediem abiturus est. Utrum autem eandem sibi promittere possit, et spes sit, fore, ut hospitium mensamque pro informatione in studiis modo nominatis obtinere possit, rogo ea, qua par est, observantia, ut, si fieri possit, per primum aut proximum curso-rem publicum mihi indices. Ignosce huic meæ libertati, quam late sparsa fama de tua humanitate mihi fecerat. Spero, primum hoc amicitiae et commercii pignus non ingratum fore. Argent. die 4. Martii 1718.



XC.

D. JO. HENRICO BARTHIO.

Quas D. PRITIO nostro commiseras , redditæ mihi bene sunt litteræ. Fuerunt autem acceptissimæ , utpote a tanto Vi- ro profectæ , de cujus eruditione , sinceritate , atque humanitate non modo fama , sed germana , qui aliquandiu cives in vestra academia vixerunt , Fratrum me- orum fide constiterat. Hinc jucundissi- mum mihi fore tibi persuadeas velim , si tam benevole oblatam amicitiam tueri ve- lis. Ego certe dextram , qua hæc scribo , tibi ea , qua par est , reverentia do , fi- demque facio , me illam perpetuo cultu- rum , ac , quantum in me erit , ita ge- sturum , ne cœptæ illius unquam possit pœnitere. Vereor autem , ne in primo , quod a me exigis , officio minus , quam voles , ac egometipse velim , satisfacere queam. Antiochenus , quem mihi com- mendas , hospes sane foret gratissimus , cum ejus in urbem nostram adventum , cujus spem D. Funck , et alii hac transeuntes , ac Bibliothecam meam perlustrantes , fe- cerunt , summo cum desiderio hætenus exspectarim. De quo ne dubitare possis , scias , me una cum MAJO filio in conte- xendo Mistorum Bibliothecæ meæ Catalo-

go laborasse. MAJUS meus Codices Orientales, atque Græcos recenset, ego reliquos. Ille autem non tantos in lingua Arabica ac imprimis Turcica progressus se fecisse professus fuit, ut Codices his linguis exaratos, quorum mihi non pauci sunt, aggredi possit. Quid igitur mihi jucundius accidere potuisset, quam quod Virum in his exercitatissimum commendaris? Lubens sane ipsum in domum reciperem, nisi Musæ ita illam occupassent, ut ne Præceptorum quidem in liberorum gratiam alendo locus sit. Decem(n) enim Camerae libris repletæ sunt. De mensa, quod nec ego variis de causis possem, D. PRITIUS prospiciet, ac forte etiam de hospitio. Ipse cum Rectore nostro SCHUDTIO ac aliis in gratiam ejus agam. Etsi etiam nullum habere hospitium, nisi publicum queat, tantum tamen lucrari, opinor, poterit, ut commode aliquandiu subsistere queat. Ipse ego, si in supra dicto negotio operam navare

vo-

-
- (n) In præfatione Tomi 1. Bibliothecæ Universalis Vffenbachianæ, A. 1729. mense Septembri scripta, octo conclavia libris repleta se habuisse b. Vir meminit, quod ipse etiam Conspectus Bibliothecæ, æri incisus, comprobatur. Conclavia igitur ista illis cameris longe spatiosiora fuisse, hinc apparet.

voluerit , non . contemnendo honorario subventurus sum , nec quicquam omittam , quo eum juvare possim , ut cum ipso intelligas , quantum tua apud me valuerit commendatio . Antequam te valere jubeam , permitte quæso , ut ex te quæram , num homonymus tibi Caspar BARTHIIUS , Eruditorum sui seculi princeps , cognatione tibi , familiæque tuæ , de quo tamen , cum stemma , ex quo descendit , Saxonicum sit , dubito , junctus fuerit . Occasionem quærendi non modo nova , quam cum tanti nominis viro in eo , amicitia dat , sed opusculum ipsius Caspari , quod inter alia nuper nactus sum manuscripta . En Titulum : *C. BARTHII Corona anime conversa ex Flosculis gratiosa gratia divina.* MDCXXVII. Auctoris videtur Autographon , nunquam typis exscriptum , prelo tamen paratum . Simile est Soliloquiis opus , de quo , si libuerit , plenius Te edocebo , vel etiam , si jusseris , specimen dabo. d. 15. May. 1718.



D. JO. HENRICUS BARTHIUS.

Si, Vir Amplissime, me immemorem, si ingratum, si incivilem me appellaveris, non equidem irascerer, utpote culpæ meæ conscius, veniam tamen deprecarer, quod ad literas tuas amicissimas, superiori jam anno scriptas, nunc demum respondeam. Amicitiam tuam benevolentiamque, quam rogavi, mihi promte concessisti, mihi ipsi succenseo, quod hætenus ea non sim usus. Sed nescio quis laborum cumulus et negligentia in causa est, quod felicitatem hanc non acceptaverim. Gratissimo interea tamen silentio veneratus sum, quod obtulisti. Age, nec immemori hætenus aditum præclude. Grata mente veneror, quod DADICHIUM placidissime susceperis, de quo tamen, quo venerit, nihil hætenus comperi. Nec Lipsiam, quantum quidem ego novi, et ubi etiam ipsi hospitium paravi, venit. Utrum ex eodem cum Caspare BARTHIO genere natus sim, me latet. Parentes mei ex Alsazia in Alsatiam venerant. A. 1592. nobilitate donati sunt, sed quam tum demum revocabo, si prius ditiora feuda mihi contingant. Malo mediocri fortuna frui, quam splendida miseria. Quid titulus

ius sine vitulo ? Pervelim interea plura a te edoceri de scripto illo Barthiano nondum edito, cujus mentionem fecisti sub titulo : *Corona anima conversæ*. Si illud communicare velis, gratissimo id celebrarem animo.

Rogo insuper, utrum quædam vel typis expressa vel manu exarata in refertissimo tuæ bibliothecæ thesauro possideas de Melchior HOFFMANNO (o), LUTHE-

(o) Est mihi de hoc heteroclito capite scriptum, a Martino BUCERO A. MD-XXXIII. Argentorati in 4. editum, cujus en tibi titulum : *Handlung in dem öffentlichen Gespräch zu Straßburg jüngst im Synodo gehalten, gegen Melchior Hoffmann, durch die Prediger daselbst, von vier fürnehmen Stücken Christlicher Lehre und Haltung, sampt getreuem dargeben auch der Gründe, darauf Hoffmann seine Irthume setzet. In titulo hæc etiam de HOFFMANNO adjecta sunt : Dieser Melchior Hoffmann wird von seinen Jüngern für den grossen Propheten und Apostel ausgeschryen, der sich vor dem grossen Tag des Herrn habe in Niederlanden erheben sollen, und das recht Evangelii erst in aller Welt ausbringen. Varia de ipso, turbisque ab eo in Holfatia excitatis, commemorat b. Jo. Melchior*

THERI seculo turbatore , et in Sleidano quoque memorato , aut de Nicolao FRE-GIO , ejusdem ætatis homine , qui primam uxorem , quam a se sumtam crediderat , repudiavit , et , ipsa viva , alteram sibi junxit , quam a Deo datam jactavit. Sed solenni Bigamorum pœna apud nos aqua suffocatus est. De utroque proxime forte disputaturus sum , cum in eo sim , ut historiæ patriæ specimina edam. Animus præterea est, historiam scholæ Argentinensis et Professorum, qui in ea docuerunt, luci publicæ exponere, in memoriam Jubilæi Academiæ Argentinensis, quod A. 1721. celebrabitur. Si quæ habes , quibus hæc illustrari possent , publico patriæ bonarumque literarum nomine gratias agerem , tuique etiam nominis , a quo hæc haberem , grata mente meminero. Ignosce , quod hæc a te petam, quis enim a tanto literarum Musageta aliquid petere reformidabit , cujus inserviendi promittunt omnem prædicat et admiratur orbis eruditus ? Nuper apud nos prodiit typis Dulsekeri BALDI Jesuitæ doctissimi Gallico idiomate judicium patrum ecclesiæ de morali doctrina Gentilium. Venditur etiam

chior Krafftius in *Husumischer 200. jährigen Kirchen-Historie*, p. 105. sqq.

etiam Episcopi de Soisson Instructio pastoralis contra Appellantes in Gallia , in folio , et aliud scriptum itidem contra Appellantes *Traité du Schisme* , 1718. ubi testimonia plurima exterorum Episcoporum ex Italia , Germania , Hispania et Portugalia &c. qui constitutionem acceptarunt , afferuntur. Quid interea Gallia paritura sit , dies docebit. Duo ego imprimis æstimo venerorque in hac rerum facie , alterum , quod per Testamentum hoc Quesnellianum multa millia exemplarium N. T. Galliæ illata sint et legantur , alterum , quod ab opere operato revocentur , et ad gratiam divinam æstimandam magis adducantur. Quæ duo si radices egerint , non possunt non bonos fructus ferre , quos Deus et dies manifestabunt. d. X. Apr. MDCCXIX.



D. JO. HENRICO BARTHIO.

Citius equidem , si per varia impedimenta licuisset , respondiſſem , ne ſcilicet par pari referre velle tibi viderer ; aſt , ut nundinales ſtrepitus ac turbas taceam , Catalogi meorum MSS. cujus pars prima jam ſub prælo ſudat , reviſio totum hætenus occupavit. Ab omni igitur vindictæ cupidine liberum non modo judicabis , ſed ob levem moram excuſatum etiam habebis. DADICHIUS abſoluto Mſtorum meorum Orientalium indice Gieſſam abiit, ex hac vero Academia Halam profeſtus eſt, ubi ab Orientalium Profeſſore MICHAËLE benivole exceptum audio. Amavi iſtum non ſolum ob linguarum peritiam , ſed ſingularem in philoſophicis ac re literaria , quam tam exiguo temporis , quo in noſtris oris verſatur , ſpatio adquiſivit, notitiam, Græcam vero ejus fidem ac genium probare nequeo. Apud me Græcum religione ſe dixit, ſcripſitque , apud Reformatos vero productis etiam testimoniis profeſſus eſt , ſe Genevæ ad ipſorum caſtra tranſiſſe , quod ut confirmaret , ac lauto potiretur viatico , ſacra cum ipſis cœna uſus eſt. Quam Halæ perſonam induerit , neſcio. Scriptum Barthianum
com-

complectitur meditationes sacras , Soliloquiis ab ipso editis tum pietate tum elegantia plane similes. Specimen data occasione transmittam ; quod si probaris , ac publico dare volueris , lubentissime concedam. De HOFMANNO ac FREGIO nil, quod te latere , vel juvare possit , mea subministrat bibliotheca ; erunt vero nonnulla , quæ ad illustrandam Academiae vestrae historiam facere poterunt , quæ e Catalogo , quem suo tempore transmittam , cognosces , ac facile postea impetrabis. Justum tuum est de Jansenistico in Gallia schismate judicium. Faxit modo Deus , ut bona , quæ ominaris , eveniant feliciter ! d. 3. Jun. A. MDCCXIX.



OBSER-

OBSERVATIO

de

CAROLO DADICHI (p) Antiocheno.

Virum hunc doctum , ac Arabicæ potissimum linguæ peritissimum ita nobis depictum dedit, qui familiariter cum eo versatus fuerat, Vir, dum viveret, Illustris Carolus Stephanus JORDANUS in historia itineris sui literarii, A. 1733. peracti, Gallice scripta p. 147. *Je vis au Caffé (à Londres) de Slaughter Mr. DADICHI: son visage marque qu' il n' est pas Européen. C' est un Philosophe sans Ambition, sans Orgueil, qui ne cherche point à paroître, qui a de l' Esprit infiniment. Il rend Justice à Mr. la CROZE, et le croit le plus sçavant Homme de l' Europe dans la Connoissance des Langues Orientales. Il regarde Mr. ASSEMAN, comme un Homme, qui n' est versé que dans la Connoissance de la Langue Syriaque, et qui d' ailleurs ne s' est pas appliqué aux autres Sciences, et comme un Homme trop superstitieux. Mr. DADICHI a remarqué, que les Orientaux Papistes sont ordinairement plus superstitieux que les Papistes mêmes. Ce savant*
Hom-

(p) In programmate funebri Lakemacheri, mox citando, nominatur Carolus Rali Dadichi.

Homme possède à fond la Langue Arabe. Il est surpris que Sanchoniaton ne fasse point mention du Déluge ; et , suivant cet habile Homme , c' est une haute Folie de vouloir l' accorder avec Moïse. Argentorati præter BARTHIUM fida ejus institutione in Arabicæ linguæ studio feliciter usus est philologus præclari nominis , JO. HENRICUS LEDERLINUS, de quo in ejus Memoria hæc prodidit D. Jo. Andreas GNILIUS. Dum A. 1717. per octo menses hospitio et mensa exceperat juvenem in variis , præprimis Arabica , linguis versatissimum, Dn. CAROLUM DADICHI, patria Antiochenum, religione Christianum, secta Græcum, haud erubuit hujus erudita institutione in addiscenda Arabum lingua uti, et ita feliciter usus est , ut non tantum sub juvenis auspiciis integrum Alcoranum in linguam Latinam transferret, simul omnibus vocabulis Arabicis cum eorundem versione Latina et Grammatica analysi excerptis ; sed et ipse postea Latinitate donaret MS. quem Bibliotheca nostra servat, Codicem Arabicum , quatuor religionis Es-lam fundamenta exponentem, cujus autor est AH-MADES , filius Mohammadis, filii Saidi Gaznaviensis. vid. A&A. historico-eccles. Vinariens. Vol. III. p. 96. sq. Anno 1718. Francofurti ad Mœnum commoratus, Orientalium Codicum MSSorum Bibliothecæ Vffenbachianæ Indicem struxit , qui impressus extat in Catalogi illius parte tertia, f. 695. sqq. A. 1719. eandem Bibliothecæ Senatoriæ Lipsiensi operam præstitit,

Pars II. Ec tit ,

tit, teste Jo. Christiano CLODIO, in Thesauri Epistolici La Croziani Tomo I. p. 80. Inde abiit in Academiam Halensem, ubi præter alios in linguæ Arabicæ studio discipulum habuit Jo. Gothofredum LACKEMACHERUM, qui cupiditate perficiendi, illo duce, quam institutione Salomonis Negri jam consequi cœperat, ejus linguæ notitiam stimulatus, Helmstadio Halam A. 1719. remeavit, ibidemque per sex circiter menses cum ipso familiariter vixit (q). Ante annum 1722. diversatus Basileæ, Jacobi ARTHEMII nomen, quibus de causis ignoro, assumsit, uti refert Jo. BUXTORFIUS in Dissertatiuncula de Alcorani editione Arabica variisque ejusdem versionibus, Bibliothecæ hist. philol. theol. Bremens. Classi VI. inserta, p. 277. Berolini eodem circiter tempore amicitiam sibi conciliavit viri in literis orientalibus summi, Mathurini Veissier LA CROZE, luculenter id testantibus DADICHII literis, Londino A. 1730. ad illum exaratis, ac obviis in JORDANI *Histoire de la Vie et des Ouvrages de Mr. LA CROZE*, p. 192. sqq. in quibus de itineribus ab se in Italiam, Hispaniam, Galliam, Belgium et

(q) vid. Programma ejus funebre, Tomo II. Actorum historico - ecclesiasticorum Vinariensium insertum, p. 100.

et Angliam susceptis exponit. Dignum memoratu est, hac præcipue causa illum in Hispaniam profectum esse, ut sollicite indagaret, num in Bibliotheca Scoriacen-
 si (de l' Escorial) Arabica Titi Livii integri versio (r) quod Abrahamus Echellensis venditavit, asservetur. Dabimus ipsa ejus verba lectu haud injucunda : *J' avois toujours souhaité de faire le Voyage d' Espagne, non seulement pour voir un Pays que le commun des Voyageurs ne se soucient guères de voir, mais encore pour savoir par moi-même, s' il étoit bien vrai qu' une Traduction Arabe d' un Tite-Live complet, se trouvoit dans la Bibliothèque de l' Escorial. Car c' est ce qu' assure Abraham Echellensis dans une Epître Dédicatoire au Chancelier Seguier, si je ne me trompe. Mais je puis vous assurer, qu' après une recherche exacte pendant huit jours, que je demeurai à l' Escorial, non-seulement je n' ay point trouvé cette prétendue Traduction, mais même pas une, de quelque autre Auteur Latin que ce soit ; quoiqu' il y ait un prodigieux nombre de Manuscrits Arabes, qui sont à tas et à piles, dans le Galetas de cette Bibliothèque, couverts de poussiere et d' araignées,*

Ee 2

(r) conf. quæ de Livio Arabico habet b. D. Jo. Alb. FABRICIUS in Bibliotheca Latina, Vol. I. p. 196. sq. ac Bernhardus MONETARIUS (*Mr. de la Monnoye*) in Epistola de libro de tribus Impostoribus, Tom. IV. Menagianorum. p. 297.

gnées, et abandonnés à la merci des vers, comme s'ils étoient des livres pleins de magie. Il est vrai qu'un Moine de ce Couvent m'assura que le feu s'étant mis à leur Bibliothèque, il y a cinquante ans, une plus grande quantité de Manuscrits Arabes que celle qui reste en fut consummée, et que la prétendue Traduction de Tite-Live fut enveloppée dans ce malheur. Mais je me persuade à présent, que tout ce qui regarde cette Traduction n'est qu'un conte fait à plaisir, parce que j'ai bien des raisons de croire, que les Arabes ne se sont jamais appliqués à la Langue Latine, comme ils ont fait à la Grecque, que par conséquent ils ne l'ont jamais entendue, bien loin d'en avoir traduit aucun Auteur. Je ne vous dis point quelles sont ces raisons, parce que cela me meneroit trop loin, et que je ne doute nullement, que vous ne les sachiez mieux que moi. C'est pourquoi je reprends mon voyage. Ita scilicet factum est, ut, cum olim Gaditanus quidam ad ipsum Livium visendum, ejus nomine gloriaque excitatus, teste Plinio, Romam ab ultimo terrarum orbe venerit, statimque, ut viderat, abierit, nunc homo Syrus ab oris longe remotis molesto itinere Gaditanum portum, atque hinc Cœnobium Scoriacense, Arabicæ saltem illius translationis lustrandæ causa, irritò successu, peteret. Tandem vero DADICHIUS, terris varie jactatus et alto, paratum rebus suis portum invenit in Anglia, alma illa Musarum receptrice, suffectus, favore Ducis Richemontii, Salomoni

NE-

NEGRI, Damasceno , regio linguarum orientalium interpreti, ac Londini anno 1734. morte absumtus. Obiter moneo de Salomone NEGRI, ejus in sparta illa decessore, varia notabilia haberi in Anton. Wilh. Böhmens *Erbaulichen Briefen*. p. 419. sqq. 428. sq. *Berlin. Freywilligen Heb-Opfern*. Tom. I. p. 147. sqq. et in Mich. Lilienthalii *Preussischen Zehenden*, Tom. I. p. 365. sqq.

XCIII.

PETRO FRIDERICO ARPE

Jcto Kiloniensi.

Cum meus in rem litterariam ac librariam amor Te, ut existimo, non equidem lateat, mirum tibi videri haud poterit, quod hisce te compellem. Ex scriptis enim tuis elegantissimis, quæ maxima cum voluptate legere atque relegere soleo, simile prorsus studium tuum abunde perspexi. Quare cum iisdem una mecum deliciis te oblectari animadvertam, experientia autem didicerim, in comparandis, ornandis, atque augendis cimeliis litterariis, nil magis proficuum esse, quam suavissimum cum viris doctis horumque studiosis commercium

cium , tuam quoque , Vir Celeb. amicitiam , quod jam dudum in animo fuit , ambiendam duxi. Hanc vero pro singulari humanitate tua non denegabis ; ego autem fidem tibi facio sinceram , me eandem ita culturum , ut contractæ mecum amicitiae nunquam poeniteat. Nullum erit officii genus , quo benivolentiam tuam conciliare atque servare non satagam. De quo ne dubites , en rariorum nonnullorum , tum manu , tum typis exscriptorum librorum meorum indicem , e quibus , quæ modo arrident , tibi feliges. Omnes cum cæteris universis , quæ libraria mea qualiscunque supellex suppeditare poterit , tuis usibus omnino patebunt , si modo tuorum , quod minime detrectabis , copiam vicissim concedere volueris. Nullus sane dubito , quin honestam hanc permutationem sis ratihabiturus , cum probe mecum agnoscas , liberali ejusmodi commercio reciproco facilius scripta rariora comparari posse , quam ære , etsi Cræsi divitias impendere atque profundere velimus. Libri sane rariores frustra in officinis quærantur , ac nonnisi forte fortuna in doctorum virorum , qui haud ignorant , quid distent æra lupinis , inprimis manus incidunt , et ab his copiae petendæ , quæ aliunde sperare non licet. Nunquam sane qualemcunque adparatum illum , quo gaudeo , adornare valuisssem , nisi hoc præprimis consilio ac
mutuo

mutuo amicorum adjumento fuisset usus. Neque tu aliter senties, parique una mecum horrore abominaberis Bibliotaphos illos, qui sibi solis sapere, ac quæ fortuna indignis ipsorum manibus offert, sibi vel blattis potius ac tineis in escam servare malunt, e cœtu eorum, qui humaniora studia tractant, plane eliminandi. Hac fiducia fretus, eo usque audaciæ progredior, ut te statim rogem, velis sequentium, quæ in jucundissimis Feriis tuis æstivalibus inter alia, quibus tua superbit Bibliotheca, animadverti, copiam concedere. Pagina nimirum 124. mentionem facis libelli istius famosi Godofr. VALLÆ, quem Artem nihil credendi seu *beatitudo des Chrétiens* inscripsit; pag. vero 127. duplicem STOSSII apologiam memoras. Hanc vero temeritatem meam vitio minime vertes, nec repulsam, confido, dabis. Ego vero, quæcunque ex meis jusseris, me tibi concessurum sancte spondeo. Cum vero me non fugiat, quam facilis talium scriptorum abusus sit, rogandus es, ne, quod me attinet, ullum ejus metum capias, quemadmodum nulla mihi in te sinistra erit unquam suspicio. Probe enim novi, heterodoxa talia in ornatum Bibliothecæ solum servanda, ac nonnisi prudentioribus, et a quibus nullus plane abusus metuendus, concedenda esse. Pluribus tibi molestus hac vice haud forem, nisi amici

cujusdam narratio aliquam adhuc quæstionem, pace, ut spero, tua, tibi proponendam suggereret. Is nimirum persuadere mihi voluit, latere in quadam Ducum Holsatiæ Bibliotheca integrum de Tribus Impostoribus opus famosissimum, e quo compendium desumptum sit illud de impostura religionum, quod Vir Cl. MAYERUS possedit, quodve Illustr. Princeps Sabaudiaë EUGENIUS magno satis pretio redemit. Hujus ipse quoque, ut in schedula notatum videbis, apographum teneo. Et si igitur, quod MAYERUS ac alij persuasum sibi habuerunt, ac aliis etiam inepte voluerunt, minime credam, opus hoc esse librum illum famosissimum de Tribus Impostoribus, sed Cl. Viri de la MONNOTE sententiæ subscribam, talem librum, qui scil. Friderici II. Imp. tempore conscriptus, ac statim post artis typographicae inventæ primordia typis etiam exscriptus sit, merum figmentum esse (s) adductis.

(s) Ego in eadem me cum b. VFFENBACHIO meo hæresi versari ingenue fateor. Quæ ab aliis de libro hoc famosissimo dicta sunt, diligenter collegit, et concinne digessit literatissimus Vir W. V. sub quibus literis Clar. Woldebrandum VOGTIUM, Rev. Pastorem Templi Ca-

Etis ab eo in dissertatione, quam Menagianis subjunxit, rationibus firmissimis, rem

E e 5

ta-

Cathedralis Bremensis, latitare arbitror, in singulari de hoc argumento dissertatione, cui eximium spicilegium adjecit Summe Venerabilis Ecclesiarum et Scholarum in Ducatibus Bremensi ac Verdensi Superintendens Generalis, D. Jo. Henricus PRATJE. vid. *Brem- und Verdisches freywilliges Heb-Opfer*, Tom. I. p. 869. sqq. et p. 911. sqq. Unicum mihi liceat addere testimonium Viri non incelebris, nostris autem iniquissimi, Wilhelmi Damasii LINDANI, Episcopi quondam Ruræmpondensis, cui, si credere fas foret, reapse aliquando librum hujus furfuris abominabilem sæculo XVI. typis fuisse exscriptum, dubitandum non esset. Ita autem ille in *Christomachia Calvinistica*, Coloniae A. 1584. in 8. edita, p. 161. sq. *Non desunt, hoc infelicissimo tempore, qui omnem superantes non modo impudentia, sed et blasphemia modum audent scribere contra tres impostores, Moysen, Mahumetum, et quem mihi religio est hoc loco præ blasphemia horrore (quia contremisco referens) nominare. Hac si non est Sathanica in Deum et Christum ejus blasphemia, nescio quid sit blasphemia, a qua Dominus Deus totum tandem repurget orbem. Impii scripti*

tamen faceres gratissimam, si me edocere velles, num de hoc opere, in Bibliotheca Holsatica existente, quidpiam cognoveris. Ut vero impudentiæ meæ, quod primis, quas ad te exaro, litteris tantum negotiū tibi faceßam, condones, etiam atque etiam rogo, die 29. Junii 1728.

XCIV.

scripti exemplaria ex Francfordia evocavi. Nihil autem aliud retuli responsi: nullum illic existere amplius, quod universa essent in Galliam aucta, ubi ejus lectione nobiles feruntur mirifice oblectari. Si Postellano illi auditorio, illi potissimum Veneto, non probantur, equidem satis demirari non possum: cum istius atheismi praeludia, et tam bellas ante annos fere novem in Veneto Arsenalī jecerit isagogas, ex professo Christomachas, et verissimo Luciano dignas. Ex quo venenato ovo jam pridem Geneva ab aliquot Italis philosophis posito (sicut videre est apud Bezam in vita mendacissima sui Calvinī) quid toti orbi expectandum, ni Deus averterit propitius, divinator non est piis difficile. Facile, hæc in Reformatorum odium vel a LINDANO, ipsis infensissimo, vel ab aliis efficta esse, videmus.

XCIV.

PETRUS FRIDERICUS ARPE.

Ex itinere Holsatico reduci, literæ Tuæ humanissimæ mihi redditæ sunt; quæ insignis amoris et benevolentia erga me maximæ testes, jucundissima animum impleverunt voluptate. Quis enim ignorat illustris nominis Tui decus, avitam nobilitatem, heroico animi cultu splendidiorum, virtutem singularem, summa in Rempublicam merita, et, ut paucis complectar, Te in sæculi nostri decus et literarum emolumentum factum natumque videri? Tanti ingenii dotes tacitus hætenus venerabar, dum occurris modeste hæsitanti, et, cui voto teneor, eo damnas, antequam profari necesse sit. Te igitur duce Hesperios subeo hortos, et thesauros, animis medicinam allaturos, inspicio, cujus lenitatis ne Te unquam poeniteat, curæ mihi erit. Lustrabam hætenus indices exquisitissimæ bibliothecæ Tuæ, quos publico usui consecrasti, indigne ferens, quum plerasque partes culturæ Europæ percurrerim, mihi non contigisse, operta adyta adire, unde haurire licuerit, quæ frustra in principum gazophylaciis nostra quærit diligentia. Mirabar opes, numerum, conditionem, cultum, conjiciebam,

Te

Te animo consilioque ad optima quæque esse paratum, cujus conjecturæ veritatem dum literis melle dulcioribus confirmas, et amica mente, conjunctius ut porro tecum agam, concedis, lubentissimo conditionem accipio animo, et partes meas quocunque officiorum genere ut impleam, si deerunt vires, non deerit animus. Quæ præterea de literarum et eruditorum factis prudentissime monuisti, sagacis mentis confirmo oracula; non omnes omnia posse, nisi communi ope et auxilio, studii literarii amplificandi docet experientia, dum sæpe in angulo latent, quæ curiosam sitim movere possint. Quo animo dum humiles meos attingis lares, et parvam supellectilem excutis, quam curiosa convasavit juvenus, singula ex voluntate Tua pendent, modo aliquid obveniat, quod studio Tuo non indignum videatur. Ferias meas æstivo tempore conscripsi ante biennium, quum me vitæ Academicæ satietas cepisset, et Musis et patriæ valedicens, consignavi opusculum, ut aliquid egisse videremur. Cujus laboris fructum jam percipio uberrimum, dum Tibi placuit, ut egregium est probari probato viro. Quæ exinde ut transmitterem, Vir Magnifice, postulasti, en adsunt, præcursores reliquorum, si verbulo indicare dignaberis, nec mora ulla fuisset, nisi epistola vestræ Dignitatis Kilonium esset delata,

ta, et sic ad manus meas demum pervenisset, cui civitas Hamburgensis liberale præbet hospitium, in quo Musis severioribus aliquot horas subtrahere soleo, quando plurimum temporis operosis impendere et molestis negotiis necessum est. Amici relatum, de Principis Holsatiæ bibliotheca, quæ librum *de tribus Impostoribus* contineat, dulce est somnium. Apud nos, invitatus fateor, frigent Musæ, et vix ullum mansuetioribus literis est pretium. Per tot lustra nos publica premit calamitas, et rerum vicissitudines, quæ bellum secum trahit, studia altius emergere haud sinunt. Librum illum nefandum unquam typis exscriptum fuisse, persuaderi mihi haud patior, et facile accedo Dno *de la MONNOTE*, quem, Vir Excellentissime, citas, quicquid alii ferant. Schedæ, in *MAYERI* librorum adparatu repertæ, testes haud sunt omni exceptione majores, de quibus vir fide dignissimus retulit, nuperum esse ingenii foetum, cujus autor adhuc inter nos in vivis degit, et specimen meditationum in *Hiobi* caput *XX.* sub nomine *R. Mare-scotti* edidit. Ipse *J. U. D. a MAYERO* de *tribus Tabernaculis* differente, epistola ad opponendum provocatus, præcipue de hoc libro., quem avum habuisse fama erat, virum tum in civitate præpotentem, naso adunco suspendit, et quicquid nugarum est, ingenio ad satyram proclivi compilavit. Nomen

men adderem, nisi, quod invitus ipsi nullam non invidiam movere possim, timerem. Argumento est, libellum duntaxat apud theologum istum fuisse inventum, ex cujus scriniis, quæ jam feruntur, examinis instar evolarint exempla. Concesserat PALTHENIO amico, is Christiano WORMIO, Episcopo Sialandiæ, cujus beneficio ad me pervenit, ut epistola operi præfixa testatur. Gallici MS. infausta Lucina editi mihi quoque exemplum est, et quæ sunt hujus farinæ bellaria, potius ad movendam sitim, quam magnum, quem præstant, usum apta, cæterum suis in repagulis servanda.

*Nec cibus iste juvat morsu fraudatus aceti ;
Nec grata est facies, cui Gelasius abest.*

Constitueram, indicem mittere næniarum minus forte obviarum, nisi temporis præcluderet angustia, vestraque me abuti patientia censerem, qui tam longa fastidiosaque epistola vos compellare ausim, gravioribus rebus occupatos. Copiam librorum rariorum in vestro thesauro mirarer, nisi ex omni parte ipsius emineret præstantia. *Non possumus*, inquit Seneca, *licet tentemus, educere aliquid ex tanta rerum aequalium multitudine.* Pauperis est numerare pecus. Quocunque miseris oculum, id tibi occurrit, quod eminere posset, nisi inter paria inveniretur. Si
de

de libris tanto candore indicatis , libere confabulari licet, nihil miror, me invenisse de J. C. VANINO, decantato philosopho, cujus, ut nosti, aliquando Apologiam scripsi. Ipsam secundis curis prælo reddere paro, modo advenerint acta Tholosana integra, quorum copiam viri præstantissimi ut mihi facerent, in se susceperunt. Quæ in curiæ cancellis notata de eo invenerunt, teneo; reliqua Dn. Massieu patronus causarum jussu regio primus in illa metropoli superstitionum ex latebris insigni studio eruit, et concessit. Sed adhuc mea messis in herba est, et, ut transmittantur, exspecto. *Cymbalum mundi* in vestro thesauro an idem sit, quod Gallica lingua P. MARCHAND edidit, scire vellem; nec non quid contineant BEVERLANDI Otia Oxoniensia. Em. SONNERI demonstratio contra pœnas æternas jam non infimi momenti est, dum M. Ludovicus GERHARDI tanta hic invidia argumentum illud movet; libri ipsius auctoritate publica sublata, ipsi indictum exilium, nimio, ut videtur, rigore. Quodsi commentarios more recepto ad rogam damnaissent, locum invenisset in Bibliotheca Vulcani, quam ex amicis in Gallia quidam magno studio molitur, in quem Dn. de la MONNOTE non ineleganter:

*Quam vereor famosa virum dum scripta recenset,
Quæ rapido absumpsit publicus igne rogas;*

Ne

*Ne tua Vulcano libros complexa dicatos
Exitio pereat bibliotheca pari.*

De hujusmodi commentario cogitabat olim Rev. Abbas de MOSHEIM, qui nuper de fatis Serveti dissertationem sub Alvoerdenii nomine edidit, politius limandam. Inter scripta sctadica pessimus liber nuper Lutetiæ prodiit sub titulo: *Histoire du Prince Apprius (Priapus) à Constantinople 1728. 12.* impurarum nequitiarum compendium virulentum, ad quod erubesceret Venus ignara pudoris. Clavem, ad historiam Pomponii ex Gallia transmissam, exhibere, si libet, potero. Ex Anglia nuper cohortem accepi Paradoxorum, quibus abundat felicissima insularum libertatis favore conspicua, inter quos TOLANDI Miscellanea nuper edita volum. 2. Jonathæ SWIFTS vol. 3. GEDDES vol. 3. Thom. BROUN. BAXTERI Glossarium, SPENCER de prodigiis, TOLANDI Amyntor, Pantheisticon &c. &c. BRUNI *Spaccio della bestia trionfante* nuper ex bibliotheca Cantabrigiensi Italica lingua accepi. POMPONATIUS de immortalitate animæ in operibus non comparet, nec FLUDDII apologia pro fratribus Rosæ crucis Lugd. Batav. 1617. 8. nec in omnibus codicibus Clavis philosophiæ et alchymix Fluddanæ Frf. 1633. in folio, nec crebro occurrit David JORIS Apologia ab ipso 1540. ad An-
nam

nam comitem Oldenburg. missa. AGRIP-
PA nuper Gallice prodiit. Sed quorsum?
vides, quam prolixo affectu, ut Tibi sa-
tisfaciam, curo, qui et limites modestiæ
transgredi non vereor, dummodo con-
stet, me ex Tua voluntate et ore pende-
re. Hamburgi, d. XIII. Jul. MDCCXXVIII.

XCV.

PETRO FRIDERICO ARPE.

Quanta voluptate curiosum plane volu-
men, quod tanta facilitate concessisti, a-
nimum meum perfuderit, verbis declarare
vix valeo, malo etiam re potius ipsa ac
factis gratam Tibique devotam mentem
comprobare, ac insignem, quo me com-
plecti cœpisti, favorem demereri. Optas-
sem igitur, ut ex transmissio librorum
meorum indice indicasses, quorum copi-
am habere aveas, quod ut proxime fa-
cias, ac quibus alias egregia studia Tua
juvare possim, significes, etiam atque e-
tiam rogo. Interim sedulo curabo, ut vo-
lumen, quod meæ fidei credidisti, sartum
tectum, quam primum fieri poterit, ad Te
redeat. Quod fabulam de libro de tribus
Impostoribus ab amico mihi, de ejus veri-
tate

tate statim dubitanti, narratam refutare, ac alia nonnulla notabilia addere volueris, gratias ago, majores vero habiturus, si Mayeriani MSti auctorem, sub silentii fide, nominare volueris. Dn. BALTHASAR Prof. Gryphiswaldensis certio rem me reddiderat, Professore m quendam Rostochiensẽ exemplum scripti illius auctoris possidere. Rogabam, ut supplementum istud procuraret; negabat autem se illud obtinere posse, imo ne nomen quidem possessoris indicare volebat, quod ex metu invidiæ factum esse, existimo. Quum vero ex iis, quæ memoras, PALTHENIUM illum esse, e cujus exemplo copia quoque Tua provenit, conjiciam, rem gratissimam facies, si quæ erunt in MSto Tuo augmenta, mihi describenda curares. Quod ut præstare possis, initium ac finem MSti mei subnectam. Aliud adhuc est, quod abs Te contendam, ut scilicet non modo specimen illud meditationum in Jobum sub MARESCOTI (t) nomine vulgatum, sed et GER-

-
- (t) Sub MARESCOTI nomine latitare Jo. Joach. MULLERUM, Jctum Hamburgensem, ex Ad. Henr. LACKMANNI Miscellaneis literariis p. 22. didici. Nomen illud per anagramma derivatum est a loco *Otmarsche*, ubi hortus Mulleri situs erat.

GERHARDI de pœnis æternis scriptum comparare velis. Sumtus non modo lubens restituam, sed beneficium hoc quovis officiorum genere compensare studebo. J. C. VANINI opuscula in nupero indiculo per oblivionem cum aliis, quæ memoria festinanti non suggestit, omiseram. Non modo enim Amphitheatrum, sed rariores etiam ipsius Dialogi in mea bibliotheca habentur. Lubens autem intellexi, Te novam et multo auctiorem elegantissimæ apologiæ Tuæ editionem meditari, quam maximo cum desiderio expectabo, ac, ut eandem quantocyus in lucem proferre valeas, ex animo voveo. Interest sane Reipublicæ Literariæ quam maxime, ut tristia similium virorum fata dilucidius explicentur, eorumque nomina a maculis ac figmentis, quibus nimio sæpe pro religione fervore obfuscantur, liberentur. Egregia plane dexteritate jamjam demonstraſti (u), miserum VANINUM

Ff 2

tenta-

erat. conf. Cl. Jo. Christoph. MYLII Bibliothecam Pseudonymorum, p. 112.

(u) B. BUDDEUS, idoneus harum rerum judex, in Thesibus de Atheismo et Superstitione p. 122. ARPIUM tam erudite, tamque ingeniose hac in re versatum esse censet, ut pessima etiam causa nunquam

tantarum impietatum, quarum multi illum postulare solent, minime reum esse, ac majori, quam par erat, immanitate in eundem sævitum fuisse; id quod altera, quam præ doctis manibus habes, Apologiæ Tuæ editione ex ipsis cum martyre hoc, ut ita dicam, philosophico actis, clarius atque firmitus procul dubio evinces. Felix sane post fata æstumandus est VANINUS Tuus, quod tam bonum atque eximium prorsus defensorem nactus fuerit. Plures sunt, quibus eadem felicitas merito optanda. Quod ut evenire possit, eo major spes affulget, quod Historia Ecclesiastica atque literaria hoc nostro sæculo majori studio atque candore excolatur, quam superioribus temporibus, quibus aurea sentiendi libertas, qua nunc fruimur, nondum viguit; sed lividus in omnes dissentientes et a tritis ac receptis opinionibus vel tantillum abeuntes furor ac hæretificandi (liceat barbaro hoc vocabulo immanem illam barbariem describere) studium obtinebat: Nunc vero cum singulari Dei beneficio studia solidius hoc nostro ævo excolantur, majorique cum libertate tractentur, ac liberissime in veritatem inquirere liceat, recte mea quidem sententia

quam meliorem habuisse defensorem jure dici queat,

tentia faciunt, qui scripta rariora ac alia omnia, quæ ad innocentiam atro nimis carbone notatorum hominum demonstrandam, vel certe ad aliquam eorundem exculpationem facere possunt, cum cura colligunt. Id mearum quoque partium esse semper duxi. Spem fecerat V. C. JÆNICHIUS, Gymnasii Thoruniensis Rector, se Acta cum famoso illo Polono, Casimiro LINCYNISKIO, seu, ut alii nomen scribunt, Liszynskio procuraturum. Ast, quod maximè doleo, tristissimæ illæ Thorunii actæ tragœdiæ spem istam adeo sufflaminarunt, ut nullum plane ab isto tempore responsum a viro alias humanissimo receperim.

Cymbalum illud meum MStum, de quo quæris, a Gallico, quod P. MARCHAND vulgavit, plane differt, estque argumenti magis impii, receptaque religionis dogmata serio impugnat, quum Gallicus ille libellus non nisi scommatibus absolvatur. Dolendum autem, mancum illud in fine esse MStum. Hadriani BEVERLANDI Otia Philologica, Critica, et ad antiquitates spectantia complectuntur, variis tamen in locis salax auctor ingenium suum prodit. Certiorem me nuper fecit nobilis quidam Saxonius, se plurima BEVERLANDI anecdota adepturum, quorum indicem dedit, simulque eorundem copi-

am pollicitus est. Si videre aves , illum ipsum transmittam , et quam primum aliquid horum MStorum recepero , pleniorrem eorundem notitiam dabo. Haud ita pridem Basilea a Cel. ISELIO accepi elenchum librorum manu exaratorum POSTELLI, quorum multi in Bibliotheca Basileenſi extant , quem itidem, si desideres, lubens tecum communicabo. De libris rarioribus , quos ex Anglia nactus es , Tibi gratulor , utque fortuna illa , quam ego librariam salutare soleo , porro Tibi fa-veat , ex animo opto. Clavem ad Pomponii historiam , quem benivole offers, et, si quidem pace Tua id fieri poterit , Jordani BRUNI librum , quem SPACCIO inscripsit , lingua Italica , quem ego non nisi Anglica , qua ipsum TOLANDUS donasse dicitur , possideo , suo tempore expectam , remisso scilicet , quod jam Tua benignitate teneo , volumine. Indecorum enim esset , Te pluribus cimeliis una vice orbare. Ni grave foret, Te , vir Humanissime , rogarem , ut saltem per diligentem ac fidum amanuensem illorum copiam fieri juberet. Ut enim mentem meam ingenue Tibi explicem , periculosa ac omnino noxia res mihi videtur librorum rariorum transmissio , quum libri per eam facile detrimentum capere , vel etiam perire possint. Sumtus scriptori erogandos vel lubens restitutus , vel meorum , quæ juf-feris,

feris, apographis compensaturus essem.
Utcunque tamen Tibi videbitur, statues
agesve. d. 2. Aug. A. MDCCXXVIII.

DUPLEX ELENCHUS

librorum MStorum Guil. POSTELLI,
qui partim olim Basileæ asservati fuerunt,
partim hodiernum in inclytæ illius Aca-
demiæ Bibliotheca extant.

Habemus equidem jam aliquot copio-
sos famosissimi ac portentosi Viri Guil.
POSTELLI librorum Indices, in Bibliothe-
ca scilicet Gesnero-Simleriana, Tiguri A.
1574. edita, f. 261. sqq. in Observationum
Halenſium Tomo IV. p. 262. sqq. ac in va-
riis b. Thomæ ITTIGII Opusculis, quæ cu-
ra L. Christiani LUDOVICI Lipsiæ A.
1714. in 8. junctim prodierunt, p. 251.
sqq. et 262. sqq. Non tamen injucundum
fore lectoribus meis arbitror, duplicem,
quem heic exhibemus, eorum lustrare
syllabum, a Cel. ISELIO, Academiæ quon-
dam Basileensis lumine, cum b. VFFEN-
BACHIO meo amice communicatum. Sub-
inde enim differunt hi Indices a reliquis,
et quædam continent, in illis prætermis-
sa. Nec ingratum insuper bibliophilis e-
rit, nosse, ubinam vel extent, vel for-

tassis adhuc indagari queant libri hi, quorum aliqui vero jam sunt typis exscripti. En ergo tibi primum Indicem, cui hunc titulum præfixit ISELIUS, Vir, dum viveret, summus.

Index librorum POSTELLI
extantium in Bibliotheca Academica Ba-
sileensi, ipsius manu, ut videtur,
exaratorum.

Oporino suo C. P. R.

1.
Zoar super Geneseos librum, a Postello inchoatum per folia 60. Sequuntur brevia Excerpta ex Postelli Glossis, auctore Conr. Pellicano, unius pag.

2.
Ex Guil. Postelli Glossis per Conradum Pellicanum excerptæ ex Zoar super Geneseos librum per folia 60. M S. 4. Incipit ab initio Geneseos, usque ad Capitis tertii versum primum inclusive: Et serpens erat astutior omnibus animalibus terræ.

3.
Gulielmo Postello Apostolica professione Viro interprete, Chavæ seu Evæ Matris omnium viventium admirabiles, et super omnes doctrinas mundi, secundum Evangelicam veteris et novi Testam. veritatem amplectendæ Prophetiæ, olim in Adami cerebro conscriptæ a Raziele, Adami primi parentis Angelo, et nunc primum
in

in lucem ex linguæ Sanctæ penetralibus apud Latinos editæ, ex libro Behir, id est, lucis purissimæ. Præfixa est apologia ad Christi veros alumnos, ut ratio tanti exponatur mysterii, quoque modo hac revelatione duce clarissime perinde de futuris singuli cognoscent, sicut de præteritis, duce Historia, hætenus cognoscimus.

4.

BEHIR, id est, lucis purissimæ libri, inter Secretioris doctrinæ auditorum Moſis interpretes summa auctoritate constantis interpretatio, qua duce ad universa, etiam reconditissima scripturæ mysteria summa facilitate pervenire liceat.

5.

Divinæ dispositionis explicatio ex libro Barasschim, id est Elementorum et radicum ad ponendam confirmandamque primam Divinorum sensuum veritatem.

6.

Ex libro, cui titulus est Asochilecha, hoc est, instituum te, et est ex Maarecheth Elo-huth, Commentarius in Decem Sefiroth.

7.

Gulielmi Postelli, hujus cognitionis instauratoris, Paradisi terrestriſ loci cosmographicæ Scientiæ beneficio inventus, et nunc primum orbi patefactus, cum iis, quæ ex ejus situ dependent, plane revera admirandis.

8.

Gulielmi Postelli Midraſs, ſive interpretatio Secretior Samuelis , ſive libri 1. Regum : ubi perfectiſſimo et finali ſenſu tractatur ex innumeris propoſitionibus, quæ tam in lege ſcripta, quam in interpretatoria ſunt aliquo modo delibata, de ſecundo Chriſti in Matrem mundi et in ejus primogenitum adventu, ut ponatur hic in caput anguli.

9.

Guil. Postelli *le Catechisme et introduction de la verité Chreſtienne par raiſon naturelle de la grace de Jeſu Chriſt illuminée tellement demonſtrée, qu'elle deſtruiſe toute faulſeté et contraigne tout le genre humain de l'embracer.*

Item. Interrogata Præceptoris propoſita Diſcipulo, ad erudiendos pueros et ignorantes in Doctrina Chriſtiana et Via Domini Dei. Florentiæ, juxta Archiepiſcopale 1568.

10.

Guil. Postelli reſtitutionis omnium primogeniti, a J. Calvino hac in cauſa maligne perſtricti, auctoris apologia pro Serueto Villanovano, de anima Mundi, ſive de ea natura, quæ omnino neceſſaria eſt, et habenda eſt media inter æternam immobilemque, et creatam mobilemque, eſtque conſubſtantialiter in ipſo Chriſto, ſicuti eſt, etiam habenda, contra aſpergines, et præcipitatum Calvini in hanc cauſam

sam judicium. Sive ut Titulus sit clarior: De Dei et naturæ , vel de animi et animæ mundi, seu de divinæ naturæ et inseparabilium ab ea virtutum ejus summo conatu et effectu.

Alteri syllabo hanc præmisit Vir laudatus epigraphen.

Libri infra notati hoc tempore non sunt ad manum : sed quum auctor Indicis ante hosce annos centum Professor Basileensis fuerit , spes est , aliquos ex iis , vel plerosque adhuc Basileæ reperiri posse.

A. *Guilielmi Postelli* Barentonii, Dolekiensis, seu Dolegenſis , confirmatio Doctrinæ Evangelicæ , et Rationale Coactoriumque, sive novissimum Testamentum ipsius Jesu. In quo Doctrinæ Evangelicæ , atque totius Nôvi Testamenti origo patet , et futuræ nunc in genere humano felicitatis clarissima ponitur descriptio , et ex Commentariis R. Racanati confirmatio. Explicantur in hoc manuscripto sex priora capita Geneseos ab initio , usque ad sexti capitis versum octavum inclusive, Noah autem invenit gratiam in oculis Domini. 4to incompect.

B. *Guilielmo Postello* , restitutionis omnium Antesignano , interprete , auctoreque commentationes secretiores in Genesin (notandum haberi hic tantum in

in tria illius priora capita, tertiiq[ue] capit[is] versum 21. inclusive) et fecit Deus Adam uxoriq[ue] ejus tunicas seu vestes, expellibus (parascias 20. reliqua deficiunt) et in omnia difficiliora Sacrae Scripturae loca commentarii, ex libro, qui Hebraeis Beressith rabba, hoc est, major in Genesin interpretatio dicitur, conversi, collecti et extracti, familiariq[ue] Interpretis paraphrasi suis parenthesibus sub Hebraeorum textu distincta, exornati et declarati. Manuscripti 4to. illigati.

E. *Guilielmus Postellus*, apostolica professione Sacerdos, ex 72. Seniorum Moysi Spiritu donatorum doctrina, a Sancto Simeone Justo primum publice exposita collegit de aeterno Christi in inferioribus Regno, et Sacro ejusdem Christi primatu, jam ab Adamo per Noachum, Abrahamum, Moysen, et Christum ad nos usque deducto. Ex Zoharis seu illustrationis scripturarum sententia tam clara, ut Evangelii instar sit.

F. *Guilielmi Postelli*, admirabilis Judaeorum clausorum, seu decem Tribuum Israel, sub Turcarum et Ismaelitarum potentia reductarum, historia atque adeo ipsa Israelitarum origo. MS. 4. illigatus.

G. *Guilielmi Postelli* commentarius in librum Ruth, in quo totius naturae et gratiae historia et eventus ita exponitur, ut
quis

quis fuerit futurusve sit omnium nationum exitus, tam in Religioso quam in civili negotio clarissime cernatur, quæ omnia quum ab uno solo dependeant Christo, omnia suæ voluntatis nutu disponente, inque suam sensim habitationem suorum membrorum varia agitatione contendente, ideo generali nomine inscribitur: De ultimo Christi adventu et ultima nativitate. MS. 4to compact.

H. *Guilielmi Postelli*, Pandochæi regenerati, commentarius in Apocalypsin, pro venturi seculi statu Restitutis in integrum præparato. MS. crassior liber 4to.

I. *Guilielmi Postelli* in primogeniti mundi inferioris locum restituti resolutionum divinarum expositio, sive demonstrativa ex sacris veris ratione suppositis prophetia, qua quid sit in Ecclesia Dei usque ad mundi finem futurum exponitur. MS. incompactus libellus.

K. *Guilielmi Postelli* libellus, de locali statu aut positione corporis Christi in Sacramento, et quod localiter adorari et recipi debeat. MS.

L. *An Guilielmi Postelli* (tractatulus manu ejus scriptus quidem est, sed suum nomen non adscripsit) de rebus Summopere admirandis, quæ annis proximè elapsis contigerunt in diversis orbis partibus, commentatiunculæ seu adnotationes,

ones, ut de illarum causis cogitetur, conscriptæ. MS. 4to.

M. *Iacobi Fratris* Jesu Christi Evangelium, de admirabili nativitate et incunabulis virginis matris Mariæ; et ipsius Jesu, e Græco vetustissimo codice Constantinopoli translatus in latinum sermonem MS. Græco-Latinum a Guilielmo Postello, 4to. incompact.

N. *Guilielmi Postelli* electus libellus in 8. minori manuscriptus charta incompactus, de signis Judicii, et maxime de cadavere admirabili, ad quod aquilæ congregantur, ubi Judicii Dei Signum est positum, et de cæteris temporis Judicii primi causis.

O. *Guilielmi Postelli* interpretis et assertoris liber, de Summopere considerandis, et non minus admirandis mysteriis et veritatibus, quæ ex propriâ ipsius Christi, hoc est maternæ linguæ, quæ Syriaca est, verbis in Evangelio Syriaco conservatis eliciuntur, et ante omnia de cœnæ Domini verbis, et sensu vero. Hunc librum toti Ecclesiæ Christianæ de illo judicaturæ tanquam suæ fidei de cœna Domini obsidem offert. MS. folio, incompact.

P. *Guilielmi Postelli*, de universitate, sive de cosmographico auditu, disputationes, tam circa temporis cœlive, quam circa generalis loci orbisque habitabilis, ratio-

rationes, quinque libris expositæ, et in perfectissimæ Reipub. Suppetias, duce Ratione conductæ. MS. 4to.

Q. *Guilielmus Postellus* de primario Universitatis Jure a Germanica gente, potentiave illi divinitus concessa, una cum suis fratribus asserendo et restituendo; id est, de Romanorum Janigenarumve Regno revera, et non tantum nomine nudo suo legitimo principi vindicando et tradendo. 4to. et quædam in folio.

R. *Guilielmi Postelli* Spolium Ægyptiacum veris Israelitis addictum, Sive qua ratione Deus voluerit Ethnicos, aut adversantes sacris quoscunque Scriptores (nempe Ciceronem, Varronem, Solinum, Vergilium, Plutarchum, Platonem, Aristotelem, Dionysium Halicarnasseum, Talmud, Zohar, cur tam diu penes Judæos delituerit, cur tam diu viguerit Muhamedis in Alcorano deliramentum, cur Plinium in hanc diem servavit Deus, item Strabonem Cosmographum, Ptolomæi quadripartitum opus, Macrobius, Thargum Jonathan) ad hanc diem in sua Ecclesia superesse, et quanta utilitas Reipub. Christianæ inde oboriatur. Sola ex inimicis utilitatem capere novit Ecclesia vera: falsæ omnes impugnationem, nedum conflictum, timent.
MS. 4to.

S. *Guilielmi Postelli* restituti tabulæ ipsius Scri-

Scriptoris , in ordinationis æternæ tabulam liber explicatorius , quo duce humana ratione, et auctoritate sacra demonstrabitur clarissime , quænam rerum constitutio sit in toto terrarum orbe ad finem usque mundi futura , et quisnam sit futurus tam calamitosi , uti nunc videtur, temporis exitus. In hoc MScripto libro perpulchro , quaternarii numeri vis et intellectus tam in rebus sacris , quam naturalibus , luculentissime demonstratur et docetur. 4to.

T. *Guilielmus Postellus* Apostolica professione Sacerdos, et Restitutus emisit , pacisque universi causa scripsit. De admirandis numerorum Platoniorum Secretis, et divina virtute intelligentiæ in illis absconditæ , qua duce adultus, et Mosaica Christianave disciplina imbutus , uno aut altero anno facilius, in Encyclopædiæ, seu universi disciplinarum orbis cognitionem devenias, quam totis viginti annis, usitato ad hanc diem Scholarum cursu , indefessis pervenias sudoribus. Ex priscorum Platonis et Pythagoræ præceptorum, hoc est : ex Moseos alumnorum scriptis, unde illi desumpserunt. MS. 4to. Compactus.

V. *Guilielmi Postelli* Retractationum liber, in sua de restitutione omnium scripta institutus. MS. A. 1560. ubi de Davidis Georgii Batavi Hæresiarchæ erroribus , et exustione post mortem agitur , et de
Virgine

Virgine quadam Moniali Veneta, quam per errorem Postellus alteram quasi Mariam diu esse reputavit, utpote in quam Maria Deipara transfusa fuerit tota.

X. *Guilielmi Postelli* restituti, resolutæ et summæ veritatis excitationes naturales, in quibus corporis separabilis, hoc est, immortalis natura intra mortalem et sensibilem inclusa, ex Peripateticorum placitis clarissime ESSE, et debere cognosci HABEREque demonstratur. Appendix est pro declaratione ampliori ejus loci, quem ex secundo de generatione animalium libro declarandum suscepit, et anno salutis 1553. in lucem emisit. MS. 4to.

Ejusdem demonstratio, quod præcipua, et potissimum fundamentaria, ejus doctrinæ, quæ nomine Aristotelis circumfertur, placita, sint contra sensum et rationem, tam in mente, quam humanis et divinis literis expressam, sola auctoritate maxima mundi ingenia obcæcante introducta, summique mali, id est, perturbatæ hæctenus in universo pacis causa. MS. 4to.

Ejusdem Aristotelica de separabili, sive immortali corpore humano, sententiæ expositio, et clarissima veritatis in ea contentæ demonstratio: qua patet, dari necessario corpus humanum personale et ex omnibus hominibus superstes indivi-

Pars II.

G g

dum,

duum, et una cum sua forma victurum in æternum.

Hi tres libelli de variis erroribus Aristotelis agentes propter communem materiam in unam juncti sunt compacturam.

Y. *Guilielmus Postellus* de Tonitru summo, sive de summa divinæ potentiae demonstratione, ex auctoritate, ratione, et sensu deducta. Quorsum vergat Victoriæ a Venetorum dominio, de Turcarum classe reportatæ facinus A. Domini 1571. ad B. Andreæ reliquias, et bustum Patrasium, aut Navipactium sinum. MS. 4to illig.

Z. *Guilielmi Postelli*, ad Sacrosanctam et unicam destinatione æterna, Christi sponsam mysticam, ut suæ unitatis perfectissimam originem ubivis gentium cognoscat et colat in Spiritu et virtute, sive in mente Eliæ, cohortatio. MS. 4to. incompact.

Aa. *Guil. Postelli* causæ, propter quas legati Pontificis Romani Pauli IV. in hoc instructi, et Senatus Veneti decreto, idem Postellus amens judicatus est, et ad universum concilium provocare coactus. MS. 4.

Bb. *Guili. Postelli* disunctio, qua clarissime ostenditur, æternum seu Novissimum Testamentum ex suis Rationibus probatum. MS. 4to incompact.

Cc. *Guil. Postelli* de Correctione, emendatione, aut restitutione potius Calendarii, opusculum, quo sine ulla perturbatione,
et

et cum summa facilitate effectum completumque id redditur, quod jam a sexcentis annis et supra Ecclesia quæsit ut debuit, et nunquam potuit efficere. MS. 4to. illig.

Dd. *Guil. Postelli* resolutio et decisio ratione demonstrativa terminata de substantia intellectus, et maxime quid sit Intellectus factus. Postremo autem quid sit corpus separabile, immortale, et his elementis divinius, quod Aristoteles dixit omni animæ adesse, et a corpore feminis esse separabile. MS. 4to. incompact.

Ee. *Hippolyti Thebani*, ex Chronici ipsius Conscriptione, genealogia sanctissimæ Deiparæ Mariæ. MS. 4to. (incompactæ tres paginæ manu Postelli) incompactus.

Ff. *Petro Anusio* Veneto, ex Syriaca Christi lingua interpretē, sermo de Romanæ Cabalæ admirandis, et toti generi humano in universo orbe considerandis mysteriis. Ut summa fugiatur falsitas, et prima cognoscatur veritas, manu Guil. Postelli. MS. 4to. incompact.

Gg. *Petro Anusio* Veneto autore et observatore, de mundi mirabilibus, universitatisque consideratione, et expositione ad suas mensuras naturales redacta. 1566. Manu Postelli script. 4to. incompact.

Hh. *Guil. Postelli* de inhærente justificatione, resolutio æterna. MS. 8. incompact.

- li. *Epiphanii Archiepiscopi Cypri*, in Dominicam sepulturam, sermo, Lelio Typhernate e Græca in Latinam linguam interprete. Sub finem desunt quædam, MS. 4to. incompact.

XCVI.

PETRUS FRIDERICUS ARPE.

Commentarium MARESCOTTI in Hiobum frustra adhuc quæro, interea dum Hermannus VON DER HARDT, monstrum eruditionis, in illo libro protrudit,

*Quod non sani esse hominis, non sanus juret
Orestes.*

Adeo ipsum dissentiendi libido tenet, et inventa ipsius de diluviis S. Scripturæ, de Scytarum incursionibus vix interpretabitur RUDBECKII devotus affecla. Quum ante aliquot hebdomadas in Gazophylacio literario Guelferbyti Cl. Hertelium convenirem, et illustriss. Baro de Stain adestet, inceserat me fere cupido conveniendi hominem, ante viginti annos familiariter notum, sed temporis spatium

tium deerat, et graviora negotia revocarunt domum. Quo quum venissem, Hiobi in modum tristis supervenit nuntius, unus et idem alter partim de obitu Petri Nicolai SIBBERII, viri in rebus septentrionis versatissimi, partim de incendio tragico et incredibili Hafniensi, quo literarum thesauri interierunt nunquam recuperandi. In altero defleo amicum, cujus bibliotheca Codd. MStis locupletissima, jam suum experietur fatum; quod Th. Fritschii, quod Polycarpi Lyseri libris Lipsiæ et Helmstedii instat, de quibus sine dubio Catalogum accepisti. Ad alterius rogam, jucundissimam recordationem Resenianæ, Brochmanni, Mulenii, Fuienii aliarumque bibliothecarum repeto, quæ ut olim mihi in deliciis erant, jam nemini amplius ullo erunt usui. Præcipue doleo Illustr. Christiani WORMII, Episcopi Sialandiæ, vices, qui flammarum furore ædes, opes, bibliothecam et ipsum carissimum amisit filium.

Sic certam præsens vix habet hora fidem.

Non dissimili fato ante aliquot annos operum egregiorum interitum deplorabat M. R. TRELLUND, episcopus Wiburgensis, ne BARTHOLINI catalogo un-

quam desit supplementum his in oris ,
 ubi plerumque Musæ frigent. Illustris
 Comit̃is DE DANNENSCIOLD librorum
 thesaurus ad alios transibit lares , simul ac
 Hafniæ ex tanta calamitate animum re-
 ceperint. Quæ hic agantur , WOLFIUS
 non dubito significabit , qui vir optimus ,
 quantus quantus ad literas incumbit , et
 fere cum detrimento sanitatis. Non alia
 est ratio FABRICII nostri , cujus inde-
 fessum studium reliquis exemplo esse po-
 terit. *Den Hamburgischen Auszug von gelahr-
 ten Sachen* sine dubio vidisti. Icones ma-
 gistratus suspenduntur eis , ut vino ven-
 dibili suspensa opus est hedera. Auctor
 ipse quidam studiosus HAMAN , qui e-
 tiam nomine Matronæ plagulas quasdam
 in imitationem Patriotæ (sit venia verbo)
 sic dicti hactenus , sed non pari successu
 communicavit.

Quæ præterea scribam , vix habeo ;
 horis , quas severioribus Musis eripio , li-
 bros ex Anglia allatos evolvere , BAXTE-
 RI Glossarium , SPENCERUM de Pro-
 digiis , Thomæ BROUN opuscula ,
 SCHAFFTSBURII characteres , et COL-
 LINS , WHISTHONI , TOLANDI fa-
 mosos commentarios , ea , qua decet ,
 prudentia. Sub Jacobi Masse nomine la-
 titare Simonem TISSOT , Professore
 Ma-

Mathes. Deventriensem , te non fugiet.
 Libri illius impudentissimi , nec non epi-
 stolarum ipsius copia est. Sed quorsum?
 est modus in rebus , et sic in epistolis.
 Hamburgi, d. VII. Decemb. MDCCXXVIII.

MEMMINGÆ , typis Jo. Valentini
 Mayeri.

MAG 2006576







